

মধ্যযুগের কবি ও কাব্য

প্রথম খণ্ড

বৈষ্ণব কবি ও কাব্য

অধ্যাপক শ্রীশঙ্করীপ্রসাদ বসু



জেনারেল প্রিন্টার্স য্যাং পারিশার্স লিমিটেড
১১৯ ধর্মতলা ষ্ট্রীট, কলিকাতা

প্রকাশক : শ্রীসুরেশচন্দ্র দাস, এম-এ
জেনারেল প্রিন্টার্স ব্যান্ড পারিশার্স লিঃ
১১৯, ধর্মতলা স্ট্রীট, কলিকাতা

— ১০১ —

১১ ১ ১

১লা বৈশাখ, ১৩৬২

মূল্য ছয় টাকা



ভাণসী প্রেস, ৩০, কর্ণওয়ালিস্ স্ট্রীট, কলিকাতা, হইতে
শ্রীমুখ্যনারায়ণ ভট্টাচার্য্য কর্তৃক মুদ্রিত ।

৩ পিতৃদেবের পুণ্য স্মৃতির
উদ্দেশে

ভূমিকা

‘মধ্যযুগের কবি ও কাব্য’ গ্রন্থের প্রথম খণ্ড বৈষ্ণব কবি ও কাব্য প্রকাশিত হইল। দ্বিতীয় খণ্ডে মধ্যযুগের অপরাপর শ্রেষ্ঠ বাঙালী কবি ও তাঁহাদের কাব্যের আলোচনা থাকিবে।

আমার উদ্দেশ্য কাব্য-সমালোচনা—সাহিত্যের ইতিহাস রচনা নয়। সে-कारणे সাহিত্যের ইতিহাসে প্রাধান্য পাইয়াছেন এমন অনেক কবি আমার আলোচনার বাহিরে আছেন। তথাপি আলোচনাযোগ্য দু’একজন কবি হয়ত বাদ পড়িয়াছেন। ব্যক্তিগত রসবুদ্ধি সে জ্ঞাত দায়ী। কিন্তু কোন রসবুদ্ধিই যাহাকে অস্বীকার করিতে পারে না, সেই শ্রেষ্ঠ কবি পদাবলীর চণ্ডীদাসের নামে পৃথক প্রবন্ধ না থাকা বিস্ময়কর। তাহার কারণ আছে। চণ্ডীদাস কেবল একজন বিশিষ্ট কবি নহেন, তিনি একই সঙ্গে যেন সমগ্র বৈষ্ণব পদাবলীর ভাবমণ্ডল। তাঁহার কথা সর্বত্র এত বেশী বলিতে হইয়াছে যে, পৃথক প্রবন্ধ লিখিবার প্রয়োজন অনুভব করি নাই। এসব সঙ্গেও কাজটা সম্পন্ন হইয়াছে কি না সে বিষয়ে পাঠকদের সঙ্গে লেখকেরও সংশয় রহিয়া গেল।

কোন কোন ক্ষেত্রে শ্রদ্ধাভাজন ব্যক্তিদের—আমার অধ্যাপকদেরও—মতের প্রতিবাদ করিতে হইয়াছে। নির্বিচার মতানুগত্যকে আমি ভক্তির নিদর্শন মনে করি না।

বর্তমান গ্রন্থরচনা প্রসঙ্গে সর্বপ্রথম স্মরণীয় আমার পিতৃপ্রতিম পূজাপাদ অধ্যাপক শ্রীজনার্দন চক্রবর্তী। মধ্যযুগের কাব্যসাহিত্য সম্বন্ধে সর্বশ্রেষ্ঠ সম্পদ ‘শ্রদ্ধা’ তাঁহারই নিকট লাভ করিয়াছি। ঋণগ্রহণের ছাত্রকৃত্যে আমার চেষ্টার অভাব ঘটে নাই, এবং ঋণশোধের অসাধ্য প্রয়াস বুদ্ধিমানের মত ত্যাগ করিয়াছি। অন্যান্য বহুজনের নিকটও নানাভাবে উপকৃত হইয়াছি; তাঁহাদের মধ্যে বিশেষভাবে উল্লেখযোগ্য—অধ্যাপক শ্রীবিম্বপতি চৌধুরী, সাহিত্যিক শ্রীঅমলেন্দু দাশগুপ্ত, অধ্যাপক শ্রীবিভূতি চৌধুরী,

অধ্যাপক শ্রীক্ষুদিরাম দাশ, অধ্যাপক শ্রীঅসিতকুমার বন্দ্যোপাধ্যায়, অধ্যাপক শ্রীমুনীলবিহারী ঘোষ ও শ্রীরমেন্দ্রনাথ মিত্র। শ্রীমুরেশচন্দ্র দাসের অকুণ্ঠ উৎসাহে এই পুস্তক প্রকাশ সম্ভব হইয়াছে।

বলরামদাস ও রায়শেখর ছাড়া অন্ত প্রবন্ধগুলি স্বয়ংসম্পূর্ণ ভাবে লেখা। তাই কিছু কিছু পুনরুক্তি থাকিতে পারে। অত্যাশ্রয় ত্রুটিও আছে, তাহার মধ্যে দু'একটি বিভ্রান্তিকর; যথা—১১ পৃষ্ঠায় 'ত্রক্ষবৈবর্ত-গীতগোবিন্দের' পরিবর্তে 'বিষ্ণুপুরাণ-ভাগবতের' এবং ২২ পৃষ্ঠায় 'মাণ্ডুনিকতার' পরিবর্তে 'আধুনিকতা' হইয়াছে।

প্রাচীন বঙ্গসাহিত্যকে সাহিত্যরূপে বিচারের বিস্তৃত চেষ্টা প্রায় হয় নাই। এই শৃংখল-পূরণের কাজে ভবিষ্যতে অনেকে আগাইয়া আসিবেন; বর্তমানের জ্ঞান সেই কঠিন কর্ম গ্রহণ করিয়া ত্রুস্ত আনন্দবোধ করিয়াছি।

বাংলাদেশের সহৃদয় পাঠকের প্রশ্রয় কামনা করি।

সিটি কলেজ,
আমহার্ট স্ট্রীট,
কলিকাতা

প্রবন্ধকার

সূচী

এক

পৃষ্ঠা

✓ বিজ্ঞাপতি

... , ...

৩—৪০

(১)

[পূর্বভারতের কবি-সাক্ষ্যভৌম বিজ্ঞাপতি ৩ ; বিজ্ঞাপতির কাব্যসাধনার দুই স্তর —
প্রথম স্তরে মনোভঙ্গি : ঐ উপাহরণ—মান দূতী ইত্যাদি ৩—৬ ; রূপশিল্প, সৌন্দর্য-
সাধনা ও বৈজ্ঞানিক দৃষ্টি ৭—৯ ; বয়ঃসন্ধি ৯—১৩ ; পূর্বরাগ ১৩—১৯ ।

• • (২)

[দ্বিতীয় স্তরে প্রাণভঙ্গি ; বিজ্ঞাপতির কবিপ্রাণতার উৎস ১৯—২১ ; ঐ দৃষ্টান্ত—
✓ শঙ্কিসার ২২—২৪ ; বিরহ ২৪—২৯ ; চণ্ডীদাস ও জ্ঞানদাসের সহিত তুলনা ২৯—৩২ ;
বিজ্ঞাপতির একটি রহস্তগভীর পদ ৩২—৩৩ ; ভাবসম্মিলন, আনন্দতত্ত্ব ৩৪—৩৫ ;
প্রাণনা ৩৫—৩৯ ।]

দুই

শ্রীকৃষ্ণকীর্তন—রাধাচরিত্রে

....

....

৪১—৬২

[শ্রীকৃষ্ণকীর্তনের রাধিকা পূর্ণাবয়ব বাস্তব চরিত্র ; রাধা-সর্বস্ব শ্রীকৃষ্ণকীর্তন ৪১ ;
গ্রাম্যতা ও অলীলতা ৪১—৪৫ ; রাধা-চরিত্রের ক্রমবিকাশের নানা স্তর ৪৫—৫৯ ;
বড় চণ্ডীদাসের কবিকৌশল—সমগ্র কাব্যটি লিরিক, ড্রামা ও স্মার্টেটের বিচিত্র
সমন্বয় ৫৯—৬০ ; বিজ্ঞাপতি, বড় চণ্ডীদাস ও পরবর্তী পদাবলী ৬০—৬২ ।]

তিন

✓ জ্ঞানদাস

...

...

৬৩—৮০

[জ্ঞানদাসের লিরিক প্রতিভা ; পদাবলী কতদূর লিরিক কাব্য ৬৩—৬৪ ; বিজ্ঞাপতি ও
গোবিন্দদাস এবং চণ্ডীদাস ও জ্ঞানদাস ৬৪—৬৫ ; জ্ঞানদাসের রোমান্টিক রহস্তময়তা
৬৬—৭২ ; মাধুর্য লক্ষণ ৭২—৭৫ ; কবিচিন্তে দ্বিধা ও আত্মপ্রতিষ্ঠার অভাব ;
ভাষার নির্বাচন ৭৫—৭৭ ; রূপাহরণ ৭৭—৮০ ।]

চার

✓ গোবিন্দদাস

...

...

৮১—১১১

[চৈতন্যোত্তর যুগের শ্রেষ্ঠ পদকর্তা ৮১ ; সচেতন শিল্পী—আলঙ্কারিকতা ৮২ , বিশুদ্ধ

সৌন্দর্য্যসাধনা, রূপানুরাগ ও ভক্তিপ্রাণতা ৮৩—৮৪ ; কাদিক্যাল-লক্ষণ—‘ইতিহাস-লোক’ ৮৪—৮৬ ; সঙ্গীতগুণ ৮৬—৮৭ ; নাটকীয়তা ও চিত্রধর্ম্মিতা ৮৭—৮৮ ; পদবিচার : গৌরবল্লিকা ৮৮—৯২ ; রূপানুরাগ ৯২—৯৬ ; পূর্ণরূপ ৯৬—৯৭ ; রাস ৯৭—১০০ ; প্রতিমার ১০০—১০৮ । গোবিন্দ্যাস বেদনার কবি নহেন, আর্য্যদনার কবি ১০৯—১১১]

পাঁচ

বলরামদাস

...

...

১১১—১৩৭

[বৈষ্ণব বাৎসল্য রস ১১৩—১১৫ ; শাক্ত-গীতিকার সহিত তুলনা ১১০ ১১৬ ; বলরামের মানসিক প্রোচছ ১১৬ ; কাহিনীর পরম্পরা—পূর্বগোষ্ঠ ও উত্তরগোষ্ঠ ১১৭—১১৯ ; রসোদগার—প্রবীণ রসিক কবি ; চণ্ডীদাস, জ্ঞানদাস ও গোবিন্দ্যাসের সহিত তুলনা ১২০—১২৭ ; বর্ণনার, কবিভাষা ও রাধিকা-সর্ব্ব্বতা ১২৭—১৩১ ; রূপানুরাগ ১৩১—১৩৩ ; পূর্বরূপ ১৩৩—১৩৫ ; সর্ব্বোত্তম পদটির বিচার ১৩৬—১৩৭]

ছয়

শেখর

...

...

৩৮—১৫৭

[শেখর কয়জন : শেখর ও বিজ্ঞাপতি ১৩৮—১৪০ ; অগ্রদান রসপন্যায়ের শ্রেষ্ঠ কবি ১৪০—১৪১ ; চাতুর্যের কবি শেখর ১৪১—১৪৫ ; চিত্রবস ও হিন্দুয়মুখী-সৌন্দর্য্য ১৪৫—১৪৮ ; রূপানুরাগ ও প্রতিমার ১৪৮—১৫২ ; বালাশীলা ও বাৎসল্যরস—ঐ রসান্তাস ১৫৩—১৫৭]

সাত

কৃষ্ণদাস কবিরাজ—বৃন্দাবনদাস ও কৃষ্ণদাস :

...

১৫৮—১৮১

[চৈতন্যচরিতামৃত ও চৈতন্যভাগবত সম্পর্কে আধুনিক বিতর্ক ১৫৮ ; একটি মত—চরিতামৃতের চৈতন্য সত্তা চরিত্র নহেন—ঐ বিচার ১৫৮—১৬১ ; দ্বিতীয় মত—চৈতন্যভাগবত ও চৈতন্যচরিতামৃত অর্থাৎ নবদ্বীপ ও বৃন্দাবনের ঐতিহ্যে বিরোধ—ঐ বিচার ১৬১—১৬৬ ; চৈতন্যচরিতামৃত চৈতন্যভাগবতের পরিপূরক ১৬৬—১৬৭ ।

কৃষ্ণদাসের কাব্যে শ্রীচৈতন্য

• বোড়শ শতকে চৈতন্যপ্রভাবে বঙ্গদেশের মহাজাগরণ ১৬৮ ; শ্রীচৈতন্যের লৌকিক ও অলৌকিক রূপ ১৬৯ ; চরিতামৃতের মহাকাব্যোচিত রূপ ১৬৯ ; শ্রীচৈতন্যের লৌকিক মানবিকতার নানা পর্য্যায় ১৭০—১৭৯ ; চৈতন্যজীবনে স্বর্ণমস্তুর মধ্যস্থতা ১৭৯ ; শ্রীচৈতন্যের সাধনা ১৮০—১৮১ ।

মধ্যযুগের কবি ও কাব্য

বিজ্ঞাপতি ✓

(১)

পূর্ব-ভারতের মধ্যযুগের কবি-সার্কভোম বলিয়া যদি বিজ্ঞাপতিকে অভিহিত করা যায়, তবে আপত্তি ওঠে কিনা জানি না, কিন্তু ঐ দাবীর পিছনে যুক্তি আছে। মধ্যযুগের শ্রেষ্ঠ কবি হিসাবে বিজ্ঞাপতির সঙ্গে চণ্ডীদাসের নামও একবৃত্তে ফুটিয়া আছে। চণ্ডীদাস ও বিজ্ঞাপতির কবি মাদ্যাত্ম্য ভারতের এই প্রান্তীয় প্রদেশে এমনই স্বতঃস্ফীকৃত যে, মনে হয় উভয় কবি একই ব্যক্তিত্বের দুই রূপ। এই বিশিষ্ট মনোভাব কতখানি যুক্তি-নির্ভর এবং কতখানি পূর্বাগত দারণা-অল্পসারী তাহা একবার তথ্যের আলোকে যাচাই করিলে ভালো হয়। ইহাও দেখিতে হইবে, কবি-সার্কভোম উপাধিতে বিজ্ঞাপতির অধিকার কতখানি।

বিজ্ঞাপতির কাব্যসাধনায় অনেকই দুইটি বিভিন্ন ভাব-অঙ্গীকৃত স্তর-পর্যায় স্বীকার করেন। প্রথম স্তরে কবি যে-স্বরে কাব্যরচনা করিয়াছেন, দ্বিতীয় স্তরে তাহা হইতে পৃথক তাঁহার কবিভঙ্গি। অথবা এমনও বলা যায়, প্রথম স্তরে কবি-রুতিতে একটি মনোভঙ্গি প্রাধান্য লাভ করিয়াছিল, দ্বিতীয় স্তরে প্রাণভঙ্গি। স্তবরাং স্বভাবতঃই আধুনিক ‘প্রাণ’-মুগ্ধ সমালোচক-দৃষ্টিতে প্রথম স্তরের বিজ্ঞাপতি দিক্‌ত, এবং দ্বিতীয় স্তরের বিজ্ঞাপতি অচ্চিত। এই দিক্‌কার ও অর্চনাব মধ্য হইতে বিজ্ঞাপতির যে সামগ্রিক কবি-পরিচয় তাহাই আবিষ্কার করিতে হইবে এবং দেখিতে হইবে দ্বিতীয় যুগের বিজ্ঞাপতির সঙ্গে প্রথম যুগের বিজ্ঞাপতির কোনো ভাবগত নিগূঢ় সংযোগ আছে কিনা; অথবা দ্বিতীয় যুগের বিজ্ঞাপতি প্রথম যুগের বিজ্ঞাপতির সম্ভাব্য পরিণতি কিনা। ভক্ত চণ্ডীদাসের সঙ্গে সাফাতের ফলেই মাত্র বিদগ্ধ বিজ্ঞাপতির অন্তরে রসের ঢল নামিল—ইহা নির্দেশ করিলে কাব্য-বিচারে আকস্মিকের অতিপ্রাধান্য স্বীকার করিতে হয়। তাহাতে কবি-প্রতিভার বিচার থাকে না ও স্পষ্টই তাহা কবির প্রতি অবিচার। প্রথম স্তরের কবির বাণী-ভঙ্গির পরিচয় গ্রহণ করা যাক।

(প্রথম স্তরে বিজ্ঞাপতির মধ্যে ভঙ্গি-প্রাধান্য—ইহাই কথিত এবং বাস্তবিক তাই। এই বিভাগে যে-সকল কাব্য-পর্যায় সন্নিবেশ করিতে হয়, যথা—বয়ঃসন্ধি, পূর্বাগ, মিলন, মান, প্রেম-বৈচিত্র্য ইত্যাদি—ইহাদের মধ্যে কবির বলিবার একটি বিশেষ রীতিই রূপময় হইয়া উঠিয়াছে। রাধাকৃষ্ণের প্রেমলীলাকে কবি তাঁহার নিজস্ব দৃষ্টির

আলোকে নানাভঙ্গিতে ঘুরাইয়া ফিরাইয়া নিরীক্ষণ করিয়াছেন ; স্বে-দৃষ্টিতে আধ্যাত্মিক স্বর-আবেশ অল্প এবং কবি-কথনের কোঁশল অধিক বলিয়া তাহা ভক্তি-পদাবলী না হইয়া প্রেমকাব্য হইয়া উঠিয়াছে ।) (এখন প্রশ্ন, ইহা যথার্থ কাব্য হইয়াছে কিনা ।)

কাব্যত্ব যে আসলে কি, তাহা বোধকরি নির্দেশ করার মত স্বকঠিন বস্তু অল্পই আছে । আত্ম-দর্শনের মত কাব্য-দর্শনও নিতান্ত দুর্বল হইয়া উঠিতেছে । অল্প দেশের কথা বাদ দিলেও আমাদের দেশেই সুপ্রাচীন কাল হইতে বহু কাগজ-কালি ব্যয় হইয়াছে কাব্যের কাব্যত্ব নির্দারণে । নির্দারিত হইয়াছে এমন বলি না । রস না রূপ, ভাব না অর্থ, প্রাণ না ভঙ্গি—কোনটি যে যথার্থ কাব্য-সত্য তাহা এখনও অমীমাংসিত । ইহার মধ্য হইতে অন্ততঃ একটি জিনিস স্পষ্ট হয়, কাব্যসৃষ্টিতে ঐ দুই বস্তু—রস এবং রূপ,—ইহার কোনো একটিকে অস্বীকার করা যায় না । (রস-প্রধান কাব্যও কাব্য, রূপ-প্রধান কাব্যও কাব্য । রস ও রূপের যুগপৎ প্রাধান্য যেখানে তাহাতো নিশ্চয়ই ।) বিদ্যাপতির প্রথম স্তরের কাব্যে রূপের প্রাধান্য । সেখানে একটা form,—আমি শ্রেষ্ঠ কাব্যের প্রেরণাগত, অনায়াস-আবির্ভূত form-এর কথা বলিতেছি না,—একটা সচেতন রীতি প্রতিষ্ঠিত হইয়াছে । এই রীতিকে কাব্য-জগৎ হইতে নির্দাসন দেওয়া চলে না । গভীরতর ভাব-আবেদন না থাকা সত্ত্বেও এই রীতি চাতুর্যের দোলতে অনেকে কবি-পদবী অধিকার করিয়াছেন । (বিদ্যাপতির মধ্যে আমরা ঐ দুই শ্রেণীর রীতি-অনুসৃত্যই দেখিতে পাইব ।)

* (বিদ্যাপতির অনেক পদেই কবি-কোঁশল চাতুর্যের ‘সীমা-স্বর্গ’কে বরণ করিয়া আছে । এবং তাহার মধ্যেই কি কবির সৃষ্টি-নৈপুণ্যের একটি বিশেষ দিক প্রকটিত হইয়া ওঠে নাই ? বক্রোক্তি বিশিষ্ট কবিত্ব বলিয়া সংস্কৃত সাহিত্যে স্বীকৃত) কিন্তু প্রাদেশিক সাহিত্যে, বিশেষতঃ বাংলা সাহিত্যের প্রভাব-পরিমণ্ডলে এই বক্রোক্তি কোন্ কবির মধ্যে গৌরবলাভ করিয়াছে ? আমাদের স্বীকার করিতে হইবে বহুক্ষেত্রেই বহু সাহিত্যিকের প্রতিভার যে সম্মান আমরা করিয়া থাকি, তাহা এই বক্রোক্তি-নিপুণতা লক্ষ্য করিয়াই । আধুনিক কালে প্রমথ চৌধুরীর রচনা হইতে বক্রোক্তিটুকু মুছিয়া ফেলিলে কী থাকিবে তাহাই ভাবি । স্নেহ-হিসাবে, সার্বজনীন সাহিত্য-সংস্কার বা রস-সংস্কারের দিক হইতে না হউক, সাধারণভাবে একটা দেশের একটা কালের বিশেষ চিন্তা ও ভাবনাকে একটা বিশিষ্ট মনোভঙ্গির মধ্যে ধরিয়া রাখার যে প্রচেষ্টা, তাহাকে সাহিত্য বলিতে আপত্তি করিতে পারি না । মধ্যযুগের পূর্ব-ভারতের মনোভঙ্গি রূপ ধরিয়াছে বিদ্যাপতির বক্রোক্তি-বিদগ্ধ রচনার মধ্যে এবং সেই চতুর্দশ-পঞ্চদশ শতক হইতে একেবারে আধুনিক কালে চলিয়া আসিলেও কাব্যের এই বিশিষ্ট

বিজ্ঞাপতি

পদ্ধতিটুকুর অল্পবর্তী হিসাবে একমাত্র ভারতচন্দ্র (অংশবিশেষে গোবিন্দদাস) ছাড়া আর কাহাকেও পাই না। আট যেখানে আজিকার দিনে একটা ভদ্র-সরস্বতার দিকে ঝুঁকিয়াছে, সেযুগে ভারতচন্দ্রকে কবি না বলিলে পাতক হইবে, বিজ্ঞাপতিকে না বলিলে তো নিশ্চয়ই। (সে-হিসাবে কাব্যের চিরন্তন রস-গৌরবের প্রশংসা দিয়াও আমরা এই বুকোক্তির ক্ষেত্রে বিজ্ঞাপতির জগৎ একটি নিদৃষ্ট আসন ও বিশেষ যৌরন দাবী করিতেছি)

বিজ্ঞাপতির পদে এই বুকোক্তি বা চাতুর্যের উদাহরণ বিশেষ করিয়া প্রদর্শন করার প্রয়োজন আছে বলিয়া মনে করি না। মান বা দূতী, কৌতুক বা মিলন,—ইত্যাদি যে কোন পর্যায়ের পদে ইহার ভূরি ভূরি দৃষ্টান্ত মিলিবে। ইহার মধ্যে প্রবচন বা প্রোচোক্তির অজস্র ব্যবহার লক্ষণীয়। এখানে কবি রীতিমত সমাজ-সচেতন। প্রবচন স্থিতি অথবা ব্যবহার করার পিছনে সামাজিক অভিজ্ঞতা আত্মসাৎ করিবার প্রবণতা দৃষ্টিগোচর হয়। ইহাদের অনেকগুলিই সার্থক ; অসার্থকও যে নাই তাহা নয়। সমগ্র পদ হইতে বিচ্ছিন্ন করিয়া কয়েকটি তুলিয়া দিতেছি—

- ১) কুলবতী ধরম কাঁচ সমতুল (৯৯)
২) কউড়ি পঠাওলে পাব নহি ঘোর।
ঘাব উধার মাঁগ মতি ভোর ॥
বাস ন পাবএ মাঁগ উপাতি।
লোভক রাশি পুরুথ থিক জাতি ॥ (২১৮);
- ৩) আএল বইসল পাব পোআর।
সেজক কহিনী পুছএ বিচার ॥ (ঐ)
- ৪) যে পতিপালক সে ভেল পাবক। (২১৬);
- ৫) পিপড়ী কা জ্ঞেঞা পাগি জনমএ
অনল করএ ঝাপান।
ছোটা পানী চহ চহ কর পোটা
কে নহি জান ॥ (২১৭)
- ৬) জইও জকর মুহ পেচ সন
দুসএ চাহএ আন।
হম তহ কে বিসহ আগর
চোড়লু কা থিক ভান ॥ (ঐ)

- ৭) অপনে রসে উকট কুসিয়ার । (৫২৬)
 ৮) পএর পখাল রোসে নাই খাএ ।
 অক্ষরা হাথ ভেটল হর জাএ ॥ (৫১)
 ৯) লিহলে উদলল অবইত ভার ।
 ভেটলে মেটত অছ পরকার ॥ (২৪৭)
 ১০) চিটিগুড় চুপড়লি রাড়ক পোরি ।
 লওলে লোথ বেকত ভেল চোরি ॥ (৩৩৩)
 ১১) তেলি বড়দ খান ভল দেখিঅ ।
 পাল'ব নহি উজিআই ॥ (৩৮৭)
 ১২) তোড়ি জড়িঅ জই গাঁঠ পড়এ তই । (৪২৪)
 ১৩) ভল কএ পুহলএ ঘুরি সঁসার ।
 তর স্ততে গঢ়ি কাট কুস্তার ॥ (৪৭২)
 ১৪) পুরুষ-হৃদয় জল দুঅও সহজে চল
 অলুবন্ধে বাঁধ থিরাই ।
 সে যদি ফুটল রহ সহস ধারে বহ
 উচেও নীচে পথ ষাই ॥ (৪৯৮)
 ১৫) খোজল সকল মহীতল গেহ ।
 খীর নীর সম ন হেরল নেহ ॥
 জব কোই বেরি আনল মুখ আনি ।
 খীর দণ্ড দেই নিরসত পানি ॥
 তবহ খীর উছলি পড় তাপে ।
 বিরহ বিয়োগ আগি দেই বাপে ॥
 জব কৈ পানি আনি তাহি দেল ।
 বিরহ বিয়োগ তবহি দূর গেল ॥ (৫৫৮)
 ১৬) আগিল দূর কর গাহিল চিত ধর ।
 জইমন বড়ি কুসিয়ারে ॥ (৬৮৪)

• (উদাহরণগুলি সাহিত্যপরিষদের বিজ্ঞাপতি পদাবলীর দ্বিতীয় সংস্করণ হইতে গৃহীত)

—উপরিউক্ত স্থলগুলিতে কবির চাতুর্যের যে পরিচয় মিলে তাহা যে সর্বব্যাপী
 কাব্যোৎকৃষ্ট হইয়াছে তাহা নহে। তথাপি কবি যে জীবনরসিক এবং তাঁহার

কাব্যধারার নিদৃষ্ট সীমারেখার মধ্যেও তিনি যে বহির্জগতের প্রাণোত্তাপ আহ্বান করিতে চাহিয়াছেন তাহা অনুভব করা যায়। কবির যে বুদ্ধি-কুশলতা এই সকল স্থানে মূর্ত হইয়া উঠিয়াছে, তাহাই যথার্থ রস-সিক্ত কাব্যের রূপ ধারণ করিলে এক নূতন কবি-গৌরবের আবির্ভাব ঘটিবে। ইতিপূর্বে বলিতে চেষ্টা করিয়াছি কাব্য যদিচ সাধারণভাবে ভাবমূলক, তথাপি তাহাতে অর্থের পরিসর নিত্যন্ত সঙ্গীর্ণ নয়। সাধারণ অর্থে কবিবুল যখন রম্যার্থ করিয়া তোলেন, তখন তাহার মধ্যে স্বর লাগে। সেই রমণীয় অথবা চাক্তর সম্পাদনের মধ্যে কবি-কৌশলের অনেকখানি কৃতিত্ব প্রচ্ছন্ন আছে। আসলে কাব্যের প্রাথমিক উপাদান কিনা শব্দ ও অর্থ। এই দুইয়ের সহযোগে কবি-বাঙ-নির্ম্মিত। স্বরগ রাধিতে হইবে—‘বাঙ-নির্ম্মিত’। কাব্য হইল ভাবের রূপ-নির্ম্মাণ। সেই রূপের প্রাসাদ গড়িতে যে প্রতিভার প্রয়োজন, তাহা যদি স্বয়ং সৃষ্টিকর্তার প্রতিস্পর্শী মহাকবির হয়, তাহা হইলে ঐ ক্ষেত্রে রূপ ও রস, শব্দ ও অর্থ অপৃথগ্যে হরগৌরীর মত পরস্পরের রূপ বিভোর হইয়া পড়ে। কিন্তু সেই মহত্তম আবেগের আধারীভূত কবি-প্রতিভা চিরকালই দুর্লভ। অথচ কাব্য-পিপাসা,—কোন না কোন দিক হইতে,—স্বলভ। সুতরাং আসে অর্থের সম্মান, বুদ্ধির গৌরব, অলঙ্কারের প্রসঙ্গ। যে কবি সেই বুদ্ধির অথবা অর্থদীপ্তির সম্পদ তাঁহার কাব্যের মধ্যে গাঁথিয়া দিতে পারেন, তিনিও কবি এবং নিত্যন্ত স্বলভ কবি নন। এখন তো দেখিতেছি নব্য সমালোচনা শাস্ত্রে বুদ্ধির জয়যোযণা চলিতেছে। রসই আর কাব্যের পরম পুরুষার্থ থাকিতেছে না,—তাহা ‘আনন্দ’। এবং এই ‘আনন্দ’ কেবল ‘ভাব’-পথে নয়, ‘অর্থ’-পথেও লভ্য। বলা বাহুল্য সেই অর্থ রম্যার্থ। কাব্য-জগতে বুদ্ধি ও অর্থের মধ্যাদা প্রতিষ্ঠার এই মুহূর্ত্তে নূতন করিয়া রীতিবাদের সম্মান করিতেছি, অলঙ্কার-নৈপুণ্যকে শিরোপা দিতেছি। সুতরাং বিজ্ঞাপতিও মধ্যাদা দাবী করিতে পারেন,—সেই বিজ্ঞাপতি যিনি শব্দ ও অর্থের বিদ্যুৎ-চমকে আমাদের চোখ ঝলসাইয়া দিয়াছেন।

রম্যবোধ ও রম্যার্থের পথে বিজ্ঞাপতির কাব্যে অত্যুৎকৃষ্ট কবি-কৃতির দুর্লভ অবসর আসিয়াছে। সেই সকল স্থান বিচার করিব। তৎপূর্বে বিজ্ঞাপতির একটি কবি-বৈশিষ্ট্য সম্পর্কে দৃষ্টি দেওয়া প্রয়োজন, অন্ততঃ আমার তো তাই মনে হয়। বিজ্ঞাপতি মনোদর্শী কবি। এইখানে তাঁহার কবি-প্রতিভার একটি মূলস্থল বিধৃত। ইতিপূর্বে বহুস্থলে বিজ্ঞাপতির কাব্যে অর্থগৌরবের উল্লেখ করিয়াছি। তাহার সহিত মনোদর্শিত্বের কি কোন পার্থক্য আছে? পার্থক্য প্রকারের নয় পরিমাণের। বুদ্ধি-ধর্ম মনোদর্শনের একটা অংশ হইতে পারে। এবং একথাও বলিব, মধ্যযুগের

অন্ত-কোনো কবির কাব্যেই এই মনোদর্শ্য এত অধিক পরিমাণে সক্রিয় নয়। প্রতিবাদ-স্বরূপ গোবিন্দদাসের নামোল্লেখ হইতে পারে।। আমার নিজের মনে হয় গোবিন্দদাস intellectual নন। তাঁহার কাব্যপ্রেরণার উৎসমূলে আছে ভক্তিপ্ৰাণতা, এবং সেই ভক্তিপ্ৰাণতাকে কাব্যগত করিতে তিনি মগুনকলার আশ্রয় লইয়াছেন। তাঁহার কাব্যের যে চাতুর্য্য, তাহা কোনো বিশিষ্ট মনোদর্শ্য হইতে আসে নাই, তাহার উদ্ভব মগুনকলার অনুসরণে। মনোদর্শ্য বলিতে আমরা জগৎ এবং জীবন সম্পর্কে কবির একটা বিশেষ দৃষ্টিভঙ্গি, - অবশ্য কাব্য-রীতির সীমাবদ্ধ অবসরে যতটুকু সম্ভব, - বুঝিয়া থাকি। এই যে দৃষ্টিভঙ্গি, ইহা গড়িয়া ওঠে কবির পরিপাশ্বিক এবং শিক্ষাদীক্ষা হইতে—তাঁহার বিজ্ঞা ও বৈদগ্ধ্য সহায়ে। বিজ্ঞাপতি শিক্ষিত কবি, বিদগ্ধ কবি এবং রাজসভার কবি। তাঁহার কাব্যে কেবল বুদ্ধির কসরৎ নয়, মননের অনস্বীকার্য্য রীতি-অঙ্গীকার ঘটিয়াছে। ইহারই ফলে তাঁহার দৃষ্টিভঙ্গিতে রস-পিপাসার সঙ্গে বৈজ্ঞানিক কোতূহলও যুক্ত হইয়াছে। সেই পিপাসা এবং সেই কোতূহল,—উভয় মিলিয়া তাঁহার বয়ঃসন্ধির পদগুলিকে এমন উৎকৃষ্ট করিয়াছে। বয়ঃসন্ধিতে বিজ্ঞাপতির কবি-ব্যক্তিত্বের যে পরিচয়, তাহার মাহাত্ম্য নানা দিক হইতে। প্রথমতঃ এই যে-রাধাকে তিনি নিরীক্ষণ করিতেছেন, এ রাধা কোনো বৃন্দাবন হইতে আসে নাই, মানস-বৃন্দাবনও নয়। কবির দৃষ্টিতে মানবিকতা অকুণ্ঠ আনন্দে প্রতিষ্ঠিত। দ্বিতীয়তঃ বিজ্ঞাপতি যে এই রাধাকে দর্শন করিতেছেন, ইহার মধ্যে সেই বৈজ্ঞানিক দৃষ্টি-ক্ষুধা ঘোচে নাই। ইহাকেই আমি তাঁহার মনোদর্শিতার লক্ষণ বলিয়াছি। এই দৃষ্টিঘটিত কোতূহলের জন্ত মানবী রাধার যৌবনোন্মেষের কোনো বাস্তব অবস্থাই অলঙ্ঘিত থাকে নাই। এবং সর্বোপরি ইহারই উপর,—এই বাস্তব জীবন-রূপের উপর—তিনি আপন মানসী-প্রতিমা গড়িয়াছেন। সেইখানেই বিজ্ঞাপতির সৌন্দর্য্য-সামনার সর্বোৎকর্ষ।

(১) বিজ্ঞাপতির সৌন্দর্য্য-সামনার কথা আসিল বলিয়া সে সম্পর্কে দু'একটি কথা বলিয়া লই। বিজ্ঞাপতি তাঁহার কাব্যের এক স্তরে লৌকিক অর্থে সৌন্দর্য্য-সামনা বলিতে যাহা বুঝায়, তাহাই করিয়াছেন। না, কোনো ভক্ত-প্রাণের আকৃতি নিবারণ করিতে ত্রিরাধিকার রূপ-নির্মাণ নয়, আত্মপ্রাণের সৌন্দর্য্য-পিপাসা চরিতার্থের জন্তই বিজ্ঞাপতি রাধামূর্ত্তি তিলে তিলে রচিয়া তুলিয়াছেন। তাঁহার রাধিকা যেমন একদিকে বিশ্বহৃদির রাধারাণী, অত্রদিকে তেমনি তাঁহার কবিপ্রাণের সৌন্দর্য্যলক্ষ্মী। বিজ্ঞাপতির সামনে অসীম সৌন্দর্য্যময়ী রহস্যমূর্ত্তি বিরাজিত ছিল। কবি বিমুগ্ধ দৃষ্টিতে তাহারই রূপস্থধা পান করিয়াছেন। সেই পিপাসা-নিবারণে তাঁহার কোনো কুণ্ঠা নাই, সেই

সৌন্দর্য্য-দর্শন করিতে তিনি এক মুহূর্ত্ত দ্বিধা করেন নাই। ফলে তিনি যে রাধিকার মূর্ত্তি চিত্রিত করিলেন, একদিকে তাহা যেমন তাঁহার বৈজ্ঞানিক কৌতূহলজনিত মনোবৃত্তির জ্ঞাত বাস্তব মানবী, অতদিকে তাহাই তাঁহার বিশুদ্ধ সৌন্দর্য্য-সাধনার ঈশ্বরী হইয়া দেবী—সৌন্দর্য্যাদেবী। ফলে বিজ্ঞাপতির রাধিকার মধ্যে যুগপৎ বাস্তব ও অবাস্তবের মিশ্রণ ঘটিয়াছে। বয়ঃসন্ধির রাধা (সাধারণভাবে) বাস্তব, পূর্ব্বরাগেও তাই; কিন্তু অভিষারের রাধিকায় অবাস্তবতা অথবা বাস্তব-উর্দ্ধতার ছায়াপাত হইয়াছে। অতঃপর বিরহের মধ্য দিয়া ভাবগম্বিলনে রাধিকার যে রূপ-পরিবর্তন তাহার বিচার পরে করিব, কারণ তখন বিজ্ঞাপতির নিছক সৌন্দর্য্য-সাধনার অধ্যায় সমাপ্ত হইয়াছে। বয়ঃসন্ধি, পূর্ব্বরাগ, অভিষারের রাধিকাই সৌন্দর্য্যের রাধিকা, এবং ছঃসাহস না হইলে বলিব, সে-রাধিকা বিজ্ঞাপতির মানস-সুন্দরী।)

এইবার পদ বিশ্লেষণে আসা যাক। প্রথম বয়ঃসন্ধির পদ। বাস্তবিক বিজ্ঞাপতি যে কত বড় সৌন্দর্য্যাদিক কবি, তাহা এই পদগুলি এমন অপ্রাকৃতভাবে প্রমাণ করিয়াছে যে নূতন করিয়া বর্ণনার প্রয়োজন নাই। পর যুগের এক ভাববিহ্বল বৈষ্ণব কবি রূপের পাথারে আঁখি ডুবাইয়া, যৌবনের বনে মন হারাইয়া অফুরাণ সৌন্দর্য্যের পথে কেবলই ঘুরিয়া ফিরিয়াছেন। বিজ্ঞাপতিও পথ হারাইয়াছেন, সে-পথ যৌবনের পথ নহে,— যৌবন-রহস্যের নিবিড়, গভীর, ঝাঁপিয়া-আমা মায়া-কাননও নয়,—তাহা কৈশোর যৌবনের সন্ধিক্ষণের আলো-আঁধারি। সেখানে প্রকাশ ও অপ্রকাশের মধ্যে দোলাচল চিত্ত-বৃত্তি, তেজ ও তমের পরম বিরোধ, স্মৃতি ও বিস্মৃতি, লীলা ও লাস্ত্র, সরলতা ও চতুরতার মধ্যে আন্দোলিত দেহ মন। শৈশবের মন আর যৌবনের মন, শৈশবের দেহ আর যৌবনের দেহে দ্বন্দ্ব পড়িয়া গিয়াছে। ঐ চঞ্চল দেহের সহিত চঞ্চল মনের বিরোধ কি অল্প? কোথাও দেহ যৌবনের ছায়ায় আঘাত করিয়াছে, মনের তন্দ্রা ঘুচে নাই। আবার কোথাও দেহ অবিকচ কমলকোরকের মতই সৌরভ-স্বপ্ন অথচ তাহাকে ঘিরিয়া যৌবন-মধুকর গুণ্ণগুণ্ণ করিয়া ফিরিতেছে। কবি এ সকলই দেখিয়াছেন, দেখিয়া বিভোর হইয়াছেন। সে বিভোরতা আত্মবিভোরতা নয়,—বস্তুবিভোরতা, তাহা একান্তই তন্ময় রসদৃষ্টি। তাই, শ্রীরাধিকার সৌন্দর্য্য-সন্ধির মধ্যে পথ হারাইয়াও কবি কোথাও মন হারান নাই। যাহা দেখিয়াছেন, তাহা দেখাইয়াছেন, রূপমুগ্ধ দৃষ্টির প্রত্যক্ষকে কোথাও রূপ-রসিকের নিকট অপ্রত্যক্ষ রাখেন নাই। সত্যই বয়ঃসন্ধির কাব্যপর্য্যায় নির্বাচনের মধ্যে বিজ্ঞাপতির কবি-দৃষ্টির যে পরিচয় উদ্ঘাটিত হয়, তাহা যেমনই মৌলিক, তেমনই অল্পম। (কত কবিই তো যৌবনের গান গাহিলেন, কত শিল্পীই তো শৈশবের বন্দনা করিলেন,—সে দৃষ্টির মধ্যে আত্মমগ্ন ভাবদৃষ্টির কলা-

কারু দেখিয়া আমরা কতই না মুগ্ধ হইয়াছি, কিন্তু ঐ দুই ‘স্থির’ মৌলবের অস্থির সন্ধিক্ষণকে যিনি কাব্যের উপাদান করেন, তিনি আমাদের কেবল বিমুগ্ধ করেন না,—বিস্মিত করেন ; তাহার কাব্যে কেবল রসাবেশ নয়,—রস-চমৎকার ।) আধুনিক কালের কবি-দৃষ্টিতে একস্থানে ঐ যুবতী-কিশোরীর যে ছবি ফুটিয়াছে, তাহার কিয়দংশ তুলিয়া দিতেছি :

(“মুখ ফোটে ফোটে ফোটে না। মেঘাচ্ছন্ন দিনে স্থলকমলিনীর ত্রাঘ মুখ যেন ফোটে ফোটে তবু ফোটে না। ভীক-স্বভাব কবির কবিতাকুহুমের ত্রাঘ মুখ যেন ফোটে ফোটে তবু ফোটে না। ” (চন্দ্রশেখর),

অন্ততঃ :

“সুন্দরী—নবীনা—সবেমাত্র যৌবন-বরণায় রূপের নদী পরিয়া উঠিতেছে। ভরা বসন্তে অঙ্গমুকুল সব ফুটিয়া উঠিতেছে। বসন্ত বর্ণায় একত্র মিশিয়াছে।”—(চন্দ্রশেখর)

যে দুইটি অংশ উদ্ধৃত করিলাম, তাহা স্পষ্টতঃ বয়ঃসন্ধির বর্ণনা নয়, অবশ্য ‘বালিকা-যুবতী’র ভাব ও রূপবর্ণনা প্রসঙ্গেই কবি ঐ সকল কথা বলিয়াছেন। তথাপি ঐ দুই অংশে বয়ঃসন্ধির ভাব-অস্থিরতা, উন্মাদনা অথবা প্রকাশ-বেদনার বর্ণনা এমন কবিত্বময় ও রমণীয় যে তাহা দ্বারা বিজ্ঞাপতির পদের আশ্বাদনে উল্লাস বাড়িবে ! ঐ যে, “মুখ যেন ফোটে ফোটে ফোটে না”—বিজ্ঞাপতি ইহারই চিত্র আঁকিয়াছেন—“ফোটে ফোটে ফোটে না’ দেহের, ‘ফোটে ফোটে ফোটে না’ মনের। ঐ যে ভরা যৌবনে ‘বসন্ত বর্ণায় একত্র মিশিয়াছে’—ঐ বর্ষা যৌবনের, ঐ বসন্ত কৈশোরের। বয়ঃসন্ধি হাসিকান্নার লীলা। কৈশোরের চাক্ষু্য মথিয়া যৌবন আসিতেছে, দেহমানে কী তাহার উল্লাস, অথচ কতই না বেদনা। এ বেদনা হুনিরীক্ষ্য অথচ সর্গমানব-সাধারণ—কৃষ্ণের জগ্ন রাধার বেদনা হইবার প্রয়োজন নাই—ঐ বসন্ত বর্ষার মিলন। আর একবার জৈনিক আধুনিক কবির জ্বাবনীতে বিজ্ঞাপতির বয়ঃসন্ধিলীলার রস-বর্ণনা উপভোগ করিব, অতঃপর বিজ্ঞাপতির নিজস্ব পদের আশ্বাদনে নামিব। কিশোরীর মুক্তি কবি আঁকিতেছেন—এক প্রান্তের চিত্র—

“কাঁচপোকা টিপ কপালে এখনো, ছাড়েনি পুতুল খেলা,

রাগ অভিমান কাঁদাকাটা হাসি লেগে আছে সারাবেলা।

সেখে ভাব করা যেমন তেমনি চিমটি কাটিতে পটু,

বৌদিদিদের পরিহাসে হারি রাগিয়া কহিবে কটু ॥.....

চুড়ি কয়গাছি ক্ষণে ক্ষণে বাজে, ঝাম্‌ঝাম্‌ বাজে মল,

আধমুকুলিত উরস পরশি হার করে ঝলমল।

জোড়া ভূক আর অলকার মাঝে পঞ্চমী চাঁদ পাতা,
ডাগর চোখের সবল চাহনি অশ্রু হাসিতে গাঁথা ॥”

অন্তপ্রান্তে—

“রাতের বেলায় জালিয়ে বাতি মুকুরে তার মুখ ‘ছাথে’,
কাঁচলখানি খুলেই আবার মুচকি হেসে বুক ঢাকে ।
দর্পণে সে চুম দেবে তার গালের টোলে লাজ-রাঙা,
ঠোটেই পড়ে ঠোটের চুমা, তাইত প্রাণে ছুখ থাকে ।”

(এইবার বিজ্ঞাপতির পদ । বিজ্ঞাপতির যে-সকল পদ পাইতেছি (সাহিত্য পরিষদ সংস্করণে), তাহার মধ্য হইতে পদগুলি একটু সাজাইয়া লইলে কৈশোর হইতে যৌবন-উন্মেষের একটি চমৎকার ক্রমিকচ্চিত্র পাওয়া যায় । বিষ্ণুপুরাণ ভাগবতের পূর্ণযৌবনা রাবিকা সম্পর্কে কবি-চিত্রের সংশয়-জিজ্ঞাসা— “ছিলে না কি কোনোকালে মুকুলিকা বালিকাবয়সী”—ছিল না, কবি একথা বিশ্বাস করিতে রাজী নন । সুতরাং তিনি শৈশব ও যৌবনের দ্বন্দ্ব বর্ণনা করিতেছেন—

“শৈশব যৌবন দরশন ভেল ।
দুহু দলবলে দ্বন্দ্ব পড়ি গেল ॥
কবহু বাঁধয় কচ কবহু বিথারি ।
কবহু ঝাঁপয় অঙ্গ কবহু উঘারি ॥
অতি থির নয়ন অথির কিছু ভেল ।
উরজ-উদয়-খল লালিম দেল ॥
চঞ্চল চরণ চিত চঞ্চল ভান ।
জাগল মনসিজ মুদিত নয়ান ॥”—(৪৯)

শৈশব যৌবনের দ্বন্দ্বের মধ্য হইতে শৈশবের প্রাধাত্য এখনো চিনিয়া লইতে পারি । এখনো নয়ন চঞ্চল, চরণ চঞ্চল, চঞ্চল চিত ও চঞ্চল অঙ্গ—অথচ যৌবনের পদক্ষেপ হইয়াছে, দেহ-চেতনা জাগিয়াছে ।

শৈশব যৌবনের দ্বন্দ্ব আর একটি পদের উপজীব্য । কাব্যগুণে পদটি উৎকৃষ্টতর ।—

খনে খনে নয়ন কোণ অমুসরঙ্গি ।
খনে খনে বসন-ধূলি তহু ভরঙ্গি ॥
খনে খনে দশন-ছটা ছুট হাস ।
খনে খনে অধর আগে করু বাস ॥

চট্টকি চলয়ে খনে খনে চলু মন্দ ।

মনমথ-পাঠ পহিল অমুবন্ধ ॥

হিরদয়-মুকুল হেরি হেরি খোর ।

খনে আঁচর দএ খনে হোয় ভোর ॥—(৫৪)

এখানে শৈশব ও যৌবন উভয়ে একই দেহমন অধিকার করিয়া আছে । সরল আখির কোণে কটাক্ষের চতুরতা অথচ বসনে ধূলি মাখিবার চাপল্য । প্রাণের সহজ আবেগে হাসির বলক তুলিতেছে বটে, কিন্তু তাহাকে সংবরণ করিতেও সচেষ্ট । টোটি কামড়াইয়া ধরিতেছে অথবা অঞ্চলাগ্রে মুখ ঢাকিতেছে । কবি বলিতেছেন ‘শৈশব তাকুণের’ ‘জ্যেষ্ঠ কনেষ্ঠ’ স্থির করিতে তিনি পারেন নাই, তথাপি পাঠক অমুভব করে, তাকুণের দিকেই ভাবের আধিক্য, বিশেষতঃ এই শেষ দুই পঙ্ক্তি— “হিরদয়-মুকুল হেরি হেরি খোর” ইত্যাদি, ইহা তো নিঃসন্দেহে যৌবন-সমাগমের প্রাতঃকৃত্য ।

ইহার পর একটি পদে যৌবন আসিয়া পড়িয়াছে, অথচ শৈশব যাইয়াও যাইতেছে না । তাহার মাধুর্য্য দেহে মনে আলিঙ্গন করিয়া আছে । যৌবনের সহিত পরিচয় এখনো গভীর হয় নাই, নব-পরিচয়ের চকিত-চাঞ্চল্য, তাহার নিবিড় আকর্ষণ অথচ সশঙ্ক কম্পন যেভাবে—সমগ্র পদে না হউক—একটি উপমার মধ্যে রূপ দরিয়াছে, তাহা অসংবারণ বলিতে পারি । ঐ অবসরে ঐ উপমাটি একেবারে অব্যর্থ, অনিব্যর্থ বলিলেও চলে । শ্রেষ্ঠ কাব্যে ভাব এবং উপমা যে অর্জন্যরীতির, তাহার প্রমাণ এখানে পাইতে পারি । কবি ত্রীরাপার প্রথম যৌবন-চেতনা বর্ণনা করিতে মাত্র দুইটি পঙ্ক্তি লইয়াছেন :

শুনইতে রসকথা থাপয় চিত ।

জইসে কুরঙ্গিনী শুনয়ে সঙ্গীত ॥

রাধার বর্তমান মানসিক অবস্থা বর্ণনা করিতে জগতে বোধ করি ঐ একটিমাত্র উপমান-বস্তু আছে—কুরঙ্গিনী । কোথা হইতে একটা গীতধ্বনি ভাসিয়া আসিতেছে, সদা-সম্বস্ত চঞ্চল বনের হরিণী অকস্মাৎ থামিয়া পড়িল, উৎকর্ণ হইয়া সেই অশ্রুতপূর্ব্ব সঙ্গীত শুনিতে লাগিল । হরিণী নয়—রাধিকা, গীতধ্বনি নয়—রসকথা । চঞ্চলতার মধ্যে হরিণীর ঐ উৎকর্ণ ভঙ্গিটুকু, অপরদিকে সখীপরিবৃত্তা স্বজনবেষ্টিতা রাধিকার গোপন সোৎসুক শ্রবণেচ্ছা—এ সকলই একেবারে একাকার হইয়া গিয়াছে । হরিণী এবং রাধিকা উভয়ের ঐ অরক্ষিত কৌতূহলটুকু যেন কোন্ বেদনার আভাস ঘনাইয়া তুলে, রবীন্দ্রনাথ হইলে হয়ত বলিতেন, উচ্চতমর পঞ্চশরকে মিনতি করিয়াই বলিতেন

কালিদাসের ভাষায় - “মৃদু এ মৃগদেহে মেরো না শর, আগুন দেবে কেহে ফুলেব পর”, “ন খলু ন খলু বাণঃ সন্নিপাতোহমস্মিন্ মৃদুনি মৃগশরীরে পুষ্পরাশাবিবাগিঃ।”

অতঃপর কয়েকটি পদে শৈশব কেমন করিয়া যৌবনে পরিণত হইল, তাহারই দৈহিক পরিবর্তনের বর্ণনা আছে। সেই সকল পদে মানসিক অংশ অল্প বলিয়া উদ্ধার করিবার প্রয়োজন নাই।

বয়ঃসন্ধির পদগুলি সম্পর্কে যে কিঞ্চিৎ আলোচনা হইল তাহার মারফৎ বিজ্ঞাপতির কবি-প্রকৃতির একটি স্বধর্ম আশা করি পরিস্ফুট হইয়াছে - তাঁহার তীক্ষ্ণ দৃষ্টি এবং মনোদক্ষতা। এ বিষয়ে আলোচনা পূর্বেই করিয়াছি এবং বলিতে চেষ্টা করিয়াছি ঐ মনের প্রাধাত্যের পিছনে বুদ্ধির কারু অল্প নয়। তথাপি বিজ্ঞাপতির সকলের বড় কৃতিত্ব, এই বুদ্ধি-দৃষ্টিকে তিনি কাব্য-পর্য্যায়ে উন্নীত করিতে পারিয়াছেন। যে পদগুলি উদ্ধৃত করিয়াছি, সেগুলি যে কাব্য হয় নাই - ইহা কেহ বলিবেন না আশা করি। বিজ্ঞাপতির কাব্যে মনস্তত্ত্বের এই সূক্ষ্মতা বাস্তবিক আশ্চর্য্যের। যখন এমন পঙ্ক্তি পড়ি—

ক্ষণ ভরি নহি রহ গুরুজন মাঝে।

বেকত অঙ্গ ন ঝপায়ব লাজে ॥—

তখন অবাধ হইয়া ভাবি, এতখানি মনস্তত্ত্ব সম্পর্কে অভিজ্ঞতা, ইহা কেমন করিয়া তাঁহার কাব্যের উপাদান হইতে পারিল। অথবা ইহাই স্বাভাবিক; - কবিদৃষ্টি প্রতিভাদৃষ্টি, আর প্রতিভার সম্মুখে আত্মগোপন করিবার ক্ষমতা কাহারো নাই। নচেৎ এতখানি সূক্ষ্মতা—অঙ্গ ব্যক্ত হইয়া পড়িয়াছে, তাহাতে যত না লজ্জা, সেই ব্যক্ত অঙ্গ সম্পর্কে আমি সচেতন, অঙ্গ ঢাকিতে গিয়া ইহা যদি প্রকাশ হইয়া পড়ে, তবে তাহার লজ্জা বহুগুণ, - কেমন করিয়া সম্ভব? আবার এই চিত্র :

কেলিক রভস যব শুনে আনে।

অনতএ হেরি ততহি দএ কানে ॥

ইথে যদি কেও করএ পরচারী।

কাদন মাখী হালি দএ গারী ॥—

কাব্যহিসাবে ইহার উৎকর্ষের কথা বাদ দিলেও মনস্তত্ত্ব হিসাবে? আশ্চর্য্য কবির অভিজ্ঞতা ও অন্তর্দৃষ্টি।

তথাপি বলিতে হইবে ঐ সকল অংশ কাব্য হইয়াছে এবং উৎকৃষ্ট কাব্য। মনস্তত্ত্ব আছে সত্য, কিন্তু তত্ত্ব ছাড়াইয়া বহুদূর পথে কাব্য আগাইয়া চলে।

এইবার আর একটি রস-পর্য্যায় সম্বন্ধে হু'একটি বিষয়ের উল্লেখ করিব। পূর্ব্বরাগে

বিজ্ঞাপতির শ্রেষ্ঠ নাই ইহাই স্বীকৃত। সেখানে চণ্ডীদাস ও জ্ঞানদাসের অবিসংবাদিত প্রাধান্য। কথাটি অনেকাংশে সত্য। তথাপি পূর্বরাগ-পর্য্যায়ের বিজ্ঞাপতি যে নিতান্ত 'গমার' একথা বিশ্বাসযোগ্য নয়। বিজ্ঞাপতির শ্রীকৃষ্ণের পূর্বরাগই—রাধিকার নয়—উৎকৃষ্ট। আমরা পূর্বরাগ বলিতে রাধিকার পূর্বরাগই বুঝি। রাধিকার পূর্বরাগের ক্ষেত্রে বিজ্ঞাপতি ঐ দুইজন কবির কাছাকাছিও পৌঁছিতে পারেন নাই। একথা অবিশ্যস্ত হইলেও সত্য। এমন কি 'ভাল' বলিতে পারা যায় এরূপ একটি পদও রাধিকার পূর্বরাগ-পর্য্যায়ের নাই। যেগুলিকে অপেক্ষাকৃত শ্রেষ্ঠ মনে হয়, সেগুলি বাঙালী কোন কবির রচনা, যিনি চৈতন্যোত্তর যুগের। তথাপি শ্রীকৃষ্ণের পূর্বরাগের পদ এমন উৎরাইল কি করিয়া? এখানেও সেই একই উত্তর—বিজ্ঞাপতির কবি-প্রাণের স্বপ্ন, যাহা ভাব ছাড়িয়া রূপ, রস, ছাড়িয়া অর্থের দিকে বেশী ঝুঁকিয়া পড়ে। শ্রীকৃষ্ণের পূর্বরাগ তো আর কিছুই নহে, তাহা রূপমুগ্ধতা। রাধিকার রূপ দেখিয়া কৃষ্ণের মন মজিয়াছে। বিমুগ্ধ প্রাণের সেই উচ্ছ্বসিত স্তবোৎসার শ্রীকৃষ্ণের পূর্বরাগ-বিষয়ক পদে এরূপ অল্পম-সুন্দর হইয়া উঠিয়াছে। কিন্তু শ্রীরাধার প্রেমপ্রীতির পরিচয় সম্পূর্ণ ভিন্ন। রাধিকা নারী। তাহার মধ্যে যতই হউক নারী-স্বভাব একটা মধুর হৃদয়বস্তুর প্রাধান্য থাকিবেই—আধ্যাত্মিকতার কথা যদি ছাড়িয়াও দিই। তাহাই যখন কৃষ্ণপ্রেমের দেউলে পূজা নিবেদন করিতে অগ্রসর হয়, তখন—নারী বলিয়াই—একপ্রকার পূজারিণীর গুচি-সুশ্লিষ্ট ভাবের প্রাবল্য ঘটে। বিজ্ঞাপতি ইহার অগ্ণা করিয়াছেন, তাই তাহা সার্থক কাব্য হয় নাই। চণ্ডীদাস-জ্ঞানদাস তাহার পূর্ণ স্বযোগ গ্রহণ করিয়া পূর্বরাগের রাধিকাকে অপূর্ব-রাগোন্মত্তা করিয়া তুলিয়াছেন। বাস্তবিকই অপূর্ব। চণ্ডীদাস-জ্ঞানদাসের পূর্বরাগ—আক্ষেপাহরণের তুলনা আছে নাকি? সেখানে রূপ নয় সেখানে নাম, সেখানে মন নয় সেখানে প্রাণ—'জপিতে জপিতে নাম অবশ করিল গো', 'অন্তরে বিদরে হিয়া কি জানি কি করে প্রাণ'। বিজ্ঞাপতির রাধা তো তেমন করিয়া আকুল হইতে পারে না। এই পর্য্যায়ের কাব্যে 'রাধার দেহের ভাগ অধিক' ইহা তো দিবাসত্য। নারীর রূপতৃষ্ণা উৎকৃষ্ট কাব্য হইতে পারে কিনা সন্দেহ যদি তাহার মধ্যে রূপাতীত কিছু না থাকে। অপর পক্ষে নারী-রূপই যুগে-যুগান্তরে কবি-চিত্তের ধূপ-দীপারতিতে রহস্ত-কল্পনাময় হইয়া মূর্তি ধরিয়াছে। একজন পুরুষ যখন সেই রূপ দর্শন করেন, তখন রূপ-লালসার বর্ণনার মধ্য দিয়াই—যদি উচ্চতর কোনো মনোভাব অল্পস্থিত থাকেও—কাব্যে উত্তীর্ণ হওয়া সম্ভব। পুরুষ কৃষ্ণ যখন নারী রাধিকার রূপ 'নেহারিছেন', তখন কৃষ্ণের দৃষ্টি কবির দৃষ্টিতে রূপান্তরিত হইয়া গিয়াছে। কৃষ্ণ নয়, স্বয়ং কবিই তাঁহার

আরাধ্যা সৌন্দর্য-মূর্তির বন্দনাগান রচনা করিতেছেন। বঙ্গদেশে যে কারণে উৎকৃষ্ট, শ্রীকৃষ্ণের পূর্বরূপও সেই কারণে। রাধিকার রূপ নয়ত শেল, একেবারে পাঁজর ভেদিয়া হৃদয়ে বসিয়া গেল—হৃদয় ধসিয়া গেল। প্রজ্ঞতির সময় ছিল না, আত্মরক্ষার উপায় ছিল না, পথে যাইতে বুঝি একবার নয়নের কোণে,— একেবারে সম্মুখে প্রত্যক্ষও নহ,—সে রূপ লাগিয়াছিল—‘ভাল করি পেখন ন ভেল’— তাহার পরেই—

মেঘমাল সঞ্চে তড়িতলতা জুহু

হৃদয়ে শেল দেই গেল।

কপ-শেল-বিন্দু শ্রীকৃষ্ণের কামনার হৃদয়-মন্ডন-জালা কয়েকটি পদে সত্যাকার রসকপ ধরিয়াছে :

অপরূপ পেখল রামা

কনকলতা অবলম্বনে উয়ল

হরিণ-হীন হিমধামা ।—(৩৪)

যব—গোধূলি সময় বেলি

ধনী—মন্দির বাহর ভেলি।

নবজ্বলধর বিজুরি-রেহা

দ্বন্দ্ব পসারি গেলি ॥ (৪২)

গেলি কামিনী গঙ্গা গামিনী

বিহসি পলটি নেহারি ।.....

চরণে যাবক হৃদয় পাবক

দহই অঙ্গ মোর ॥ (৭৫)

চিকুর গরএ জলধারা।

জনি মুখশলী ডর

রোয়এ অঁধারা। (৩৫)

আবার আধুনিক কবির মৌলিকতা হরণ করিয়াছে এমন কাব্য-পঙ্ক্তিও আছে—

তলু সঞ্চে মিলি গেও সজল নীলাধর

বিন্দু বিন্দু ঝরু বারি।

রোয়ত সাটী, মোহে ধনী তেজব

পহিরব আনহি সাড়ী ॥ (৪৬)

—না, রবীন্দ্রনাথের কাব্যে একটু পার্থক্য আছে, হৃন্দরীর হৃনীল বসন স্নানের পূর্বেই অঙ্গচ্যুত হইয়া কাদিতেছে—

“তীরে শ্বেতশিলাতলে হৃনীল বসন
লুটাইছে এক প্রান্তে স্থলিতগৌরব
অনাদৃত ; শ্রীমঙ্গের উত্তপ্ত মৌরভ
এখনো জড়িত তাহে, আঘুপরিশেষ
মূর্ছাবিহিত দেহে যেন জীবনের লেশ ।
লুটায় মেখলাখানি ত্যজি কটিদেশ
মৌন অপমানে ।”

যে সামান্য পদাংশ উদ্ধৃত করিলাম, তাহাতে কবি-বাণ্-নির্মিতির দৃষ্টান্ত প্রত্যক্ষে আদিয়াছে। এই রূপনির্মাণ-কৌশলের জগৎ রচনা উচ্চতম লিরিক অহুভূতির আধার না হইয়াও চমৎকৃতি লাভ করিতে পারে। এবং বিদ্যাপতিতে তাহাই দেখিলাম। বিদ্যাপতির সঙ্গে চণ্ডীদাসাদির পার্থক্য এইখানে। বিদ্যাপতি কাব্যের form-কে যেমন প্রাধান্য দিয়াছেন, চণ্ডীদাস বা জ্ঞানদাস তেমন দেন নাই। বিদ্যাপতির দৃষ্টিমূলে আসক্তি ছিল, কিন্তু আসক্তি কেবল উপভোগে, তিনি ভোক্তা। কাব্যে রূপদান করিতে গিয়া ঐ আসক্তির সূত্র ধরিয়া তাঁহার ব্যক্তিগত হৃদয়াবেগ সীমাহারা হয় নাই। তাঁহার কবি-দৃষ্টি একান্তই বস্তু-বিভোর। অপরপক্ষে চণ্ডীদাস-জ্ঞানদাস ভোক্তা হইতে ভক্ত অবিক, তাঁহাদের কাব্যে রূপমুগ্ধতা হইতে স্বরূপ-বিভোরতা প্রধান। জ্ঞানদাসের একটি অতুল্য পদ—‘রূপ লাগি আখি বুঝে গুণে মন ভোর’—রূপাহরণের পদ বলিয়াই কথিত। কিন্তু ইহার মধ্যে রূপের প্রতি অহুরাগ কতটা আছে তাহা সন্দেহজনক। রূপ কতখানি অহুরাগ জন্মাইয়াছে ইহা তাহারই কাব্য-কথা। যাহার “পুলকে পুরয়ে তহু শ্যাম পরমঙ্গ” সে আবার কোনদিন ভাল করিয়া রূপদর্শন করিয়াছে কি, সন্দেহ হয়। বিদ্যাপতি সত্যি তাহা করিয়াছেন, তাঁহার কাব্য-শিষ্ট গোবিন্দদাসও তাহাই। তাই বিদ্যাপতির পক্ষেই (গোবিন্দদাসেরও) আত্ম-আবেগ সংবরণ করিয়া রাধিকার সৌন্দর্য্য দেখিতে অগ্রদর হওয়া সম্ভব হইয়াছে। আত্মপ্রাধান্য প্রতিষ্ঠিত নয় বলিয়া, নানা পরিবেশে শ্রীরাধার সৌন্দর্য্যের নব নব বিকাশ কবি প্রত্যক্ষ করিতে পারিয়াছেন। এবং এইজন্মই তাঁহার কাব্যে চিত্রবর্ণ—নাটকীয়তা—উপমা-উৎপ্রেক্ষার ছড়াছড়ি। যে তন্ময় দৃষ্টি হইতে চিত্ররস ও নাট্যরসের উদ্ভব সম্ভব, তাহা বিদ্যাপতিতে কী পরিমাণ বর্তমান ছিল, তাহা পূর্বোদ্ধৃত বয়ঃসন্ধি ও পূর্বরাগের পদগুলি হইতে প্রমাণ হইয়াছে। কথায়

এমন টুঙ্কল অত্রান্ত ছবি আঁকিতে তো সে-যুগে আর কাহাকেও দেখি না। এমন কি গোবিন্দদাসও এবিষয়ে তাঁহার নিয়ে। তিনিও ছবি আঁকিয়াছেন কিন্তু তাঁহার অখণ্ড-প্রবাহিত ছন্দহিলোল সে-চিত্র উপভোগে বাদ সাধে। বিদ্যাপতির অপেক্ষাকৃত ছন্দ-পঙ্কতি পদের অর্থ ও সেই সূত্রে চিত্রটি অধিকতর হৃদয়গোচর করে। এবং অনেকাংশে বিদ্যাপতির প্রাচীন কবি-ঐতিহ্য পরিচয় এ বিষয়ে তাঁহার শ্রেষ্ঠত্বের স্মারক। বয়ঃসন্ধিতে তিনি প্রাচীন কবি-পন্থার সাহায্য পান নাই। যদি বিদ্বিপ্ত ইঙ্গিত সামান্য কিছু থাকেও, তাহাকে কাছে পরিণত করিবার সমুদয় কৃত্তিব তাঁহারই। গোবিন্দদাসের কবি-দৃষ্টিতে এই মৌলিকতা নাই। আবার বিদ্যাপতির কাব্যে যে উপমা-প্রাধাত্যের উল্লেখ করিয়াছি, তাহাও তাঁহার কবি-বৈশিষ্ট্যকে ধরাইয়া দেয়। ভারতীয় কাব্যকাহিনীতে উপমা-প্রাধাত্য অত্যধিক। জাতিহিসাবে আমরা প্রতীক-উপাসক। স্তব্রাং বাস্তব জীবনচিত্র হইতে, সেই জীবনকেই এক আবাস্তব-মনোহর জগতে স্থাপন করিয়া,—যেখানে উপমা-উৎপ্রেক্ষা রূপক-অলঙ্কারের অবাধ সঞ্চরণ—আমরা কাব্যকে মর্ত্য হইতে বিচ্ছিন্ন করিয়া ফেলিয়াছি। শিল্পজগতে,—কি চিত্র, কি কাব্য,—আমরা ‘ছান্দসিক’ রীতির পক্ষপাতী; ঐ রীতি আর কিছুই নয়, একটি বস্তুর গড়ন ও রঙের সহিত অন্তবস্তুর গড়ন ও রঙের সাদৃশ্য উপলব্ধি ও সংকেতে তাহার রূপায়ণ। আমরা সাধারণতঃ একটা বস্তুর সহিত শ্রেণীগত ছন্দাভূগ অথ একটি বস্তু প্রায়শঃ মনুষ্যোত্তর প্রাণী বা বস্তুর স্বস্থ ভাবৈব্য উপলব্ধি করি এবং তাহাকেই সর্বাঙ্ক্ষেপে উপমান হিসাবে ব্যবহার করি। যেমন নারীর গতিগমনের সঙ্গে গজগমনের, পদ্মপর্ণের সঙ্গে চক্ষুপল্লবের, বিশ্বের লালিমার সঙ্গে অধরোষ্ঠের। এই বস্তুগুলি ‘ধ্রুবমান’ হিসাবে ব্যবহৃত হয়, এবং কবি বা চিত্রীগণ উপমা দিতে গিয়া, সাদৃশ্য উপলব্ধি করাইতে গিয়া, ঐ সকল ধ্রুবমানের যথেষ্ট ব্যবহার করেন। এই রীতির অত্যধিক অহুশীলনে অস্পষ্টতা এবং জীবন-বিমূখতার দোষ ঘটে। বিদ্যাপতির কাব্যে উপমা-ব্যবহারে এই দোষ নাই তাহা নয়, তথাপি তিনি অনেকাংশে ইহাকে অতিক্রমও করিয়াছেন। তাঁহার কতক মৌলিক উপমা ইতিপূর্বে উদ্ধার করিতে চেষ্টা করিয়াছি। তাহার মধ্যে কবিপ্রাণের স্বাধীনতা ঘোষণার অভিজ্ঞান আছে। আবার অনেক ক্ষেত্রে কবি গতানুগতিক উপমা-উৎপ্রেক্ষার মধ্যে নূতন রসমৌলিক স্থাপন করিতে পারিয়াছেন। সেই সকল স্থানে কবি প্রাচীন কাব্যরীতির অহুসারক বটে, কিন্তু নবজীবনায়নের গৌরব তাঁহার। হু’একটি দৃষ্টান্ত :

গিরিবর-গরুড় পয়োধর-পরশিত

গৌম গজমোতিক হারা।

কামকধু-ভরি কনয়া শত্ৰু পরি

চারত সুরধুনী ধারা ॥—(৩৪)

এই উপমাটির মধ্যে মৌলিকতা কোথায়, গতাত্মগতিকতা তো অল্প নয়। গিরিবরতুল্য পয়োধর, কধুতুল্য কণ্ঠ, শত্ৰুতুল্য পয়োধর,—সব তো ব্যবহার-পরিচিত। তথাপি মুহূর্তমধ্যে উপমাটি অন্তরে আনন্দসঞ্চার করে কেন, না আশ্চর্য্য উহার ব্যঞ্জন। কণ্ঠে গজমোতির হার বক্ষের উপর দিয়া নামিমাছে, এক মুহূর্তে মনে যে চিত্র-কল্পনা জাগিল,—কনককাস্তি শিব-মণ্ডকে সুরধুনীর ধারাভিষেক হইতেছে,—তাহা একেবারে মন লুটিয়া লয়। দেহবর্ণনার মধ্যে বিদেহ সত্যের আবির্ভাবে কবির যে কৃতিত্ব, তা যে-কোন প্রশংসার যোগ্য। এ যেন মধুযামিনীর প্রেমসী প্রভাতে দেবীর বেশে উদ্ভিত হইল, যেন অকুণ্ঠিত সৌন্দর্য্যের সম্মুখে :

“পরক্ষণে ভূমি-পরে

জান্ন পাতি বসি, নির্ঝাঁক বিশ্বয়ভরে,

নতশিরে, পুষ্পধনু পুষ্পশরভাব

সমর্পিল পদপ্রান্তে পূজা-উপচার

তুণ শূন্য করি।”

আর একটি দৃষ্টান্ত লওয়া চলে; সেখানেও দুইটি যুগ্মবস্তুর কাব্যে স্প্রচলিত অন্তরঙ্গতার সাহায্য গ্রহণ, কিন্তু কবি যে-ভাবে তাহার ব্যবহার করিয়াছেন, তাহাতে কী অসীম আকৃতিই না ব্যক্ত হইয়াছে—

মরসিজ় বিহু সর সর বিহু মরসিজ়

কী মরসিজ় বিহু সুরে।

যৌবন বিহু তন তন বিহু যৌবন

কী যৌবন পিয়-দূরে ॥ (৭৬৭)

এমন বলতর দৃষ্টান্ত কবির কাব্যে পাওয়া যাইবে যেখানে ভাবানুবন্ধের দিক হইতে কবি প্রাচীন কবি-ঐতিহ্যকে অতিক্রম করিতে পারেন নাই, অথচ তাঁহার স্বকীয় প্রতিভাও আপন স্বরূপে আপনি ধন্য। যথাঃ দুইটি পরিচিত উদ্ধৃতি—

লোচন জহু থির ভৃঙ্গ আকার।

মধু মাতল কিএ উড়ই ন পার ॥

এবং

চঞ্চল লোচনে বকু নেহারনি

অঞ্জন শোভন তায়।

জহ্নু ইন্দীবর পবনে ঠেঁল

অলিভরে উলটায়॥

বিজ্ঞাপতির প্রথম স্তরের কাব্য ও কবিত্ব সম্পর্কে আলোচনা একটু দীর্ঘ হইয়া পড়িল। এই আলোচনার মধ্যে, — সফল ন্যূ হইলেও, — যে কথাটি বুঝাইতে চেষ্টা করিয়াছি তাহা বিজ্ঞাপতির বাঙ-নির্মিতির কৃতিত্ব। সাধারণতঃ আমাদের মতামত বড় প্রান্তিক হইয়া পড়ে। স্বীকার এবং অস্বীকারের দুই অন্তে আমাদের বিচারবুদ্ধি ছুটিয়া বেড়ায়। বিজ্ঞাপতি যখন মনকে টানে নাই, তখন তাঁহাকে নিতান্তই আলঙ্কারিক কবি বলিয়া নস্যাৎ করিবার একটা চেষ্টা অথবা অপচেষ্টা ইত্যন্তঃ লক্ষ্য করিয়াছি। তাহার বিকক্ষে আমাদের বক্তব্য ছিল। কাব্যসাধনার এক অধ্যায়ে অন্ততঃ কবি যে আলঙ্কারিকতার অহুর্ভবন করিয়াছেন তাহা সত্য। কিন্তু অলঙ্কারপ্রিয়তা কেবল সেখানেই সীমাবদ্ধ থাকে নাই। অলঙ্কার এবং তদতিরিক্ত সৌন্দর্য্য কবি নিকাশন করিতে পারিয়াছেন। তাঁহার এই যুগের কাব্যে যে কালচারের ছাপ মুদ্রিত তাহা আড়দর স্থল নয়, — মার্জিত-দ্যুতি, সূন্দর-রমণীয়। এই শ্রেণীর কাব্যে যতদূর কৃতিত্ব সম্ভব বিজ্ঞাপতি বোধকরি তাহার প্রায় শেষ সীমা পর্য্যন্ত পরিক্রমণ করিতে পারিয়াছেন। সংস্কৃত আলঙ্কারিক রীতিবিলাসের ক্ষেত্রে প্রাচীন কবি ‘কবিরাজ’, ‘স্ববন্ধু’ ও ‘বাণভট্টকে’ চতুর্থ-গ্রহিত নির্দেশ করিয়া সর্কশেষ কথা কহিবার একটা আশ্বপ্রসাদ অভূতব করিয়াছেন। তাঁহাদের সৌভাগ্য অথবা দুর্ভাগ্য উত্তরকালের বিজ্ঞাপতির কবি-কৃতি দেখিয়া খাইতে পারেন নাই। বিজ্ঞাপতি তৃতীয়েন পাদপূরণে চতুর্থ হইয়া সগৌরবে বিরাজ করিতেছেন।

(২)

১. বিজ্ঞাপতির কাব্য রীতি-মূলকতা অথবা রীতি-সর্কস্বতার মধ্যে থামিয়া ছিল না। তাঁহার কাব্যসাধনার এক গভীরতর এবং শ্রেষ্ঠতর দিক ছিল। সেই কাব্য-পর্যায়ই বর্তমানে আমাদের আলোচ্য। তৎপূর্বে কয়েকটি সাধারণ কথা বলিয়া একটু ভূমিকা করিব। আলোচনার আরম্ভে ইতিপূর্বে বিজ্ঞাপতিকে তাঁহার স্ব-যুগের কবি সর্কভৌম বলিয়া উল্লেখ করিয়াছি। তাহার স্বপক্ষে কয়েকটা যুক্তিও এই প্রসঙ্গে আসিয়া পড়িবে।

বিজ্ঞাপতির সমগ্র কাব্য-সম্পদ প্রত্যক্ষ করিয়া সে ধারণা জাগিবে—অন্ততঃ আমার যাহা জাগিয়াছে, বিজ্ঞাপতি যত বড় কবিই হউন, কাব্যসাধনা তাঁহার জীবন-

সাধনার অংশ-বিশেষ মাত্র, কবি-জীবন তাঁহার সমগ্র জীবন নয়। একটি বৃহত্তর ব্যক্তিত্ব, একটি বিরাটতর চরিত্রের অন্ততম দিক ঐ কাব্যসাধনা—হয়ত শ্রেষ্ঠ দিক। কবিগণের স্বরূপ-বৈশিষ্ট্য বুঝাইতে গিয়া আমরা প্রায়শঃ যে শব্দটি ব্যবহার করি, সেই “কবি-ব্যক্তিত্ব” কথাটি সেই যুগে বিদ্যাপতির প্রতি যেকোন স্তম্ভগুণ, সেরূপ অন্য কাহারো পক্ষে নয়। আমি বিদ্যাপতির সমযুগ বা অব্যবহিত পরযুগের যে শ্রেষ্ঠ কবি চণ্ডীদাস, তাঁহার গৌরব এই মন্তব্য দ্বারা বিন্দুমাত্র ক্ষুণ্ণ করিতেছি না। সামান্য মন্তব্যে ক্ষুণ্ণ-গৌরব হইবার কবি চণ্ডীদাস নহেন। তথাপি কবির সে স্বরূপ-স্বাতন্ত্র্য, যাহা কাব্যের একটি নির্দিষ্ট form-সৃষ্টির উপর নির্ভর করে, তাহা বিদ্যাপতিতে সমধিক। বিদ্যাপতির কাব্য তাঁহার নামাঙ্কিত না থাকিলেও তাঁহারই বনিয়া যেমন অসংশয় হওয়া যায়, চণ্ডীদাসের তেমন নয়। চণ্ডীদাসের একটি শ্রেষ্ঠপদ, যে কোন ভাব-গভীর শ্রেষ্ঠ কবির হইতে পারে, তাঁহার কাব্যের নিদ্বিগ্নতাই তাঁহার বিশেষত্ব। কিন্তু এই লক্ষণমাত্র-সহায়ে একজন কবির কাব্য না জানিয়া চেনা শক্ত। কিন্তু বিদ্যাপতির ব্যক্তিত্ব বিদ্যাপতির কাব্যে এমনই দীপ্তিমান যে চিনিতে দ্বিধা হয় না। এবং কবির এই যে কবি-ব্যক্তিত্ব, তাহা একটি জীবন-ব্যক্তিত্বের অংশস্বরূপ তাহাও অল্পভবে ধরা দেয়। বিদ্যাপতির চরিত্র গড়িয়া উঠিয়াছে এক বিশেষ যুগে, বিশেষ সমাজে ও বিশেষ প্রতিবেশে। সেই সমাজ এবং সেই যুগ তাহার ঘত-কিছু শ্রেষ্ঠত্ব লইয়া বিদ্যাপতির মধ্যে ধরা পড়িয়াছিল, ইহাই আমার বিশ্বাস। অর্থাৎ বিদ্যাপতি সেই যুগের প্রতিনিধি-পুরুষ। আমার এই বিশ্বাসের উপাদান সংগ্রহ করিয়াছি তাঁহার কবি-সাধনা ও কবি-ভাবনার অন্তরঙ্গ আভ্যন্তর সাক্ষ্য হইতে এবং বাস্তব জীবন কাহিনীর সামান্য প্রাপ্য বিবরণ মারফৎ। বিদ্যাপতি রাজসভার কবি ইহা বলিলে তাঁহার সমক্ষে দ্বটুকু বলিয়া ওঠা হয় না, ভারতচন্দ্র ও রাজসভার কবি। রাজসভার বাক ও বুদ্ধির চতুরালি ভারতচন্দ্রেও রূপ ধরিয়াছে ভাল। বিদ্যাপতি চতুর কবি সত্য, কিন্তু তাঁহার বৈদম্ব্যের উৎস আরো গভীরে। তিনি রাজসভা তো বটেই, নিজ অন্তঃপ্রবৃত্তি এবং কচি-হৃথের মুখ চাহিয়াও ঐ হৃদে কাব্য রচনা করিয়াছেন। অর্থাৎ তাঁহার কাব্যে যে বৈদম্ব্যের স্বর, তাহা নিছক কোনো বহিরঙ্গ প্রেরণাজনিত নহে, তাহা তাঁহারই চরিত্রের অনিবার্য উদ্ভব। বিদ্যাপতির জীবনকাহিনী সেই সাক্ষ্যই দেয়। তিনি মহা অভিজ্ঞাত পরিবারের সন্তান; তাঁহারা অনেক পুরুষ ধরিয়া মিথিলার রাজপরিবারে অমাত্য-সমক্ষে সংশ্লিষ্ট। এমন পরিবারের সন্তান হইয়া, জন্ম ও পরিবেশ-প্রভাবে সে-যুগের সর্বশ্রেষ্ঠ কালচারের উত্তরাধিকার গ্রহণ ও অঙ্গীকার করিয়া, বিদ্যাপতির যে চরিত্র পূর্ণায়ত হইল, তাহা স্বভাবতঃই সাবেগ-আকুল

ভক্ত-ভাবুকের চরিত্র নয়। তাঁহার মধ্যে জ্ঞানের ও বুদ্ধির পাকা রঙ ধরিয়া গিয়াছে। ইহাই অবলম্বন করিয়া তিনি কবিজীবন আরম্ভ করিয়াছিলেন। আবার বংশপ্রভাবে কবির জীবনে একটা ব্যাপকতার অঙ্গুর ঘটিয়াছিল।) বিজ্ঞাপতি স্বয়ং উত্তর জীবনে যে মতাবলম্বী হউন না কেন (এবং সে-সম্পূর্ণে স্থির মীমাংসা দুঃক্লেশ) তাঁহার বংশ যে শিব-শক্তি মতাবলম্বী তাহাতে সন্দেহ নাই। শিব ও শক্তির প্রতি অতুরাগ তাঁহার বংশজনিত; শিক্ষা দীক্ষা ও প্রতিবেশ-প্রভাবে তিনি বহু বিচিত্র জীবনরমের আবাদনও করিয়াছেন। সুতরাং তাঁহার মধ্যে দে-যুগে বিরল একটি ঐশ্বর্য দেখা যায়—ব্যাপকতা। কাব্যোৎকর্ষের পক্ষে গভীরতার সঙ্গে ব্যাপকতার মাহাত্ম্য ও অনস্বীকার্য। একটি কবিতা বা পদের ক্ষেত্রে এই ব্যাপকতা স্রবের উদারতা ও প্রসারতায় নির্ভর করে মত, কিন্তু ঐ ব্যাপকতাকে বুঝিয়া লইতে হয় কবি-প্রচেষ্টার বৈচিত্র্য ও বিস্তারে। *বিজ্ঞাপতির মত বহুব্যাপক কাব্যরীতি ও কাব্য-বস্তব্যবহারী কবি সে-যুগে আর কে? তিনি রাধাকৃষ্ণের পদাবলী রচনা করিয়াছেন এবং তাঁহার কবিত্বাতি ইহার জন্ম। তথাপি বিজ্ঞাপতিকে বুঝিতে হইলে তথ্য হিসাবেও অন্ততঃ তাঁহার অন্ততঃ কাব্য-প্রয়াসের পরিচয় প্রয়োজন। বিজ্ঞাপতি শিববন্দনা বচনা করিয়াছেন, মহামায়ার ছন্দে অর্চনা করিয়াছেন, বারমাস্তার প্রকৃতি কাব্য ও নিছক বসন্তের বর্ণনা লিখিয়াছেন। একটি সম্পূর্ণ লৌকিক ভাষা অবলম্বনে এক যুগের বাস্তব সমাজের রাষ্ট্রের পরিচয় রাখিয়াছেন, এবং কি করেন নাই। ধর্ম, সমাজবিধি, পূজা-বিধি অবলম্বনে বহুতর সংস্কৃত গ্রন্থ রচনাতেও তাঁহার ক্লাস্তি ছিল না। আবার ছিল তাঁহার সুন্দর দীর্ঘায়ত দেহছন্দ। তাঁহাকে সে-যুগের কালচারের প্রতিভা বলিব না! এমনই এক চরিত্র যখন কাব্যরচনা করিতে বসে তখন অনিবার্যভাবে কাব্যে তাঁহার ব্যক্তিত্বের ছায়াপাত ঘটিয়া যায়। বিজ্ঞাপতির প্রথম স্তরের কাব্যে তাঁহার এই ব্যক্তিত্ব-পরিচয় বিস্তৃতভাবেই গ্রহণ করিয়াছি। form-আহুগতাই সেই ব্যক্তিত্ব। সে-যুগে লিরিক আত্ম-উচ্ছ্বাসের রীতি ছিল না। সুতরাং কবির ব্যক্তিসত্তার পরিচয় তাঁহার কাব্যের বিশিষ্ট রীতি-অনুহতির মধ্যেই প্রচ্ছন্ন থাকিত। বিজ্ঞাপতি তাঁহার রূপ-প্রাণ পদসমূহে আপনাকে যথাসম্ভব সংবরণ করিয়া যে তন্ময় কবিদৃষ্টির পরিচয় দিয়াছেন, সেখানে তাঁহার সেই আত্মসংবরণই আত্ম-ব্যক্তিত্বের অভিজ্ঞান। ঐ যে আত্মাভিমান-বর্জিত রূপ-বিভোরতা উহাই বিজ্ঞাপতিকে চিনাইয়া দেয়।

✓ দ্বিতীয় স্তরে কবির রচনায় গভীরতার ছায়া নামিল। উল্লাস-উজ্জলতার দিগ-লোকের উপর সঘন-সজল প্রচ্ছায় টানিয়া বেদনার অন্তর-লক্ষী বিজ্ঞাপতির কাব্য-সৃষ্টির উপর নামিয়া আসিলেন। বিজ্ঞাপতি রূপ দেখিয়া মজিয়াছিলেন, এইবার রসে

মরিলেন। ভুল হইল বুঝি, শ্রীরামকৃষ্ণ বলিতেন, “অমৃতের সাগরে ডুবলে মরণের ভয় নেই।” রস-সাগরে ডুব দিয়া বিজ্ঞাপতির নবজন্ম ঘটিল। তখন যে-স্বরে ৭ সুরে গান ধরিলেন তাহা মানব জীবনের অনাদি হৃদয়-উৎস হইতে উথিত অনন্ত হৃদয়-রাগিনী। চিরন্তন ধ্বনি-মূর্ত্তনাকে বিজ্ঞাপতি তাঁহার কবি-প্রাণের ছিদ্রপথে আহ্বান করিয়া, অল্পভবের আলোছায়া পথে ঘুরাইয়া ফিরাইয়া আবার সেই সুর-বন্তাকে মুক্ত করিয়া দিয়াছেন। চিরন্তন মানবের জীবন-বাণী বহন করিয়াছেন যে বিজ্ঞাপতি, তিনি নিত্যযুগের কবি, চণ্ডীদাসও তাই। তবে পার্থক্য কোথা? আছে। // বিজ্ঞাপতি চণ্ডীদাসের মত নির্বিশেষকে অবিকৃত সত্তায় ফুটাইতে পারেন নাই, তাঁহার নির্বিশেষ বিশেষের মধ্য দিয়াই রূপ ধরিয়াছে। তাহাই বিজ্ঞাপতির ব্যক্তিত্ব। আবার শ্রীরামকৃষ্ণের উপমাই ধরি; তিনি রহস্তচ্ছলে বলিতেছেন,—“কানার ঈশ্বরদর্শনে মূক্তি হোলো, কিন্তু কানা চোখটা রয়ে গেল।” কথাটি গভীর। বিজ্ঞাপতি নিখিল প্রাণের বেদন-মহোৎসবে যতই মাতিয়া উঠুন, নিজের ব্যক্তিত্ব বিসর্জন দিতে পারেন নাই; ভাবের সমুদ্রে তিনি বাঁপ দিলেন না, তরী ভাসাইলেন। ঐ form-এর কঠোর বন্ধনই তরীর বহিরবয়ব। “যদি গাহন করিতে চাও এসো নেমে এসো হেথা গহন তলে”—সে কবি চণ্ডীদাস।)

শেষ পর্য্যন্ত বিজ্ঞাপতির এই যে কবি-আমিত্বের রক্ষা, ইহা তাঁহার কাব্যের উৎকর্ষ ও অতুৎকর্ষের কতদূর সহায়ক হইয়াছে, সে-প্রশ্ন মনে আসা স্বাভাবিক এবং চণ্ডীদাস-জ্ঞানদাসের এই শ্রেণীর পদের সঙ্গে তুলনার ইচ্ছাও জাগিবে। সে প্রশ্ন আসিবার পূর্বে এই শ্রেণীর পদের ক্রম-পারস্পর্য্য একবার নিরীক্ষণ করিব।

অভিসার পর্য্যায় হইতে বিজ্ঞাপতির কাব্যে রীতি-অতিরিক্ত রস বা ভাবের রঙ ধরিয়াছে। তথাপি এই পর্য্যায়ের সম্পূর্ণ আধুনিকতার প্রভাব কবি এড়াইতে পারেন নাই। অধ্যাত্মভাবগোতক পদের পাশাপাশি নিতান্ত লৌকিক সুরের পদও আছে। অবশ্য এই লৌকিক স্থূলতার প্রভাব কবি কোনদিনই অতিক্রম করিতে পারেন নাই। বিরহের পদে অতুৎকষ্ট ভাব ও রূপসৃষ্টির পরিচয় দিয়া যখন তিনি জগৎ কবিসভার সভাসদ, তখন তাহারই মধ্যে এমন ছ’একটি পদ রচনা করিয়া ফেলিয়াছেন যাহা তাঁহার মর্যাদাকে অবমানিত করিবে। তবে একটা জিনিষ স্বীকার্য্য, ঐ সকল নিম্নস্তরের পদের রচনাকাল আমাদের জ্ঞাত নয়। এবং কবি জীবনের এক এক স্তরে যে এক এক পর্য্যায়ের কাব্য রচনা করিয়াছেন, তাহা না হওয়াই সম্ভব। হয়ত নিম্ন-স্তরের পদগুলি অপরিণত বয়সের অপরিপুষ্ট কবি-প্রতিভার স্মারক, কে বলিতে পারে? যাহা হউক অভিসারের পদে আমরা উভয় শ্রেণী ও সুরের পদই প্রায় সমান সমান

পাইতেছি—লৌকিক ও লোকোত্তরতার ইঙ্গিতবাহী। অভিসারের পদে লৌকিকতা যুগ বিচারে এবং কবি-ধর্ম বিচারে নিতান্ত অসম্ভব নয়। কিন্তু সেই সঙ্গে কবি-চিত্তের অন্তর্ভবণালিতা মানিতে হইলে—অভিসারের দুর্জয় আত্মবিশ্বাস, স্বহৃৎসহ কৃচ্ছ সাধনা, সদাশক্তি অথচ অনুরাগমণ্ড পদক্ষেপ—এ-সকলই একপ্রকার উচ্চতর জগতে মনকে উঠাইয়া দিবে। আধ্যাত্মিকতার জ্ঞান কেবল ঈশ্বর ঈশ্বর করিয়া আকুল হইবার প্রয়োজন নাই, মহত্ত্বের শ্রেষ্ঠত্ব যেখানে, সেই সাধন-দহনে নিম্নল আত্মবিকাশের ক্ষেত্রে ইঞ্জিয়ার বাধন মাত্র অতিক্রম করিয়া যায়ই। তাই জগতের শ্রেষ্ঠ প্রণয়কাব্য, যাহা মিলনে নয় বিরহে লগ্ন, তাহা মাতৃবের অধ্যাত্মচেতনাকেই পরিতৃপ্ত করে। “তহিঁ অতি দূরতর বাদর দোল”—ইহা মাথায় করিয়া কেহ যদি পথে বাহির হয় প্রিয় মিলনের আকাঙ্ক্ষায়, তবে সে প্রিয়কেই দেবতা করিয়া তোলে, সেই পরম পুরুষের আশ্রয় তাহার উপর উচ্চত হইয়া থাকে—“যে যেভাবে আমাকে ভজনা করে সে সেই ভাবেই আমাকে লাভ করে।” ক্ষুরদারার ছায় নিশিত ও দুর্গম পথে যে অভিসার করে সে কেবল পথকেই নয়, আপনাকেও অতিক্রম করিয়া যায়। রবীন্দ্রনাথ বলেন, যেখানে মাতৃয় ভালবাসে, সাধনা করে, সেখানে সে আপনাকে ছাড়াইয়া যায়, সীমার মধ্যে অসীমের স্পর্শ লাভ করে, অন্তর্মণিতে অনন্ত স্বর্ঘ্যের জ্যোতিঃপ্রকাশ উপলব্ধি করে। বিজ্ঞাপতির অভিসারের পদে সেই অবশুজ্ঞাবী অধ্যাত্মঅভিজ্ঞানার ইঙ্গিতই পাইতেছি।)

বরিস পয়োদর

দবণী বারি ভর

রয়নী মহাভয় ভীমা।

তইও চলি ধনী

তুঅ গুণ মনে গুণি

তহু সাহস নাহি সীমা ॥

দেখি ভবন ভিত্তি

লিখল ভুজগপতি

জহু মনে পরম তরাসে।

সে স্ববদনী করে

বাপইত ফণীমণি

বিহুসি আইলি তুঅ পাশে ॥

নিঅ পহঁ পরিহরি

সঁতরি বিখম নরি

অঁগিরি মহাকুল গারী।

তুঅ অনুরাগ

মধুর মদে মাতলি

কিছু ন গুণল বরনারী ॥ (৫৩৫)

অথবা—

গুরুজন নয়ন অন্ধ করি আঁওল
 বাধব তিমির বিসেগ ।
 তুঅ উর ফুরত বাম কুচ লোচন
 বহু মঙ্গল করি লেখ ॥
 কুলবতী ধরম করম ভয় অব সব
 গুরু-মন্দির চলু রাখি । (২৩৮)

বা একটি সন্দেহজনক পদ—

চকিত চকিত কত বেরি বিলোকই
 গুরুজন ভুল্লন-দুয়ার ॥
 অতি ভয় লাজে মঘন তলু কাঁপই
 কাঁপই নীল নিচোল ।
 কত কত মনহি মনোরথ উপজত
 মনসিদ্ধু মনহি হিলোল ॥ (২৫৩)

কিন্তু এমন অংশও বিরল নয়—

লিহলে উধলল অবইত ভার ।
 ভেটলে মেটত অছ পরকার ॥ (২৪৭)

অভিসারের পথে প্রসারনের অনাবশ্যকতা বর্ণনা করিতে এই ধরণের স্থূল উক্তি সখীর মুখে বসান হইয়াছে। তবু একথা সত্য উৎকর্ষের দিক হইতে অভিসারের পদে গোবিন্দদাস ছাড়া (ছ'একটি পদে রায়শেখর, যথা, —“গগনে অব ঘন মেহ দাক্ষণ”) বিজ্ঞাপতির জুড়ি নাই বৈষ্ণব সাহিত্যে। অবশ্য গোবিন্দদাস অপেক্ষা এ বিষয়ে তাঁহার স্থান অনেক নিম্নে। শুধু তাঁহার কেন, অথ কোন বৈষ্ণব কবি অভিসারের পদ-পর্য্যয়ে গোবিন্দদাসের সমকক্ষতা তো দূরের কথা, নিকটেই উপস্থিত হইতে পারেন নাই। “মাধব কি কহব দৈব বিপাক”, “কণ্টক গাড়ি কমল সম পদতল”, “মাথহি তপন তপত পথ বালুক”, “কুলমরিযাদ কপাট উদঘাটলু”, “মন্দির বাহির কঠিন কপাট” ইত্যাদি পদের সদৃশ বৈষ্ণব সাহিত্যে নাই, অবশ্য অভিসার পদের দিক হইতে।)

অভিসারের পর বিজ্ঞাপতির বিরহের পদ। এই পর্য্যয়ে বিজ্ঞাপতির কবিশক্তি শ্রেষ্ঠত্বের সীমা-লগ্ন বলিতে হয়। কী অপূর্ব সব পদই না পাইয়াছি। ছ'-একটি তুলিয়া দেওয়া যাক :

১। অঙ্কুর তপন- তাপে যদি জারব
কি করব বারিদ মেহে ।
ঈ নব যৌবন বিরহে গমায়ব
কি করব সৌ পিয়া-লেহে ॥
হরি হরি কো ইহ দৈব দুরাশা ।
সিন্ধু নিবটে যদি • কণ্ঠ শুকাযব
কো দূর করব পিয়াসা ॥ ইত্যাদি

২। এ সখি হামারি দুখের নাহি গুর ।
ঈ ভর বাদর মাহ ভাদর
শূণ্য মন্দির মোর ॥
বাম্পি ঘন গর- জন্তি সম্ভতি
ভুবন ভরি বরিখন্তিয়া ।
কান্ত পাহন কাম দারুণ
সঘনে খর শর হস্তিয়া ॥
কুলিশ শত শত পাত মোদিত
ময়ূর নাচত মাতিয়া ।
মত্ত দাহুরী ডাকে ডাহুকী
ফাটি যাওত ছাতিয়া ॥
তিমির দিগ্ ভরি ঘোর যামিনী
অখির বিজুরিক পাতিয়া ।
বিজ্ঞাপতি কহ কৈসে গমায়ব
হরি বিহু দিন দ্বাতিয়া ॥

অন্থন মাধব মাধব সোঙরিতে
সুন্দরী ভেলি মধাঈ ।...

৪। সরসিজ বিহু সর সর বিহু সরসিজ...

৫। চীর চন্দন উরে হার ন দেলা ।
সো অব নদী গিরি আতর ভেলা ॥

পিয়াক গরবে হাম কাঙ্ক ন গণলা ।

সো পিয়া বিনা মোহে কে কি না কহলা ॥....

৬। সজনি কো কহ অঁওব মধাঙ্গি ।

বিরহ-পয়োধি পার কিএ পাওব

মঝু মনে নাহি পাতিয়াই ॥

এখন তখন করি দিবস গোড়ায়লু

দিবস দিবস করি মাসা ।

মাস মাস করি বরিখে গোড়ায়লু

ছোড়লু জীবনক আশা ॥

ইহাই যথেষ্ট। উৎকৃষ্ট কবি-ভাবনার পূর্ণায়ত রস-রূপের সন্ধান এখানে পাওয়া যাইবে। যে কয়টি পদের উল্লেখ করিয়াছি, তাহার প্রথম চারিটি এবং শেষ দুইটি পদের ভিতর একটা ভাবরূপের সূক্ষ্ম পার্থক্য মনে হয় দৃষ্টিগোচর হইবে। প্রথম পদগুলিতে কবি-চিত্র যে আবেগে স্পন্দিত, তাহা রূপ-নির্মাণের অল্পম কৌশলের দিকেই বেশী ঝুঁকিয়াছে। কিন্তু শেষ দুইটি পদে কবি যেন “আমার গান ছেড়েছে তার সকল অলঙ্কার” বলিয়া ভাব-উৎকর্ষকে নিরলঙ্কারে প্রকাশ করিতেই ব্যস্ত। প্রথম পদগুলি ব্যঞ্জন ধ্বনি এবং অলঙ্কারের মৌল্যবের মধ্য দিয়া যে কাব্যশ্রী লাভ করিয়াছে তাহার মধ্যে একটা ঐশ্বর্য ও গৌরব আছে। সে-গৌরব কেবল কাব্যদেহে নয়, সে-ঐশ্বর্য কেবল বর্ণনা-ভঙ্গিতে নয়, তাহা ভাব এবং আবেগ-সত্তাতেও। অর্থাৎ রাধিকার ঐ যে বিরহ, উহা আমাদের বেদনা দেয় না,—আনন্দ দেয়, মনে একটা পরমোন্মাদার ভাব জাগায়। কারণ এ বিরহ-বেদনাতো একটা ঐশ্বর্য আছে, উল্লাস আছে। বিরহ এবং বিচ্ছেদ মিলন-সুখ-মহুর সাধারণ দিনগুলির মর্ম্মমূলে একটি বিপর্যয় আনিয়া দিয়াছে। মর্মে লাগিয়াছে দোলা, প্রাণে লাগিয়াছে কম্পন, সমস্ত সত্তা ব্যাপিয়া এক অপূর্ণ রসোন্মাদনার হিল্লোল বহিয়া যাইতেছে। ইহা বাহ্যতঃ বেদনাগতির রূপ ধরিলেও কোথায় যেন একটা আনন্দ-সাগরের কল্লোল ধ্বনিত হইয়া ওঠে। তাই এইসকল পদে নিভৃত রাতের ব্যথাকাতর অর্দ্ধশুট মুহূর্ত্ত নহে, হৃদয়ের বেদন-মহোৎসবের বাণী-বন্দনা একেবারে নাভিদেশ হইতে গর গর ধ্বনিতে উৎসারিত হইয়া উঠিতেছে। ‘এ সখি হামারি দুখের নাহি ওর’ পদটিতে তাহার নিদর্শন আছে। ‘অক্ষুর তপন-তাপে যদি জারব’ পদটিতেও একই সুর। রাধিকা বিরহের বেদনাকে প্রকাশ করিতে যে চরম অলঙ্কৃত বাক্যকে আশ্রয়

করিয়াছেন, তাহাতেই তাঁহার বিরহ-প্রকৃতি বোঝা যায়। ঐ পদটিতে অলঙ্কার নির্বাচনের যথার্থ্য এবং সেই অলঙ্কারের মধ্যে প্রাণোত্তাপ সঞ্চারিত করিয়া দেওয়াতেই কৃতিত্ব। ইহার তুলনায় “এ সখি হামারি দুখের নাহি ওর” পদটি অনেকাংশে উৎকৃষ্ট। যে বেদনা-রূপায়ণ এখানে, তাহা এমনই রূপ-সার্থক যে, মনে এক অসাধারণ উদ্ভাদনার সঞ্চার করে। তথাপি কবিতাটির অনুরূপ সর্বকালিক নয়। এক বিশেষ মুহূর্ত্তে বিশেষ পরিবেশে এক বিশেষ মাত্রার যে চিত্ত-চাঞ্চল্য, তাহাই সুরে ও ছন্দে, ভাবে ও ভাবনায় আকারিত হইয়াছে। ইহার মধ্যে বৃক-নিড়ানো, প্রাণ-নিড়ানো যন্ত্রণা নাই, তৎপরিবর্ত্তে একপ্রকার রসাবেশ আছে। আত্ম-স্মৃতির জগৎ মিলনের মন্দির মুহূর্ত্ত হইতে বিরহের এই মদনার্ত্ত প্রহরের প্রয়োজন বেশী। “বাম্পি ঘন গরজন্তি সন্তুতি ভুবন ভরি বরিখস্থিয়া” এমন সময়ে মিলনের আশ্লেষমুগ্ধ রভস-লীলা একান্তই স্থূল হইয়া আসিত নাকি? কবি তাহা চান না। মানব-হৃদয়ের একটি বেদনাকে চরম ঐশ্বর্য্যরূপ দান করিবার জগৎ যে মত্ত বর্ষাদিনের প্রয়োজন, কবি তাহাকেই গ্রহণ করিয়াছেন; এ বর্ষা ‘অবিরল বার বার জলধার’ নয়, নায়িকার চোখে বর্ষাধারা নামে নাই, তাহার হৃদয়ে বর্ষামদল হইতেছে। রবীন্দ্রনাথ একস্থানে বলিতেছেন: “মেঘদূত যেদিন লেখা হয়েছিল, সেদিন পাহাড়ের উপর বিহ্ব্য চমকছিল। সেদিনকার নববর্ষায় আকাশে বাতাসে চলার কথাটাই ছিল বড়।……তাই মেঘদূতে যে বিরহ, সে ঘরে বসে থাকার বিরহ নয়, সে উড়ে চলে যাওয়ার বিরহ। তাই তাতে দুঃখের ভার নেই বললেই হয়, এমন কি তাতে মুক্তির আনন্দ আছে। প্রথম বর্ষাধারায় সে পৃথিবীকে উচ্ছল বরণায়, উদ্বেল নদীশ্রোতে, মুখরিত বনবীথিকায়, সর্বত্র জাগিয়ে তুলেছে। সেই পৃথিবীর বিপুল জাগরণের সুরে লয়ে যক্ষের বেদনা মন্দাক্রান্তা ছন্দে নৃত্য করতে করতে চলেছে। মিলনের দিনে মনের সামনে এতবড় বিচিত্র পৃথিবীর ভূমিকা ছিল না। ছোট তার বাসকক্ষ, নিভৃত, কিন্তু বিচ্ছেদ পেয়েছে ছাড়া নদী-গিরি-অরণ্য শ্রেণীর মধ্যে। মেঘদূতে তাই কারা নেই, উল্লাস।”

উদ্ধৃতিটি একটু দীর্ঘ হইল, তথাপি ইহাকেই বর্ত্তমান পদের বিরহানুরূপতার ব্যাখ্যা হিসাবে নির্দেশ করা যায় না কি? রবীন্দ্রনাথ নববর্ষায় মর্ত্য ও মর্ত্যবাসী মানুষের যে মুক্তির কথা বলিয়াছেন, সেই মুক্তিই বিজ্ঞাপতির ‘মাহ ভারবের’ কাব্যে। প্রথম পঙ্ক্তিতেই তাহার সূচনা। ‘এ সখি হামারি দুখের নাহি ওর’—এ ভাষায় গভীরতম বেদনার বাণী কেহ প্রকাশ করে? এ তো দুঃখের আশ্ফালন। আনন্দের দিনে যে কথা সত্য—‘কি কহব রে সখি আনন্দ ওর’—বিরহের কুলহীন দুঃখের দিনে উহাকে

পরিবর্তিত করিয়া বলা চলে না—“এ সখি হামারি দুখের নাহি ওর।” সখিরে, আমার দুঃখের সীমা পরিসীমা নাই—ইহা যদি কেহ পদের প্রথম পঙ্ক্তিতে বলিয়া বসে, তবে তাহার দুঃখের যন্ত্রণার কথা বিশ্বাস করিতে প্রবৃত্তি হয় না, কিন্তু দুঃখের ঐশ্বর্যের কথা! আহা কি অপূৰ্ণ তাহার রূপ। ঐ “কুলিশ শত শত পাত মোদিত ময়ূর নাচত মাতিয়া”, ঐ “মত্ত দাহুরী ডাকে ডাছকী ফাটি যাওত ছাতিয়া”—এ বর্ণনায় বেদনা কোথা, কেবল ময়ূর নয়, রাধিকার চিত্তও নাচিতেছে—“হৃদয় আমার নাচেরে আজিকে ময়ূরের মত নাচেরে।”

(লক্ষণীয়—‘এ সখি হামারি’ পদটিকে আমি বিজ্ঞাপতির বলিয়াই গ্রহণ করিয়াছি—গতানুগতিক পূৰ্বধারণাত্মকনয়নই তাহার কারণ বলাই বাহুল্য। কিন্তু তদতিরিক্ত আর একটু দাবী—কবিতার আভ্যন্তরীণ সাক্ষ্যের উল্লেখ করা যায় না কি? এমন পদ বিজ্ঞাপতির ছাড়া অত্র এক অন্তর্গত কবির দ্বারা রচিত হওয়া সম্ভব নয়, সে যুক্তি যদি বাদও দিই তথাপি যিনি ‘আনন্দ ওর’ লিখিয়াছেন, তাঁহার পক্ষে ‘দুখের ওর’ লেখাই স্বাভাবিক)।

কিন্তু বিজ্ঞাপতির বিরহ কেবল গৌরবান্বিতভূতিকে নয়—তাহার নিভৃততম রূপও আছে। পূৰ্বোক্ত ‘সজনি কো কহ আওব মধাঙ্গি’, ও ‘চীর চন্দন উরে হার ন দেলা’ পদদ্বয়ে প্রিয়-বিরহিত নারীর ‘অন্তর্গত বাষ্পাকুল বিচ্ছেদ ক্রন্দন’ একেবারে আকুল হইয়া উঠিয়াছে। পদ দুটিতে অলঙ্কার কোথা? কী আক্ষেপ! কী আশ্চর্য! যাহার সহিত মিলনে চীর-চন্দন-হারের প্রভেদটুকুও রাখি নাই, আজ তাহার ও আমার মধ্যে নদী গিরির ব্যবধান তরঙ্গিত—সমুদ্রত। ‘সজনি কো কহ আওব মধাঙ্গি’ পদটিতেও কবি-বাণী যথাসম্ভব নিরলঙ্কার। বিরহকে ‘পয়োধি’ ইত্যাদি বলার মধ্যে যেটুকু অলঙ্কার তাহা সীমাহীন দুঃখের বাণীরূপ দান করিতে একেবারে অপরিহার্য। অকুল অনন্ত প্রমত্ত কৃষ্ণ-সাগরের কূলে রাধারাগী বসিয়া আছেন। সে সাগর বিরহ-সাগর। তাহারই পরপারে কোন্ হৃদয়ে তাঁহার দয়িত অদৃশ্য হইয়া আছেন, মধ্যে বিচ্ছেদের তরঙ্গিত লবণাস্থরাশি—রাধিকা তীরে বসিয়া হাহাকার করিতেছেন—‘বিরহ পয়োধি পার কি এ পাওব’। কিন্তু রাধার দয়িত কি সমুদ্রের পরপারে, না ঐ সমুদ্রই তিনি—গভীর গহন বিপুল বিধর শ্যাম-সাগর। রাধিকা চরম মিলনের দিনেও তাঁহাকে চিনিতে পারেন নাই—‘জনম অবধি হাম রূপ নেহারল’ নয়ন না তিরপিত ভেল...লাখ লাখ যুগ হিয়ে হিয়ে রাখল তব হিয়া জুড়ন না গেল’। যিনি অনন্ত তিনিই যে অন্তরতম, যিনি অসীম তিনিই যে দয়িত—তাঁহার সহিত সম্পূর্ণ মিলন হয় কি? অথবা প্রিয়ের মধ্যে অসীমত্বের উপলব্ধির নামই বিরহ। রাধিকা সেদিন কাদিয়াছেন, লক্ষ যুগ পূর্বেও

কাদিয়াছেন, আজিকে কাদিতেছেন, আগামীকালেও কাদিবেন। “এখনো কাদিছে রাধা হৃদয়-কুটারে” সর্বযুগের সর্বশেষ ও সর্ব-আধুনিক কথা।

(বিজ্ঞাপতির) বিরহ-পদে বর্ণনাশ্রমে চণ্ডীদাস ও জ্ঞানদাসের বিরহ-পদের কথা মনে আসে। চণ্ডীদাস নাকি দুঃখের কবি। সর্বশেষ দুঃখের কথায় নাকি তাঁহারই অধিকার। সত্যই। চণ্ডীদাসে উল্লাস নাই, উচ্ছলতা নাই; মেঘশায়ল দিনের সজল ছায়ায় সঞ্চারণ, বর্ষারাতের অশ্রুবর্ষণ চণ্ডীদাসের কাব্য—এবং তাঁহারই অল্পগামী, ভাবাল্পগামী হিসাবে জ্ঞানদাসের পদও কবিপ্রাণের নিভৃত আকৃতির বাণীই বহিয়া আনে। পূর্বরাগ হইতে, চণ্ডীদাসের বিরহ স্বরূপ হইয়াছে, আক্ষেপাল্পরাগে তাহারই বৃদ্ধি,—পর্যায়ের পর পর্যায়ের অগ্রসর হইয়া চণ্ডীদাস ভাবসম্মিলনের আনন্দ-মুহূর্তে বিচ্ছেদের অন্তিমতম বেদনাকে প্রকাশ করিয়া দিলেন। এমন ভাবে প্রকাশ করা—এ বোধকরি আর কোন বৈয়াকব্য কবির পক্ষেই সম্ভব নয়-

বর্হাদন পরে বঁধুয়া এলে।

দেখা না হইত পরাগ গেলে ॥...

দুখিনীর দিন দুখেতে গেল।

মথুরা নগরে ছিলে তো ভাল ॥

করণ! মর্ম্মস্পর্শী! কোন বিশেষণই এই চারিটি পঙ্ক্তির অল্পভূতিকে প্রকাশ করিতে পারিবে না। যিনি সে বেদনা জানিয়াছেন, তিনিই কেবল এমন করিয়া জানাইতে পারেন। এ স্রষ্টার বেদনাক্ষন নয়; এখানে আপন হৃদয়কেই, করণ ব্যাখিত স্পন্দিত হৃৎপিণ্ডকেই, কবি একেবারে অনাবৃত করিয়াছেন, বেদনা লইয়া তিনি কাব্য করেন নাই। কিন্তু বিজ্ঞাপতি এতদূর অগ্রসর হইতে পারেন নাই। তিনি রাধিকার বেদনাকে অল্পভব করিয়াছেন, অতি গভীর ভাবেই হৃদয়গত করিয়াছেন, কিন্তু সে বেদনা রাধিকারই, বিজ্ঞাপতির নয়। ‘বিষয়ের’ সঙ্গে আর্টিস্টের একটা দূরত্ব বজায় আছে। চণ্ডীদাসের সে দূরত্বটুকু নাই। এই দিক দিয়া বিজ্ঞাপতি অনেক বেশী সচেতন শিল্পী। তাঁহার সৌন্দর্য বা ভাবোপভোগে আত্মবিভোরতা থাকিলেও (অধিকাংশ ক্ষেত্রে রূপ-বিভোরতা) আত্মবিস্মৃতি নাই। চণ্ডীদাস কিন্তু একেবারেই আত্মবিস্মৃত কবি। তাই চণ্ডীদাসের কাব্যের আবেদন মরমীর নিকট যতটা, সর্বত্র সেরূপ নয়। যাহার প্রাণ আছে, অল্পভব আছে, যিনি সেই উপলব্ধির আশীর্বাদ অন্ততঃ কিয়দংশও অন্তরে লাভ করিয়াছেন তাঁহার নিকট চণ্ডীদাসের তুল্য কবি নাই। অথবা তাহাও সম্পূর্ণ সত্য নয়; মানুষের জীবনের কোথাও না কোথাও একটা গভীরতর অন্তরতর স্থান আছে। সেখানে ছুঁইলে প্রাণ সাড়া দিবেই। চণ্ডীদাসের পদের একটি পঙ্ক্তি হয়ত সেই

‘মরম’-কে স্পর্শ করিয়া গেল। তখন আর তাঁহার সম্পূর্ণ কাব্যের প্রয়োজন নাই, সেই বিচ্ছিন্ন কলিটাই মনের মধ্যে স্থর হইয়া সঞ্চরণ করে, বারবার গুণ্ণু করিয়াও আশ মেটে না—“হুখিনোর দিন দুখেতে গেল, মথুরা নগরে ছিলে তো ভাল।” চণ্ডীদাসের কাব্যে তাই শিল্পচেতনার পরিতৃপ্তি নাই; সমগ্রতঃ বিচার করিলে তাঁহার অধিকাংশ পদই রূপসম্পূর্ণ নয়। এমনও বলা যায়, তাঁহার পদ অরূপের রূপাভাস। তাহা একটা নির্বিশেষ অল্পভূতিকে বিশেষের মধ্যে—বাণীর মধ্যে—একবার হয়ত স্পর্শ করিল, তারপরেই উধাও! ভাবুক, মরমী,—এবং জীবনের বিশেষ বিশেষ মুহূর্ত্তে সব মাহুয়াই ভাবুক—চণ্ডীদাসের মুক্ত স্তুতি রচনা করে, কারণ চণ্ডীদাস তাঁহার কাব্যের রূপে আমাদের মুক্ত রাখেন নাই, ভাবে মুক্ত করিয়াছেন। চণ্ডীদাস সেই কবি—রামকৃষ্ণ যেমন বলিতেন “আগুণ জ্বলে দিয়ে গেছে, এখন রইল আর গেল।”

এখন যে-প্রশ্নটি বড় হইয়া উঠিতেছে, তাহা হইল, সাহিত্যের ক্ষেত্রে কিসের মূল্য বেশী, এই প্রকাশ-সৌষ্ঠব-পন্থা, না গভীরতর অল্পভূতিকে বাণীস্বয়মার দিকে দৃকপাত না করিয়া আভাসিত করিবার প্রচেষ্টা? একথা সত্য, সাধারণ ভাবে কাব্য বলিতে আমরা যা বুঝি, আমাদের শিল্পবোধ মূখ্যতঃ যে প্রতীতির উপর গড়িয়া উঠিয়াছে, তাহা বিদ্যাপতির রূপ-সুন্দর কাব্যেই অধিক তৃপ্তিলাভ করে। বিদ্যাপতি সৌন্দর্য-সাধনা বলিতে যা বুঝি, তাহাই করিয়াছেন। এ বস্তুটি চণ্ডীদাসের কাব্যে নাই। বিদ্যাপতির কাব্যে সেখানে সমগ্র পদটি ব্যাপ্ত করিয়া কবির সুন্দর-বিগ্রহ রূপময় হইয়াছে, সেখানে চণ্ডীদাসের কাব্যে চকিত-রূপের একটি বলক (“চলে নীল সাড়ি নিঙাড়ি নিঙাড়ি পরাণ সহিত মোর”),—কিন্তু তাহারই রূপোৎকর্ষ এরূপ যে, চণ্ডীদাসকে মহাকবি বলিতে বাধে না। তথাপি চণ্ডীদাসে সর্বাঙ্গীণ বাণীস্বয়মার পরিচয় নাই। বিদ্যাপতি আজীবন সৌন্দর্য্যচর্চা করিয়া এই বস্তুটি লাভ করিয়াছিলেন; সে কারণে যেখানে তাঁহার পদের ভাববস্তু নিতান্ত অকিঞ্চিৎকর, সেখানেও পাঠক একপ্রকার আনন্দানুভব করিতে পারে। এবং দিব্য আবেগের মুহূর্ত্তে এই প্রকাশ-প্রতিভা-সিদ্ধ বলিয়া বিদ্যাপতির কতকগুলি পদ একেবারে পারফেক্ট, ক্রটি বিচ্যুতির চিহ্নমাত্র নাই। সৌন্দর্য-সাধনার স্বকঠোর নিষ্ঠাই বিদ্যাপতিকে ভাষার বন্ধনে ভাবের উচ্ছল লাঘবকে ধারণ করিবার শক্তিদান করিয়াছে। ভাবের যমুনা বহাইতে কবিপ্রাণের আবেগোৎসারই যথেষ্ট। কিন্তু ভাবের তাজমহল গড়িতে গেলে সংযম, সাধনা, নিষ্ঠা ও কার্ণাট প্রয়োজন। অল্পভূতি একটা নির্বিশেষ বস্তু; রস কুলহারা সাগর; সেই অল্পভূতি এবং রসকে একটি নির্দিষ্ট আকারে বদ্ধ এবং মুক্ত করিয়া দিতে হইলে—এবং যাহা যথার্থ কবিকর্ম,—স্মৃতি ও সংযমের নিতান্ত প্রয়োজন। ঈশ্বর নির্বিশেষ

সচ্চিদানন্দ সাগর, কিন্তু তাঁহার একটি ঢেউ যেমন রাম, একটি ঢেউ কৃষ্ণ (কথায়ত), তেমনি অবিশেষ রঙ্গ সাগরের এক একটি ঢেউ মহাকাব্য বা কাব্য—বীচিবিভক্ত এক একটি পদ-গীতিকা। রঙ্গসমুদ্রের ক্ষণ-উচ্ছ্বাসিত তরঙ্গভঙ্গের প্রতিবিম্ব পড়ে কবির মনোদর্পণে, তিনি সেই ক্ষণ-বিষট্টককেই 'বিশেষ্য' করিয়া তোলেন; অথচ স্বরূপসত্তায় তাহা রঙ্গ-সাগরের ঢেউ, তাহার অঙ্গে অঙ্গে সমুদ্রের স্বপ্ন ও স্রব, সৌরভ ও লাবণ্য; কাব্য তাই বিশেষ্য হইয়াও নির্কীর্ণশেষ। ইহাকেই আমরা কাব্যের ব্যঞ্জনা বলি, ধ্বনি বলি, বলি লোকোত্তর দ্যুতির দূর্তা। বিজ্ঞাপতির কাব্যে ঐ বিশেষ্যের বিষট্টক ফুটিয়াছে ভাল, চণ্ডীদাসে তেমন নয়। একেবারে কি ফোটে নাই? তাহা নয়, না ফুটিলে কাব্য হইত না। বিজ্ঞাপতি হইতে অসম্পূর্ণ ইহাই বক্তব্য।

বিজ্ঞাপতি কাব্যের এই form কোথা হইতে পাইয়াছিলেন (অবশ্য কবি-প্রকৃতিই আসিল) তাহার উল্লেখ ইতিপূর্বে করিয়াছি; তাঁহার শিক্ষাদীক্ষা, পরিবেশ, সমাজ ইত্যাদি। ঐ পরিবেশের কবি হইয়া এবং চৈতন্য-পূর্ণ যুগের কবি বলিয়াও, তাঁহার পক্ষে প্রথমেই রাধার মহাভাবের কথা গাহিয়া ওঠা সম্ভব হয় নাই। তাঁহাকে ধীরে ধীরে অগ্রসর হইতে হইয়াছে। রাধার জন্ম হয়ত অল্প কবি দিয়াছেন, কিন্তু তাহাকে লালন করিয়া যৌবন-স্বর্গে তুলিয়াছেন বিজ্ঞাপতি। সেই কোন্ বয়ঃসন্ধির কাল হইতে তিনি রাধাকে নিরীক্ষণ করিতেছেন, পূর্বরাগ অভিসার মিলন মান বিরহ ভাবসম্মিলন পর্যন্ত তাহাকে দর্শন করিয়াই চলিলেন। অন্তের দর্শনের সাহায্য তিনি পান নাই। তাই তাঁহার রাধিকা প্রথমে একেবারেই লৌকিক। পরবর্তীকালে প্রেমের রুচ্ছ সাধনায় অতীন্দ্রিয়তাকে আত্মান করিলেও শেষ পর্যন্ত "যোগিনী" হইয়া উঠিতে পারে নাই। চণ্ডীদাস কিন্তু তৈরী রাধিকাই পাইয়াছিলেন। তাই পূর্বরাগে নামস্মরণেই প্রাণ-বিস্মরণ, 'নাম পরতাপে ঐছন' অবস্থা। ভাবুক-গোষ্ঠীর জগৎ চণ্ডীদাস গান গাহিয়াছেন, বিজ্ঞাপতি বিদগ্ধ রাজসভার জগৎ। রসিক সমালোচকের ব্যাখ্যা শুনিয়াছি; তিনি বিজ্ঞাপতি ও চণ্ডীদাসের কাব্যপরিবেশ ব্যাখ্যা করিতেছেন: একজন বাঙালী মন্দিরের পূজারী। বনচ্ছায়া-মণ্ডিত নির্জন গ্রাম্য মন্দিরের চূড়া বাহিয়া শেষ দিনলেখাটুকু নামিয়া গেল। সন্ধ্যা ঘন হইয়া আসিল; প্রদীপে ক্ষীণ সলিতাটুকু উস্কাইয়া এক গ্রাম্য কবি গান বাঁদিতেছেন। আপন মনেই গাহিতেছেন—তিনিই চণ্ডীদাস। সন্ধ্যা নামিয়াছে আর এক দিগন্তে; তাহা গ্রাম নয়, নগর। রাজসভার কলমুখরিত প্রাঙ্গণে ঝাড়-লঠন একের পর এক জলিয়া উঠিয়া রোশনাই ফেলিয়া দিয়াছে। রাজকবি আসিয়া দাঁড়াইলেন। তিনি কি ঐ গ্রাম্য পুরোহিতের মত কেবল আপন অন্তরের দিকে তাকাইয়া গান ধরিবেন, তাঁহার কাব্যে কি কেবল প্রদীপটুকু স্নিগ্ধ হইয়া মৃদু আলোর

শাস্তিটুকু বিকিরণ করিবে, না তাহাতে হাজার তারার বাতি, আলোর উল্লাস।
চণ্ডীদাসের কাব্যে আঁধার বেশী, বিদ্যাপতির কাব্যে আলোক।)

তথাপি বিদ্যাপতি সম্পর্কে সবটুকু বলিয়া ওঠা হইল না। * তাঁহার কাব্যে কেবলই আলো বলিলে অবিচার করা হয়। কোন কবিই নিছক আলোর কবি হইয়া বড় হইতে পারেন নাই। বিদ্যাপতির কাব্যে আলো এবং ছায়ার মাঝামাঝি এক অসীম রহস্যের ধূসরতা পরিব্যাপ্ত হইয়া আছে। - আজীবন তিনি শিল্পরীতির চর্চা করিয়াছেন এবং তাঁহার কাব্যের উপজীব্য রাধাকৃষ্ণের জ্বানীতে মানবহৃদয়ই। একটি বার— বোধকরি সেই একটি বার মাত্রই—তাঁহার কাব্যে মানবজীবনের অনন্ত রহস্য—অনন্ত ট্রাজেডী ও আনন্দ যেভাবে রূপ ধরিয়াছে তাহাতে তাঁহার আর্ট-সাধনা সার্থক হইয়া গেল। বিশ্বসাহিত্যের সঙ্গে পরিচয় না থাকিলেও বলিতে পারি—সর্বশ্রেষ্ঠ অনুভূতি ও তাহার অব্যর্থ প্রকাশের বাণী মানবপ্রাণ চিনিয়া লয়ই—এ পদটি অত্যন্ত শ্রেষ্ঠ লিরিক কাব্য। সুপরিচিত পদটি উদ্ধৃত করিতেছি—

সখি কি পুছদি অমুভব মোয়।

সোহি পিরীতি অমু- রাগ বখানিএ

তিলে তিলে নূতন হোয় ॥

জনম অবধি হাম রূপ নেহারল

নয়ন না তিরপিত ভেল।

সোহি মধুর বোল অবধি শুনল

ঐতিপথে পরশ না গেল ॥

কত মধুযামিনী রভসে গমায়ল

না বুঝু কৈছন কেল।

লাখ লাখ যুগ হিয়ে হিয়ে রাখল

তব হিয়া জুড়ন না গেল ॥

কত বিদগ্ধ জন রস অমুগন

আমুভব কাছ না পেথ।

কহ কবিবল্লভ প্রাণ জুড়াইতে

লাখে না মিলল এক ॥)

—রভস-মুচ্ছিতা রাধিকা কোন আচম্বিত মুহূর্তে বঁধুর মুখ দেখিয়া ফেলিলেন; কী দেখিলাম! এতদিন কি দেখেন নাই! হয়তো, হয়তো নয়। দেখিয়াছি, আবার দেখিও নাই। একদিন নয়, দুইদিন নয়, ‘জনম অবধি রূপ নেহারল’, তবু কেন এই

বিশ্বয়, কেন এই দর্শন-লালসা, স্পর্শ-কামনা, রতি-বাসনা। কেন কে বলিবে? ইহাই তো মানবজীবনের পরম রহস্য; সর্বজীবনের দুর্ভেদ্য সমস্যা। চিরন্তন নারী সেই যে একবার মিলনের মদির মুহূর্তে চিরন্তন পুরুষের অনাদি রূপ-রহস্য, অনন্ত প্রাণ-বিশ্বয়টুকু নয়নগোচর, হৃদয়গোচর, বসিয়াছিল,—তাহার পর সেই যে রত্নির দাহ হইতে আরতির দীপশিখা জ্বালাইয়া সে অনন্ত অনন্তকাল হৃদয়-দেবতার অর্চনা করিয়া চলিয়াছে, তাহার শেষ নাই, শেষ হইবে না। নিখিল প্রাণ-রাধিকা—প্রাণ-আরাধিকা—প্রাণপতি কৃষ্ণের দিকে দুই চক্ষু বিস্ফারিত করিয়া থাকিবেই, তাহাতে রূপের কামনা, রসের বাসনা, তৃপ্তির নিবিড়তা, তৃষ্ণার বিধুরতা।

এই একটি পদ বিজ্ঞাপতির কবি-শক্তির সীমা-নির্দেশক হইয়া আছে। বৈষ্ণব কাব্যের অগ্রত ইহার সদৃশ উৎকৃষ্ট পদ আছে। জ্ঞানদাস মিলনের তীব্র উৎকণ্ঠাকে অল্পম কাব্যশ্রীতে মণ্ডিত করিয়াছেন, তাহার মধ্যে চিরন্তনী জীবনের বাণী-বিকাশের গৌরব আছে—

রূপ লাগি আখি যুরে শুণে মন ভোর ।
প্রতি অঙ্গ লাগি কান্দে প্রতি অঙ্গ মোর ॥
হিয়ার পরশ লাগি হিয়া মোর কান্দে ।
পরান-পুতলি মোর থির নাহি বান্দে ॥

আশ্লেষ-বদ্ধ মিলন-মুহূর্তেও তীব্র বিরহবোধ চণ্ডীদাসের কাব্যে ফুটিয়াছে—

দুহঁ কোরে দুহঁ কান্দে বিচ্ছেদ ভাবিয়া ।
তিল এক না দেখিলে যায় যে মরিয়া ॥

বিজ্ঞাপতির ঐ একটি পদে এই সকল ভাব-রহস্য এবং ইহার অতিরিক্ত ব্যঞ্জনা-রহস্য পুঞ্জিত হইয়া আছে। ইহাকে যিনি Cosmic Imagination—সৃষ্টি-রহস্য-ভেদকারী কল্পনা বলিয়াছেন তিনি অতি যথার্থই বলিয়াছেন।

ভাবের বাণী-নির্মাণ এবং তাহারই মাধ্যমে ভাবাতীতকে স্পর্শ করিবার কবি-দুঃসাহস বিজ্ঞাপতির ছিল তাহা হয়ত পূর্বোক্ত আলোচনা হইতে কিছুটা স্পষ্ট হইয়াছে। ইহার সহিত আর দু'একটি দৃষ্টান্ত-সংযোগ করিব। ভাব-সম্মিলন ও ভাবোন্মাদার পদে বিজ্ঞাপতি প্রতিধ্বন্দ্বী-হীন। বিজ্ঞাপতি পরম স্বখে মিলনের রসাবেশ বর্ণনা করিয়াছেন। তাহার মধ্যে যেটুকু উৎকর্ষ তাহা বুদ্ধিদীপ্তি, অর্থ-গৌরব, শব্দ-নিপুণতার দান। বিজ্ঞাপতির সেই রম্যার্থ-উজ্জল কবি-ব্যক্তিত্বের পরিচয় ইতি-পূর্বে গ্রহণ করিয়াছি। সেই মিলন বর্ণনাতোই তাহার কবি-শক্তি নিঃশেষ হয় নাই।

সেই প্রাকৃত মিলন-সঙ্কমে তিনি আপনার শ্রেষ্ঠ পূজা-উপচার সমর্পণ করেন নাই। মিলনের পর বিরহ আসিয়াছে, তাহার পর ভাবসম্মিলন। বিতাপতি ভাবসম্মিলনের কবি। একদা তাঁহাকে আমাদের দেশের আধুনিক কালের সর্বশ্রেষ্ঠ কাব্যকার স্বথের কবি বলিয়াছেন। কিন্তু তাঁহাকে নিছক স্বথের কবি বলি কি করিয়া? স্বথে নয় দুঃখে, মিলনে নয় বিরহে তাঁহার কবি-ভাব চরমে উঠিয়াছে। এই পর্য্যন্ত বলিতে পারি, বিতাপতি জীবন হইতে স্বথকে দিসর্জন দেন নাই। কিন্তু পরম সত্য যে অনাদি দুঃখ তাহাই তাঁহার কাব্যের ভূষণ। অথবা এমনও বলা যায়, তিনি স্বথেরও কবি, দুঃখেরও কবি এবং একই সঙ্গে স্বথ দুঃখাতীত আনন্দের কবি। শ্রীরামকৃষ্ণ উপমা দিতেন, জ্ঞানের কাঁটা দিয়ে অজ্ঞানের কাঁটা তুলে ফেলতে হয়, তারপর দুই ফেলে দিয়ে বিজ্ঞানের অবস্থা। স্বথের পর দুঃখ তারপর আনন্দ—বিতাপতির কাব্যে মিলনের পর মাথুর তারপর ভাবসম্মিলন, ভাবোল্লাস। এই আনন্দবাদ আমাদের দেশে উপনিষদের মতই প্রাচীন। রবীন্দ্র-দর্শনের অগ্রতম মূল আশ্রয় আনন্দতত্ত্ব। তিনি বহু কাব্যে ও আলোচনায় ইহা প্রকাশ করিয়াছেন; বলিয়াছেন, আনন্দ সঙ্কীর্ণ নয়, তাহা দুঃখের বিপরীত স্বথ নয়; আনন্দের মধ্যে সমস্ত কিছুই মিলন। রবীন্দ্রনাথের রচনার সামান্য অংশ উদ্ধৃত করিতেছি:—“জগতের এই অপূর্ণতা যেমন পূর্ণতার বিপরীত নহে, কিন্তু তাহা যেমন পূর্ণতারই একটি প্রকাশ, তেমনি এই অপূর্ণতার নিত্য সহচর দুঃখও আনন্দের বিপরীত নহে, তাহা আনন্দেরই অঙ্গ। অর্থাৎ দুঃখের পরিপূর্ণতা ও সার্থকতা দুঃখই নহে তাহা আনন্দ। দুঃখও আনন্দরূপমৃতং।” রবীন্দ্রনাথের এই উদ্ধৃতির পর বিতাপতির ভাবসম্মিলনের মর্মব্যাখ্যা অনাবশ্যক। এখন একটি পদ তুলিয়া দিই।—

আজু রজনী হাম ভাগে পোহায়লুঁ

পেখলুঁ পিয়া মুখ চন্দা।

জীবন যৌবন সফল করি মানলুঁ

দশ দিশ ভেল নিরদন্দা ॥

আজু মঝু গেহ গেহ করি মানলুঁ

আজু মঝু দেহ ভেল দেহা।

আজু বিহি মোহে অহুকুল হোয়ল

টুটল সবছঁ সন্দেহা ॥

সোহি কোকিল অব লাখ লাখ ডাকউ

লাখ উদয় করু চন্দা।

পাঁচ বাণ অব

লাখ বাণ হউ

মলয় পবন বহু মন্দা ॥

অব মণ্ডা যব

পিয়া সঙ্গ হোয়ত

তবহু মানবনিজ দেহা ।

বিজ্ঞাপতি কহ

অলপ ভাগি নহ

ধনি ধনি তুষা নব লেহা ॥

কী উল্লাস ! আনন্দের একি অপরূপ প্রকাশ ! এ কাব্যের রস আনন্দনে বিলম্ব হয় ? ইহার সঞ্চরণ একেবারে হৃদয়ে অব্যবহিত । ভাষা-ছন্দ-স্বর ভাবের সহিত অভিন্ন সত্তায় সম্মিলিত হইয়া যে কাব্য-দেহের সৃষ্টি করিয়াছে, তাহাকে আনন্দন করি বলিলে ভুল হইবে—একেবারে অপরোক্ষ করি । রাধিকা যে-স্বরে কথা বলিতেছেন, তাহা যেন প্রাণের গভীরতম প্রাস্ত হইতে উচ্ছসিত । এ ভাষা এ আনন্দোল্লাস তাঁহারই, যিনি বলিতে পারেন, আমি তাঁহাকে জানিয়াছি, তাঁহাকে পাইয়াছি, তাঁহাকে পাইয়া মাহুষ মৃত্যুর পরপারে অমৃতত্ব লাভ করে । ভয় কি, কাহাকে ভয় ?—“সোহি কোকিল অব লাখ লাখ ডাকউ, লাখ উদয় করু চন্দা, পাঁচ বাণ অব লাখ বাণ হউ, মলয় পবন বহু মন্দা ।” ভাব ও ভাষা, রূপ ও রসের এমন পার্শ্বকী-পরমেশ্বর মিলন মহাকবিদের রচনাতেও বিরল ।

ভাবসম্মিলন পর্যায়ে “কি কহব রে সখি আনন্দ ওর”, “পিয়া যব আওব এ মল্লু গেহে” ইত্যাদি উৎকৃষ্ট শ্রেণীর পদ আছে । সে সম্পর্কে আর অধিক বিস্তার নিম্প্রয়োজন । আমি যে আর একটি পর্যায়ের কাব্যসৃষ্টিতে বিজ্ঞাপতির কবি-প্রতিভা সার্থকতা লাভ করিয়াছে, তাহারই কিঞ্চিৎ বর্ণনা করিয়া এই দীর্ঘ আলোচনা শেষ করিব । সে পর্যায় প্রার্থনা ।

ভাবসম্মিলনের মত প্রার্থনারও শ্রেষ্ঠ কবি বিজ্ঞাপতি । কোনপ্রকার সাম্প্রদায়িক বন্দনারীতির বশবর্তী না হইয়া বিজ্ঞাপতি রাধিকার জ্বানীতে মাধবরূপী সেই সত্য-স্বরূপের নিকট যেভাবে আত্ম-উদ্ঘাটন করিয়াছেন, তাহা বৈষ্ণব কাব্য-সাহিত্যে অভিনব । এই শ্রেণীর যে তিনটি শ্রেষ্ঠ পদ পাইতেছি, তাহার মধ্যে বিজ্ঞাপতির কবি-প্রাণের এক নূতন প্রকাশ লক্ষ্য করিব । পদগুলির আভ্যন্তর প্রেরণা সম্পর্কে দু’ একটি কথা বলিবার আছে ; তৎপূর্বে পদ তিনটি উদ্ধৃত করি :

(১) যতনে যতেক ধন

পাপ বটোরলে

মেলি পরিজনে খায় ।

মরণক, বেরি হেরি কোঈ ন পুছত
করম সঙ্গে চলি যায় ॥

এ হরি বন্দো তুয়া পদ নায ।
তুয়া পদ পরিহরি পাপ পয়োনিধি-
পারক কওন উপায় ॥

যাবত জনম হাম তুয়া পদ ন সেবলু
যুবতী মতি ময় মেলি ।
অমৃত তেজি কিএ হলাহল পিয়লু
সম্পদে বিপদহি ভেলি ॥

ভনঈ বিজাপতি হেন মনে গনি
কহিলে কি বাড়ব কাজে ।
সাঁঝক বেরি সেবা কোন মাগই
হেরইতে তুয়া পায় লাজে ॥

- (২) মাধব বহুত মিনতি করি তোয় ।
দেই তুলসী তিল দেহ সমর্পলু
দয়া জুনি ছোড়বি মোয় ॥
- গণইতে দোষ গুণ লেশ ন পাওবি
যব তুহু করবি বিচার ।
তুহু জগন্নাথ জগতে কহাওসি
জগ-বাহির নহে। মুঞি ছার ॥
- কি এ মানুষ পশু পাখি কি এ জনমিয়ে
অথবা কীট পতঙ্গ ।
করম বিপাকে গতাগতি পুন পুন
মতি রহ তুয়া পরসঙ্গ ॥
- ভনঈ বিজাপতি অতিশয় কাতর
তরইতে ইহ ভবসিদ্ধি ।
তুয়া পদ-পল্লব করি অবলম্বন
তিল এক দেহ দীনবন্ধু ॥

তাতল সৈকতে বারি বিন্দু সম
 স্নাত মিত রমণী সমাজে ।
 তোহে বিসরি মন তাহে সমর্পিলু
 অব মরু হব কোন কাজে ॥
 মাধব হাম পরিণাম নিরাশা ।
 তুহু জগতারণ দীন দয়াময়
 অতয়ে তোহারি বিশোয়াসা ॥
 আধ জনম হাম নিদে গমায়লু
 জরা শিশু কত দিন গেলা ।
 নিধুবনে রমণী রসরঞ্জে মাতলু
 তোহে ভজব কোন বেলা ॥
 কত চতুরানন মরি মরি যাওত
 ন তুয়া আদি অবসানা ।
 তোহে জনমি পুন তোহে সমাওত
 সাগর লহরী সমানা ॥
 ভনসে বিজ্ঞাপতি শেষ সমন-ভয়
 তুঅ বিহু গতি নাহি আরা ।
 আদি অনাদিক নাথ কথাওসি
 তারণ ভার তোহারা ॥

প্রার্থনা পদে বিজ্ঞাপতির যে অভিনব কবি-ভাবনার কথা বলিতেছিলাম, আমার
 নিজের বিশ্বাস, এগুলির মধ্যে কবির আত্মস্বরূপের ছায়াপাত ঘটিয়াছে। যে গভীর
 আন্তরিকতা এবং স্নাতী আকৃতির সুরে পদগুলি রচিত তাহাতে এমন সন্দেহ
 স্বাভাবিক) “আধ জনম হাম নিদে গমায়লু জরা শিশু কতদিন গেলা, নিধুবনে
 রমণী-রস-রঞ্জে মাতলু,” “যাবত জনম হাম তুয়া পদ ন সেবলু যুবতী মতি ময়
 মেলি”—এই আকুল আক্ষেপ ও আত্মগ্লানি, এই পার্থিব নৈরাশ্য, নিজ জীবন-অভিজ্ঞতা
 ভিন্ন উৎপন্ন হওয়া কঠিন। রাজসভাশ্রিত পণ্ডিত অভিজ্ঞাত বিজ্ঞাপতির লৌকিক
 জীবন স্মরণ করিতে বলি। সেই নাগরিক জীবন, সেই ঐশ্বর্য-বিলাসের প্রভূত
 আড়ম্বর—অবশ্যই অতৃপ্তি আনিতে পারে; সে অতৃপ্তি আক্ষেপ আর একটি পদে
 ইতিপূর্বে পাইয়াছি—

কত বিদগ্ধ জন রদ-অহুগমন আহুভব কাছ না পেথ ।

কহ কবিবল্লভ প্রাণ জুড়াইতে নাথে না মিলল এক ॥

স্বতরাং মনে হয়,—হয়ত অহুমান মাত্র—প্রার্থনার পদে 'রাধার নয়, বিতাপতিরই আত্মগত খেদোক্তি প্রকাশিত হইয়াছে, 'উহা মধুসূদনের আত্মবিলাপের মত বিতাপতির আত্মবিলাপ।

রে প্রমত্ত মন মম ! ' কবে পোহাইবে রাত্তি

জাগিবি রে কবে ।

জীবন-উত্তানে তোর যৌবন-কুসুম ভাতি

কতদিন রবে ॥

বিতাপতিরও এই সুর, এই আত্মদম্বিতের আচঞ্চিৎ জাগরণ। বিতাপতি ভোগী কবি কিন্তু ভোগবদ্ধ কবি নহেন। মানসভোগের অভৃষ্টি এবং সম্ভবতঃ বস্তু-ভোগের নৈরাশু তাঁহাকে উদ্ধতর অহুভূতির জগতে তুলিয়া দিয়াছে। নচেৎ তিনি স্বভাবতঃ নাস্তিক ভক্ত নন, রাজসিক। বিতাপতির মধ্যে প্রথম হইতে আত্মদানের ব্যাকুলতা নাই। তাহা চণ্ডীদাসের ছিল। সে হিসাবে বিতাপতি প্রথম জীবনে (ধরিয়া নইতেছি) অগভীর। কিন্তু ভোগজনিত জীবন-রস উপলব্ধির একটা বিস্তৃতি আছে। তাহার দ্বারাই পরবর্তী আত্মসমর্পণের কাব্যে সমুদ্রের সুর লাগিয়াছে। যে ভোগ করে নাই সে তাহার অসারতা উপলব্ধি করে কেমন করিয়া? শ্রীঅরবিন্দ যেমন বলেন, জ্ঞানের সীমাবদ্ধতা (লৌকিক জ্ঞান) জানিবার জগুই জ্ঞানী হওয়া দরকার।

জ্ঞানের কথা উঠিতে আর একটি কথা মনে হইতেছে; বিতাপতির প্রার্থনার পদ এমন অপূর্ব হইবার কারণ, আমাদের বিশ্বাস, তাহাতে জ্ঞানের একটা দৃঢ় বহিরাবরণ আছে। প্রার্থনার পদের বিতাপতিকেও নিছক ভক্ত-কবি বলিতে কেমন বাধা বাধা ঠেকে। এ কথায় আপত্তি উঠিবে জানি, তথাপি মনে হয় প্রার্থনার অমন ভাবৈবশ্য নিছক আবেগ-মুখ হইতে আদে নাই। কবি শিব-ভক্ত, শক্তি-ভক্ত—তাঁহার একটা বৈদাস্তিক দীক্ষা ছিল। তাহাই, ঐ জ্ঞানকাঠিগুই, যেন আত্মসমর্পণের আবেগে বিগলিত হইয়া রসরূপ ধরিয়াছে। “কত চতুরানন মরি মরি যাওত ন তুঅ আদি অবসানা। তোহে জনমি পুনঃ তোহে সমাওত সাগর লহরী সমানা, “আদি অনাদিক নাথ কহাওসি”,—ইত্যাদি উক্তি জ্ঞানীর। এখানে অধৈততত্ত্বের আভাস। শ্রীরামকৃষ্ণের যে উপমাটি ইতিপূর্বে উদ্ধৃত করিয়াছি তাহা এখানে কত সুপ্রযুক্ত

—“সচ্চিদানন্দ সাগরের ছুটি ঢেউ—রাম আর কৃষ্ণ”—এ “কত চতুরানন ... সাগর লহরী সমানা!”

সৰ্বশেষে আমি আর একবার বিজ্ঞাপতির স্বপক্ষে আমাদের পুরাতন দাবীটি উত্থাপন করিতেছি,—বিজ্ঞাপতিকে তাঁহার যুগের কবি-সার্বভৌম বলা যায় কি না। যিনি কাব্যে রীতি-বিলাসের চূড়ান্ত প্রমাণ রাখিয়াছেন,—বাক্যবৈদগ্ধ্য ঋষি-র তুলনা নাই, রূপ ও রসের মিলনোজ্জ্বলে ঋষি-র কাব্য চমৎকৃতির শেষ স্তরে উঠিয়াছে, এবং অন্ততঃ প্রধান কয়েকটি রসপৰ্য্যায়ের ঋষি-র কবি-কৃতিই সৰ্বশ্রেষ্ঠ, সেই মহাকবি বিজ্ঞাপতিকে তাঁহার যুগের শ্রেষ্ঠ কবি বলিলে বোধকরি মিথ্যাচার করা হয় না।

(ইতিপূর্বে আমি “সখি কি পুছসি অলুভব মোয়” পদটিকে বিজ্ঞাপতির বলিয়াই গ্রহণ করিয়াছি। অনেকে পদটি বিজ্ঞাপতির বলিতে চান না। যুক্তি—পদটি ‘কবিবল্লভ’ ভণিতায় পাওয়া যায় এবং পদান্তর্গত ‘অলুভব’ শব্দটির ঐ বিশেষ অর্থে ব্যবহার রূপ গোস্বামীর অলঙ্কার গ্রন্থের নির্দেশ-অনুযায়ী। এ বিষয়ে আমাদের বক্তব্য হইল, ‘কবিবল্লভ’ বিজ্ঞাপতিরও উপাধি ছিল, অস্ত্রেরও থাকিতে পারে। আর ‘অলুভব’ শব্দটি যে বিজ্ঞাপতির অজানা ছিল, তাহা সত্য নয়। অকৃত্রিম ও সন্দেহজনক—বিজ্ঞাপতির নামাক্তি উভয় প্রকার পদে ‘অলুভব’ শব্দটির ব্যবহার আছে। যথা সাহিত্য-পরিষদ সংস্করণের ৫২৭, ৫৩৫ এবং ৬৯৯ পদ। আবার ‘অলুভব’ শব্দটির বিশেষ অর্থ—নিতি নবায়মান প্রেম—ঠিক ঐ অর্থে শব্দটির ব্যবহার থাক বা না থাক, ‘তিলে তিলে নূতন হোয়’ প্রেম যে বিজ্ঞাপতির অজানা ছিল না তাহার প্রমাণ তাঁহার কাব্যেই পাওয়া যায়। বিজ্ঞাপতির বলিয়া অবিদ্যবাদিতভাবে স্বীকৃত অতিশয় বিখ্যাত “আজু রজনী হাম ভাগে পোহায়লু” পদের শেষ পঙ্ক্তি—“ধনি ধনি তুয়া নব নেহা।” বিজ্ঞাপতির নয় বলিয়া কাল্পনিক সন্দেহ-দুষ্ট আরো দুইটি পদে অলুভব ভাব—“সহএ ন পারএ নব নব নেহ” (২৯৯ সাঃ পঃ সং) এবং “তোহর পিরীতি সে নব নব মানয়” (এ—৩৯৫)।

কিন্তু ইহা তো বহিঃপ্রমাণ-অপ্রমাণের কথা। আমি আভ্যন্তরীণ দৃষ্টান্তকেই গুরুতর বিবেচনা করি। সে দিক দিয়া ‘সখি কি পুছসি’ পদটি এবং প্রার্থনার পদগুলির ভাবগত ঐক্য কি চক্ষুস্থানের নিকট অস্পষ্ট থাকিবে? পদটির শেষে ‘বিদগধ জনের’ বিরুদ্ধে যে অভিযোগ, ‘অলুভবের’ জন্ত যে উৎকর্ষা, তাহা তো প্রার্থনা পদের ভাব-অঙ্গীকার। “কত চতুরানন,” “কিএ মাহুয পশু”—এ সকল যে “লাখ লাখ যুগ,”

“কত মধু যামিনী,” ইত্যাদির সঙ্গে একেবারে ভাবৈকরস তাহাও বুঝাইয়া বলিতে হইবে? ইহাতেও যদি না হয়, ‘আজু রজনী হাম’ পদটির প্রতি পুনর্বার দৃষ্টপাত করিতে বলি। সেখানে “লাখ লাখ ডাকউ,” “লাখ উদয় করু,” “লাখ বান ইউ,” আর “কি পুছনি” পদে “লাখ লাখ যুগ”—লাখের প্রতি এমন পিঙ্গীতি তো বিতাপতি বই আর কোথাও বিশেষ দেখি না। এ প্রমাণও যদি যথেষ্ট না হয়, তবে শেষ যুক্তি আছে—অপরপক্ষের যথেষ্ট প্রমাণাভাব। একটি সুপ্রচলিত ধারণাকে বিপর্যস্ত করিতে হইলে যে পরিমাণ যুক্তি ও তথ্য সমাবেশ করিতে হয় তাহার অল্পমাত্র সংগৃহীত হইলে আসামী সন্দেহ সত্ত্বেও প্রমাণাভাবে খালাস পায়। এই হিসাবেও বিতাপতি পরিজ্ঞাণ পান।)

শ্রীকৃষ্ণকীর্তন

রাধাচরিত্র

শ্রীকৃষ্ণকীর্তনের রাধিকা পুরাতন বাংলা কাব্যসাহিত্যের পুঙ্খানুপুঙ্খচিত্রিত পূর্ণাবয়ব চরিত্র। সে যুগে ইহার দ্বিতীয় নাই। চর্যাপদের পর কৃষ্ণকীর্তন যদি সর্বাধিক পুরাতন বাংলা সাহিত্যের নিদর্শন হয়, তবে বলিব, ইহার মধ্যে প্রাচীন কবিমনের সৃষ্টি, প্রাচীন কবিসংস্কারের অল্পগত যে নারীচরিত্রটিকে পাইলাম, সে নারী কিন্তু চিরস্তনী—যুগের খোলসটি ছাড়াইয়া ফেলিলে চিরমানবের রক্তস্পন্দিত দেহবিগ্রহ বাহির হইয়া আসিবে; সে নারী ‘তীনভুবনজনমোহিনী’, ‘শিরীষকুম্মকৌঅলী’, ‘অদভুদ কনকপুতলী’ চন্দ্রাবলী রাহী।

কৃষ্ণকীর্তনের রাধিকা রক্তমাংসে গঠিতা, প্রাণোত্তাপে সঞ্জীবিতা। মাহুষের দেহপ্রাণের ইচ্ছা অনিচ্ছা, আশা নিরাশা, বাসনা কামনা, আকৃতি আবেগ—এ সকলের একটা স্বতন্ত্র মর্যাদা এবং কাব্যমূল্য আছে। সে মূল্য ও মর্যাদাকে কাব্য কখনো স্বীকার করে, কখনো করে না। অবশ্য সম্পূর্ণ স্বীকারের অর্থ কাব্যের আত্মবিনাশ। কাব্যে হয় বাস্তবের শরীরী রূপ নয় অশরীরী আত্মা—ইহার যে কোন একটির প্রাধান্য ঘটিয়া থাকে। নভোলোকচারী সূক্ষ্ম রসরহস্তলীন কাব্যের—এ উৎকৃষ্ট কাব্যেরই—অভাব এদেশে নাই। কিন্তু জীবনোচ্ছল কাব্য! তাহার বিরল অস্তিত্বের ইতিহাসে রাধাসর্বস্ব শ্রীকৃষ্ণকীর্তন একটি স্মরণীয় সম্পদ।

‘রাধাসর্বস্ব শ্রীকৃষ্ণকীর্তন’ বলিবার তাৎপর্য আছে। কাব্যটির যাহা কিছু ঐ একটি চরিত্র। অগ্ন চরিত্রগুলি ঐ চরিত্রকে ফুটাইবার জগ্ন অঙ্কিত। শ্রীকৃষ্ণকীর্তনের শ্রেষ্ঠত্বের সবটুকু আত্মসাৎ করিয়াছে রাধা। যাহার নামকীর্তন করিতে কাব্যটির রচনা সেই শ্রীকৃষ্ণই উহার দোষের আশ্রয়। কাব্যটির যত কিছু দুর্নাম কৃষ্ণের জগ্ন।

রাধার চরিত্র বর্ণনাপ্রসঙ্গে কাব্যের দোষগুণের বিচারে আসা উচিত নয়, তবে স্থূলতঃ দুই-একটি কথা বলিয়া লই।

কৃষ্ণকীর্তনের বিরুদ্ধে গ্রাম্যতা ও অঙ্গীলতার অভিযোগ আছে। আপাতদৃষ্টিতে সে অভিযোগ সত্য মনে হয়। যাহাদের সাহিত্যরুচি অপেক্ষাকৃত মার্জিত তাঁহারা বহিরঙ্গ অঙ্গীলতা যাহা, সেই দেহবর্ণনার অতিরেককে তত দৃশ্যীয় মনে করেন না;

কৃষ্ণের অনাবৃত গ্রাম্য গোঁয়াতুঁ মিহি তাঁহাদের নিকট অসহ। কৃষ্ণের আচরণ কাব্যত্রীকে অবমানিত ও মাহুঘের সৌন্দর্য্যবোধকে আঘাত করিয়াছে। ই

শ্রীকৃষ্ণকীর্তনের কৃষ্ণ বাস্তবিক 'গমার' তাহাতে সন্দেহ নাই, এবং সময় সময় তাহার কুশ্রীতা মনে ক্রুদ্ধ বিরাগের সৃষ্টিও করে। তথাপি বিচারের অপর দিকও আছে। কৃষ্ণকে বাদ দিয়া কাব্যের কাব্যত্ব যেখানে, সেখানে দীপ্তি আসিত কি? অর্থাৎ ঐ অসহ অভব্য কৃষ্ণব্যতীত রাধাচরিত্র অমন করিয়া ফুটিতে পারিত কি? রাধাচরিত্রের অগ্র কৃষ্ণ—ঐ অসংস্কৃত কৃষ্ণ—যদি অপরিহার্য্য হয়, তবে কাব্যের পক্ষেও তাহাকে অপরিহার্য্য বলিয়া স্বীকার করিতে হইবে। শ্রীকৃষ্ণকীর্তনের রাধাচরিত্রের মধ্যে মানব-বিগ্রহের প্রাণপ্রতিষ্ঠা যদি হইয়া থাকে, তবে এই কথাই বলিব, কৃষ্ণের সহিত সংঘর্ষ-সম্পর্কেই রাধার অমন উজ্জ্বল্য বিচ্ছুরণ; এক বিদগ্ধ কৃষ্ণের পাশে রাধার অপ্রাকৃত রসবিহ্বল স্বরূপ নিরীক্ষণ করিয়া আমাদের রসপিপাসা এক্ষেত্রে চরিতার্থ হইতে পারিত না।

শ্রীকৃষ্ণকীর্তনের মানবতা ও বাস্তবতা আমাদের প্রাচীন কাব্যসাহিত্যের একটি সম্পদ। এই মানবতা মানবগুণসার কোন ভাবনির্যাস নহে, তাহা সীমাবদ্ধ আশা-আকৃতির মর্যাদার উপর প্রতিষ্ঠিত। কোন উচ্চতর ভাবলোকের কলাকুতূহল নহে, যে মাহুঘকে জানি, যাহাকে বৃকে জড়াইয়া অহুভব করি, যাহার মধ্য দিয়া সাধারণ জীবনের উৎকর্ষা মূর্তিমান হইয়া ওঠে—শ্রীকৃষ্ণকীর্তনে সেই মাহুঘকে অভিবাদন জানান হইয়াছে। এই মানবতা বা মাহুঘত্ব দেহ এবং প্রাণ উভয়কে বেঠেন করিয়া আছে। কৃষ্ণকীর্তনে দেহকে অস্বীকার করা হয় নাই। বিদেহ আত্মা সেখানে দেহকে ঘিরিয়া গুল্লন করে, সহজে দেহত্যাগ করিতে চায় না। সুতরাং এই 'দেহ' পরবর্তী বৈষ্ণব পদাবলীর 'দেহ' নয়। পদাবলীতে দেহ আছে, তাহার সন্তোগের সূক্ষ্মাতিসূক্ষ্ম বর্ণনাও আছে। কিন্তু অপ্রাকৃত ভাববৃন্দাবনের সেই 'দেহ' যেন মাহুঘের শুদ্ধ আত্মার বাহু রূপনির্মাণ। তাহার মধ্যে প্রাকৃত প্রাণোত্তাপ—সজীবতা অল্পই। দেহসন্তোগ পরিবেশ এবং বর্ণনাগুণে এমনই রূপকাক্রমী যে, মনে তাহা পার্থিব কাব্যাহুভূতি তেমন করিয়া জাগাইতে পারে না। উদাহরণস্বরূপ গোবিন্দদাসের কথা ধরা যাক। গোবিন্দদাসের মধ্যে দেহকামনা ও দেহভোগের যে বিস্তৃত বিবরণ আছে, তাহা কেবল মাণ্ডনিকতার দ্বারা চাপা পড়িয়া গিয়াছে, একথা সূর্য্যংশে সত্য নয়। মাণ্ডনিকতা খানিকটা চাপা দিয়াছে,—তদুপরি ছিল গোবিন্দদাসের কাব্যে পার্থিব দেহকামনা অস্বীকৃতির মনোভাব। তিনি দেহকে দেহ হিসাবে অর্থাৎ সাধারণ মাহুঘ যেভাবে গ্রহণ করে সেভাবে গ্রহণ করেন নাই, ঐ দেহ দেহাতীতকে পাইবার একটা অবলম্বন-

স্বরূপ। সুতরাং গোবিন্দদাসের কাব্যের মূল্য অন্তরীক্ষে, যাহাই হউক, তাহাতে লৌকিক রসের মধ্যাদা নাই। অবশ্য ইহাতে কবি বা পাঠকের দুঃখের কারণ ঘটতেছে না; মানবজীবনের মধ্যাদাপ্রতিষ্ঠা গোবিন্দদাসের কাব্যোদ্দেশ্য নয়। এই দেহের প্রসঙ্গে আরও একটি সম্পূর্ণ বিপরীত দৃষ্টান্তের কথা মনে আসিতেছে। বামাচারী তাত্ত্বিক সাধকেরা দেহকেই তাঁহাদের সাধনার প্রথম সোপান হিসাবে গ্রহণ করেন। ইন্দ্রিয়পাশ ছেদন করিতে সেই অনাবৃত ইন্দ্রিয়সম্ভোগ বা দেহোপভোগকে কাব্যের উপাদান করিলেও কাব্যে মানবতার প্রতিষ্ঠা হইবে না। কারণ সেখানে সাধারণ মানুষের দৃষ্টি—তাহার প্রবৃত্তি সংস্কার প্রীতি বা ভীতি লইয়া দেহকে গ্রহণ করা হয় না।

সাধারণ মানুষের দৃষ্টিতেই কৃষ্ণকীর্তনকার এই দেহকে গ্রহণ করিয়াছেন। তাই তাঁহার কাব্যে মানবজীবনের নিজস্ব যে সম্মান, তাহার আশ্রয়লাভ ঘটিয়াছে। রাধিকা-চরিত্রের মধ্য দিয়া প্রাকৃত মানুষের সাধারণ দেহবোধের পরিচয় রাখিয়াছেন। প্রবৃত্তি এবং তাহার পরিণতির চিত্র আছে কৃষ্ণকীর্তনে। মানবিক ধর্ম ও ধারণার বৈপরীত্য ঘটান হয় নাই বলিয়া আমাদের দৃঢ় বিশ্বাস, শ্রীকৃষ্ণকীর্তনের মধ্যে অঙ্গীলতা বা দুর্নীতি নাই—অবশ্য গ্রাম্যতা বা স্থূলত্ব কিছুটা আছে। যুগপরিবেশে এবং বাংলা সাহিত্যের তাৎকালিক অবস্থাবিচারে উহা অবশ্যস্বাবী।

এখন আর একবার অঙ্গীলতা বা দুর্নীতি-সম্পর্কিত অভিযোগের সত্যাসত্য যাচাই করা যাক। একজন খ্যাতনামা আধুনিক সমালোচক রবীন্দ্রনাথের চিত্রাঙ্গদার আলোচনাপ্রসঙ্গে একটি গুরুতর প্রশ্ন তুলিয়াছেন; তিনি বলিতেছেন, চিত্রাঙ্গদার অঙ্গীলতা-বিষয়ে যে-কারণে অভিযোগ উপস্থিত করা হয়, সে কারণটি যুক্তিসহ নহে। কাব্যটির মধ্যে দেহসম্ভোগের যে বর্ণনা আছে তাহা এমন কিছু মারাত্মক নয় যে, অঙ্গীল বলিতে হইবে। এই প্রসঙ্গে সমালোচক মহাশয় কিন্তু আর একটি কঠিনতর আপত্তি তুলিয়াছেন; তিনি বলেন, চিত্রাঙ্গদা কাব্যে অঙ্গীলতা নয়, দুর্নীতি প্রবল। তাঁহার বক্তব্য উদ্ধৃত করিলে বিষয়টি পরিষ্কার হইবে :

“চিত্রাঙ্গদার মধ্যে যাহা প্রধান দোষ তাহা অঙ্গীলতা নয়, দুর্নীতি; তাহাতে ভাষাগত অঙ্গীলতা তো নাই-ই, অর্থগত অঙ্গীলতা যেখানে যেটুকু আছে, কাব্য হিসাবে তাহা নিম্ননীয় নয়। কিন্তু যে ধরণের দুর্নীতি এ কাব্যের প্রধান দোষ, তাহা কল্পনাবস্তু ও কল্পনাভঙ্গিতেই প্রকট হইয়াছে। আমি যে দুর্নীতির কথা বলিতেছি তাহা নীতিবাগীশের দুর্নীতি নহে; কবির কল্পনায় যে ভাববঞ্চনা রহিয়াছে, সৃষ্টির সত্যকে উপেক্ষা করিয়া একটা অযথার্থ আদর্শ-প্রতিষ্ঠার যে চেষ্টা উহাতে

লক্ষিত হয়—এ কাব্যের সর্বপ্রকার দুর্নীতির মূল কারণ তাহাই।...যে চিত্রাঙ্গদার রূপে প্রথমে অর্জুনের দেহের ক্ষুধা মিটিয়াছিল, এবং যে চিত্রাঙ্গদার গুণে শেষে ঙ্গাহার আত্মার ক্ষুধা মিটিল—এই দুই চিত্রাঙ্গদা কি এক ব্যক্তি? 'দেহেও এক নয়। বরং এত বিপরীত যে একজনকে আর একজন বলিয়া চিনিয়া লওয়াই দুঃসাধ্য। চিত্রাঙ্গদা যখন স্বর্গীয় রূপলাবণ্যের অবসানে তাহার মুখাবগুঠন মোচন করিল, তখন অর্জুন শুধু কুৎসিত নয়—একজন সম্পূর্ণ অপরিচিত নারীকে দেখিয়া অপ্রতিভ ও সম্বস্ত হইল না? এই সম্পূর্ণ ভিন্নমূর্তিধারিণীকে তৎক্ষণাৎ সে গভীর প্রেমের চক্ষে দেখিল কি করিয়া? এ যেন এক নারীকে ত্যাগ করিয়া আর এক নারীতে আসক্ত হওয়া। তাহা হইলে, সম্ভোগতৃষ্ণা চরিতার্থ করিবার জন্ত এক নারী, এবং সেই তৃষ্ণার অবসানে ধর্মচর্চার জন্ত আর এক নারীর ব্যবস্থাই সমীচীন?...যৌনশিপাসা মিটাইল একজন, প্রেমের আকাজক্ষা পূরণ করিল আর একজন—জীবনের সত্য ইহা নয়, ইহা সৃষ্টি-নিয়মের বহির্ভূত।”

চিত্রাঙ্গদা সম্পর্কে উপরিউক্ত সমালোচনা বর্তমান লেখকের মনোমত, এ কথা কেহ যেন ধরিয়া না লন। মনোমত কি, সে প্রশ্নের উত্তর দিবার প্রয়োজন বর্তমানে নাই। আমি চিত্রাঙ্গদার ঐ বিরূপ সমালোচনার স্বযোগ গ্রহণ করিতেছি এইজন্য যে, ঐ সমালোচনার বিপরীত পক্ষ খাড়া করিয়া শ্রীকৃষ্ণকীর্তনের কবিকৃতির মূল্য যাচাই করিয়া লইতে পারিব। চিত্রাঙ্গদাসম্বন্ধে ঐ বিরুদ্ধ বক্তব্যকে আমি কাব্য হইতে যেন বিচ্ছিন্ন করিয়া লইয়াছি এবং তাহারই আলোকে কৃষ্ণকীর্তনের অঙ্গীলতার অভিযোগের পুনর্বিচারে প্রবৃত্ত হইয়াছি। বলা বাহুল্য, চিত্রাঙ্গদা সম্বন্ধে সত্য হোক বা না হোক, সাধারণ কাব্য সম্বন্ধে সমালোচকের পূর্বোক্ত তত্ত্বদৃষ্টিকে আমি সমর্থন করি।

শ্রীকৃষ্ণকীর্তনে আপাতদৃষ্টিতে অঙ্গীলতা যতই থাক, তাহা সমালোচক-কথিত চিত্রাঙ্গদার পূর্বোক্ত দুর্নীতি হইতে মুক্ত। চিত্রাঙ্গদার কবি বাহু-রূপের উর্দ্ধে প্রাণ বা আত্মার মর্যাদা প্রতিষ্ঠা করিতে চাহিয়াছিলেন। কিন্তু তাহা করিতে গিয়া দেহের মূল্যকে সম্পূর্ণ অস্বীকারের চেষ্টা করিয়াছেন। চিত্রাঙ্গদা ধার-করা রূপের বিরুদ্ধে বিদেহ পোষণ করিতে পারে, কিন্তু দেহ, তাহাতো তাহার নিজের। দেহ-খাচায় বাস করিয়া হৃদয়-মনের অতথানি নির্বিকার কূটস্থ অবস্থা সম্ভব কি, অন্ততঃ চিত্রাঙ্গদাশ্রেণীর নারীর? দেহরূপের মর্যাদাগত যে অস্বীকৃতি চিত্রাঙ্গদার ক্রটি বলিয়া বিবেচিত, শ্রীকৃষ্ণকীর্তনের মধ্যে তাহার সম্পূর্ণ ব্যতিক্রম। রাধিকার দেহের উপর কৃষ্ণের অত্যাচার ঘটনাছে তখন, যখন তাহার মন জাগে নাই। কিন্তু ঐ

দেহই মনকে জাগাইল। দেহের সঙ্গে মনের আত্মিক বিচ্ছেদ চিত্রাঙ্গদায়; কৃষ্ণকীর্তনের মধ্যে দেহ এবং মনগভীরতর সত্যায় সংযুক্ত। ইচ্ছায় অথবা অনিচ্ছায় যাহাকে দেহদান করিতে হইল, তাহার বিকীর্ণ হই প্রেম নয় ঘৃণা, যে কোন একটি জাগিবে। রাধিকার প্রেমই জাগিয়াছিল। দেহের সোপান সাহিয়া সেই প্রেমের পদক্ষেপ। কৃষ্ণকীর্তনে রাধিকার পূর্বরাগ নাই,—পূর্বভোগ ঘটয়াছে। রাধিকা সেখানে পূর্বভোগ হইতে পূর্বরাগে পৌঁছিয়াছেন। ইহাতে অমনস্তাত্ত্বিক কিছু ঘটে নাই। দিনের পর দিন কামনার সাগরে দেহদান করিতে হইতেছে, অথচ মন আগাইতেছে না—ইহা অসম্ভব। অর্জুন চিত্রাঙ্গদার সহিত কত বসন্ত-নিশীথ যাপন করিল, অথচ আরোপিত রূপের এমনই মাহাত্ম্য যে, সে চিত্রাঙ্গদা-মাল্লঘটার কোন পরিচয়ই আবিষ্কার করিতে পারিল না—ইহা বড় আশ্চর্য। বৎসরান্তে রূপত্যাগী চিত্রাঙ্গদাকে নূতন করিয়া প্রাপ্তি—চিত্রাঙ্গদার মহত্ত্বের সহিত শুভদৃষ্টি—অর্জুনের পক্ষে অভিনব ঘটনা। নূতন চিত্রাঙ্গদার সহিত পূর্বতন চিত্রাঙ্গদার সম্পর্ক কোথা? শ্রীকৃষ্ণকীর্তনে এই বস্তুটি ঘটে নাই। রাধা এবং কৃষ্ণ এই দুই নরনারীর মধ্যে দেহমিলনঘটিত যে দ্বন্দ্ব চলিয়াছিল—তাহাতে প্রথমে মনের কোন সম্পর্ক ছিল না। কিন্তু মন দেহকে বাদ দিয়াও নয়। কৃষ্ণ রাধাদেহকে যতই ভোগ করিয়াছে—আন্তরিক বিরাগ সত্ত্বেও—রাধার চিত্ত কৃষ্ণের প্রতি সেই পরিমাণে আকৃষ্ট হইয়াছে। এই আকর্ষণ একেবারে অনিবার্য। কৃষ্ণকামনার আদি অধ্যায়ে রাধার মধ্যে হয়ত প্রবৃত্তির নীচুমহলের তাড়না একটু অধিক পরিমাণে ছিল, কিন্তু যতই দিন গিয়াছে, ততই ঐ অসংযত কামনা প্রেমের রূপ ধরিয়াছে। সর্বশেষে, রাধার প্রেম যে স্তরে উপনীত হইল তাহা পরবর্তী বৈষ্ণব ভাবরসের শ্রেষ্ঠাধার মহাভাবস্বরূপ হয়ত হয় নাই, দেহকামনার রেশটুকুও বোধ করি শেষ পর্য্যন্ত উহার মধ্যে থাকিয়া গিয়াছিল, যাহা নিতান্ত মানবিক—তথাপি তাহার অন্তিম রূপান্তর মানবচরিত্রের শ্রেষ্ঠ হৃদয়ধর্মকে উদ্ঘাটিত করিয়া দেয়।

এখন আমরা সংক্ষেপে কৃষ্ণকীর্তন কাব্যে রাধাচরিত্রের ক্রমবিকাশের স্তরগুলি পর্য্যবেক্ষণ করিব। কবি রাধা নাম্নী একটি এগার বৎসরের বালিকাকে তাহার কাব্যে অবতীর্ণ করাইলেন। বলাবাহুল্য এ রাধা কোন ভাববৃন্দাবনের নয়। সে একেবারেই লৌকিক। সে রোমাটিকা নয়, সে বাস্তবিকা। কবি যেমন দেখিয়াছেন তেমনি দেখাইয়াছেন। তাহার মুখের ভাষাটুকু পর্য্যন্ত তাহার নিজের। কবি সম্পূর্ণ আত্মসংহরণ করিয়া সেই রাধাচন্দ্রাবলীকে আত্মপ্রসারের স্বযোগ দিয়াছেন।

কবি সেই বালিকাটিকে অবাক হইয়া চাহিয়া দেখিতেছেন। তাহার বয়স এগার বটে কিন্তু ঐ বয়সেই কী তীব্র ব্যক্তিত্ব,—কী প্রথম আত্মস্বাতন্ত্র্য! আত্মস্বাতন্ত্র্য

অবস্থায় সর্বস্ব খোয়াইয়া ফেলিবার মেয়ে সে নয়। রতিই জাগিল না, আরতি কোথায়! পরযুগের বৈষ্ণব কবিরা রাধার মুখ দিয়া বলাইয়াছেন—‘শিশুকাল হইতে বন্ধুর সহিতে পরাণে পরাণে বান্ধা,’—সে রাধিকা দ্বিজ। দুইজন কবির হাতে রাধিকার একটি সম্পূর্ণ জীবন কাটিয়া গিয়াছে। তাঁহারা হইলেন বিজ্ঞাপকি ও বড় চণ্ডীদাস। এই দুইজন অনভিজ্ঞাকে অভিজ্ঞা, মুগ্ধাকে প্রগল্ভা, কৃষ্ণবিরূপাকে কৃষ্ণ-প্রাণা করিয়া গিয়াছেন। তবেই না পরের যুগের প্রারম্ভেই ‘রাণাবাস পরা যৌবনে যোগিনী’ সে।

যাহাই হউক, প্রথম দর্শনেই রাধিকা একেবারে ‘মনের পাঁজর’ কাটিয়া বসিয়া যায়। সাগর গোয়ালের ঘরে যাহার জন্ম, পদ্মা যাহার মাতা, বৃন্দাবনে যাহার বাস, রূপ তাহার অপরূপ—চমৎকার ভাষায় কবি তাহা বর্ণনা করিয়াছেন :

তীনভুবনজনমোহিনী।

রতিরসকামদোহনী ॥

শিরীষকুসুমকৌঅলী।

অদভূত কনকপুতলী ॥

রূপের বর্ণনায় মনে যেটুকু কোমল মধুর ভাব জাগিয়াছিল, তাহা রাধিকা অবিলম্বে দূর করিয়া দিল। ‘শিরীষকুসুমকৌঅলী’ দেহের মধ্যেও বিদ্যুতের দীপ্তি আর অগ্নির দাহ থাকিতে পারে। কৃষ্ণ রাধার রূপের কথা শুনিয়া মজিয়াছে, বড়ায়িকে দিয়া প্রণয়ের কর্পূর তাড়ুল পাঠাইয়াছে। বড়ায়িও দূতীর উপযুক্ত স্বরে কথা পড়িল (‘কথা খানি খানি কহিল বড়ায়ি বসিআ রাধার পাশে’); কৃষ্ণের পরিচয়, বিরহজ্বরে (নাম শুনিয়াই বিরহ!) তাহার শোচনীয় দশা,—ইত্যাদির বর্ণনা দ্বারা রাধিকার করুণা এবং তদন্তর স্নেহোদ্রেকের উপযোগী পরিবেশ সৃষ্টি করিয়া সবে কর্পূর তাড়ুল হয়ত একটু বাড়াইয়াছে—বাড়াইতে আর হইল না—অকস্মাৎ—

এ বোল স্থগিআ নাগরী রাধা

হাণএ সকল গাএ।

যত নানা ফুল পান করপূর

সব পেলাইল পাএ ॥

তারপরেই দিকার, গল্পনা, আত্মমর্যাদার ঘোষণা—সর্বশুদ্ধ অগ্নিবর্ষণ :

ঘরে সামী মোর সর্বাক্ষে স্থন্দর

আছে স্থলক্ষণ দেহ।

নান্দের ঘরের গরু রাখোআল

তা সঙ্গে কি মোর নেহা ॥...

ধিক জাউ

নারীর জীবন

দেহে পশু তার পতী ।

পরপুরুষের

নেহাঞঁ যাহার

বিষুপুরে (হএ) স্থিতী ॥

বুড়ি বড়ায়ি অবশ্য ইহাতে খামিল না । কৃষ্ণ নাছোড়বান্দা, রাধার সহিত মিলন ঘটাইতেই হইবে । কৃষ্ণের প্রতি প্রীতি অথবা আপন স্বভাবে বড়ায়ি রাধাকে আর একবার ধরিয়া পড়িল । কিন্তু কাছে কাছে ঘুরিলেও বড়ায়ির রাধিকাকে চিনিতে বাকি ছিল । বড়ায়ির কথা শুনিয়া—‘কোপে গরজিলী রাধা যেন কালশাপ ।’ কাল-সাপের গর্জন কবির ভাষায় শোনা যাক :

দাকগী বুঢ়ী তোর বাপেত নাহিঁ লাজ ।

তেকারণে মোক বোলসি হেন কাজ ॥...

আর ঘবেঁ বোল মোরে হেন পরিহাস ।

আবসি করিবোঁ তবেঁ তোমার বিনাশ ॥

এবং :

এহা গুআ পান তোকে আপণেই ঝাহা ।

আপণাক চিহ্নিয়া কাছের থান যাহা ॥

এবং ইহাতেও সন্তুষ্ট না হইয়া :

এহা বুলী বড়ায়িক চড়ে মাইল রোষে ।

এই রাধা । সবল স্বস্থ তেজস্বিনী প্রাণোচ্ছল । দেহে এবং মনে দুর্বলতা কোথাও নাই । হিন্দুর ঘরের মেয়ে, মনে সত্যবোধ গাঁথিয়া আছে । সংস্কার তাহার চিরকালের সম্পদ । অবস্থাপন্ন ঘরের বধূ—সে কারণে গর্বও অল্প নয় ; ‘বড়ার বোহারী আক্ষে বড়ার বী’ ; স্বামী লইয়া তাহার অভিযোগের কোন কারণ ঘটে নাই—‘চিরকাল জীউ মোর সামী আইহন । আহুপাম বল বীর মতীএঁ গহন ॥’ সে একজন সাধারণ ‘রাখোয়াল’ ছোকরাকে ভজিবে কোন দুঃখে । স্বতরাং রাধা কৃষ্ণের কুপ্রস্তাবে চটিয়া গালাগালি দিয়া মারিয়া যে বড়ায়িকে তাড়াইয়া দিবে তাহাতে অবাধ হইবার কিছু নাই ; না দিলেই অবাস্তব হইত ।

এমন মেয়ে একদিন কৃষ্ণ কৃষ্ণ করিয়া পাগল হইয়া উঠিবে—রূপযৌবন, পতি-পরিজন, লাজলজ্জা, কুল-গোহুল সব ভাসাইয়া অন্ধ আবেগে কৃষ্ণ-সন্ধানে ছুটিয়া বেড়াইবে—অন্ততঃ নয়, এই বড়ু চণ্ডীদাসের কাব্যেই । কিন্তু সে অবস্থা আনিতে কবিকে

দীর্ঘ প্রস্তুতি, সতর্ক পদক্ষেপে অগ্রসর হইতে হইয়াছে। সেই প্রস্তুতির ইতিহাসটুকু কৃষ্ণকীর্তনের গৌরব। এমন করিয়া চরিত্র-চিত্রণ সে যুগে কেন এ যুগের তুল্য ক্ষেপে প্রতিভা-শক্তি দাবী করে। তাম্বুল খণ্ডে কৃষ্ণের কর্পূর-তাম্বুল রাধা 'পেলাইল পাএ'; দানখণ্ড, নৌকাখণ্ড, ভারখণ্ড, ছত্রখণ্ড, বৃন্দাবনখণ্ড, কালিয়দমন খণ্ড,—যমুনা, হার এবং বাণখণ্ডের সুদীর্ঘ পথ পরিক্রমণ করিয়া যে রাধা জীবনের পথে অনেকখানি আগাইয়া গিয়াছে, বংশীখণ্ডে তাহার কণ্ঠে যখন বাজিয়া উঠিল—যাহা চিরযুগের বিরহী-হৃদয়ের ভাবোচ্ছ্বাস :

কে না বাঁশী বাএ বড়ায়ি কালিনী নইকুলে ।

কে না বাঁশী বাএ বড়ায়ি এ গোঠ গোকুলে ॥

আকুল শরীর মোর বেআকুল মন ।

বাঁশীর শব্দে মো আউলাইলোঁ রাক্ষন ॥

কে না বাঁশী বাএ বড়ায়ি সে না কোন জনা ।

দাসী হইয়া তার পাএ নিশিবোঁ আপনা ॥...

আবার বরএ মোর নয়নের পাণী ।

বাঁশীর শব্দে বড়ায়ি হারায়িলোঁ পরাণী ॥

—তখন পাঠক রাধিকার এই রূপান্তরকে অভিনব মনে করিয়া বিস্ময়-চাকত দৃষ্টি-ক্ষেপ করে না। পূর্বের খণ্ডগুলি বাহিয়া পাঠকও রাধার সহিত বংশীখণ্ডে আসিয়া পৌছিয়াছে। সূক্ষ্ম রসদৃষ্টি এবং তীক্ষ্ণ মানবচরিত্রাভিজ্ঞতা সহায়ে বড় চণ্ডীদাস রাধা-চরিত্রের যে বিবর্তন ঘটাইলেন তাহাতে অবাস্তবতা—আধুনিক মনোদর্শী দৃষ্টিভঙ্গির আলোকেও—অসম্ভাব্যতা কিছু থাকে নাই। সমালোচক বলিতেছেন, ইহার পর সকল বাংলা কাব্যের রাধিকাই কৃষ্ণের বংশীধ্বনি শুনিবে, কিন্তু কেহই কৃষ্ণকীর্তনের রাধার মত সহজ স্বাভাবিক একান্ত ঘরোয়া সুরে আপনার বেদনা প্রকাশ করিতে পারিবে না—যাহার শরীর আকুল, যাহার রক্ষন 'আকুলায়িত', যাহার মন 'বেআকুল', 'কৃষ্ণারের পণীর' মত যাহা নিরন্তর দগ্ধ হইতেছে।

তাম্বুলখণ্ডে রাধা লাগি মারিয়া তাম্বুল এবং হাতে মারিয়া বড়ায়িকে বিদায় দিল। কিন্তু ঐ 'অলপবয়সী বালা' মাত্র নিজের তেজ ও সতীত্ব-গর্বে কি সর্বনাশ এড়াইতে পারিবে? অপমানাহত বড়ায়ি এবং কামাহত কৃষ্ণ যড়যন্ত্র করিয়া রাধাকে পথে আটকাইল। রাধিকা পসরা লইয়া ঘাইতেছে, সুতরাং কৃষ্ণের দান চাই। চাহিবার অধিকার? বর্ষের বল আপনার অধিকার আপনি সৃষ্টি করে। কৃষ্ণ বলিতেছে, হয় অর্থ, নয় দেহ, যে কোন একটি দাও; কোন তৃতীয় বিকল্প নাই। আবার অর্থ হইতে

দেহের প্রতি কৃষ্ণের অধিক আসক্তি। সেই নির্জ্ঞান গ্রামপথে সহায়হীনা একটি নিতম্ব বালিকা,—অসভ্য বলিষ্ঠ গ্রাম্য যুবক তাহার প্রতি অত্যাচারে উত্তত। কিন্তু কী সাহস মেয়েটির—চরিত্রের সে কিরূপ বহিঃদীপ্তি! কৃষ্ণ চরম ইন্দ্রিয়সুখার পরিচয় রাখিয়া খুঁটিয়া খুঁটিয়া রাধিকার দেহ-সৌন্দর্যের বর্ণনা করিতেছে, উত্তরে রাধিকা বলিতেছে :

দেখিল পাকিল বেল গাছের উপরে ।

আরতিল কাক তাক ভথিতৈ না পারে ॥

কৃষ্ণের অহুচিত কামনার বিরুদ্ধে তাহার স্পষ্ট কথা :

যার প্রাণ ফুটে বৃকে ধরিতৈ না পারে ।

গলাত পাথরী লক্ষী দহে পসী মরে ॥

অথবা কঠিন বাদ্য :

দিঠিত পড়িলে বাঘত হয়ে লাজ ।

সোদর ভাগিনা হইয়া হেন তোর কাজ ॥

অথবা স্তম্ভিত রোষ :

যোল শত গোআলিনী নাইএ বিকে হাটে ।

মাগুকিলে কিলান্না মারিবো তোম্মা বাটে ॥

অথবা উপযুক্ত প্রত্যুত্তর :

এ বোল বুলিতৈ কাহ্নাঞিঁ মুখে লাজ বাস ।

এভোঁহো নাহিঁ ঘুচে তোর মুখে দুধবাস ॥

অথবা তীক্ষ্ণ সতর্কবাণী :

আক্ষার যৌবন কাল ভুজঙ্গম

ছুইলৈ খাইলৈ মরী ।

এত করিয়াও কিছু হয় না। বলাধিক্যের বিরুদ্ধে এক সময় তাহাকে ভাঙ্গিয়া পড়িতে হয়। রাধা কৃষ্ণকে সকাতির অহুরোধ জানাইল :

এহা অভয়ণ কাহ্নাঞিঁ সব মোর নে ।

বেরি এক কাহ্নাঞিঁ মোক ঘর যাইতে দে ॥

বলাবাহুল্য অহুনয়ে ফল হয় নাই। কৃষ্ণ পুনঃপুনঃ কদর্য্যভাবে রাধিকার বিভিন্ন দেহাঙ্গের বর্ণনা করিয়াই চলিল। ঘৃণায় লজ্জায় আশঙ্কায় বেদনায় অভিভূত সেই নিঃসহায় বালিকা কী গভীর হতাশায় না আত্মধিক্য দিতেছে—‘আপনার মাসে

হরিণী জগতের বৈরী'; 'সৌভাগ্য ও গৌরবের অভিজ্ঞান নিজ রূপসৌন্দর্যের প্রতি তাহার বিরাগের সীমা নাই :

আন ডাক দিখা বড়ায়ি নাপিতের পো।

কানড়ী খোপা বড়ায়ি মুণ্ডায়িবো মো ॥...

মুছিখা পেলাইবো বড়ায়ি সিশের শিন্দুর।

বাহর বলয়া মো করিবো শঙ্খচূর ॥

আর সর্বশেষে বাণীহীন বেদনায় :

লোটায়াঁ লোটায়াঁ কান্দে রাহী।

সেই রাধিকা আত্মসমর্পণ করিয়াছিল—তাহাকে করিতে হইয়াছিল। সে আত্ম-সমর্পণে আত্মরক্ষাবুদ্ধি প্রবল, বিন্দুমাাত্র হৃদয়সম্পর্ক ছিল না। নচেৎ আত্মদানের পূর্বে কেহ প্রতিজ্ঞা করাইয়া লয়, দেখিও হার না ছেঁড়ে, মুকুট না ভাঙে, অলঙ্কার না নষ্ট হয়, শরীরে আঘাত না পাই।—

মাথার মুকুট কাহাঞিঁ ভাঁগি জুগি জ্ঞাএ।

ঘোড় হাথ করি কাহু বোলোঁ তোর পাএ ॥

ছিণ্ডি জুগি জ্ঞাএ কাহাঞিঁ সাতেসরী হারে।

আর নঠ না করিহ সব অলঙ্কারে ॥

আত্মদানের উপযুক্ত ভাষা ও স্থর বটে! রাধিকা মন বিবিক্ত করিয়া দেহটিকে একটি কামোন্মত্ত জীবের হাতে নিরুপায় বেদনা ও লজ্জায় ছাড়িয়া দিল।

কাহাঞিঁর কামনা এত সহজে নিবৃত্ত হইবার নয়। স্তত্রাং বড়ায়ি-কাহাঞিঁ ষড়্‌যন্ত্রের শিকাররূপে পুনরায় নৌকাখণ্ডে রাধিকার নূতন বিপদ উপস্থিত হইল। তাহাকে নৌকা চড়াইয়া মাঝ যমুনাতে কৃষ্ণ যংপরোনাস্তি নাকাল করিয়া ছাড়িল। রাধিকার কটুকথা, ক্রন্দন, অনুনয় কিছুতে কিছু হইবার নয়। যখন—

মাঝ যমুনাত বড় বাত ভাঁা গেল।

পরত সমান ঢেউ নাঅত লাগিল ॥

—তখন কৃষ্ণ সাধুনা বা আশাস তো দূরের কথা, ইচ্ছা করিয়া নৌকা টলমল করাইতে লাগিল আর প্রতিশ্রুতি আদায়ের ফিকিরে রহিল—যদি আমার কথা স্বীকার কর, তবেই বাঁচাইব। প্রমত্ত কৃষ্ণযমূনার মাঝখানে লোভ-নিষ্ঠুর কৃষ্ণের হাতে পড়িয়া যদি 'ধারে' 'ঝরে' রাধিকার নয়নের পানী', যদি 'ডর পায়ি রাধা কাহাঞিঁকে মাছে কোল'—তাহা হইলে বুঝিতে হইবে রাধিকার দ্বিতীয় আত্মসমর্পণেও কোন হৃদয়-

সংযোগ ছিল না, তাহা নিতান্তই প্রাণের তাগিদে—দেহ-প্রাণ একত্র রাখিবার অবশ্য তাড়নায়। তথাপি এ পর্য্যন্ত কি রাধিকা-চরিত্রের কোন বিবর্তন ঘটে নাই? মানব-চরিত্রাভিজ্ঞ কবির নিকট তাহা অসম্ভব ঠেকে। দ্বিতীয়বারে রাধিকার দেহচেতনা জাগিয়াছে। প্রথমবার রাধা অকুণ্ঠিতচিত্তে নিজ দেহের উপর কাহ্নাক্রির অত্যাচারের কথা বড়ায়ির নিকট বিবৃত করিয়াছে, কিন্তু দ্বিতীয় বারে নানা ছলনায় তাহা চাপিয়া গেল। কৃষ্ণের প্রতি রাধার বিরাগের পূর্ণ পরিচয় রাখিয়াও মাত্র এই ঘটনাটির উল্লেখ করিয়া কবি অতি সূক্ষ্মভাবে রাধার চারিত্রিক পরিবর্তনের ইঙ্গিতটুকু দিলেন। আরো কোতুকের কথা, দ্বিতী বড়ায়ির নিকট রাধা এ বিষয় গোপন করিতেছে, যে সকলই জানে। রাধাও যে তাহা জানে না তাহা নয়, তবু—ইহাই মানবচরিত্র! চেতনা জাগিলে জাগে লজ্জা; তখন অণু আচ্ছাদন না পাইলে একান্ত আত্মজনের নিকটও মাহুষ সঙ্কুচিত হইয়া লজ্জা ও ছলনার তলে আত্মগোপন করিতে চায়।

ভারথণ্ডে রাধিকা অনেকখানি অগ্রসর হইয়াছে। সেখানে রাধা-কৃষ্ণের মধ্যে কলহে বাক্যগত তীব্রতা হ্রাস না পাইলেও ভাবগত বিদ্বেষ যথেষ্ট কমিয়াছে। তাহাদের কলহ অনেকটা রসকলহের মত ঠেকে। বুলিতে পারি ঐ প্রকার কথা কাটাকাটি বেশ সুখদায়ক, অন্ততঃ রাধার পক্ষে। রাধার কয়েকটি বক্তোক্তি :

আউ থাকিতে কাহ্নাক্রি মরণ ইছসি।

সাপের মুখেতে কেহে আঙুল দেসী।

বা—

হার্থে হার্থে চাহা কাহ্নাক্রি আকাশের চান্দ।

অথবা এমন ব্যঙ্গ :

কাঁট কাহ্ন লঅ দধিভার।

এ নহে কলঙ্ক তোন্ধার ॥

দধি দুধ বহএ গোআলে।

তাহাত কে কুলিতে পারে ॥

—এ সকলের মধ্যে ক্রোধের প্রকাশ নাই, কেবল কাহ্নাক্রি যে তাহার প্রার্থিত সম্মানলাভের নিতান্ত অযোগ্য সেই কথাটি রাধিকা বুঝাইয়া দিয়াছে। নচেৎ যে-কৃষ্ণের দর্শনমাত্রে রাধা ভয়ে শিহরিয়া উঠিত, তাহাকে দিয়া ভার বহাইয়া ‘উলসিলী গোআলার বাঁ’? ভারথণ্ডে রাধিকা আকারে ইঙ্গিতে, এমনকি অনেকক্ষেত্রে স্পষ্ট ভাষায় কৃষ্ণকে দেহদানে সম্মতিজ্ঞাপন করিয়াছে :

“উলটি উল্লটি রাধা কাহু পাণে চাহে।”

“মনস্থখ ভৈলো বোল ধরিবো তোমার।”

“আসিতে তোমাক রতি দিবো মো কাহাঞি।”

“বার্টে জায়িতে তোরে দিবো চুম কোল।”

রাধিকা যে কতদূর আগাইয়া গিয়াছে তাহার পরবর্তী প্রমাণ ছত্রখণ্ডে মেলে। সেখানে প্রথমতঃ কৃষ্ণের জগ্ন ‘চারিপাশ চাহে রাধা তরল নয়ানে’; অতঃপর চলনা করিয়া সে উভয়ের নিকট হইতে বড়ায়িকে সরাইয়া দিল। ছত্রখণ্ডে রাধা আলিঙ্গন দিবার নাম করিয়া কৃষ্ণকে প্রায় খেলাইয়া ফিরিয়াছে। এখানে কৃষ্ণসঙ্গত্যাগ করিতে নয়, নির্জন বনপথে কৃষ্ণকে দিয়া আপনার মাথায় ছাতা ধরাইতে রাধিকার সমধিক আগ্রহ।

বৃন্দাবন খণ্ডের ভিতরে রাধাকে প্রায় কৃষ্ণোৎস্কাররূপে পাই। ইতিপূর্বে ষে-শান্তির সতর্ক রক্ষণে রাধা স্বেচ্ছায় আত্মগোপন করিতে চাহিত, সেই শান্তি আটকাইয়া রাখিয়াছে বলিয়া এখন তাহার হৃৎকের সীমা নাই। বড়ায়িকে বলিতেছে, কী যন্ত্রণা, শান্তির জগ্ন ঘরের বাহির হইতে পারি না, বৃন্দাবনে যাইতে প্রাণ এমন করিতেছে, যাইবার উপায় কর দেখি :

আমার মাসুড়ী বড়ায়ি বড় খরতর।

সব খন রাখে মোরে ঘরের ভিতর ॥

কেমনে জায়িবো বড়ায়ি তার বৃন্দাবনে।

মনত গুণিআ বোল উপায় আপনে ॥

এই বৃন্দাবনখণ্ডেই রাধা নানা দেহভঙ্গিতে কৃষ্ণের কামনাকে উত্তেজিত করিয়াছে; সকলের নিকট হইতে পৃথক করিয়া কৃষ্ণ-সঙ্গ উপভোগের বাসনা জাগিয়াছে; সর্বোপরি মান দেখা দিয়াছে। মান প্রেমের এক বিশিষ্ট পরিপক্ব অবস্থা। কেবল নিজের প্রেম নয়—অপরের প্রেম সম্পর্কে নিশ্চয়তা—সুতরাং অধিকারবোধ না জন্মাইলে মান হয় না। বৃন্দাবনখণ্ডে রাধিকা সেই অবস্থায় উপনীত।

কালিয়দমনখণ্ডে রাধার কৃষ্ণার্তি সর্বপ্রথম অনাবৃত ও অসুষ্ঠিত স্বরূপে সর্বসমক্ষে প্রকাশ পাইল। কৃষ্ণ যখন কালীদেহে নিমজ্জিত, তখন রাধা পারিপার্শ্বিক ভুলিয়া ডাক ছাড়িয়া কাঁদিয়াছে; বলিয়াছে :

ধিকছুক কাহাঞি সে কালীনাগে।

• আম্মা না দংশিল তোমার আগে ॥

প্রেম যে সম্পূর্ণ দেহবন্ধ নয়, শেষ পঙ্ক্তির উক্তি তাহারই সঙ্কেত প্রদান করে। তারপর কৃষ্ণ জল হইতে উঠিতে বিশ্ব ভুলিয়া রাধা :

নিমেষবহিত বন্ধ সরস নয়নে ॥

দেখিল কাহের মুখ স্থচির সমএ ।

সকল লোকের মাঝে তেজি লাজ ভএ ॥

অপূর্ব তলগত তয়য় অবস্থা ।

যমুনাখণ্ড হইতে কিন্তু রাধার মনোভাবে ও আচরণে বিপরীতমুখিতার আভাস আছে। অবশ্য এই খণ্ডের প্রারম্ভে রাধার যমুনা জল তুলিতে যাইবার আগ্রহ এবং পরিশেষে রাধাকৃষ্ণের মিলনের কথা আছে, তথাপি রাধার ব্যবহারে ঠিক ঠিক অহুরাগের সুর লাগে নাই। তাহার গঙ্গনার ভাষা যেন পূর্বের তীক্ষ্ণতা ফিরিয়া পাইয়াছে। যেমন :

বড়ার বহু মো বড়ার ঝী ।

আন্ধে পাণী তুলী তোন্ধাত কী ॥...

যার কান্ধ বসে দোষের মাথা ।

সেসি আন্ধা সমে কহিবে কথা ॥...

গোআলিনী আন্ধে নহৌ নাচুনী ।

মোর কাজ নাহিঁ তোর কিস্কিনী ॥

অথবা :

নাহিঁ চিহ্ন তোন্ধে চক্রপাণী ।

তৌঁসি মোরে বোল হেন বাণী ॥

কাজ পড়িলেঁ দুষ্ট কাহ্নে ।

ইষ্ট মিত্র কাহ্নে নাহিঁ চিহ্নে ॥

হেন দুর্জনে সে কাহ্নাঞিঁ ।

মামী মাউসী তার ঠায়ি নাহীঁ ॥

ইহা চরমে উঠিয়াছে :

আন্ধে সখি সব বহুত কাহ্নাঞিঁ

এক তোন্ধে এহা তীরে ।

মাণ্ডকিলেঁ তোন্ধা কিলায়িআ কাহ্নাঞিঁ

নীব যমুনার নীরে ॥

সর্বশেষে রাধিকা অসংরূপীয় বিরাগে হারথণ্ডে যশোদার নিকট কৃষ্ণের বিরুদ্ধে হার চুরির অভিযোগ পর্য্যন্ত আনিল। রাধার এই চিত্ত-বৈরূপাকে বহিরঙ্গ 'বুলিয়া নির্দেশ করা যায়; এই কৌটিল্য প্রণয়-পর্য্যায়েরই অংশবিশেষ। তথাপি এতখানি বিরূপতাকে নিছক প্রণয়-কুটিলতা বলিতে বণ্ণা আছে। আমাদের মনে হয়, রাধার মনে প্রতিক্রিয়া জাগিয়াছিল। সমাজ এবং সংসারে আবদ্ধ, সামাজিক সংস্কারে আবিষ্ট এই চতুর্দশী কিশোরীর মনে সম্ভবতঃ নিজ কৃতকর্মের যাথার্থ্য সম্পর্কে প্রশ্ন উঠিয়াছিল। অপ্রতিরোধ্য হৃদয়-তাড়নায় ইতিপূর্বে সে কৃষ্ণের দিকে ঝুঁকিতে বাধ্য হইয়াছে; কালিয়দমনথণ্ডে প্রেমের সেই প্রকাশ্য আত্মঘোষণা দেখিয়াছি। কিন্তু রাধিকা তো আমাদেরই দেশের মেয়ে, যুগ-যুগান্তরের সংস্কার ও নিষ্ঠাবোধ তাহার মধ্যে জাগ্রত। তাই প্রকাশ্যে সম্পূর্ণ অবৈধ প্রেমের প্রতি আসক্তির পরিচয় দিয়া তাহার পক্ষে প্রত্যাবর্তনের বাসনা স্বাভাবিক। কামনা এবং কামনা-নিগ্রহের প্রচেষ্টা—যমুনা ও হারথণ্ডের মধ্যে সেই মানস-বিগ্ৰহ আমরা প্রত্যক্ষ করি—প্রত্যক্ষ করিয়া নিতান্ত পুলকিত হই। বাস্তবিক সেই অপরিণত এক ভাষার গ্রাম্য এক কবির মধ্যে এতখানি মনস্তত্ত্ববোধ—জীবনদৃষ্টি—আশ্রয়লাভ করিয়াছে! বৃন্দাবন-কালিয়দমনথণ্ড ও বংশী-বিরহথণ্ডের কৃষ্ণমুখী হৃদয়-প্রাবল্যের একমুখী ধারায় যমুনা-হারথণ্ডের প্রতিক্রিয়াজনিত উজ্জ্বলপ্রস্রোত বড়ু চণ্ডীদাসের কবিপ্রতিভার স্মারক হইয়া থাকিবে।

কিন্তু এই প্রতিক্রিয়া রাধিকার উত্তাল হৃদয়াবেগকে ঠেকাইতে পারিল না। বরং যমুনা-হারথণ্ডের বন্ধ শৈলে আহত হইয়া তাহা বিগুণবেগে বংশী-বিরহথণ্ডের উপর আছড়াইয়া পড়িল। বংশী ও বিরহথণ্ডের সেই আর্তি কেবল বড়ু চণ্ডীদাসের কাব্যের নয়, আমাদের সমগ্র কাব্যসাহিত্যের একটা সম্পদ। এই প্রেমতরঙ্গকে বংশীথণ্ডের কূলে ভাঙিয়া ফেলাইবার ঠিক পূর্ব মুহূর্ত্তে কবি একটি কৌশল অবলম্বন করিলেন। যাহা স্বাভাবিক ভাবে ঘটতে পারিত, তাহা ঘটাইতে তিনি অপ্রাকৃতের আশ্রয় লইলেন। বাণথণ্ডে তাহার ইতিহাসটুকু আছে।

বাণথণ্ডে আছে, কৃষ্ণ বড়ায়ির সহিত পরামর্শ করিয়া বিরূপা রাধিকার উপর পুষ্পণর প্রয়োগ করিল, ফলে রাধিকা প্রথমে মৃতপ্রায় অচেতন, পরে কৃষ্ণের চেষ্টায় জীবন পাইয়া নিজ স্বরূপ বৃত্তিতে পারিল এবং কৃষ্ণ-সঙ্গের জ্ঞাত আকুলি-ব্যাকুলি করিতে লাগিল। বাণথণ্ডের এই পুষ্পবাণটিকে রূপক হিসাবে গ্রহণ করিতে আমাদের আপত্তি নাই। যমুনাথণ্ডের পর বংশীথণ্ড মনস্তত্ত্বের দিক দিয়া অবশুসম্ভাবী ছিল, কিন্তু কবির পদক্ষেপ এত সতর্ক, তাহার বিচার-বুদ্ধি এমন তীক্ষ্ণ, অহুভূতি এহেন স্পর্শকাতর যে,

তাহার নাগিকার পরবর্তী আচরণের পক্ষে তিনি ঐ অপ্রাকৃত সমর্থনটুকু সংগ্রহ না করিয়া প্যারেন নাই। যমুনা-হারথণ্ডের ঠিক পরেই বংশীখণ্ড আনা যাইত না। মানসিক প্রতিক্রিয়া এবং সেই প্রতিক্রিয়ার প্রতিক্রিয়া দেখাইতে মধ্যে আরো একটি খণ্ড সংযোজিত করার প্রয়োজন ছিল। বাণখণ্ডের মধ্যে সেই প্রয়োজনীয় খণ্ডটির আরক্কা কার্য সারিয়া লইয়াছেন। তবে ঐ খণ্ডে অগ্নাশ্রু খণ্ডের অননুসঙ্গ একটু অতিপ্রাকৃতের আশ্রয় লইয়াছেন। তাহাতে ক্ষতি হয় না। ঐ মদনধর মদনই মারিত, কবি কৃষ্ণের হাত দিয়া শরাঘাত কাজটুকু করাইয়াছেন। স্তবরাং কৃষ্ণের শরক্ষেপকে রূপক বলিতে বাধা কি? শকুন্তলা নাটকে দুর্কীসার শাপকে রবীন্দ্রনাথ রূপক বলিয়াছেন। বহুবল্লভ দুঃস্বপ্নের পক্ষে যে ব্যবহার নিতান্ত স্বাভাবিক, কালিদাস দুর্কীসার শাপরূপ রূপকের অন্তরালে তাহার রূঢ়তা হরণ করিয়াছেন। উপরন্তু তাহাতে ঘটনাবৈচিত্র্যের বৃদ্ধি। কৃষ্ণ-কীর্তনের বাণখণ্ডে কি ঘটনাবৈচিত্র্য বাড়ে নাই?

বাঁশি বাজিয়া উঠিল। ‘বাঁশি বাজে বনমাঝে কি মনমাঝে।’ রাধাচন্দ্রাবলীর আর আত্মসংবরণের উপায় নাই। তাহার মর্ষভেদ করিয়া যে বেদনাধরনি বাহির হইয়া আসিয়াছে, বড় চণ্ডীদাসের প্রতিভাধারে তাহাই বাংলা সাহিত্যের একটি শ্রেষ্ঠ পদের রূপ ধরিল। ঐ ‘কেনা বাঁশী বাএ বড়াগি কালিনী নইকুলে।’ বাঁশির শব্দ শুনিয়া রাধার কি অবস্থা :

আষাঢ় শ্রাবণ মাসে

মেঘ বরিষে যেহু

ঝরএ নয়নের পাণী।

কী প্রতিক্রিয়া :

বড়ার বোঁহারী আন্ধে বড়ার ঝী।

কাহু বিণি মোর রূপ যৌবনে কী ॥

কী ব্যাকুলতা :

শ্রীনন্দনন্দন গোবিন্দ হে।

অনাখী নারীক সঙ্গে নে ॥

এবং কিরূপ আত্মসমর্পণ :

আজি হৈতৈ চন্দ্রাবলী হৈল তোর দাসী।

এই বেদনার হাত হইতে পরিত্রাণের নিমিত্ত রাধিকা কৃষ্ণের বাঁশি না চুরি কটুয়া, পারে নাই। বাঁশির সাতটি ছিদ্রের ভিতর দিয়াই তো কৃষ্ণের অনিবার আত্মান ছুটিয়া আসে, দুনিবার গতিতে ছুটিয়া যাই, হৃদহর কৃষ্ণ ধরা যে দেয় না, রাধিকা বাঁশি চুরি করিবে না?—

তোক্ষার বিরহে মের্ হইলেন। বেআকুলী ।

তেকারণে তোর বাঁশী নিলেন বনমালী ॥

বংশীধ্বের পরই বিরহখণ্ড । কৃষ্ণ ধরা দিয়া দেয়, নাই । রাধিকার প্রেম সীমা মানিতেছে না । যত প্রেম, তত অশ্রু । রাধিকা কাঁদিয়া কুস পায় না । বিরহে বিচিত্র মনের অবস্থা । এতদিন লালসায় কৃষ্ণ রাধার দেহবন্দনা করিয়াছে । আজ রাধিকা প্রেমে কৃষ্ণের দেহবিগ্রহ নিরীক্ষণ করিল । রাধার রূপাল্লুরাগ জাগিল—এতদিনে । বংশীধ্বণে ইহার স্মৃতি—বিরহখণ্ডে ইহার ব্যাখ্যি :

পাএ মগর খাড়ু

হাথে বলয়া

মাথে ঘোড়া চুলা ।

ধূলাএ ধূসর

১, নীল কলেবর

সেই সে নান্দের বালা ॥ (বংশীধ্বণ)

বা :

কাল কাছাঞি মাথাতে ঘোড়াচুলে । ..

স্বগন্ধে চন্দনে বড়ায়ি লেপিআ গাএ ।

করেঁ করতাল মধুর বাঁশী বাএ ॥

কাল কাছাঞি গাএ ধরে পীত বাসে ।

ষোল শত গোপীজন যাএ তার পাশে ॥

নেতধড়ী পিন্ধি আণ্ড পাছু লাষাএ ।

চরণে নুপুর রুণুণু কাঢ়ে রাএ ॥

(শেষ দুই পঙ্ক্তির ধ্বনিগুণ লক্ষ্য করিতে বলি)

বা :

নানা আভরণ গেলে শোভকএ ।

নীল জলদ সম দেহা ।

এমন কৃষ্ণকে রাধিকা পাইতেছে না । রাধিকার নিকট পৃথিবী শূন্য, জীবন অসার, যৌবন জঞ্জাল । সুদীর্ঘ বিরহখণ্ড ব্যাপিয়া রাধিকার হৃদয়-মন্ডন—প্রাণ-পীড়ন—নানা সুরে ও ছন্দে উচ্ছ্বসিত হইয়াছে । সেই বিভিন্ন বিচিত্র অবস্থার সামান্য অংশ—কখনো আত্মগ্লানি,—পূর্ব দুঃস্তির জন্ত অহুতাগ—বিপুল আক্ষেপ :

বিরহে বিকল গোসাঞি তোম্কে বনমালী ।

যবেঁ আছিলাহৌ আক্ষে অতিশয় বালী ॥

পান ফুল না লইলোঁ। মাইলোঁ। তোর দূতী ।
 সেহোঁ দোষ খণ্ড মোর মদন মুকুতী ॥...
 বারে বারে তোক যত বুলিলোঁ। আহঙ্কারে ।
 সেহে। দোষ খণ্ড মোর দেব গদাধরে ॥ ইত্যাদি

কখনো কলঙ্কের, জালা :

সামী মোর দুর্ভবার গোআল বিশাল
 প্রতি বোল ননন্দ বাছে ।
 সব গোপীগণে মোরে কলঙ্ক তুলিআঁ দিল
 রাষ্ট্রিক, কাহাঞি'র সঙ্গে আছে ॥

বিমুখ ভাগ্যের জন্ত আক্ষেপ :

যে ডালে করে মো ভরে সে ডাল ভাঙ্গিঞাঁ পড়ে
 নাহি হেন ডাল যাত করে বিসরামে ।

বিরহের একমাত্র শান্তি স্বপ্ন-মিলন-ভঙ্গে যন্ত্রণা :

দেখিলোঁ প্রথম নিশী সপন স্ননতৌ বসি
 সব কথা কহিআরেঁ। তোফারে হে ।
 বসিআঁ কদমতলে সে কৃষ্ণ করিল কোলে
 চুস্থিল বদন আঁকারে হে ॥

কিস্ত :

দারুণ কোকিল নাদে ভাঁগিল আঁকার নিন্দে ।

আর সকলের বড় বেদনা প্রিয়তমের অগ্ৰাসক্তি :

যে কাহ লাগিআঁ মো আন না চাহিলোঁ।
 না মানিলোঁ। লঘু গুরু জনে ।
 হেন মনে পড়িহাসে আঁকা উপেখিআঁ রোষে
 আন লআঁ বঞ্চে বৃন্দাবনে ॥

তাই রাধিকা বড় ছুঃখই বলিতেছে :

সকল সন্তাপ কাহ্ন সহিবাক পারী ।

তোর বিরহ সন্তাপ সহিতে না পারা ॥

তথাপি সন্তাপ সহিতে হয়—বিরহের আছে তপন-তাপন শক্তি। তাই কখনো রাধা অর্দ্ধশুট গদগদস্বরে হৃদয় নিবেদন করে :

আতি দুঃখিনী বালী ল ।

আল

লবলীদলকোঅলী ল ।

আল

মদনবাণে পরাণে আফুলী ল ॥

বিরহে না মার মোরে ল ।

আল

চরণে ধরোঁ তোরে ল ॥

কখনো করুণ কাতর অশ্রুনিষিক্ত কণ্ঠে আবেদন জানায় :

আল হের (বড়ায়ি) ।

কাহ্নাক্রিঁ মোরে আগিআ দে ।

আল পরাণের বড়ায়ি ।

কাহ্নাক্রিঁ মোকে আগিআ দে ॥

এখানে বাণী কত সংক্ষিপ্ত সরল, অথচ কি হৃদয়ভেদী ! বুক-নিঙ্ডানো ব্যথার স্বর বোধকরি এমনই হয়। হৃদয় যতই স্পন্দিত, কণ্ঠ ততই স্তিমিত। কিন্তু বেদনার একটা ঐশ্বর্যের দিকও আছে। রাধিকার সর্বস্বসমর্পণে মাঝে মাঝে সেই ঐশ্বর্যের স্বর লাগে। রাধার কৃষ্ণপ্রেমে আর খাদ নাই, সমস্ত বিশ্বসংসারের সামনে দাঁড়াইয়া উচ্চকণ্ঠে আপন বেদনা ঘোষণা করিবার অবস্থায় পৌঁছিয়াছে। বলিবার স্বরে অপক্লপ উদ্দীপ্তি :

এ ধন যৌবন বড়ায়ি সবদে আসার ।

ছিণ্ডিআ পেলাইবৌ গজমুকুতার হার ॥

মুছিআ পেণায়িবৌ (মো) এ সিসের সিন্দূর ।

বাহুর বলয়া মো করিবৌ শংখচুর ॥.....

মুণ্ডি পলাইবোঁ কেশ জাইবোঁ সাগর ।

যোগিনীরূপধরী লইবোঁ দেশান্তর ॥

যবেঁ কারু না মিলিহে করমের ফলে ।

হাথে তুলিয়া মেখ খাইবোঁ গরলে ॥

পূর্বে একদিন ঠিক এই কথাগুলিই রাধিকা বলিয়াছিল, কিন্তু সম্পূর্ণ বিপরীত ভক্তিতে । কৃষ্ণের দৃষ্টিক্ষুধায় অবমানিত হইয়া সে নিজ দেহসৌষ্ঠবকে বিনাশ করিতে চাহিয়াছিল ; আজ কৃষ্ণের সেই নয়ন ও প্রাণের ক্ষুধার আশ্রয় হইতে পারে নাই বলিয়া সে ধনধৌবনকে বিসর্জন দিতে চায় । কবি আয়রনির প্রলোভন ছাড়িতে পারেন নাই ।

তাহ্মলখও হইতে আরম্ভ করিয়া বিরহখণ্ডে আসিয়া রাধিকার সুদীর্ঘ জীবনচর্যা সমাপ্ত হইল । বিরহখণ্ডের শেষভাগে ক্ষণস্থায়ী মিলনের অন্তে স্মৃতিরকালের বিচ্ছেদে রাধিকার মৰ্ম্মাস্তিক হাহাকারের মধ্যেই সম্ভবতঃ কাব্যের সমাপ্তি । একদিন যে বালিকাটি দুইচক্ষে অগ্নি লইয়া অসামাজিক প্রেমের বিরুদ্ধে ফিরিয়া দাঁড়াইয়াছিল—সেই নীতি-বিগর্হিত প্রেমের জগৎ দুই চক্ষুতে অশ্রু কুলাইল না, সমস্ত হৃদয় ভরিয়া শ্রাবণ নামিল । এই সম্পূর্ণ পৃথক দুই প্রান্তের যোগসূত্র রচনা করিয়াছে বড়ু চণ্ডীদাসের অল্পম কবি-প্রতিভা । রাধিকার রূপদান করিতে বড়ু চণ্ডীদাস যে কবিকৌশল অবলম্বন করিয়াছেন, তাহা এই বিশিষ্ট ক্ষেত্রে অতীব উপযোগী । সমগ্র কৃষ্ণকীর্তন কাব্যটি লিরিক, ড্রামা ও গ্রায়েটিভের বিচিত্র সমন্বয় । একজন জীবন্ত মানুষের চরিত্রাঙ্কন করিতে হইতেছে বলিয়া ঐ তিন পন্থা কাব্যের মধ্যে সার্থকভাবে মিলিতে পারিয়াছে । কারণ জীবন নিছক লিরিক নয়, নিছক ড্রামা নয়, নিছক গ্রায়েসনও বলা যায় না—ঐ তিনের সমন্বয়—হয়ত অধিক কিছু । কৃষ্ণের সহিত রাধিকার কলহের রূপায়ণে ড্রামাটিক কলাকৌশল-অবলম্বন অত্যন্ত উপাদেয় । দুইটি নরনারীর ঘন্দকলহের ভিতরে কবির অল্পপ্রবেশ অতিশয় অল্পচিত হইত । কবি নাট্যকারের মত এখানে নিজেকে অপসৃত রাখিয়াছেন বলিয়া ঐ দু'টি চরিত্র অমন স্বকীয় দীপ্তিতে উজ্জ্বল হইয়া ফুটিতে পারিল । তাহার কিছু কিছু পরিচয় পূর্বে লইয়াছি । আবার কৃষ্ণ-প্রেম এবং কৃষ্ণ-বিরহে রাধিকার অশ্রুসিক্তে যখন জোয়ার আসিয়াছে তখন কাব্যেও লিরিক ভাববত্তা । কবি আপন হৃদয়বেদনা রাধিকার কাতরোক্তির মধ্যে উজাড় করিয়া দিয়াছেন । আর ঐ লিরিক ও ড্রামার মধ্যে সংযোগ রচিয়াছে আখ্যানের সূত্র—গ্রায়েসন ।

তথাপি কাব্যের শেষাংশের লিরিক স্বর সর্বাংশে কবির আত্মভাবগীতি হইয়া উঠিতে পারে নাই । ইহার জগৎ কবির অসামান্য সঙ্গতিবোধ দায়ী । বড়ু চণ্ডীদাস

রাধার মধ্যে একজন মানবী—একজন কিশোরী-যুবতীর চিত্র আঁকিয়াছেন। এই কিশোরীর চিত্রে প্রেমোন্মেষ ও তাহার পরিণতি তিনি দেখাইয়াছেন। প্রথম দেহ-মিলন ও তাহার ফলস্বরূপ শঠন: শঠন: প্রেম-জাগরণ যে কিরূপে ঘটিল—সে সম্পর্কে ইঙ্গিত প্রথমেই করিয়াছি। ঐ সঙ্গে বিচার্য, দেহমথনের মধ্য দিয়া যে প্রেম জাগিয়াছে, তাহা দেহকে যতই ছাড়াইয়া যাইতে চাউক, সম্পূর্ণ ছাড়িতে পারে কি? সংশয় থাকে। বড়ু চণ্ডীদাস অন্ততঃ যে নারীটিকে অতি স্নাতকভাবে দীর্ঘকাল ধরিয়া পর্যবেক্ষণ এবং পরিচিত্রণ করিয়াছেন, সে যে সম্পূর্ণ পারে নাই, তাহা সত্য। বংশী ও বিরহখণ্ডে রাধিকা অতি উচ্চ সুরে কথা বলিয়াছে বটে, কিন্তু তাহার সমস্ত আক্ষেপবাণীর মধ্যে দেহসন্তোগের তৃষ্ণা মিশাইয়া ছিল। ইহাতে কাব্যের কোনই হানি ঘটে নাই—বরং তাহা কাব্যকে স্বাভাবিকত্ব দান করিয়াছে। ইতিপূর্বে বিরহখণ্ডের যে সকল উৎকৃষ্ট কবি-পঙ্ক্তি উদ্ধৃত করিয়াছি, সেগুলি লক্ষ্য করিতে বলি,—ঐ সন্তোগের স্বপ্ন-দর্শনমূলক পদটি, কিংবা ‘যে কাহ্ন লাগিয়া যো,’ ‘এ ধন যৌবন বড়ায়ি’ ইত্যাদি। দেখা যাইবে বিরহের প্রায় সকল পদেই দেহসন্তোগ-বিরতিজনিত হতাশা ফুটিয়াছে—দেহবিস্মৃতি নাই। থাকিলেই হতাশার কারণ ঘটিত। কারণ বড়ুর কাব্যের রাধা একজন মানবী, দেবী নয়। পদাবলীর চণ্ডীদাসের রাধার সঙ্গে এই রাধার তুলনা চলে। সেখানে রাধা সন্ন্যাসিনী, এখানেও খানিক তাই। তথাপি উভয়ের যথেষ্ট পার্থক্য। সে রাধা জন্ম হইতে যোগিনী—একটি বিশেষ ভাবে অঙ্গীকার করিয়া তাহার জন্ম। সে ভাব ভোগমুখী নয়—তাই তাহার ভোগলিপ্সা অল্প। সে যথার্থ মহা-ভাবময়ী হইবার গুণ ধরে। তাহার কাতরোক্তির উপর কবির ব্যক্তিগত ভাবোচ্ছ্বাস ঢালিয়া দিতে বাধে নাই। কারণ পূর্বেই বলিয়াছি—সে কোন পৃথক ব্যক্তিত্ব নয়—ভাবের রূপ—রসের পুঞ্জ। অথচ বড়ুর কাব্যে রাধিকা বিশিষ্ট চরিত্র, শুধু ভাবময়ী নয়—জীবনময়ীও। স্বতরাং তাহার বেদনা অথবা আনন্দ বিশুদ্ধরূপে যত নির্বিশেষেই হউক, ঐ ‘বিশেষ’ একেবারে ঘুচিবার নয়। তাহার মানবীহীন ভোগলিপ্সা ঐ ‘বিশেষ’। তাহাকে মুছিতে পারেন নাই বলিয়া,—আর্টিস্ট হিসাবে জীবন-বিমুখতাকে অঙ্গীকারের ক্ষমতা ছিল বলিয়া,—বড়ু চণ্ডীদাস একজন সার্থক কবি।

বিজ্ঞাপতি ও বড়ু চণ্ডীদাসের কবিধর্মগত সাদৃশ্য লক্ষণীয়। বড়ু এবং বিজ্ঞাপতি, এই দুইজন কবি রাধিকাকে শিশুকাল হইতে লালন করিয়া যৌবন-স্বর্গে উত্তীর্ণ করিয়া দিয়াছেন। তাঁহাদের দুইজনকেই—রাধাকে প্রেমময়ী করিয়া তুলিবার পূর্বে—যথেষ্ট আয়াস স্বীকার করিতে হইয়াছে,—উপযুক্ত পরিবেশ সৃষ্টি করিয়া যত্নসহকারে রাধাকে সেখানে স্থাপন করিয়া পর্যবেক্ষণ করিতে হইয়াছে। অতএব স্বভাবতঃই

তঁাহারা রাধার পথ হইতে নিজেরা সরিয়া দাঁড়াইয়াছেন। স্বাভাবিক ভাবে রাধাকে জীবন-রস সংগ্রহ করিতে দিয়া তঁাহারা কবি হিসাবে মালঞ্চের মালাকরের ভূমিকা লইয়াছেন। ফলে উভয়ের দৃষ্টিতে তন্ময়তা ও নাটকীয়তা প্রাধান্যযুক্ত। এইজন্যই শেষ পর্য্যন্ত তঁাহারা রাধার ব্যক্তিত্বকে শ্রদ্ধা করিতে পারিয়াছেন। রাধার বেদনা যেখানে সর্বজনীন—বেদনা একসময় সর্বজনীন হইয়া ওঠেই—সেখানে কবি একজন দ্রষ্টার অল্পভবমতই রাধার বেদনা আত্মগত করিয়াছেন—কিন্তু তাহার বেশী অগ্রসর হইতে পারেন নাই—অর্থাৎ হন নাই। বড়ু চণ্ডীদাস এবং বিজ্ঞাপতির কাব্যে রাধার বেদনা,—হৃদয়োৎকর্ষার সর্বোচ্চ স্তরেও—রাধারই বেদনা, কবির বেদনা নয়। বিষয়ের সঙ্গে আর্টিস্টের এই ব্যবধান পদাবলীর চণ্ডীদাস বা জ্ঞানদাসের মধ্যে নাই। সেখানে কবি ও রাধা একাকার।

তথাপি বিজ্ঞাপতি ও চণ্ডীদাসে যে কবিকৌশল ও কবিভাবনাগত পার্থক্য নাই এমন নয়। একথা সত্য, বয়ঃসন্ধি প্রভৃতি পর্যায়ে বিজ্ঞাপতি অকুণ্ঠিত বাস্তবতা এবং বৈজ্ঞানিক দৃষ্টিক্ষমার পরিচয় রাখিয়াছেন; সেখানে উপমা-নিরূপণ হইতে শুরু করিয়া সমস্ত কিছু লৌকিক জীবনানুসারী। চণ্ডীদাসেও এই লৌকিক জীবন ও তাহার চিত্রণ। তবে পার্থক্য কোথা? বিজ্ঞাপতি যতই বাস্তব জীবন অবলম্বন করুন, তঁাহার প্রতিভার মূলে আছে একটা আলঙ্কারিক দৃষ্টিভঙ্গি—রাজসভার বৈদগ্ধ্যের স্থায়ী মুদ্রণ। বয়ঃসন্ধির কাল হইতে তিনি রাধিকাকে নিরীক্ষণ করিতে পারেন, এবং সে দৃষ্টি হয়ত বাস্তবও, তবু ঐ বাস্তবতা সীমাবদ্ধ। ঐ সকল পদ পর্যায়ে রাধিকার জীবনের যে স্থানটুকুর উপর দৃষ্টি সন্নিবিষ্ট হইয়াছে, সেই স্থানে হয়ত আলঙ্কারিকতা তেমন করিয়া চাপান নাই, কিন্তু ঐ দৃষ্টিমুখে জীবনের অংশ নিরূপণ ও গ্রহণ-রীতির মধ্যে একটা সীমাবদ্ধতা আছে। বিজ্ঞাপতির রাধা দেবী নয়, আবার সর্বাংশে মানবীও নয়। বিজ্ঞাপতির কৃতিত্ব, তিনি তঁাহার মানসী-প্রতিমারূপিনী এই রাধামূর্তির উপর নিজের বাস্তব-দর্শনের ঐশ্বর্য চাপাইতে পারিয়াছেন। বড়ু চণ্ডীদাসের রাধা সর্বাংশে বাস্তব নারী। বড়ু কোন রাজসভার কবি নহেন; তিনি শিক্ষিত হইতে পারেন, কিন্তু বিজ্ঞাপতির আলঙ্কারিক কবি-ব্যক্তিত্ব তঁাহার ছিল না। তিনি সহজ স্বাভাবিক জীবনরসের রসিক। হৃদয়াং সীমাবদ্ধ ক্ষেত্রে নয়, সমগ্র জীবনপ্রাণেই বড়ুর বাস্তবতা।

বড়ু চণ্ডীদাসের বাস্তবতার স্বরূপ—যাহা রাধা-চরিত্রের মধ্যে পূর্ণ বিকশিত—বুঝা যাইবে পরবর্তী পদাবলী হইতে অপর উদাহরণ গ্রহণ করিলে। পরবর্তীকালের পদে কৃষ্ণের ঐশ্বর্য্যভাব যথাসম্ভব পরিহার করিয়া মাধুর্য্যরসের প্রতিষ্ঠা করা হইয়াছে।

তাহার সহিত ভক্তিরসের মিশ্রণ আছে। মাধুর্য্য সিক্ত রাধা ও কৃষ্ণ সাধারণের মত হইয়াও সম্পূর্ণ সাধারণ হয় নাই—একটু স্বাতন্ত্র্য থাকিয়া গিয়াছে। কবিগণের অতীন্দ্রিয় ভাবাকুলতা এবং ভক্তিপ্রাণতা সাধারণ মানবজীবনের প্রেমালীলার ইতিবৃত্তকে ভিন্ন লোকে স্থাপন করিয়াছে। ০ কিন্তু বড় চণ্ডীদাসের কাব্যে কৃষ্ণের সম্পূর্ণ ঐশ্বর্য্য ভাব। ঐ ঐশ্বর্য্য একেবারে বহিঃস্থ - খোলসের মত কাব্যের গায়ে লাগিয়া আছে। একবার যদি ঐশ্বর্য্য-আড়ম্বর বিচ্ছিন্ন করা যায় তবে কৃষ্ণ নিতান্ত সাধারণ শ্রেণীর একটি গ্রাম্য যুবক হইয়া দাঁড়ায়। পাঠক সম্ভবক্ষেত্রে আরোপিত ঐশ্বর্য্য বর্জন করিয়া কাব্যাস্বাদ করিবার ক্ষমতা রাখে। তাই তাহাদের পক্ষে রাধা ও কৃষ্ণের মানবিক সম্পর্কের রসটুকু সম্পূর্ণ উপভোগ করা সম্ভব হয়। তদুপরি বড় চণ্ডীদাস লৌকিক উপমা উৎপ্রেক্ষা এবং গ্রাম্য কথাবুলিকে পরিমার্জিত করিয়া এইরূপে কাব্যে নিবেশিত করিয়াছেন যে, ঐ কাব্যের বাস্তবরস আমাদের প্রত্যক্ষে বিদ্যমান। কিন্তু পরবর্ত্তী মাধুর্য্যময় কৃষ্ণকে এমন নিরঙ্গুণ বাস্তব ভাবা সম্ভব নয়। কৃষ্ণের ঐশ্বর্য্য নির্গলিত হইয়া যখন মধুর ও ভক্তিরসের সহিত সম্মিলিত হইয়াছে, তখন সেই কৃষ্ণ—পূর্বে যে কথা বলিয়াছি—মাহুষের গা ঘেঁষিয়া আসিলেও সম্পূর্ণ মাহুস হয় নাই, অতএব বাস্তবতার স্বরূপ অকুণ্ঠিত নয়। যেখানে কৃষ্ণ একজন সাধারণ মাহুসের মত চিত্রিত,—অথচ না দিলে নয় বলিয়া মাঝে মাঝে তাহার ঐশ্বর্য্যভাবের সাড়ম্বর গাহনা দেওয়া হইতেছে, সেখানে ঐশ্বর্য্যের চাপরাশ খুলিয়া তাহাকে প্রাকৃত জ্বনের আসরে সহজে টানিয়া আনিতে পারি। আর যেখানে ঐশ্বর্য্য নির্ঘাসে পরিণত হইয়া দেহপ্রাণের বলাধান করিতেছে, সেক্ষেত্রে অত সহজে তাহাকে দেব-মহিমাহারা করিতে পারি না। বড় চণ্ডীদাসের কাব্যে বাস্তবতার অগ্রতম কারণ,—আমার বিশ্বাস,—ঐ ঐশ্বর্য্য ও মানবিকতার অমিশ্রণ, যাহার মধ্য হইতে মানবত্বকে সহজেই পৃথক করিয়া লওয়া সম্ভব।

জ্ঞানদাস

বৈষ্ণব কবিকুলের মধ্যে, আধুনিককালে লিরিক-প্রতিভা বলিতে যাঁহা বৃষ্টি, তাঁহা যদি কাহারও থাকে, তবে জ্ঞানদাসের। জ্ঞানদাসের গাঢ় গভীর অমুভূতির আকৃতি ছিল এবং জ্ঞানদাস জানিতেন কেমন করিয়া সেই অমুভূতিকে সংহত তীব্র আকারে প্রকাশ করিতে হয়। অমুভূতির গভীরতার দিক হইতে চণ্ডীদাস জ্ঞানদাস অপেক্ষা অনেক অগ্রসর; কবিতার রূপবিলাস ও মণ্ডনকলার বিচারে গোবিন্দদাসের আসন জ্ঞানদাসের উর্দ্ধে। কিন্তু এই উভয়ের সময়—রূপ ও রসের যথাযথ মিশ্রণ ও তদ্বারা কাব্যমূর্তি গঠনের প্রতিভা জ্ঞানদাসে যে রূপ তাঁহা,—যদি স্পর্ধা বিবেচিত না হয় বলিব, অল্পত্ন দুর্লভ। অমুভূতির অতি-গভীরতা এবং কুলপ্লাবী উন্মাদনা সাধকোচিত ভাবাঙ্গ-স্বজনে অক্ষমতার সহিত যুক্ত হইয়া চণ্ডীদাসকে অনেকাংশে মিষ্টিক কবি করিয়া তুলিয়াছে এবং ভাব-ব্যতিরেকেই বহুতর ক্ষেত্রে অল্পম প্রকাশ-ভঙ্গির অমূল্য ও তাহার অভিব্যক্তির পরীক্ষা গোবিন্দদাসকে রূপদক্ষ আলঙ্কারিকতায় প্রায়শঃ আত্মতুষ্ট রাখিয়াছে। ঐ ঐ কবির প্রতিভার নিজস্বতার দিক অর্থাৎ উৎকৃষ্টতর রস ও রূপপ্রতিভার পদতলে প্রণতি জানাইয়া ভাব ও বাণীর যে কাব্যপ্রয়াগ জ্ঞানদাস রচনা করিয়াছেন, নিম্নতর ক্ষেত্রে বলরামদাস ছাড়া তাহার অমুরূপ বৈষ্ণব-সাহিত্যে নাই। তুলনা করিয়া বলিতে গেলে, চণ্ডীদাসের রসহিল্লোল জ্ঞানদাসে নাই, গোবিন্দদাসের হীরক-কাটিগুণ ও তাঁহাতে পরিদৃষ্ট হয় না, কিন্তু লাবণ্যকে অনায়াসবন্ধনে বাঁধিয়া অতি চমৎকার মুক্তাহার রচনার গৌরব তাঁহার প্রাপ্য। রবীন্দ্রনাথের “ইন্দ্রাগীর” রূপের মতই অনেকটা জ্ঞানদাসের কবি-প্রতিভা “আপনার মধ্যে একটা প্রবল বেগ এবং প্রথম জ্বালা একটি সহজ শক্তির দ্বারা অটল গাভীরাপাশে অতি অনায়াসে বাঁধিয়া রাখিয়াছে। বিদ্যায় তাহার মুখে চোখে এবং সর্বক্ষেত্রে নিত্যকাল ধরিয়া নিস্তক হইয়া রহিয়াছে।”

জ্ঞানদাসের কবিতাকে লিরিক ভাবসম্পন্ন বলিয়াছি। জ্ঞানদাস বৈষ্ণব কবি; কোন বৈষ্ণব কবির পদকে লিরিক বলিয়া ওঠা একটু বিপদের। এখানে লিরিক কবিতাহলভ স্তূতির রসামুভূতির উজ্জ্বল সংহত প্রকাশ হয়ত থাকে, কিন্তু সেই অমুভূতি কবি-ব্যতিরিক্ত অল্প একজনের ব্যক্তিসত্তার মধ্য দিয়া আত্মপ্রকাশ করে। লিরিক কবিতায় কবির আত্মভাব অথবা মনন্যতা সর্বপ্রধান। সেই মনন্য দৃষ্টির

আলোকে বস্তুর স্বীকৃত সাধারণ প্রকৃতির পরিবর্তন পর্য্যন্ত ঘটে। বিশ্বকে দেখিবার দৃষ্টিভঙ্গি এবং আপনাকে প্রকাশ করিবার রীতি সমস্তই স্রষ্টার হৃদয়বাসনায় বৃঞ্জিত হয়। সামান্যকে বিশেষ করিবার কবি-প্রাণতা লিরিক কবিতায় দেখিতে পাই। সেখানে নির্দিষ্ট কবি-রীতি অথবা প্রথাগত বস্তু ও দৃশ্যসংস্থানের মর্যাদা নাই। বৈষ্ণবকাব্য কিন্তু আধুনিক অর্থে মন্বয়কাব্য নহে। উহাতে রূপের কথা বাদ দিও ভাবের কথা, হৃদয়ের কথা যেখানে প্রকাশ পাইয়াছে, সেখানে তাহা রাধা অথবা কৃষ্ণের হৃদয়ভাব। পদাবলীতে কেবল রাধাকৃষ্ণের প্রেমলীলার অল্পগত ভাব ও ভাবনার অবসর রহিয়াছে। স্তবরাং পাঠকের পক্ষে কবির নিজস্ব আবেগ, ব্যক্তিগত কামনা-বাশনার অহরঞ্জন বলিয়া কোন কিছুকে গ্রহণ করা শক্ত হইয়া পড়ে।

(তথাপি কবি-প্রাণের আবিষ্কার—বৈষ্ণবপদে—কি একেবারেই অসম্ভব? পদাবলী সাহিত্যে দুই শ্রেণীর পদকার আছেন; এক শ্রেণী মূলতঃ বস্তুবিদ্য অথবা রূপ-তন্ময়। তাঁহাদের কাব্যে যেখানে ভাবের কথাও আছে, তাহা বিভাবাদির হৃদয়ভাব। শিল্প ও শিল্পীর মধ্যে দূরত্ব বজায় আছে। বিজ্ঞাপতি গোবিন্দদাস এই শ্রেণীর কবি। আবার অল্প এক শ্রেণীর পদকর্তা আছেন যাহারা মূলতঃ ভাববিদ্য—প্রাণতন্ময়। তাঁহারা যখন কথা বলেন, রাধার মুখে বসিলেও তাহা ঐ কবিদের নিজের কথাই থাকিয়া যায়। সে সময় রাধার মুখের বাণী নিত্যকালের বাণী হইয়া ওঠে এবং সেই নিত্যকালের বাণীকেই কবি রসস্থিতির বিশেষ কোশলে নিজস্ব করিয়া লন। রাধা যে কথা বলিতেছে, অল্পরূপ অবস্থায় যে কোন নারী তাহা বলিতে পারে, রাধার কথাই মধ্যে ‘বিশেষত্ব’ কিছু নাই, তাহা ভাবে ও রসে সর্বজনীন। এই সর্বজনীন আনন্দ-বেদনার ভাষাটুকু যাহারা বৈষ্ণবকাব্যে আবিষ্কার করিয়াছেন, তাঁহারা হইতেছেন চণ্ডীদাস ও জ্ঞানদাস।) বিজ্ঞাপতি-গোবিন্দদাসের তুলনায় এই দুইজনের মন্বয়তার অল্পতম প্রমাণ ইহারা যেসব ‘রূপকল্প’ ব্যবহার করিয়াছেন তাহার অনেকগুলিই ইহাদের স্ব-ভাবিত! বিজ্ঞাপতি ও গোবিন্দদাস চিত্র বা উপমাব্যবহারে অতিশয় আলঙ্কারিক। আপনাকে নিরপেক্ষ রাখিয়া যখন রূপলোক নির্মাণ করিতে হইতেছে—যে রূপলোক আবার রাধাকৃষ্ণের অপ্ৰাকৃত বৃন্দাবন—সেখানে প্রাকৃত জীবন হইতে কাব্যবস্তুকে দূরে রাখিবার জ্ঞান প্রাচীন কবি-ব্যবহৃত উপমা উৎপ্রেক্ষার শরণ লওয়া ছাড়া গত্যন্তর নাই। প্রতীকধর্মই রাধাকৃষ্ণ-লীলার উপর অপার্থিবতার ব্যঞ্জনা আরোপ করিতে পারে। বিজ্ঞাপতি-গোবিন্দদাস সেই চেষ্টাই করিয়াছেন। কিন্তু চণ্ডীদাস-জ্ঞানদাসের হৃৎ-মর্মেই রাধাকৃষ্ণের বৃন্দাবন। চক্ষু বা মন দিয়া নয়, হৃদয় দিয়া কবি যখন দেখিয়াছেন, তখন তাঁহার কাব্যে ব্যক্তিগত আবেগ অহুরাগের সুর

লাগিবেই—অভিনব রূপকল্পনার প্রাদুর্ভাব ঘটিবেই। এই প্রসঙ্গে শ্রীরামকৃষ্ণের একটি উক্তির কথা মনে আসে : তাঁহার অপূর্ণ রসোজ্জ্বল ভাব-গভীর, অতি যথার্থ তুলনাগুলি নিতানূতন রূপে বাহির হইয়া আসে, তাহার উত্তর দিতে গিয়া শ্রীরামকৃষ্ণ বলিলেন,—“মা রাশ ঠেলে দেয়। দেখনি, মেয়েরা ধান কুটবার সময় একজন কেমন ক’রে ঢেঁকির গর্তে ধানের রাশ ঠেলে দেয়?” নিজস্ব ভাবানুভূতি বা দর্শনের বিশেষ স্বর্ষোগ এই—কাব্যে ‘চিত্র বা দৃশ্যের’ অভাব হয় না, উপমা-উপমানের ‘রাশ’ মনের ভিতর হইতে ঠেলিয়া আসে। যে কবিদৃষ্টি বস্তুর মর্মভেদ করে, তাহাই অভিনব সামঞ্জস্যের আলোকে দুইটি আপাত-বিপরীত বস্তুকে একত্রে গাঁথিতে পারে।

এই স্বকীয় উপলব্ধির ব্যাপারে চণ্ডীদাস ও জ্ঞানদাস তুলনীয়। মনঃসত্য উভয় কবিবই ছিল, এবং ব্যক্তিগত হৃদয়োত্তাপ তাঁহারা কাব্যে সঞ্চারিত করিতে পারিতেন। তথাপি চণ্ডীদাস ও জ্ঞানদাসের মধ্যে ক্ষেত্র-বিশেষে একটা স্বল্প পার্থক্য আছে। সে পার্থক্য কাব্যের পরিণতির ব্যাপারে। উভয় কবি একই ভাবে আরম্ভ করেন কিন্তু চণ্ডীদাস তাঁহার কাব্যের সমাপ্তিতে ব্যক্তিগত অনুভূতিকে এমনই নির্বিশেষ করিয়া ফেলেন যে, শেষ পর্যন্ত তাঁহার কাব্যরূপ অনেকাংশে শিথিলতা পায়। চণ্ডীদাসে যে পরিমাণে গভীরতা ছিল, সেই পরিমাণে রূপসৃষ্টির ক্ষমতা ছিল না, অথবা তাহা যদি সত্য নাও হয়, রূপকে বজায় রাখিবার বাসনাই তাঁহার ছিল না। চণ্ডীদাসের কাব্যের বিচ্ছিন্ন পঙ্ক্তিরূপের ক্ষণিক চাক্ষু্যমাত্র সৃষ্টি করিয়া একাকারের ভাবপ্রাবনে আত্মহার্য হইয়া যায়। শেষ পর্যন্ত তিনি মিষ্টিক। “চলে নীল সাড়ি নিঙাড়ি নিঙাড়ি পরাণ সহিত মোর”—এই ধরণের খাটি রোমান্টিক রসানুভূতি কবি অল্প-ক্ষেত্রেই প্রকাশ করিয়াছেন। ইহাকে অতিক্রম করিয়া এক অতীন্দ্রিয় ভাবানুভূতি প্রাণসমর্পণ করিতে তাঁহার পরম তৃপ্তি। তাই অধিকাংশ ক্ষেত্রে তাঁহার কাব্যে রূপবহু নয়—অপার্থিব ভক্তিপ্রাণতাই জয়যুক্ত হইয়াছে। “বিরতি আহারে রাজ্যবাস পরে মহাযোগিনীর পারা”—ইহা চণ্ডীদাসের কাব্যের একটি মূল ভাব। ‘আকোষানুরাগে’, ‘আত্মনিবেদনের’ ভক্তিস্তোত্রে তাঁহার প্রতিভার বিশেষ বিকাশ ঘটিয়াছে। (জ্ঞানদাসের) মধ্যেও ভক্তিপ্রাণতা আছে সত্য, এবং তাঁহার আত্মনিবেদনও চমৎকার। তথাপি জ্ঞানদাসের কাব্য মিষ্টিক হইয়া পড়ে নাই, তাঁহার কাব্যের একটি মূল ধর্ম—আমার মনে হয়—রোমান্টিকতা। রোমান্টিক রহস্যময়তায় জ্ঞানদাসের কাব্য পূর্ণ। এই রহস্যময়তাই তাঁহার নিজস্ব সম্পদ, তাৎ বৈষ্ণব পদকর্তাদের কবিস্বর্ণের সহিত জ্ঞানদাসের পার্থক্য এইখানে। জ্ঞানদাসের মধ্যে

(একটা অনির্দিষ্ট কিছু—ঠাঁহা আধ্যাত্মিক হইবার প্রয়োজন নাই—আভাসিত করিবার শক্তি ছিল। তিনি বুঝিতেন কোথায় থামিতে হয়, কোথায় থামিলে পাঠকের ভাবকুল হৃদয় নিজস্ব কিছু সৃষ্টি করিয়া অসমাপ্তকে আপন মনে সমাপ্ত করিয়া লয়। একটি উদাহরণ লইলে জ্ঞানদাসের এই স্বতন্ত্র শক্তিটুকুর প্রকৃতি ধরা পড়িবে। পূর্বরাগের এক পদ আরম্ভ হইতেছে :

আলো মুঞি জানো না সই জানো না

জানো না গো জানো না।

—এ কাহার ভাষা? একই কথা আকুলভাবে ঘুরাইয়া ফিরাইয়া পরম অহুনয়ের স্বরে প্রকাশ করিতেছেন যিনি, তিনি বাহ্যতঃ হয়ত রাধিকা, আসলে স্বয়ং কবি। এ যেন রবীন্দ্রনাথের কণ্ঠে,—এক রোমাটিক কবির কণ্ঠে,—স্পন্দমান হৃদয়ের উচ্ছ্বাস অকারণ অহুনয়ের স্বরে বাজিয়া উঠিয়াছে। ঐ ব্যাকুলতার একটা বাহ্য কারণ কবি দেখাইয়াছেন, সে কারণটুকু কোনমতে যথেষ্ট নয়,—‘জানো না সই জানো না, জানো না গো জানো না’—এই সন্দ্বীত, এই স্বর কারণহীন আবেগে জাগে। “নীল নবঘনে আষাঢ় গগনে তিল ঠাঁই আর নাহিবে, ওগো আজ তোরা যাসনে ঘরের বাহিরে”—ঘর হইতে বাহিরে না যাইতে অন্তরোধের কারণ কি বর্ষার মেঘাড়ধর, বৃষ্টির ভয়, বজ্রপাতের আশঙ্কা? এত ক্ষুদ্র হেতু, এত স্থূল যুক্তি? নহে নহে। আষাঢ়ের ঘনাচ্ছন্ন দিনে যখন বর্ষা তাহার মেঘময় বেণী এলাইয়াছে, তখন কবির মনে না জানি কেন, এই কথাটাই উচ্ছ্বসিত হইয়া উঠিতে লাগিল—ওগো আজ তোরা যাসনে ঘরের বাহিরে। কৃষ্ণ কদম্বতলে দাঁড়াইয়া আছে—রাধিকা বলিতেছে, তাহা জানিলে ঐ স্থানে যাইতাম না—এই হেতু-নির্দেশই কি ঐ স্বরময় বাণীর, গুণ্জনধ্বনির শেষ কথাটুকু বলিয়া দিয়াছে, না রাধিকা অর্থাৎ কবি বলিবার আনন্দেই বলিতেছেন—“জানো না সই জানো না ……”। ইহার পর যে চারিটি পঙ্ক্তি আছে তাহা যে কোন সাহিত্যের গৌরব হইতে পারে :

রূপের পাথারে আঁখি ডুবি সে রহিল।

ঘোবনের বনে মন হারাইয়া গেল ॥

ঘরে যাইতে পথ মোর হইল অফুরাণ।

অন্তরে বিদরে ছিয়া না জানি কি করে প্রাণ ॥

এ কোন্ যুগের কবি-বাণী? এমন করিয়া বলা রবীন্দ্রনাথ ছাড়া আর কাহারো পক্ষে আমাদের দেশে সম্ভব কি? সুদীর্ঘ কয়েকশত বৎসর পূর্বে জ্ঞানদাস এই কল্পি-ভাষা আবিষ্কার করিলেন কিরূপে? আশ্চর্য্য রোমাটিক না হইলে কাহারও

লেখনীর মুখে এই বাণী আসিতে পারে না। ইহার রহস্যময়তার মর্মভেদ কেবল অনুভবে, ব্যাখ্যায় নয়, বিশ্লেষণে নয়। নিতান্ত আধুনিক কালের কবিভাবনার মধ্যেই ইহার অরূপ কিছু খুঁজিয়া পাওয়াছি। রূপের পাথারে আঁথি ডুবিয়া গিয়াছে, যৌবনের বনে মন ঝরাইয়া গেল—আধুনিক কবির হৃদয়-অরণ্যে পথ হারাইবার কথা শুনিয়াছি বটে। ‘ঘরে ঘাইতে পথ মোর হইল অফুরাণ’—এ পথ যে কেন ফুরায় না, কেমনই বা এই পথ, এ পর্যন্ত কেহ সেকথা বলিতে পারে নাই। বলিতে পারে নাই অথচ বলিতে ছাড়ে নাই; না-বলার আবেগ, না-পাওয়ার অভূষ্টি, না-থামার আনন্দ—ইহা বিমিশ্র অনুভূতির যে কলতান অন্তরে বাজাইয়া তোলে তাহাতে—‘অন্তরে বিদরে হিয়া না জানি কি করে প্রাণ’-না জানিবার রস-রহস্য-বিলাসেই যুগে যুগে কবি-চিত্ত উল্লাস-মথিত।

জ্ঞানদাসের এই বিশিষ্ট কবি-মর্ম ছিল। ইহার বহু প্রমাণ তাঁহার কাব্যে মিলিবে। প্রায় সকল পদকর্তার মধ্যেই খুঁজিলে দুই-চার পঙ্ক্তি এইরূপ রহস্যজ্যোতক অংশ আবিষ্কার করা যায়, কিন্তু জ্ঞানদাসেই ইহার সবিশেষ প্রাচুর্য। জ্ঞানদাসের রাখা বলিতেছে :

শিশুকাল হৈতে বন্ধুর সহিতে
পরানে পরানে নেহা।
না জানি কি লাগি কো বিহি গঢ়ল
ভিন্ ভিন্ করি দেহা ॥

ইহা অতিশয় রোমাণ্টিক উক্তি—ইহাকে নিছক আধ্যাত্মিক বলিলে মানিব না। “শিশুকাল হৈতে” পাঠ করিলেই মনে পড়ে রবীন্দ্রনাথের অতুলনীয় কাব্যাংশ :

আমরা দুজনে ভাসিয়া এসেছি
যুগলপ্রেমের স্রোতে
অনাদি কালের হৃদয়-উৎস হতে।
আমরা দুজনে করিয়াছি থেলা
কোটি প্রেমিকের মাঝে
বিরহবিধুর নয়নসলিলে,
মিলনমধুর লাজে।

অগ্রজও জ্ঞানদাস যুগ হইতে যুগান্তরে অবিচ্ছিন্ন প্রেমোপলব্ধির কথা বলিয়াছেন :

শুন বিনোদিনী প্রেমের কাহিনী
পরান রৈয়াছে বাঁধা।

‘একই পরাণ দেহ ভিন্ ভিন্
জ্ঞান কহে গেল ধাক্কা ॥

অথবা :

তোমার আমার একই পরাণ
ভালে সে জানিয়ে আমি ।
হিয়ার হৈতে কাঁহির হৈয়া
কেমনে আছিল তুমি ॥

চণ্ডীদাসের কাব্যে অল্পরূপ দু’একটি পঙ্ক্তি আছে বটে (“হৃদয়ে ষাছিল বেকত হইল দেখিতে পাইলু সে”.....“শিশুকাল হইতে অবশে শুনিহু সহজ পিরীতি কথা” ইত্যাদি), তথাপি জ্ঞানদাসেই যেন এই ভাবটির সহজ স্বাভাবিক অধিকার ।

জ্ঞানদাস কয়েকটি উৎকৃষ্ট বংশীমূলক পদ রচনা করিয়াছেন । তাহা সম্ভব হইয়াছে, আমার বিশ্বাস, কবির রহস্য-প্রিয়তার জন্ত । বংশ বস্তুটি যতই স্থূল হোক, বংশি সূক্ষ্ম ও সুসুন্দর । আবার তাহার রঙ্গপথে যে স্বরোৎসারণ তাহার মত অনির্দেশ্য আর কিছু নাই । বংশিতে abstract music । তাহার কোন ভাষা নাই, তাই সে যে বেদনা জাগায় তাহাও ভাষা পায় না, অথবা যে ভাষা পায় তাহা ভাষাহীন স্বরেরই সংগোত্র । চণ্ডীদাস বা বিদ্যাপতির বেদনার একটা কারণ আছে, উভয়ের বেদনার রূপ অবশ্য পৃথক । জ্ঞানদাসের একটা আপাত কারণ আছে বটে, কিন্তু তাহাই সবটুকু নয়—অকাঙ্ক্ষে তাহার আঁখি ছলছল করিয়া আসে, মিলনের মন্দির মুহূর্তে বিরহের তপ্তশ্বাস কোথা হইতে বহিয়া যায় । বংশি সেই অকারণ আনন্দ-বেদনার স্বরকে মুক্ত করিয়া দেয় । কত বিশ্বস্ত দিনের, হৃদয় অতীত যুগের, সঞ্চিত স্মৃতির গোপন অবিকচ মুকুলটিকে বংশির স্বর একবার স্তম্ভপূর্ণে ছুঁইল, তারপরেই উধাও, তবু তাহার অদৃশ্য সূক্ষ্ম গতিরেখা বাহিয়া সহসা-জাগরিত মনটি ছুটিয়া চলিতে চায়, অর্থাৎ কাল-সঞ্চিত রূপের পাথারে আঁখি ডুবিয়া যায়, যুগ-পুঞ্জিত যৌবনের বনে মন হারাইয়া যায়, ঘরে ঘাইবার চিরাচর পথ কোনদিন ফুরায় না । নিদ্রিতকে জাগাইয়া, পথে নামাইয়া, পথ ভুলাইয়া দিবার শক্তি বংশির আছে, তাই হৃদয় জ্ঞানদাসের বংশির প্রতি প্রীতি—কে জানে ! অল্প কবি বংশীধ্বনির ফলাফল লইয়া কাব্য করিয়াছেন,—শারদরাজিতে ‘মুরলী গান পঞ্চম তান’ শুনিয়া গোপবধূদের অবস্থার রসোত্তীর্ণ প্রকাশ আছে গোবিন্দদাসের কাব্যে, কিন্তু নিছক বংশিকে লইয়া কাব্য বোধকরি জ্ঞানদাসই করেন । যে বংশি রাধার হৃদয়ে এমন বিপর্যয় আনিয়া দেয়, সমস্ত বিশ্বপ্রকৃতির মর্ম্মকোঠায় সে কোন্ আমন্ত্রণের স্বর বহন করে সে সম্পর্কে কবির যথেষ্ট কৌতুহল :

রূপলাগি আখি বুঝে গুণে মন ভোর ।
প্রতি অঙ্গ লাগি কান্দে প্রতি অঙ্গ মোর ॥

হিয়ার পরশ লাগি হিয়া মোর কান্দে ।

পরান পুতলি লাগি থির নাহি বাঞ্জে ॥ ইত্যাদি

রূপে-গুণে, সম্ভোগে-মিলনে তৃপ্তি আসে নাই বলিয়াই তো রূপ লাগি আঁপি
ঝুরে। দীর্ঘ বিরহের অন্তে যে মিলন ঘটিবে—যাহার স্থায়িত্বে বিশ্বাস নাই—
তাহাকে আঁকড়াইয়া ধরিয়া রাখার অতি করুণ প্রযত্ন :

হিয়ার উপর হৈতে শেজে না ছোঁয়ায় ।

বুকে বুকে মুখে মুখে রজনী গোড়ায় ॥

নিদের আলসে যদি পাশ মোড়া দিয়ে ।

কি ভেল কি ভেল বলি চমকি উঠিয়ে ॥

✓ রোমান্টিকতার সহিত স্বপ্নের একটা গুঢ় সম্পর্ক আছে। যাহা কিছু অনির্দিষ্ট
তাহার প্রতি রোমান্টিক মনের আকর্ষণ। স্বপ্নে বাস্তব বলিয়া কিছু নাই, অথচ
বাস্তবের ছায়াটি আছে। স্মরণ্য সব রোমান্টিক কবিই স্বপ্ন দেখিতে ভালবাসেন।
রবীন্দ্রনাথ অভীতলোকে প্রস্থানের বাসনা হইলেই স্বপ্নের আশ্রয় লইয়াছেন : “দূরে
বহুদূরে স্বপ্নলোকে উজ্জয়িনীপুরে, খুঁজিতে গেছি কবে শিপ্রা নদীপারে মোর পূর্ব-
জনমের প্রথম প্রিয়ারে।” আমাদের কবিরও স্বপ্নের প্রতি পক্ষপাত আছে। অন্ততঃ
একটি স্বপ্নদর্শনকে তিনি যে কাব্যরূপ দিয়াছেন, উচ্ছ্বসিত স্তুতি-বিস্তারেও উহার
পরিপূর্ণ সৌন্দর্য্য উদ্ঘাটিত করা সম্ভব নয়। পদটি উদ্ধৃত করি :

মনের মরম কথা তোমায়ে कहিয়ে হেথা

শুন শুন পরাণের সহি ।

স্বপনে দেখিছ যে শ্রামল চরণ দে

তাহা বিহু আর কারো নই ॥

এটুকু ভূমিকা। অতঃপর নিদ্রাকালীন বর্ধার পটভূমিকা :

রজনী শাওন ঘন ঘন দেয়া গরজন

রিমিকিমি শব্দে বরিষে ।

পালকে শয়ান রঞ্জে বিগলিত চৌর অঙ্গে

নিদ্দ যাই মনের হরিষে ॥

শিখরে শিখণ্ড রোল মস্ত দাড়ুরী বোল

কোকিল কুহরে কুতূহলে ।

ঝাঁঝি ঝিনিকি বাজে ডাহকী সে গরজে

স্বপন দেখিছ হেন কালে ॥

এমন আশ্চর্য্য শব্দমন্ত্র, রূপচিত্র, রহস্যময় বর্ণার আবেষ্টন্য, এমন ভাষা-স্বর-ছন্দে
অনিবার্য্য মায়াবিশ্ভার—জারক শক্তি—ইহা নিত্যকালের একটি চিত্র হইয়া রহিল।
আশ্চর্য্য নয়, কোন এক অস্বরূপ বর্ণাবালে শত কবিতা থাকিতে জ্ঞানদাসের এই
পদটি রবীন্দ্রনাথের স্বল্পনাথ উত্তেজিত ঝরিয়া তুলিবে :

“অন্ধকার বাদলা রাতে মনে পড়ছে ঐ পদটি, রজনী শাউন ঘন ঘন দেয়া গরজন...”।

“সেদিন রাধিকার ছবি পিছনে কবির চোখের কাছে কোন একটি মেয়ে ছিল।
ভালবাসার কুঁড়ি-পরা তার মন, মুখচোপা সেই মেয়ে, চোখে কাজল পরা, ঘাট থেকে
নীল সাড়ি নিঙাড়া নিঙাড়া চলা। সে মেয়ে আজ নেই। আছে শাউন ঘন, আছে
সেই স্বপ্ন, আজো সমানই।”

বিশ্বপ্রকৃতি এবং বিশ্বজীবনের দিকে তাকাইয়া, মুগ্ধ হইয়া, তন্ময় হইবার পূর্বেই
মন্ময় কবি যখন আপন হৃদয়-সমুদ্রে ডুব দেন, তখন হৃদয় লক্ষ্মীর উপমা খুঁজিতে
তাহাকে অলঙ্কারশাস্ত্র উল্টাইতে হয় না,—ঐ সুন্দরকে বরণ করিতে সার দিয়া
সুন্দরোপম বাহির হইয়া আসে—একথা পূর্বেই বলিয়াছি। ভাবুক চণ্ডীদাস প্রচুর
মৌলিক উপমা উৎশ্রেষ্ঠা ব্যবহার করিয়াছেন, রোমান্টিক জ্ঞানদাস অল্প করেন নাই।
কবি বর্ণিতেছেন :

“নয়ানে নয়ানে মোরে পিয়ে।”

রাধিকা ঘাটের পথে পথ ভুলিল, কারণ :

“তিমিরে গরাসিল মোরে।”

কৃষ্ণের মন রাধার রূপে মজিয়াছে। কেমন রাধা ?—

“উলটি উলটি চলু পদ দুই চারি।

কলসে কলসে জল অমিয়া উঘারি।”

রূপ হৃদয়ে পশিয়াছে, কি ভাবে —

“হৃদয়ে পশিল রূপ পাজর কাটিয়া।”

জ্ঞানদাসের রাধা নদীর কূলে উপস্থিত। চাহিয়া দেখে পারঘাটে এক নীরদ নেয়ে
—তরুণ, সুন্দর, সুকুমার ; দেখিয়া রসে মন ভিজিয়া আসিল। যে সোৎসুক প্রশ্নটুকু
রাধিকা করিতেছে, তাহাতে কতই মাধুরী, কত না সরল চাতুরী :

বড়াই হের দেখ রূপ চোখে।

কোথা হতে আসি

দিল দরশন

বিনোদ বরণ নেয়ে।

ঐ কি ঘাটের নেয়ে ॥

স্নেহ-কম্পিত এই বিষয়টুকু কাব্যের সম্পদ। নৌকালীলার আর একটি পদে একেবারে আধুনিক ভাষা ও ভঙ্গিতে জ্ঞানদাস রসস্রষ্টি করিয়াছেন :

মানস গঙ্গার জল ঘন করে কলকল

ছু' কূল বহিয়া যায় ঢেউ ।

গগনে উঠিল মেঘ পবনে বাড়িল বেগ

তরঙ্গী রাখিতে নারে কেউ ॥

নবীন কাণ্ডারী শ্রামরায় ।

কখনো না জানে কান বাহিবর সঙ্কান

জানিয়া চড়িল কেন নায় ॥

নেয়ের নাহিক ভয় হাসিয়া কথাটি কয়

ফুটিল নয়ানে চাহে মোরে ।

ভয়েতে কাঁপিছে দে এ জালা সহিবে কে

কাণ্ডারী ধরিয়া করে কোরে ॥

জ্ঞানদাসের পদাবলীতে রোমান্টিক রহস্যপ্রিয়তার অল্পরূপ আর একটি সামান্য লক্ষণ আছে যাহা কাব্যের সর্বত্র অল্পস্বত। মাধুর্য্য সেই সামান্য লক্ষণ। জ্ঞানদাসের সব পদকেই (বাংলা পদ) নিবিচারে মধুর বলিয়া নির্দেশ করা যায়। এই মাধুর্য্যগুণ সাধারণভাবে তাঁহার কাব্যের বর্ণনাভঙ্গি, সংযত প্রকাশরীতি, শব্দব্যবহারের মধ্যে এবং স্থানে স্থানে বিশেষ পরিবেশ ও ঘটনাসংস্থানকোণলের গুণে চমৎকার ফুটিয়াছে। বর্ণনাচাতুর্য্যগত এই মাধুর্য্যের একটা উদাহরণ দিই : রাধার জননী রাধাকে প্রশ্ন করিতেছেন,— প্রাণনন্দিনী রাধা, তুমি কোথায় গিয়াছিলে, তোমাকে প্রতি গোপঘরে আমি খুঁজিয়া ফিরিয়াছি, তোমার এমন অপরূপ বেশবাসই বা কেন, ভালে অশুরু চন্দন, কন্তুরী কুঙ্কম, পৃষ্ঠে নবমল্লিকার মালায় জড়ানো বিনোদ লোটন ? উত্তরে রাধারাণী যাহা বলিল, তাহা যেন অমিয়-সেঁচা বাণীর মণি :

মাগো গেহু খেলাবার তরে ।

পথে লাগি পেয়ে এক গোয়ালিনী

লৈয়া গেল মোরে ঘরে ॥

গোপ রাজরাণী নন্দের গৃহিনী

যশোদা তাঁহার নাম ।

তাহার বেটার রূপের ছটায়

জুড়ায়ল মোর প্রাণ ॥

কি হেন আকুতে তার বাম ভিতে
 লৈয়া বসাল মোরে ॥
 একদিঠে রহি তাহার আমার
 রূপ নিরীক্ষণ করে ॥
 বিজুরী উজোর মোর দেহখানি
 সেহ নব জলধর ।
 স্মেল দেখিয়া দিবাকর ঠাঞি
 কি হেতু মাগিল বর ॥

বুন্দাবনের চিরকিশোর-কিশোরী এরা ।

বর্ণনাভঙ্গির মধ্যে যে মাধুর্যরসের বর্ণনা বলিয়াছি, ইতিপূর্বে উদ্ধৃত পদ বা পদাংশের মধ্যে তাহার যথেষ্ট নিদর্শন আছে। জ্ঞানদাসের কাব্যের সর্বব্যাপী এই মাধুর্যগুণ অনেকক্ষেত্রে অসুভূতির তীব্রতাকে পরিহার করিয়া স্মিত লাভণ্যের সঞ্চার করে। ফলে যেখানে সর্বগ্রাসী হাহাকার, মর্ম্মবিশারণ, সেখানে জ্ঞানদাসের প্রতিভা অসামর্থ্যক। চণ্ডীদাসেরও। সেখানে বিছাপতির অভ্যাদয়। সমুদ্রের স্রব তুলিতে একমাত্র বিছাপতিই পারিয়াছেন, জ্ঞানদাস গায়ের স্বচ্ছতোয়া কুলুনাদিনী নদীটি। বিরহের পদ সম্পর্কেই ঐ বক্ষবিদার ক্রন্দনধ্বনির কথা আসে। সেখানে বিছাপতি কণ্ঠ তুলিলেন :

এ সখি হামারি দুখের নাহি ওর ।

ঐ ভর বাদর মাহ ভাদর

শুগ্ধ মন্দির মোর ॥

বিছাপতির বিরহ যেমন রাজসিক, মিলনও তদ্রূপ :

“আজু রজনী হাম ভাগে পোহায়লু”.....ইত্যাদি

বিরহ বা মিলনের এই এক রূপ—ঐশ্বর্য ও মহিমা-জড়িত প্রকাশ। কিন্তু ইহার অন্তর আর একটি দিক আছে; সেখানে বেদনায় প্রাণ মুচ্ছিত, দেহ-মন স্তিমিত। সেই বেদনার রূপদান করিতে চণ্ডীদাস জ্ঞানদাস আসিয়া দাঁড়ান। চণ্ডীদাসের অতুলনীয় কাব্যপঙ্ক্তি:

বহুদিন পরে বঁধুয়া এলে ।

দেখা না হইত পরাণ গেলে ॥

দুখিনীর দিন দুখেতে গেল ।

মথুরা নগরে ছিলে তো ভাল ॥

জ্ঞানদাসের বেদনায় এতখানি গভীরতা নাই, বেদনাকেও তিনি স্মিষ্ট করিয়া প্রকাশ

করেন। তিনি বিছাপতির মত আনন্দের কবি নহেন, গোবিন্দদাসের মত উল্লাসের কবি নহেন, তিনি মাধুর্যের কবি। রাধিকার বিরহদশা প্রকাশ করিতে তিনি কোন আবেগের সঞ্চার করেন না, কেবল শাস্ত্র সংক্ষিপ্ত বিরলবর্ণ উক্তি ব্যথার্থ অবস্থাটি ফুটাইতে চান :

সোনার বরণ দেহ ।
 পাণ্ডুর ভৈগেল সেহ ॥
 গলয়ে সঘনে লোর ।
 মূরছে সখীক কোর ॥
 দারুণ বিরহ জ্বরে ।
 সো ধনী গেয়ান করে ॥
 জীবনে নাহিক আশ ।
 কহএ এ জ্ঞানদাস ॥

কৃষ্ণের বিরুদ্ধে যখন অভিযোগের স্রব, তখনো তাহাতে উত্তেজনা নাই, কল্পণ ক্লান্ত অহুযোগ :

মাধব কৈছন বচন তোহার ।
 আজি কালি করি দিবস গোড়াইতে
 জীবন ভেল অতি ভার ॥
 পশু নেহারিতে নয়ন অঙ্কায়ল
 দিবস লিখিতে নথ গেল ।
 দিবস দিবস করি মাস বরিখ গেল
 বরিখে বরিখে কত ভেল ॥

জ্ঞানদাসের আর একটি বিখ্যাত পদেও হাহাকার নয়, অভাগা কণ্ঠের অশ্রুসিক্ত আক্ষেপ ও আত্মদিক্কারই মুখ্য হইয়াছে :

সুখের লাগিয়া এ ঘর বাধিল
 আনলে পুড়িয়া গেল । ইত্যাদি

জ্ঞানদাসের আত্মনিবেদনের পদেও একই মাধুর্যের সঞ্চরণ। চণ্ডীদাসের আত্ম-নিবেদন সত্যকার আত্মসমর্পণে সার্থক। তাহার মধ্যে বিন্দুমাত্র আত্মগৌরব অবশিষ্ট নাই। কিন্তু জ্ঞানদাস তাহার বঁধুর প্রেমভাজন হইবার গৌরবটুকু ছাড়িতে পারেন নাই। চণ্ডীদাসের রাধা বলিয়াছে :

বঁধু তুমি সে আমার প্রাণ ।

দেহ মন আদি তোমাতে সঁপেছি

কুলশীল জাতি মান ॥

অপরপক্ষে জ্ঞানদাসের রাধা সব দেয়, গরবটুকু দিতে পারে না :

বঁধু তোমার গরবে গরবিনী হাম

রূপসী তোমার রূপে ।

হেন মনে লয়

ও ছুটি চরণ

সদা নিয়ে রাখি বুকে ॥

অন্তের আছয়ে

অনেক জনা

আম্ববু কঁকল তুমি ।

শিশুকাল হৈতে

মায়ের সোহাগে

সোহাগিনী বড় আমি ॥

জ্ঞানদাসের রাধার এখনো অমিত্র আছে, স্বরণ করাইয়া দিতেছে—সোহাগিনী বড় আমি। সোহাগের মত মধুর স্নিনিস আর নাই। ‘তুষা অল্পরাগে হাম নিয়গন হইলাম’ ইত্যাদি পদেও ঐ গৌরব-গরব, ঐ সোহাগ-সরমটুকু বড় ফুটিয়াছে।

জ্ঞানদাসের প্রতিভার মূল গতি-প্রকৃতি সম্বন্ধে আমাদের বক্তব্য বলিতে চেষ্টা করিয়াছি। তাঁহার কবি-শক্তি সর্বোচ্চ কোন্ স্তরে উঠিতে পারে সে সম্বন্ধে আমাদের মতামত যথাসম্ভব প্রকাশ করিয়াছি। তথাপি মনে হয় জ্ঞানদাসের প্রতিভা সম্পূর্ণ সার্থক হয় নাই। তাঁহার মধ্যে কোথায় একটা দ্বিধা ছিল, কোথায় যেন অসম্পূর্ণতার ছোঁয়া ছিল। ফলে সমগ্রতঃ নিখুঁত কাব্যদেহ বলিতে যাহা বুঝি, অনেকক্ষেত্রেই জ্ঞানদাসের মধ্যে তাহা নাই। তিনি এমন পঙ্ক্তি রচনা করিয়াছেন, শ্রেষ্ঠ নিরিক কবিও যাহা আশ্চর্য্য করিতে পারিলে আনন্দবোধ করিবেন ; আবার এমন অংশও আছে যাহার দায় গ্রহণ করিতে নিতান্ত অপ্রতিষ্ঠ কবিও ঘাড় পাতিবে না। প্রতিভা সকল সময়ে সমান জলন্ত থাকে না বুঝি,—দিব্য আবেশের মুহূর্ত্তে কবির লেখনী হইতে যে সকল অপূর্ব কাব্যোৎসারণ হয়, স্তিমিত-রসাবেশ, অভ্যাস-আবর্তনের কাব্যরচনায় তাহার নিদর্শন না মিলিতে পারে, কিন্তু একই কবিতায় (যে কবিতার আকার আবার অতি ক্ষুদ্র) যুগপৎ অত্যুৎকৃষ্ট এবং অপকৃষ্ট অংশ সম্মিলিত থাকে কি করিয়া ? উদাহরণ লওয়া বাক। পূর্বোক্ত ‘রূপের পাথারে আঁধি’ প্রভৃতি অংশের পর আছে :

চন্দন চাঁদের মাঝে যুগমদে ধাক্কা ।

তার মাঝে হিয়ার পুতলি রৈল বাঙ্কা ॥

কটি পীত বসন রসনা তাহে জড়া ।

বিধি নিরমিল কুল কর্ণকের কোড়া ॥

এই দুই অংশ কি একই কবির রচনা, না তাঁহার শত্রুপক্ষ এইগুলি তাঁহার নামে চালাইয়া দিয়াছে? “রূপের পাথারে আঁশি” লিখিবার পর এমন পূর্বাঙ্গের সামঞ্জস্যহীন রচনা জ্ঞানদাসের হাত দিয়া বাহির হইল? এগুলিকে আমরা শত্রুপক্ষ, লিপিকর, সম্পাদক—সম্ভব সম্ভব সকলেরই কারসাজি বলিয়া গ্রহণ করিতে পারিতাম, কিন্তু নানোহপায়, কবির কাব্যের অন্তর্য ও অনুরূপ দৃষ্টান্ত মিলিয়া যায়। ‘কানা’ ও ‘পল্লোলোচন’ কবির কাব্যে দিয়া পাণাপাশি চলিয়াছে। বিরহ পর্যায়ে ‘মাধব কৈছন বচন তোহার’ পদটির দ্বিতীয় অংশ নিকৃষ্ট। বিখ্যাত ‘মনের মরম কথা তোমারে कहিয়ে এথা’ শীর্ষক পদের শেষাংশে প্রাথমিক দীপ্তি বজায় নাই স্বীকার করিতে হইবে।

এখন একই পদের মধ্যে—বিভিন্ন পদের বিচার ছাড়িয়া দিলেও—এই অনুরূপ শক্তির পরিচয় কেন? ইহার কারণ, আমার মনে হয়, কবি তাঁহার কবি-ভাষা এবং কবি-ভাবনা স্বস্বক্ষে সম্পূর্ণ প্রত্যয়বদ্ধ হইতে পারেন নাই। জ্ঞানদাসের মধ্যে যে দ্বিধার কথা বলিয়াছি, ইহাই সেই দ্বিধা। প্রতিভা আত্মপ্রতিষ্ঠা না হইলে তাহার মধ্যে দ্বন্দ্ব থাকে; ফলে কাব্যে স্থানে স্থানে হয়ত অভ্যুত্থম সৃষ্টি-স্রবোৎসাহ আসে, আবার ঠিক তাহার পার্শ্ববর্তী মলিন কাব্যংশ কবির গৌরব বহুলাংশে অপহরণ করিয়া লয়। জ্ঞানদাসের মধ্যে আত্মপ্রতিষ্ঠার অভাবের দুইটি কারণ আছে বলিয়া বিশ্বাস,—এক, সমসাময়িক যুগপ্রভাব; দুই, প্রতিভা-সম্পর্কে তাঁহার সচেতনতার অভাব। জ্ঞানদাস নিঃসংশয়ে প্রথম শ্রেণীর পদকার, কিন্তু সম্পূর্ণ প্রতিভাসচেতন কিনা সন্দেহ। তাঁহার পদে ভাষার পরিপাটি, সংযত সূক্ষ্ম ভাষণ-কৌশল, নূনতম শব্দদ্বায়ে ভাবের মর্মভেদ ও মনোদ্বাটন করিবার শক্তি দেখাইয়া কেহ হয়ত এ বিষয়ে প্রতিবাদ করিতে পারেন। তদুত্তরে আমাদের বক্তব্য, ভাষার ঐ পরিপাটি বা সংযমটুকু না থাকিলে তিনি কবিই হইতে পারিতেন না, আমরা তো তাঁহাকে প্রথম শ্রেণীর পদকার বলিয়া মানি। ভাষার পরিপাটি আছে সত্য, কিন্তু ভাষার নিকীচন? আমরা জানি, জ্ঞানদাস বাংলা ও ব্রজবুলি উভয় ভাষাতেই পদরচনা করিয়াছেন। তাঁহার বাংলা পদ অবিসংবাদিত ভাবে শ্রেষ্ঠ, অথচ নিয়ন্তরের ব্রজবুলি পদরচনাও অল্প নয়। যেখানে বাংলা পদে প্রতিভা চমৎকারিত্ব লাভ করিতেছে, সেখানে ব্রজবুলিকে গ্রহণ

কেন? ইহাই কি তাঁহার প্রতিভাগত অচেতনতার লক্ষণ? জ্ঞানদাস তাঁহার কবি-ভাষা সম্বন্ধে স্থির সিদ্ধান্তে আসিতে পারেন নাই, বাংলা ও ব্রজবুলির মধ্যে ছলিয়া বেড়াইয়াছেন। ইহার জন্ত অবশ্য যুগপ্রভাব দায়ী। সে যুগে ব্রজবুলিতে পদরচনা করা রীতি, আলঙ্কারিতার অমূল্য স্বাভাবিক; যুগপ্রভাবের জন্ত কবির সীমাবদ্ধতার কথা সহ্যভূতির সহিত স্বরণ করিয়াও বসিতে হইবে, জ্ঞানদাসের মধ্যে আত্মপ্রত্যয়ের অভাব ছিল। যাহারা বলেন, যাহা ভাষা তাহাষ্ট কাব্য, ভাষা ও ভাবে পার্থক্য নাই, ভাব উপযুক্ত হইলে ভাষাকে টানিয়া বাহির করিলে, তাঁহারা একেবারে ভ্রান্ত নহেন। কাব্যের স্বয়ংবর সভায় ভাব উপযুক্ত ভাষার কণ্ঠে মাল্যার্পণ করে; যদি না করে বুঝিতে হইবে কোনোখানে ভাবের অসম্পূর্ণতা ছিল। মহাকবি বা শ্রেষ্ঠ কবিদের ভাষায় সেই অব্যর্থতা—নিঃসংশয় বিশ্বাসের স্বরূপ আছে। পদাবলী সাহিত্যে গোবিন্দদাস যখন ব্রজবুলি ভাষা ব্যবহার করেন, প্রচুর অলঙ্কার গ্রহণ করেন, তখন কাহারো বলিবার অধিকার থাকে না, ঐ ভাষা বা অলঙ্কার অস্বাভাবিক। কবি আপনার কাব্যের স্বপক্ষে সেই বিশ্বাসটুকু জাগ্রত করিতে পারিয়াছেন। বিভাপতি ও চণ্ডীদাসের কবিভাষা সম্বন্ধে একই কথা বলা চলে। কিন্তু জ্ঞানদাসে ইহা সত্য হয় নাই। বাংলা যথার্থতঃ তাঁহার কাব্য-বাহন, অথচ তিনি ব্রজবুলির দিকেও ঝুঁকিয়াছেন।

সংশয় এখনো থাকিয়া যায়, একই বাংলাপদের মধ্যে শক্তি-সুরগে পার্থক্য থাকে কেন? এখানেও এক উত্তর। কবি যেমন তাঁহার কবি-ভাষা সম্পর্কে স্থিরমতি হইতে পারেন নাই, তেমনি রীতির বিষয়ে। সেই যুগটা ছিল আলঙ্কারিকতা-মুখ্য কবিত্বের যুগ। যুগাগত উপমা-উপমানের সাহায্যে কবির কাব্যজগৎ নিরাপদে নির্মাণ করিতেন, মৌলিক রসদৃষ্টিতে সাদৃশ্য-দর্শনের অভিব্রায় তাঁহাদের বিশেষ ছিল না। অথচ জ্ঞানদাসের প্রতিভা স্বয়ংচল; তাঁহার ভিতর রোমাটিক ভাব প্রবল, নিজস্ব ভাবাহুসঙ্গ সৃষ্টির ক্ষমতা যথেষ্ট। এখন এই নিজস্ব সৃজনটুকু কাব্য-সম্পদ হইবে, না আরো কিছু মিশাল চাই—প্রচলিত আলঙ্কারিক ভাষা ও ভঙ্গির আমন্ত্রণ প্রয়োজন—সে বিষয়ে কবি স্থির-নিশ্চিন্ত হইতে পারেন নাই। তাই অতি মৌলিক কাব্যংশ রচনার পর নিত্য সাধারণ স্তরের আলঙ্কারিক বাকবিশ্রাস ঘটয়াছে। উদাহরণ পূর্বেই লইয়াছি।

জ্ঞানদাসের মূল কবিত্ব শেষবারের মত বুঝিয়া লইবার জন্ত আমরা ‘রূপাহুবাগ’ গ্রহণ করিতেছি। এই পুথ্যায়ের মধ্যে প্রচলিত কাব্যরীতির অমূল্যরূপের অর্থও স্বযোগ। রূপাহুবাগে রাধা বা কৃষ্ণের রূপদর্শন; সাধারণ ভাবে তাই রূপবর্ণনাই কাব্যের উপজীব্য। গোবিন্দদাস রূপবর্ণনার ক্ষেত্রে অভুলনীয় প্রতিভার পরিচয় দিয়াছেন।

তিনি সত্যাকার রূপদর্শন করিয়াছেন, সেই দর্শনের ফল কৃষ্ণ ও রাধার রূপনির্মাণ। নিজ আমিত্বকে পৃথক রাখিয়া যে রূপ তিনি গড়িলেন, ভাষা ভাব ও ছন্দের দিক দিয়া তাহার মধ্যে ক্লাসিক্যাল মাহাত্ম্য ও গাভীর্ঘ্য আছে। জ্ঞানদাসও রূপদর্শন করিয়াছেন। তাঁহার পক্ষেও ঐ আমিত্ব-বিবিক্ত রূপ-গঠন অসম্ভব ছিল না। তিনি সে পথে অগ্রসর হইলেন না। তাঁহার রূপ নয়, স্বরূপ-দর্শন। রূপাহুরাগটুকুই তাঁহার নিকট প্রধান। অথচ চণ্ডীদাসের মত অতথানি আত্মবিস্মৃত কবিও তিনি নন। স্তবরাং রূপবর্ণনার একটা বাহ্য প্রয়াস তাঁহার মধ্যে আছেই। কিন্তু উহাকে ভেদ করিয়া আস্তর প্রবৃত্তি—স্বরূপ-ধর্ম উকি মারিতেছে। গোবিন্দদাসের নিকট রূপদর্শন যা, রূপনির্মাণও তাই। তিনি দেখিলেন ও গড়িলেন—সর্কাবয়ব নিখুঁত মূর্তি। জ্ঞানদাসের দর্শনে ও নির্মাণে প্রভেদ আছে। তিনি যাহা দেখেন তাহা আঁকিতে পারেন না। কাব্যের মধ্যে দর্শন-জ্ঞাত আত্মস্মৃতির ছাপটুকু থাকে। ফলে সেখানে রূপ ও স্বরূপ, তন্ময়তা ও মন্ময়তার মেশামেশি, প্রাচীন কবিগুলোর শিল্পলোক হইতে আহৃত রত্নরাজি নয়, জ্ঞানদাসের নিজস্ব উপমাদি বাহির হইয়া আসে :

চুড়াটি বাঁধিয়া উচ্চ কে দিল ময়ূর পুচ্ছ
ভালে সে রমণী মনোলোভা ।
মল্লিকা মালতী মালে গাঁথনি গাঁথিয়া ভালে
কেবা দিল চুড়াটি বেড়িয়া ।
হেন মনে অহুমানি বহিতেছে স্বরধুনী
নীলগিরি শিখর বাহিয়া ॥
কালার কপালে চাঁদ চন্দনের ঝিকিমিকি
কেবা দিল ফাগু রঞ্জিয়া ।
রজতের পাত্রে কেবা কালিন্দী পূজিয়াছে
জবা কুসুম তাহে দিয়া ॥

কেবল বর্ণনাভঙ্গিতে মৌলিকতা নয়, কৃষ্ণের রূপবর্ণনা করিতে একস্থানে একটি মারাত্মক উপমা আছে—কৃষ্ণের কপালে চন্দনের ঝিকিমিকি—অর্দ্ধচন্দ্র—তাহার উপরে ফাগুচূর্ণ—কবি উপমা দিতেছেন, যেন রজতের পাত্র করিয়া জবা কুসুমে কেহ কালিন্দী পূজিয়াছে। বৈষ্ণব হইয়া জবার উপমা!

এই উপমাটুকু কবিকে চিনাইয়া দিবে। তিনি ভক্ত বৈষ্ণব সত্য, কিন্তু তিনি কবি। কাব্যের ক্ষেত্রে সংস্কারের দাগও করিতে প্রস্তুত নন। প্রয়োজন হইলে কেবল

মৌলিক সাদৃশ্য-কল্পনা নয়, নিজ সম্প্রদায়ে অপাংক্তেয় উপমাদিও গ্রহণ করিবেন। অতঃপর যে দৃষ্টান্তটি লইতেছি, তাহার মধ্যে রূপবর্ণনার রীতি অনুসরণের চেষ্টা আছে, তথাপি কবির প্রাণোত্তাপ, হৃদয়-স্পন্দন কি চাপা পড়িয়াছে :

চিকন কালিয়া রূপ মরমে লেগেছে গো

ধরণে না যায় মোর হিয়া ।

কত চাঁদ নিঙাড়িয়া মুখখানি মাজিয়াছে

না জানি কতেক হৃদা দিয়া ॥

অধরের দুটি কুল জিনিয়া বান্ধুলি ফুল

হাসিখানি মুখেতে মিশায় ।

নবীন মেঘের কোরে বিজুরি প্রকাশ করে

জাতিফুল মজাইলাম তায় ॥

পূর্বের ও বর্তমানের—উদ্ধৃত দুইটি রূপাহুবাগের পদে ‘জাতিফুল মজাইবার’ বাসনা সত্ত্বেও কিছুটা বাহ্য রূপ আঁকিবার চেষ্টা আছে। ‘কত চাঁদ নিঙাড়িয়া’ ইত্যাদি অংশ মাধুর্যের দিক দিয়া তুলনামূলক। সে যাহা হোক, জ্ঞানদাস রূপাহুবাগের অধিকাংশ পদে এতখানি রূপ দেখিবার দৈর্ঘ্য ধরিতে পারেন নাই। রস-সাগরের তীরে বসিয়া চক্ষু দিয়া সম্ভোগ বা মুখ বাড়াইয়া মধুপান নয়—তাহার একদম “ভুব দাও”। জ্ঞানদাস রূপময়ের চকিত দর্শনটুকু মাত্র লাভ করেন, অতঃপর রাধিকার মত তাঁহাকেও কৃষ্ণরূপী “তিমিরে গরাসিল মোরে”, “কালো মেঘ ঝাঁপ্যাছিল পথে”। তাহার রূপাহুবাগ কি, না “রূপের সাগরে আঁখি ডুবি সে রহিল।” ঐ ডুবিয়া যাওয়া-টুকুই আসল, পথ হারানোতেই আনন্দ। জ্ঞানদাসের একটি রূপাহুবাগের পদ আরম্ভ হইতেছে—“দৌহে দৌহা নিরখই নয়নের কোণে”; তাহার ঠিক পরের পঙ্ক্তি—“দৌহে হিয়া জরজর মনমথ বাণে।” অতঃপর জরজর অবস্থার বর্ণনা। জ্ঞানদাস “কি রূপ দেখিলাম কালিন্দী কূলে, অপরূপ রূপ কদম্বমূলে” বলিয়া বেশ খানিকটা রূপ চিত্রণ করিলেন কিন্তু শেষাংশেই নাগাদ আসল কথাটি বাহির হইয়া পড়িল :

হেন মনে লয় বিজুরী হয়ে ।

মেঘের সাথে থাকি জড়াইয়ে ॥

একবারে মনের কথা। আর একবার রাধা অথবা কবি বলিতেছেন :

দেখে এলাম তারে সই দেখে এলাম তারে ।

এক অঙ্গে কত রূপ নয়নে না ধরে ॥

বর্ণনার ভঙ্গি ও প্রাণের আকুলতা দেখিয়া পাঠক ঠিক ধরিয়া লয়, ঐ দেখাটুকু আর ভাষায় ফুটাইতে হইবে না, যে রূপ নয়নে ধরিল না তাহার বর্ণনা চলে কি ? স্তবরাং জাতিকুল ক্রমশঃই অরক্ষণীয় হইয়া পড়িতেছে, এই ভাবটি যে, কাব্যে প্রাধান্য পাইবে তাহাতে আশ্চর্য্য কি ? আর একটি পদ; “যত রূপে ততঃবেশ”—এইটুকু মাত্র রূপাঙ্কন, অতপর :

ভাবিতে পাজর শেষ ।

পাপচিতে নিবারিতে নারি ॥

অনিবার্য্য পাপচিত্তের কাহিনীই সমস্ত পদটি ব্যাপ্ত করিয়া রহিল । “রূপ লাগি আঁখি বুঝে গুণে মন ভোর” যাহার রূপানুরাগের পদ তাহার কবিপ্রকৃতি সম্বন্ধে ধারণা করিতে বিলম্ব হয় না ।

গোবিন্দদাস

মধ্যযুগের একজন কবি বিভোর হইয়া একখানি ছবি দেখিতেছেন :

নীরদ নয়নে নীরঘন সিঞ্ঝনে

পুলক মুকুল অবলম্ব ।

শ্বেদ-মকরন্দ বিন্দু বিন্দু চূয়ত

বিকশিত ভাব-কদম্ব ॥

কি পুণ্ড্র নটবর গৌর-কিশোর ।

অভিনব হেম- কলপতরু সঞ্চর

স্বরধুনী-তীরে উজোর ॥

চঞ্চল চরণ- কমলতলে বাহুর

ভকত-ভ্রমরগণ ভোর ।

পরিমলে লুবধ সুরাসুর ধাবই

অহনিশি রহত অগোর ॥ ইত্যাদি

—দেখিতেছেন ও রূপ দিতেছেন ; স্পষ্ট বোঝা যায় কবি একজন পরম ভক্ত—
ভাবাকুল হৃদয় ; কিন্তু সেই সঙ্গে অভূত সংযমও তাঁহার আয়ত্তে । হৃদয়ের আকুলতাকে
কোথাও তিনি অকূল করেন না । রূপদক্ষ শিল্পীর মত যথাদৃষ্ট রূপকে ভাষার
তুলিকায়, অপূর্ব লাভণ্যরসে ডুবাইয়া টানের পর টানে ফুটাইয়া চলেন । একটা
পরিপূর্ণ প্রাণ-সংযুক্ত চিত্র স্ফুটপদ্মের মত ভাসিয়া ওঠে ।

† চৈতন্যোত্তর যুগের অগ্রতম শ্রেষ্ঠ (শ্রেষ্ঠতম ?) পদকর্তা গোবিন্দদাসের
উপরিউক্ত পদটির বৈশিষ্ট্যের উল্লেখ-প্রসঙ্গে যে যে লক্ষণগুলির ইঙ্গিতমাত্র করিয়াছি
—কবির ভক্তিপ্রাণতা, চিত্রধর্মিতা, আত্মসংযম এবং কাব্যবস্তু অর্থাৎ বিভাবাদি হইতে
আর্টিস্টের দূরত্ব বজায় রাখিবার ক্ষমতা—মূলতঃ সেইগুলির সাহায্যেই আমরা গোবিন্দ-
দাসের কবিধর্মের স্বরূপসঙ্কানে ব্যাপ্ত হইব । আর দুইটি লক্ষণ কেবল যোগ করিতে
চাই,—নাটকীয়তা ও আলঙ্কারিকতা ।)

গোবিন্দদাস নিঃসংশয়ে বাংলাদেশের একজন শ্রেষ্ঠ কবি—আধুনিক কাল ধরিলেও ।
কাব্যশিল্পের সর্বাঙ্গীণ সামঞ্জস্য না হউক—যাহা নিতান্তই দুর্লভ,—এক বিশেষ দিক
হইতে তাঁহার উৎকর্ষ শ্রেষ্ঠত্বের প্রাসঙ্গ্যসীমা স্পর্শ করিয়াছে, তাহা হইল রূপশিল্প ।

গোবিন্দদাসের মত সচেতন শিল্পী বিরল। এ বিষয়ে পূর্বযুগের বিদ্যাপতি এবং পরযুগের ভারতচন্দ্র-রবীন্দ্রনাথ মাত্র তাঁহার তুলনাস্থল। মধুসূদনের কাব্যেও চূড়ান্ত আটকর্ম আছে, কিন্তু আর্টিস্ট স্বয়ং তাঁহার সৃষ্টি সম্বন্ধে অর্দ্ধচেতন। গোবিন্দদাসের কাব্যের রূপসম্পূর্ণতা কেবল কাব্যে সীমাবদ্ধ নয়, কবির মানসপ্রকৃতিতেই একপ্রকার সজ্জন সীমাবোধ আছে, যাহাকে কেবল উৎকৃষ্ট কবিপ্রতিভার স্বাভাবিক সংযম বলিলে যথেষ্ট হয় না; বস্তুতঃ উহা গোবিন্দদাসের কবিধর্মের মূলগত বৈশিষ্ট্য। এই সংযমবুদ্ধির ফলে গোবিন্দদাসের কাব্যে যে বিশেষ বস্তুটির আবির্ভাব ঘটিয়াছে, তাহাকে কাব্যের স্থপতিবিদ্যা বলা চলে। তাঁহার অধিকাংশ পদ যেন কুঁদিয়া তৈয়ারী —‘কুন্দে যেন নিরমাণ।’ প্রতিভার আলোড়নক্ষেণে অর্দ্ধবাহুদশায় আত্মসংবিতের বিলয়-মূহূর্ত্তে প্রেরণার হাত ধরিয়া কবি তাঁহার কাব্য সৃষ্টি করেন নাই। তাঁহার কবিভাবনা কাব্যের সবকয়টি প্রয়োজনীয় বস্তুর সমাবেশ করিয়া অপরিসীম রসবোধ ও তীক্ষ্ণ শিল্পদৃষ্টির সহায়ে একটির পর একটি পদ রচনা করিয়া গিয়াছে। ফলে কোথাও কোথাও ভাবাবেগের উত্তাপের অভাব হয়ত হইয়াছে কিন্তু কাব্যের রূপ-সম্পূর্ণতা যাহাকে বলে, সেই finish-এর অসৌকর্য্য কোথাও ঘটে নাই।

কাব্যের ভাবাবেগের কথা আসিল বলিয়া একটি প্রশ্নের সমাধান প্রয়োজন; একথা সত্য গোবিন্দদাসের কাব্যের ভাবোত্তেজনা চণ্ডীদাস বা বিদ্যাপতির পদ অপেক্ষা অল্প। অন্ততঃ সাধারণ পাঠক তাহাই অহুত্ব করে। তদুপরি আছে কবির আলঙ্কারিকতা। অতএব সাধারণভাবে এমন একটা বিশ্বাস চলিত আছে —গোবিন্দদাস ‘নিষ্প্রাণ’। এই বিশ্বাসের মূলে যথেষ্ট বিচারবুদ্ধি ও কাব্যবোধ বর্তমান কিনা সন্দেহ। গোবিন্দদাসের কিছু কিছু পদের বিরুদ্ধে যে নিষ্প্রাণতার অভিযোগ সঙ্গতভাবেই আনা যায় তাহা স্বীকার্য্য এবং কোন্ কবির বিরুদ্ধে আনা না যায়? চরম ভাবতরল কাব্যও প্রাণহীন হইতে পারে। কাব্যে কেবল ভাব থাকিলেই প্রাণ নাচে না। কাব্যের প্রাণ সৃষ্টি করিতে হয়। রূপ এবং রস, ভাব এবং বাণীর পার্ৱতী-পরমেশ্বর মিলনেই কাব্যের কুমার-সম্ভব। গোবিন্দদাসের কাব্যে বহুক্ষেত্রে সেই রূপরসের সার্থক সঙ্গমলীলা ঘটিয়াছে। তাঁহার অলঙ্কার, - সে তাঁহার ‘ভাবপ্রেরণার অনিবার্য্য উদ্ভব। তাহা বহিরঙ্গ কিছু নয়। ঐ অলঙ্কার রসের প্রযত্নে সিদ্ধ। তবে একথা সত্য, গোবিন্দদাসের কাব্য পাঠ করিতে হইলে তাঁহার কবিভাষা সম্বন্ধে অভিজ্ঞতা থাকা চাই। তিনি যে ভাষায় কাব্যরচনা করিতেছেন, সেই ভাষা সম্পর্কে বিশেষ কোন ব্যুৎপত্তি না আনিয়া কবির বিরুদ্ধে তর্কোদ্যাত্য অভিযোগ করা যৎপরোনাস্তি অহুচিত। গোবিন্দদাসের কাব্য যথাযথ আশ্বাদন করিতে হইলে কাব্য-দীক্ষার প্রয়োজন আছে।

গোবিন্দদাস বিদ্বৎ কবি। বহুযুগের অহুশীলনে এদেশে, একটা কাব্যশাস্ত্র গড়িয়া উঠিয়াছে। সেই কাব্যশাস্ত্রের আহুগত্য স্বীকার করিয়া কবি তাঁহার কাব্যরচনা করিয়াছেন। স্বতরাং ঐ বিষয়ে কোন অভিজ্ঞতা সঞ্চয় না করিলে গোবিন্দদাসের কাব্যাস্বাদ সম্ভব নয়। গোবিন্দদাস হাক্টের মাঠের কবি নহেন।

গোবিন্দদাস সৌন্দর্যের কবি। সৌন্দর্যসাধনা বলিতে আমরা যাহা বুঝি, কবি তাঁহার কাব্যের মধ্যে ঠিক সেই বস্তুটির সজ্জান অহুশীলন করিয়াছেন। তাঁহার রাধিকা তাঁহার মানসলোকের তিল তিল সৌন্দর্যের সমাহারে গঠিত। কবি যতকিছু সৌন্দর্য পানিয়াছেন সঞ্চয় করিয়া, স্থবিস্তৃত করিয়া, রাধারূপের মাধ্যমে প্রকাশ করিতে চেষ্টা করিয়াছেন এবং আমরা একথা বলিব, বহুলাংশে সফলকাম হইয়াছেন। এই রাধা ঠিক লৌকিক জীবনের কোন মানবী নয়। চণ্ডীদাস, এমনকি বিদ্যাপতির মধ্যে মানবিকতার অবসর আছে। কিন্তু গোবিন্দদাসের রাধা একেবারেই অলৌকিক, অথচ অপূর্ণসুন্দর। তাহার মধ্যে প্রাকৃত দেহকামনা যতটুকু সংযুক্ত করিয়া দেওয়া হইয়াছে, তাহা কাব্যে নিবেশিত হইবার পর পূর্বতন লৌকিক উত্তাপ সামান্যটুকুও বজায় রাখে নাই। তাঁহার দেহকামনা বিদেহ ভাব-বাসনায় রূপান্তরিত। অবশ্য একথা সর্বত্র সত্য নয়; অভিসারের পদে ইহার বিপরীত দেখিতে পাইব। তাহার কারণ অভিসারে চলিষ্ণুতা প্রবল। পথ চলিলে পথের সৌরভ ও জীবনাবেগ অঙ্গে লাগিবেই।

কবির সৌন্দর্যসাধনায় সাফল্যের এবং তাঁহার কাব্যের স্থপতি-লক্ষণের কতকগুলি কারণ আছে : প্রথমতঃ তাঁহার রূপানুরাগ। আমার নিজের বিশ্বাস, গোবিন্দদাসের সমগ্র কাব্যসাধনার মূলে আছে এই তীব্র রূপাসক্তি : যে কোন পর্য্যায়ের কাব্যই হোক, কবি কোথাও রূপকে ত্যাগ করিতে পারেন নাই। -বৈষ্ণব হইয়া পারবেনই বা কিরূপে? বৈষ্ণব যে রূপ দেখিয়া মুগ্ধ, গুণ দেখিয়া বিভোর। তাহার তো বৈরাগ্য নয়, রাগের, জ্ঞানের নয়, রসের সাধন। এখানে একটি লক্ষণীয় বিশেষত্বের কথা মনে আসে। গোবিন্দদাস ভক্ত কবি তাহাতে কোন সন্দেহ নাই। সাধারণতঃ ভক্তিকাব্য ভাবের দিক দিয়া যত গুরুতরই হোক, সৌন্দর্যাংশে সেরূপ নয়। ভক্তকবি আপন প্রাণের গভীর আকৃতি এমন প্রবলবেগে কাব্যের মধ্যে পরিবেশন করেন যে, উপযুক্ত হাত হইতে বাহির না হইলে তাহা স্থলভ উচ্ছ্বাসের রূপ ধারণ করে। কিন্তু গোবিন্দদাসের কাব্যে বিপরীত ঘটিয়াছে, অথচ সেই বৈপরীত্যের পশ্চাতে তাঁহার ভক্তিপ্রাণতার সমর্থন আছে। এ বস্তুটি ঘটে কেমন করিয়া? ব্যক্তিগত ভাবে আমাদের মনে হয়, চৈতন্যোত্তর বৈষ্ণবধর্মের বিশেষ তত্ত্ব-প্রকৃতি ইহার

অশ্রু দায়ী। বাস্তবের কথা জানি না, ধর্ম-শাস্ত্রের দিক হইতে বৈষ্ণব সাধকগণ কেহই ভাগবতী রাধাকৃষ্ণলীলার সহিত একাত্মতা লাভ করিতে পারেন না। বড় জোর তাঁহারা সেই অপ্রাকৃত বৃন্দাবনলীলার মঞ্জরিত লাভের অধিকারী। বৈষ্ণবমতে সখীসাধনাই মানবজীবনের শেষ সাধনা। সাধন-ক্ষেত্রে উত্তরোত্তর অগ্রগমনের সঙ্গে সঙ্গে সখীভাব কবি বা সাধককে আশ্রয় করিবে। আর সখীত্বের মূল কথা হইল, আত্মভোগ নয়—কৃষ্ণ-ভোগ বা রাধা-ভোগ। তাঁহাদের আত্মেন্দ্রিয় প্রীতিইচ্ছা নয়, কৃষ্ণেন্দ্রিয় প্রীতিইচ্ছা। সম্পূর্ণ অহংলয় চাই অথচ রূপবিভোরতা না থাকিলে নয়। গোবিন্দদাস ভক্ত এবং বিদগ্ধ কবি, বৈষ্ণব-দর্শনের অগ্রতম বোদ্ধা। সুতরাং যতই করুন, কৃষ্ণলীলার সঙ্গে নিজেকে মিশাইয়া ফেলা সম্ভব হয় নাই, রাধার বেদনার মধ্যে নিজ বেদনা ঢালিয়া দিতে পারেন নাই; তাঁহার ভক্তি যত বাড়িয়াছে—সাধনস্তরে উন্নীত হইয়াছেন—ততই ঐ রূপমুগ্ধতা এবং পরোন্দ্রিয় প্রীতিইচ্ছা প্রবল হইয়া তাঁহার রূপসাধনাকে সম্পূর্ণতার দিকে আগাইয়া দিয়াছে। কিন্তু চণ্ডীদাসের ক্ষেত্রে অগ্ররূপ ঘটিয়াছে। বহুসময় রাধার কথা চণ্ডীদাসের কথা; রাধার বেদনা আকৃতি বা উল্লাস—পাঠক স্পষ্টই অনুভব করে—তাহা ঐ কবিরই মর্মভেদ করিয়া নিঃসৃত হইয়াছে, কবি রাধিকার সহিত একাত্ম হইয়া গিয়াছেন। এই অবস্থা—আমাদের ধারণা—চৈতন্যোত্তর যুগে বৈষ্ণব-দর্শন ও সাধনমার্গকে স্বীকার করিলে কোন কবি বা সাধকের জীবনে আসিবে না। পরবর্তী কবির রাধাকে দর্শন করিয়াছেন, পূর্ববর্তীরা করিয়াছেন আত্মসাৎ। আত্মস্তর ভাব-প্রেরণার প্রকৃতি বিচার করিলে পদাবলীর চণ্ডীদাস যে চৈতন্য-পূর্ব যুগের, এই সিদ্ধান্তের যৌক্তিকতা কিয়দংশে উপলব্ধি করা যায়।

কবির ভক্ত-হৃদি কেবল আত্মস্বতন্ত্র রূপানুসার নয়, তাঁহার কাব্যে অগ্র একটি বস্তুর সমাবেশ অবশ্যস্বাবী করিয়া তুলিয়াছে। ইতিপূর্বে কবির অলঙ্কার-প্রিয়তার কথা বলিয়াছি কিন্তু তাঁহার পক্ষপাতের অন্তর্নিহিত কারণ অনুসন্ধান করি নাই। কবির মাণ্ডলিকতার মূলে আছে তাঁহার আভিজাত্য ও ঐশ্বর্যবোধ। ইহা ভক্তিরই আর এক দিক। রাধাকৃষ্ণ-লীলাকে কবি কাব্য-উপাদান করিয়াছেন সত্য, এবং কবিপ্রাণের স্বধর্ম অনুসরণ করিয়া অনিবার্যভাবে তাহার মধ্যে সাধারণ নর-নারীর প্রেমলীলার ইতিবৃত্তই পুনরাবৃত্ত হইয়াছে। কেবল সেই ইতিহাসটুকু থাকিলে তাহা প্রাকৃত প্রেমকাব্য হইত। কবি তাই তাঁহার কাব্যে ‘ইতিহাসলোক’ নির্মাণ করিলেন। সেই বেটনীর মধ্যে যে লীলাবিলাস, তাহা লৌকিক না থাকিয়া অলৌকিক হইয়া পড়িল। ভাষার ঐশ্বর্য ও অলঙ্কৃতি, ভাবের গূঢ়তা ও গাভীর, হৃদয়ের বিস্তৃত ও নৃত্য-দ্বারা গোবিন্দদাস তাঁহার রূপলোক নির্মাণ করিয়াছেন। ভাষা ভাব এবং হৃদয়কে সাধারণ

জীবন হইতে উদ্ধে উঠাইয়া যখন কবি তাঁহার কাব্যরচনা করেন, তখন স্বভাবতঃই কাব্যবস্তু পাঠকের ব্যক্তিগত কামনাবাসনার নিকট হইতে অনেক দূরে সরিয়া যায়। সেই দূরস্থিত লীলা চক্ষুগোচর হয় বটে, তথাপি মাঝখানে আছে অনতিক্রমণীয় ব্যবধান, সেখানে উপস্থিত হইবার কোন উপায় নাই। অর্থাৎ দূর হইতে চক্ষু ও মনের আনন্দ ঘটিবে, সংলগ্ন হইয়া সন্তোষ করা চলিবে না। প্রিয়ের সহিত নির্ঝাঁপ নিরন্তর মিলন সম্পূর্ণ করিতে রাখিকা শেষ অলঙ্কারটুকুও বিসর্জন দিয়াছিলেন; সেই অপ্রাকৃত মিলন-লোক এবং প্রাকৃত মন-লোকের ব্যবধান বিস্তৃত করিতে গোবিন্দদাস কেবলই অলঙ্কারের পর অলঙ্কার চড়াইয়া গিয়াছেন। কাব্যের বিষয়বস্তুর সংগ্রহ হয় দুই স্থান হইতে : এক বিশ্বলোক, দুই শিল্পলোক। মানব-জীবনাশ্রয়ী কবি বিশ্বলোকের উপাদান গ্রহণ করেন—গ্রহণ করেন স্বয়ং দেখিয়া শুনিয়া, নিজের সব কয়টি ইন্দ্রিয়কে সক্রিয় রাখিয়া। আবার নিছক সৌন্দর্যাশ্রয়ী কাব্যের ক্ষেত্রে বিষয়বস্তু শিল্পলোক হইতে সংগৃহীত হয়। না হইয়া উপায় নাই। বাস্তব জীবন অতি-বিশুদ্ধ সৌন্দর্য্যবোধ জাগাইতে পারে না। সেখানে নৈরব্যক্তিক সৌন্দর্য্য-ভাবনার সহিত পার্থিব জীবনের মৃত্তিকালিপ্ত আর পাঁচটা বস্তু মিশিয়া আর্টিস্টের কল্পনামূর্ত্তিকে অবিশুদ্ধ করিয়া ফেলে। তাই অবিকৃত রূপলোক নির্মাণ করিতে হইলে প্রাচীন কবি-গৃহীত উপমা-উপমান, রূপ-প্রতিরূপ, ভাব-বিভাবের সঞ্চয় গ্রহণ করিতে হয়। প্রত্যেক কবিই পুরাতন উপমাদি গ্রহণ করেন, তবে বিমিশ্র ভাবে। যেমন বিদ্যাপতি। কিন্তু যিনি নিছক প্রাচীন কবিকৃত শিল্পলোকের সাহায্যে তাঁহার কাব্য-লোক নির্মাণ করেন, বুঝিতে পারি, বর্তমানকে অতিক্রম করিয়া স্বতন্ত্র আনন্দনিকেতনে তিনি পাঠকচিত্তকে উত্তীর্ণ করাইতে চান। গোবিন্দদাস তাঁহার ভাষা ছন্দ ভাব ও অলঙ্কারের বিশেষ প্রকৃতির সহায়তায় রাধাকৃষ্ণের অপ্রাকৃতলোকে প্রাকৃত জনকে দৃষ্টি মেলিবার অবসরটুকু দিয়াছেন। রবীন্দ্রনাথের কল্পনাকাব্য আলোচনা করিতে গিয়া জর্নৈক সমালোচক যে কথা বলিয়াছেন তাহা স্মরণ করিতে বলি। ‘ক্ষণিকার’ কবি ছিলেন মানবজীবনরসের কবি। সে কবি যখন বর্তমানের পশ্চাৎ-দ্বার উন্মোচন করিয়া প্রাচীন ভারত-কবি-লোকের অন্তরপুরীতে প্রবেশ করিতে চাহিলেন, তখন তাঁহার পক্ষে গতযুগে ব্যবহৃত কবিকথনের—ভাব-ভাষা ও ছন্দের—সাহায্যগ্রহণ ব্যতীত গতান্তর রহিল না। সেই প্রাচীন কবিকৃতির আভিজাত্য ও ঐশ্বর্য্যকে পুনরায় নিজের সৃষ্টির মধ্যে আমন্ত্রণ করিয়া তবে তিনি অর্ধ-বিস্মৃত ভারতের সৌন্দর্য্যসভাতলে আসনগ্রহণের অধিকার লাভ করিয়াছেন। রাধাকৃষ্ণের লীলা-বন্দাবনে প্রবেশ করিতে গোবিন্দদাসকে তাহাই করিতে হইল। আমরা—যাহারা পদ্যবলীকে কাব্য হিসাবে

সাধারণভাবে পাঠ করিয়া থাকি—আমাদের অপেক্ষা যাহারা আসরে নূতন জগৎ সৃষ্টি করেন, সেই কীর্তিনিয়ার দল গোবিন্দদাসের এই বিশেষ কৃতিত্বটুকু অধিক পরিমাণে উপলব্ধি করেন। কীর্তিনিয়ার নিকট গোবিন্দদাসই সর্বাধিক প্রিয় কবি; তাঁহার দেখেন, এই একমাত্র কবি, যাহার পদ সুধু চড়াইলে একেবারে মেঠো হইয়া পড়ে না, একটা ঐশ্বর্যের আবেশ শেষ পর্য্যন্ত বজায় থাকে।

তদুপরি ছিল গোবিন্দদাসের সঙ্গীত-গুণ। গোবিন্দদাস খাটি অর্থে লিরিক কবি নন, অথচ সঙ্গীতের অবিচ্ছিন্ন স্রোতে একেবারে ডুবাঁইয়া দিতে তাঁহার মত সে যুগে কেহই পারেন নাই, এ যুগেও এক রবীন্দ্রনাথই পারিয়াছেন। এই সঙ্গীত-অঙ্গ অথবা সুরাঙ্গ-সৃষ্টির প্রেরণা কবি পাইয়াছেন আর এক বাঙালী কবির নিকট—তিনি কান্ত-পদাবলীর শ্রীজয়দেব। ঠিক এই সুন্দর সঙ্গীতবোধ—কব্যের সুর-চেতনা—ভারতবর্ষে বঙ্গের অগ্র কোন প্রাদেশিক ভাষা ও সাহিত্যে মিলিবে কি না সন্দেহ। ভারতীয় সাহিত্যে সুর-সমর্পণ বাঙালীর শ্রেষ্ঠ সমর্পণ বলিতে দ্বিধা নাই। রবীন্দ্রনাথ একদা কালিদাসের কাব্যের ভাব-গভীর অথচ আপাত-অমসৃণ কাব্যাংশের শ্রেষ্ঠত্ব জয়দেবের অতি-ললিত অতি-মধুর পদাবলীর সহিত তুলনা করিয়া প্রতিপাদন করিয়াছিলেন। সেই অতি-যথার্থ সমালোচনার বিরুদ্ধে আমাদের কিছু বলিবার নাই। কিন্তু ইহাও স্বীকার্য্য, ঐ অথও সঙ্গীতহিন্নোল একমাত্র জয়দেবের, অগ্র কাহারও নয়। অনেকের ধারণা, বিজ্ঞাপতির নিকট গোবিন্দদাস এই সঙ্গীত-প্রাণতার জন্ত ঋণী। বস্তুতঃ তাহা সত্য নয়। বিজ্ঞাপতির নিকট গোবিন্দদাসের ঋণ ছন্দের জন্ত, সুরের জন্ত নয়। বিজ্ঞাপতির অনেক পদ বাহ্যরূপে অপেক্ষাকৃত ছন্দ-পুরুষ, অথচ তাহাদের ভাবগৌরবের তুলনা নাই। সেখানে গোবিন্দদাস অনেক পিছনে। তথাপি গোবিন্দদাসের চূড়ান্ত প্রতিভা—অর্থাৎ সুর-প্রতিভার প্রক্ষেপে বিজ্ঞাপতির স্থান নিম্নেই।

গোবিন্দদাসের কাব্যের ক্লাসিক্যাল গাম্ভীর্যের সহিত এই সুর-মিশ্রণ ব্যাপারটা কিছু অভূত। আমাদের মনে হয়, ইহার জন্ত অনেক সময় তাঁহার কাব্যে ভাবের অমর্য্যাদা ঘটিয়াছে। যতই হোক, মন এবং কান সমভাবে একসঙ্গে এককালে সক্রিয় থাকিতে পারে না। উভয়ের প্রতিদ্বন্দ্বিতা ঘটিলে প্রথম-দ্বিতীয় স্থানভেদ হইবেই। সুরে যেখানে কান ডুবিয়া গিয়াছে, মনকে সেই সুরশয্যা হইতে জাগাইয়া সক্রিয় করা রীতিমত কঠিন; মন কেবলই গহনতলে ডুব দিতে চায়, ভাসিতে চায় না। স্থখনিদ্রার অঁবসর কে ত্যাগ করে? তখন পরম পরিতৃপ্তিতে বা—আঃ বলিয়া একটি সুদীর্ঘ টান দিয়া আবেশে মনের দলগুলি মুদিত হইয়া আসে। সুরাধিক্যের এই এক বিপদ—ভাবের কবিত্ব হইতে বঞ্চিত হইয়া সন্তাননা থাকিয়া যায়। কিন্তু সম্পদও কি নাই?

আছে। না বুঝিয়া বহুতর জন গোবিন্দদাসকে শ্রেষ্ঠ কবির আসন দেয়। কারণ আর কিছুই নয়, গোবিন্দদাসের সঙ্গীত কানের ভিতর দিয়া মরমে পশিল গো—অন্ততঃ মরমে না পশুক,—সে সম্পর্কে ঠিক ঠিক সচেতনতা থাকে না,—কানের মাধ্যমে প্রাণকে যে মাত করিয়া দেয় তাহাতে কোন সন্দেহ নাই। গোবিন্দদাসের কাব্যের একটা রীতিমত ভার আছে—বস্তুভার। সযত্নে রচিয়া তোলা সেই কঠিন-গুরু বস্তুটিকে গানে দোলাইতে পারা কম কৃতিত্ব নয়। এই স্বর-পক্ষে ভর করিয়া গোবিন্দদাসের পদ-পর্কত নিকৃদ্রেশ মেঘ হইতে চাহিয়াছে। স্থিতি এবং গতি, ক্লাসিক এবং মিউজিকের অপূর্ণ এই সমন্বয়কে রবীন্দ্রনাথের কয়েকটি পঙ্ক্তি উদ্ধার করিয়া বুঝাইতে চাই। বনম্পত্তি সম্পর্কে কবি বলিতেছেন :

পূর্ণতার সাধনায় কনম্পত্তি চাহে উর্দ্ধপানে ;

পুঞ্জ পুঞ্জ পল্লবে পল্লবে

নিত্য তার সাড়া জাগে বিরাটের নিঃশব্দ আস্থানে

মত্ত জপে মগ্নরিত রবে।

ঋবস্ত্রের মূর্তি সে যে, দৃঢ়তা শাখায় প্রশাখায়,

বিপুল প্রাণের বহে ভার।

তবু তার শ্রামলতা কম্পমান ভীক বেদনায়

আন্দোলিয়া ওঠে বারংবার।

‘ঋবস্ত্রের মূর্তি’ গোবিন্দদাসের কাব্যই আবার ‘কম্পমান ভীক বেদনায়’—এই কথা বুঝাইতে চেষ্টা করিয়াছি, পারিয়াছি বলি না।

গোবিন্দদাস খাটি লিরিক কবি নহেন, কাব্যের মধ্যে তাঁহার অবতরণ ঘটে নাই। তিনি অস্ত্রের বেদনাকে—তাহার লীলা ও রসকে প্রকাশ করিয়াছেন এবং তাহা শেষ পর্যন্ত অপরের রহিয়া গিয়াছে। চণ্ডীদাস ও জ্ঞানদাসের মধ্যে রাধার সহিত একাত্ম হইবার প্রচেষ্টা বহুস্থলে; তাই অস্ত্রের বেদনা বা আনন্দ বাহতঃ তাঁহাদের কাব্যের উপজীব্য হইলেও যথার্থতঃ কবির প্রাণবেগ তাহাতে মুক্ত হইয়াছে। অর্থাৎ বহুক্ষেত্রে তাহা মন্বয় গীতিকবিতার রূপ ধারণ করিয়াছে। গোবিন্দদাসের কাব্যে ইহা ঘটে নাই। ঘটয়াছে কি, না ছুটি বস্তু—নাটকীয়তা ও চিত্রধর্মিতা। ইহার উল্লেখ পূর্বেই করিয়াছি। কবি স্বয়ং কাব্যের বিভাব নন বলিয়া তাঁহার কাব্য উৎকৃষ্ট চিত্ররসের আধার হইতে পারিয়াছে এবং সেই নিশ্চল চিত্ররাজি বিশেষ কাব্যপর্ধ্যায়ে চলৎশক্তি লাভ করিয়া নাটকীয়তার সৃষ্টি করিয়াছে। গোবিন্দদাসের শ্রেষ্ঠত্ব যে

যে পদপর্যায়ে, তাহার কোনটিতে হয় চিত্রধর্ম, নয় নাটকীয়তা—ইহার যে কোন একটি অহুস্যত। কোন কোন ক্ষেত্রে উভয়ের মিলন। গৌরচন্দ্রিকায় উভয়ের মিলন, রূপাল্লাগে চিত্র-রসের প্রাধান্য, অভিসারে নাটকীয়তা, মহারাসেও তাই।

গোবিন্দদাস সম্পর্কে সাধারণভাবে যে 'কথাগুলি বলিলাম, এখন সেগুলি যথাসাধ্য উদাহরণ-সংযুক্ত করিতে চেষ্টা করিব। আরম্ভে স্বতঃই গৌরচন্দ্রিকা।

গৌরচন্দ্রিকার পদে গোবিন্দদাসের সর্বশ্রেষ্ঠ সযস্ক সংশয় জাগাইবার উপযোগী দ্বিতীয় পদকর্তা নাই, একথা সর্বথা গ্রাহ্য। গৌরচন্দ্রকে অগণিত মাহুষ ভজনা করিয়াছে কিন্তু চন্দ্রিকাটুকু একমাত্র প্রতিফলিত করিতে পারিয়াছেন পরম ভক্ত কবিরাজ গোবিন্দদাস। 'লোকে বলে' গোবিন্দদাস নাকি আপন মনের মাধুরী মিশায়ে শ্রীচৈতন্যকে আঁকিয়াছেন। 'লোকে' কি না বলে। আমাদের মনে হয়, 'গৌরতনু' গোবিন্দদাসের মারফৎ আপনার 'লাবণি' আপনি কিছুটা আশ্বাদ করিতে পারিয়াছে। গোবিন্দদাসের দর্পণটি বড় উজ্জল, বড় স্বচ্ছ। দর্পণের মধ্যে আমিও কিছু থাকে না, অথবা যদি কিছু থাকে তাহা গুণের মধ্যে মলিনতা-পরিহার ব্যতীত আর কিছু করিতে পারে না। গোবিন্দদাসের সাধনা সেই মালিন্য-মুক্তি ও ছাতি-ধারণের সাধনা। তাঁহার কাব্যের মধ্য দিয়া তাই শ্রীচৈতন্যের একখানি পরিপূর্ণ রূপ-বিষ পাইয়াছি। কোন্ চৈতন্য?—যিনি ভক্তের ভগবান, বৈষ্ণবের বাধা-কৃষ্ণ, বিভেদের শাস্তা,—প্রেমের অবতার। এই যে পরিপূর্ণ মানবত্ব এবং অতিমানবত্ব, ইহার যথাসম্ভব প্রকাশ পাইয়াছি অগ্রজ, একমাত্র কৃষ্ণদাস কবিরাজের মধ্যে। শ্রীচৈতন্যের পূর্ণরূপ তিনি দর্শন করিয়াছেন এবং নিজ কাব্যের দীর্ঘ পরিসরে অপরিসীম ভাবগৌরব ও অহুতবশালিতার সহিত তাহার রূপদানও করিয়াছেন। তথাপি তাঁহার মধ্যে ভাব অপেক্ষা রস অল্প, কবিত্ব কাহিনীর তুলনায় গৌণ, দর্শন-গান্ধীর্ঘ্য স্বর-রহস্যকে অতিক্রম করিয়া প্রতিষ্ঠিত। আমি একথা বলিতেছি আপেক্ষিক বিচারে; নচেৎ কবিরাজ গোস্বামীর কবিত্বশক্তি সযস্ক আমি সম্পূর্ণ সচেতন। বরং আমি ইহাই বিশ্বাস করি, অতিরিক্ত রস-তারল্য তাঁহার কাব্যের ক্ষতি করিত, আরক্স ত্রত অসমাপ্ত থাকিয়া কবিতালক্ষ্মী পূজা পাইতেন, তাহা চৈতন্যচরিতামৃত হইত না, লোচনদাসের চৈতন্যমঙ্গল হইয়া দাঁড়াইত। জীবনী রচনার ক্ষেত্রে কৃষ্ণদাস শ্রীচৈতন্যের যে রূপাঙ্কন করিয়াছেন, কাব্যের ক্ষেত্রে গোবিন্দদাসের উপজীব্য তাহাই কৃষ্ণদাস কবিরাজের ভাবমুক্তিই গোবিন্দদাস কবিরাজের মধ্যে রসমুক্তি ধারণ করিয়াছে। শ্রীচৈতন্য-সম্পর্কিত বৈষ্ণবশাস্ত্রের তাত্ত্বিক ধারণার অল্পম কবিত্বমণ্ডিত প্রকাশ গোবিন্দদাসের গৌরচন্দ্রিকায় মিলিবে। কেবল তাত্ত্বিক ধারণার পুঞ্জ নয়,

প্রাণরসও তাঁহার কাব্যে। ভাব এবং রস গোবিন্দদাসের পদে এমন সর্বাঙ্গীণ স্বধামায় মিলিয়াছে,—যে-ভাব আবার সম্পূর্ণরূপে বৈষ্ণব সিদ্ধান্ত-শাস্ত্র অঙ্গমোদিত,—যে উভয়কে পৃথক করা অসম্ভব। সাধারণ পাঠক তত্ত্বের দিকে না চাহিয়া—চাহিবার কোন প্রয়োজন নাই—ঐ রস আশ্বাদন করে। তথাপি তত্ত্ব আছে। গোবিন্দদাসের কাব্যের স্থপতি-লক্ষণের যে কথা বলিয়াছি, সেই স্থপতি-বিচার প্রয়োগ কেবল রূপ-নির্মাণে নয় ভাব-দেহ গঠনেও; তাঁহার কাব্যের কোন অংশ যে অপরিবর্তনীয়, সে কেবল কাব্যের দেহসংস্থানের দিক হইতে নয়, ঐ পরিবর্তনে দেহের পশ্চাদবস্থিত ভাবপুরুষ আঘাত পাইবে বলিয়া। আমি এই জিনিসটি একটি দৃষ্টান্ত দ্বারা বুঝাইতে চেষ্টা করিব। আলোচনার প্রারম্ভে গৌরচন্দ্রিকার যে পদটি উদ্ধৃত করিয়াছি, তাহা স্মরণ করিতে বুলি ঐ ‘নীরদ-নয়নে’ পদটি। উক্ত পদটির রসের প্রশ্ন স্থগিত রাখিতেছি, তত্ত্ব ও তথ্যের দিক দেখা যাক।

“নীরদ নয়নে নীর ঘন সিঞ্ঝনে”—ইহা চৈতন্যদেবের ঐতিহাসিক মূর্তি। “পুলক মুকুল”—তাহাও। মহাপ্রভু আকুল কণ্ঠে প্রার্থনা করিতেন (এবং সাধনা ও সিদ্ধি উভয়ের বিগ্রহ তিনি)—

নয়নং গলদক্ষধারয়া

বদনং গদগদরুদ্ধয়া গিরা।

পুলকৈর্নিচিতং বপুঃ কদা

তব নাম গ্রহণে ভবিষ্যতি ॥

মহাপ্রভুর প্রার্থনা-মূর্তি ও গোবিন্দদাস-অঙ্কিত ভাবমূর্তির ঐক্য প্রদর্শনের আর প্রয়োজন নাই। কিন্তু একটা কথা মনে হইতেছে, ঐ “নীরদ নয়নে”, ইহার অর্থ কি মহাপ্রভুর নীরদ নয়ন হইতে নীরসিঞ্ঝন হইতেছে, না রাধার মত এই রাধাভাবিত মাগুষ্যটিও “চাহে মেঘপানে না চলে নয়ন তারা”,—“নীরদ” অর্থাৎ মেঘরূপী কৃষ্ণ মহাপ্রভুর “নয়নে” লাগিয়াই আছে, আর সেই নীল নীরদ হইতে অবিরত প্রেমবারি সিঞ্চিত হইয়া চৈতন্য-কদম্বকে পুলক-কণ্টকিত করিতেছে। তাহার পর: “শ্বেদ-মকরন্দ বিন্দু বিন্দু চ্যুত বিকশিত ভাব-কদম্ব”। ‘শ্বেদ’ অষ্ট সাত্ত্বিক ভাবের বিকার-বিশেষ—ভাবোন্মত্ত মহাপ্রভুর দেহ বাহিয়া শ্বেদ অঝোরে ঝরিত। কিন্তু “ভাব-কদম্ব”? স্থনিশ্চিতভাবে ভাবাবস্থায় কদম্ব-কোরকের সমতুল রোমাঞ্চ-শিহরিত তন্তুদেহের কথাই বলা হইতেছে। তথাপি যদি বলি—ব্যঞ্জনার দিক হইতে—কদম্বতলে ‘ভাব’ বিকশিত হইতেছে—নিত্য বৃন্দাবনের কদম্ব বৃক্ষের নিম্নেই মহাভাব-রূপা রাধারাগীর আত্মবিকাশ; রাধাভাবিত চৈতন্যের কি একই অবস্থা? অতঃপর

“কি পেখলু নটবর গৌরকিশোর”। বাহ্য অর্থ অতি সহজ, কিন্তু গৌরকিশোরের ‘কিশোর’ কবি পান কোথায়, বৃন্দাবনের চিরকিশোর না কি? তারপর—

“অভিনব হেম-কলপতরু সঞ্চর’

স্বরধুনী-তীরে উজোর।”

যুগপরিবেশে চৈতন্যপ্রেমের অভিনবত্ব ব্যাখ্যার প্রয়োজন রাখে না। মহাপ্রভুর হেমকাস্তি, কল্লতরুবাং আচরণ—কেমন কল্লতরু, যিনি সঞ্চরণ করিয়া বেড়ান, যাচিয়া ডাকিয়া করুণা করেন, আসিতে হয় না,—স্বরধুনী-তীরে তাঁহার প্রেমাবস্থা—এ সকলই তথ্যঘটিত সত্য। ‘অভিনব’ ইত্যাদির সমর্থন আছে বৈষ্ণব-দর্শনে—অনপিতচরীংচিরাং করুণয়াবতীর্ণঃ কলৌ—অনপিত বস্তু যিনি দান করেন তিনি অভিনব কল্লতরু বটে। অতঃপর “চঞ্চলচরণ কমলতলে বাঙ্করু ভকত-ভ্রমরগণ ভোর”—কীর্তনরত চরিতাখ্যান-প্রবৃত্ত ভক্তবেষ্টিত চৈতন্যের একেবারে বাস্তব ছবি। (পরবর্তীকালের একটি শাস্ত্রগীতিকায় অম্লরূপ পদাংশ—হয়ত উৎকৃষ্টতর ‘মজিল মোর মনভ্রমরা কালীপদ নীলকমলে’)। চঞ্চল চরণ-কমল কেন, না এই কমল সৌরভ বিলাইয়া ভাসিয়া বেড়ায়; নবদ্বীপ হইতে নীলাচল, বৃন্দাবন হইতে দক্ষিণের ব্রহ্মগিরির পথধূলি পদকমল-রেণুতে পবিত্র। ইহার পর: “পরিমলে লুবধ স্বরাস্বর ধাবই”—বৈষ্ণব-দর্শন অম্লসারে অবতারী সাক্ষাৎ শ্রীকৃষ্ণই শ্রীচৈতন্য—স্বরাস্বরের ধাবনে বিম্বিত হইবার কারণ নাই। আর: “জহনিশি রহত অগোর”—দিবোন্মাদ মহাপ্রভু।

“অবিরত প্রেম-রতনফল বিতরণে

অখিল-মনোরথ পুর।”

—শ্রীকৃষ্ণের রাধাভাব-আশ্বাদনের কালের সহিত ভূভার-হরণের কালও মিলিয়া গিয়াছিল; সুতরাং পঞ্চম পুরুষার্থ অকৈতব প্রেম-রতন-ফল বিতরণ। সর্বশেষে: “তাকর চরণে দীন হীন বঞ্চিত গোবিন্দদাস রহ দূর”—একেবারে খাটি বৈষ্ণবীয় উক্তি। মহাপ্রভুর সময়ে কৃষ্ণের বৃন্দাবন-লীলা অপ্রাকৃত বলিয়া স্বীকৃত; গোবিন্দদাসের সময়ে চৈতন্যের বাস্তব-লীলা অপ্রাকৃতত্ব লাভ করিয়াছে, সুতরাং “গোবিন্দদাস রহ দূর।”

পদটির তত্ত্ব ও তথ্যঘটিত দিক উদ্ঘাটিত করিবার চেষ্টা করিলাম। এই তত্ত্ব-ব্যাখ্যা সত্য হউক বা না হউক, পদটির কাব্যত্ব ঐ তত্ত্বের উপর একান্ত-নির্ভর নহে। ইহার কবিত্ব স্বতঃসিদ্ধ। “নীরদনয়নে”—স্রু করিলেই মন মজিয়া যায়। যে মহাজীবনের গাথা কবি রচনা করিতেছেন, তাহার অম্লপম-সুন্দর মাদুরীতে হৃদয় ভরিয়া উঠে। স্বর এবং ছন্দের মারফৎ শ্রীচৈতন্যের যে চিত্রটি ফুটিল তাহা যেমন

অপূর্ব তেমন সত্য। রবীন্দ্রনাথ যেখানে মহাজীবনের বন্দনা করিতেছেন—“কাহার চরিত্র ঘেরি স্বকঠিন ধর্মের নিয়ম” ইত্যাদি, সেখানে কবির প্রকাশভঙ্গির উৎকর্ষটুকু উদ্দিষ্ট ভাবে মর্শ্বগোচর করায়, রামচন্দ্রের ব্যক্তিত্ব সেখানে অনেকটা abstract—বাস্তব জীবনের দৃষ্টান্ত-সংযুক্ত নহে। অথচ এখানে মানব চৈতন্য,—অতি-মানব চৈতন্যও, কোথাও হারায় নাই। তাঁহার করুণা, প্রেম, ভাব-ভক্তি সকলই জীবনের আশ্রয় লাভ করিয়াছে। অবশ্য কবিতাটির উৎকর্ষের অন্যতম কারণ গোবিন্দদাসের সহজাত কবি-প্রকৃতির মধ্যে পাওয়া যাইবে—পদটি চিত্ররসাত্মক। সে চিত্র জীবন্ত হইতে পারিয়াছে কবির রসস্বজন শক্তির গুণে।

গৌরচন্দ্রিকার পদগুলিতে তবু এবং তথ্য মিলাইয়া খ্রীষ্টচৈতন্যের পরিপূর্ণ ভাব ও রূপ-বিগ্রহ নির্মাণে কবির যে সূক্ষ্মতার উল্লেখ করিতেছিলাম, তাহার অধিক উদাহরণ দিবার প্রয়োজন নাই, কেবল নিজের সামান্য কয়টি পঙ্ক্তি হইতে চৈতন্য-ব্যক্তিত্বের আভাস পাওয়া যাইবে :-

বিপুল পুলককুল- আকুল কলেবর
গরগর অন্তর প্রেমভরে ।
লহ লহ হাসনি গদগদ ভাষনি
কত মন্দাকিনী নয়নে ঝরে ॥
নিজ রসে নাচত নয়ন ঢুলায়ত
গায়ত কত কত ভকতহি মেলি ।

বা—পতিত হেরিয়া কান্দে থির নাহি বান্ধে
করুণ নয়ানে চায় ।.....
বরণ-আশ্রম কিঞ্চন-অকিঞ্চন
কার কোন দোষ নাহি মানে ।
কমলা-শিব-বিহি- ছলহ প্রেমধন
দান করয়ে জগজ্জনে ॥

বা—পুলক বলিত অতি বলিত হেম-তলু
অনুখন নটন বিভোর ।
কত অনুভাব অবধি না পাইয়ে
প্রেমসিদ্ধ-বহ নয়নহি লোর ॥



চৈতন্যতত্ত্বের ছন্দোময় প্রকাশ :

জয় নন্দ-নন্দন •

গোপী-জন-বল্লভ

রাধানায়ক নাগর শ্যাম ।

সো শচীনন্দন

নদীয়া-পুরন্দর ।

স্বরমুনিগণমন মোহন ধাম ॥

জয় নিজ কান্তা-

কান্তি কলেবর

জয় জয় প্রেমসীভাব বিনোদ ।.....

গৌরচন্দ্রিকার আলোচনার শেষে, এই সকল পদে পূর্বকথিত কবির ভক্তি-প্রাণতা এবং তদুজ্জাত কবির অহং-বিলয়, চিত্তধর্মিতা, ভাব-প্রতিষ্ঠিত সূদৃঢ় কাব্যাবয়ব ও তদন্তর্গত সঙ্গীত-লাবণ্য যে কিরূপে ও কিভাবে প্রকাশিত হইয়াছে, তাহা হয়ত সাধারণভাবে দেখাইতে পারিয়াছি। এখন অত্ন যে যে রসপর্ধ্যায়ে কবির শ্রেষ্ঠত্ব, সে গুলির বিচারে আসা যাক। যথা রূপাহুরাগ ।)

পূর্ব মন্তব্যের সমর্থন করিয়া পুনর্বীর বলিতেছি, গোবিন্দদাসের কবিপ্রাণতার মূলে আছে রূপাহুরাগ এবং উহা তাঁহার স্বাভাবিক ভক্তিপ্রাণতার একটি দিক। কেবল রূপাহুরাগ-নামাক্ত কাব্যপর্ধ্যায় নয়, সকল শ্রেণীর পদেই রূপের প্রতি পরমা-সক্তির নিদর্শন মিলিবে। রূপাহুরাগের আর এক শ্রেষ্ঠ কবি জ্ঞানদাস। কিন্তু জ্ঞানদাসের রূপাহুরাগের পদে অহুরাগটি কতখানি রূপের প্রতি, আর কতখানি স্বরূপের প্রতি, তাহা নির্ধারণ করা শক্ত। শক্তই বা বলি কেন, আসলে তাহা স্বরূপাহুরাগই। চণ্ডীদাসেও তাই। (এ বিষয়ে গোবিন্দদাসের একমাত্র তুলনা বিজ্ঞাপতি সত্যাকার রূপাহুরাগের পদ লিখিয়াছেন; কারণ তাঁহারও গোবিন্দদাসের অহুরূপ আত্মবিবিক্তির শক্তি ছিল; গোবিন্দদাস কৃষ্ণ বা রাধার রূপ দেখিয়া “সে কথা কবার নয়” বলিয়া হাল ছাড়িয়া দেন নাই, রূপ দর্শন ও চিত্রণ করিবার চিত্তবৈধী তাঁহার ছিল। এই বৈধী আবার তাঁহাকে ভক্তিই দিয়াছে। দেবতার মূর্তি যে শ্রদ্ধা লইয়া ভক্ত-শিল্পী তিল তিল করিয়া গড়িয়া তোলে, সেই শ্রদ্ধা দ্বারাই গোবিন্দদাস তাঁহার রাধাকৃষ্ণের মূর্তি রচনা করিয়াছেন। যতই ভক্তির আবেশ আকুলতা থাক, ব্যক্তিগত ধ্যান-ধারণার দ্বারা ভক্ত-আর্টিষ্ট কখনো দেবমূর্তিকে বিকৃত করিতে পারে না। ভক্তি-স্পন্দন যে পরিমাণে বৃদ্ধি পায়, আর্টিষ্টের তন্ময়তাও সেই অনুপাতে বাড়িতে থাকে, আপন আরাধ্য দেবতার যুগাগত মূর্তিকে যথাযথ রূপায়িত করিতে নিবিষ্ট-চিত্ত হইয়া পড়েন; তাঁহার ভক্তিও যত—আত্মনিয়ন্ত্রণ, আত্মসংহরণও তত। একটি পদ গ্রহণ করা যাক :

নবঘন পুঞ্জ পুঞ্জ জ্বিতি হৃন্দর
 অহুপম শ্রামর-শোভা ।
 পীত বসন জহু বিজুরী বিরাজিত
 তাহে চণ্ডতক মনোলোভা ॥
 পেথলু হৃন্দর নন্দকিশোর ।
 কালিন্দীতীরে তীরে চলি আওত
 রাধায়তিরসে ভোর ।
 মণিময় হার বিরাজিত উরপর
 ভালে এক সিন্দূর-বিন্দু ।
 নীল গুণনেজহু নখত বিরাজিত
 তাহে উজোরল ইন্দু ॥
 ভূজযুগ কালভূজগ জহু দোলত ।.....
 পদপঙ্কজ পর মণিময় নুপুর
 চলত নাচন ঘন বাজে ।.....

পদটির কবিত্ব স্বতঃপ্রকাশ, ব্যাখ্যার প্রয়োজন নাই। কিন্তু রূপবর্ণনায় খুঁটিনাটির দিকে কী লক্ষ্য। প্রথমে সামগ্রিক দেহরূপ - “নবঘনপুঞ্জ” ইত্যাদি। তাহার পর পীত বসন, কালিন্দী-তীর বাহিয়া চলিবার ভঙ্গিটুকু, -রাধা-প্রেমে বিভোর, তাই একটু মত্ত পদক্ষেপ। বক্ষে হার, ললাটের সিন্দূর-বিন্দু, কৃষ্ণ ভূজযুগ, পদ-নুপুর এবং তাহার স্বাক্ষর—কিছুই কবির চোখ এড়ায় নাই। এমন অপূর্ণ রূপ কবি দেখিলেন, অথচ—তাঁহার ব্যক্তি আমির কথা বলিতে পারি না—আটিষ্ট-আমি কোথাও আত্মহারা হইল না। কবির বিশ্বয় প্রকাশ পাইয়াছে উচ্ছ্বাসের মধ্যে নয়, তাঁহার চিত্ত-সৃষ্টির পরিচয় আছে বর্ণনাভঙ্গিতে, উপমা-নির্কাচনে। তাঁহার বিশ্বয় আট্টিক বিশ্বয়,—বিশ্বয় যত গাঢ় হয়, ততই উপমা-উৎপ্রেক্ষা নির্কাচনের অব্যর্থতা বাড়িয়া যায়—ভাব-অর্থ শব্দ-বিন্দু হয়। কবির চিত্ররস-স্বপ্নের দক্ষতাও আশাতীতরূপে প্রমাণিত হইয়াছে—অলঙ্কার-নৈপুণ্যও। পদটির গাভীর্য্যও অদ্ভুত,—“নবঘন পুঞ্জ পুঞ্জ জ্বিতি হৃন্দর” পড়িলেই মনে স্বেচ্ছায় তান উঠিত হয়। এই ধরণের আর একটি রূপবর্ণনার পদ, যাহা গোবিন্দদাস-চিহ্নিত :

অরুণিত চরণে রণিত মণিমঞ্জীর
 আধ আধ পদ চলনি রসাল

কাঞ্চন-বঞ্চন বসন-মনোরঞ্জন

অলিফুল-মিলিত ললিত বনমাল ॥

ভালে বনি আওয়ে মদন মোহনিয়া ।

অঙ্গহি অঙ্গ অনঙ্গ তরঙ্গিম

রঙ্গিম ভঙ্গিম নয়ন নাচনিয়া ॥

নন্দনন্দন চন্দচন্দন

গন্ধনিদিত অঙ্গ ।

জলদ সুন্দর কঙ্ক কঙ্কর

নিদ্রি দিকুরুভঙ্গ ॥—ইত্যাদি

পদের গৌরব যদিচ ছন্দ-চাতুর্যে এবং গোবিন্দদাসের নিজস্ব অপরূপ স্বর-মাধুর্যের জগত, তথাপি পদটির শেষ পর্য্যন্ত কবি রূপাহুরাগের একনিষ্ঠ পরিচয় দিয়া গিয়াছেন । অবশ্য গোবিন্দদাসের এমন পদও আছে যেখানে নিছক রূপাঙ্কন হইতে ঐ রূপ-জনিত ভাবোদয় কবির কাব্যোপজীব্য :

রূপে ভরল দিঠি সোঙরি পরশ মিঠি

পুলক ন তেজই অঙ্গ ।

মোহন মুরলী-রবে শ্রুতি পরিপূরিত

না শুনে আন পরসঙ্গ ॥

সজনি অব কি করবি উপদেশ ।

কানু-অহুরাগে মোর তহুমন মাতল

না শুনে ধরম-ভয় লেশ ॥ ইত্যাদি

—তথাপি সন্দেহ থাকে না, এই রূপঘটিত চিত্ত-বিস্ফার, ইহা শ্রীমতী রাধিকারই, কবির নয় ।

(খাঁটি রূপাহুরাগের পদে বিছাপতি ও গোবিন্দদাসের শ্রেষ্ঠত্ব । রূপাহুরাগের নামাঙ্কিত অথচ আসলে যাহা স্বরূপাহুরাগ ব্যতীত আর কিছু নয়, তেমন পদে অবশ্য চণ্ডীদাস-জ্ঞানদাসের উৎকর্ষ দূর-প্রসারী । জগদানন্দ দু'একটি পদে এ বিষয়ে গোবিন্দদাসকে অতুলন করিতে পারিয়াছেন । নিম্নের পদাংশে গোবিন্দদাসকে প্রতিদ্বন্দ্বি পাওয়া যায় :

ঘন গঞ্জন চিকুর-পুঞ্জ

মালতী-ফল মালে রঞ্জ

অঞ্জনযুত কঙ্ক নয়ন

খঞ্জন গতিহরী ।

কাঞ্চন-রুচি রুচির অঙ্গ

অঙ্গে অঙ্গৈঃভরু অনঙ্গ

কিঙ্কণী-কর কঙ্কণ মুহু

বাস্কত মনোহারী ॥ ইত্যাদি

অবশ্য তাবৎ বৈষ্ণবসাহিত্যে অত্র আর একজন কবির রচিত এমন একটি পদের সন্ধান পাওয়া যায়, যাহাকে খাটি রূপাহুরাগের পদ না বলিয়া উপায় নাই, অথচ ভাবগৌরবে ও চিত্রণ-দক্ষতায় পদটি গোবিন্দদাসের পদের তুলনায় কোনমতে নিম্নস্তরের নয়। গোবিন্দদাসের রূপমুগ্ধতা উহাতে না থাকিলেও কবি রাধিকার রূপবিভোরতা এমন এক অপূর্ণ চাতুর্য্যের সহিত প্রকাশ করিয়াছেন যে, মন মুগ্ধ হয়। বহু রামানন্দের পদটি তুলিয়া 'দবার লোভ স' বরণ করিতে পারিতেছি না :

বেলি অবমান-কালে

একা গিয়াছিলাম জলে

জলের ভিতরে শ্রামরায ।

ফুলের চূড়াটি মাথে

মোহন মুরলী হাতে

পুন শ্রাম জলেতে লুকায ॥

পুন জলে ঢেউ দিতে

বিশ্ব উঠে আচম্বিতে

বিশ্বের মাঝারে শ্রামরায ।

চূড়ার টালনি বামে

ত্রিভঙ্গ ভঙ্গিম-ঠামে

জাতিকুল মজাইলাম তায় ॥

পুন জলে দিতে ঢেউ

কোথায় না দেখি কেউ

জল স্থির হইলে দেখি কাহ্ন ।

ধরি ধরি মনে করি

ধরিবারে নাহি পারি

অহুরাগে জলে ডুবেছিহু ॥

কর বাড়াইয়া যাই

শ্রামের নাগাল নাহি পাই

কাঁদিতে কাঁদিতে আইলাম ঘরে ।

হায় আমি অভাগিনী

না পাইলাম শ্রাম গুণমণি

সেই দুখে হৃদয় বিদরে ॥

বহু রামানন্দের বাণী

শুন শুন ঠাকুরাণী

অকারণে জলে ডুবেছিলে ।

বুঝিতে নারিলে মায়া

জলে ছিল অঙ্গ-ছায়া

গ্রাম ছিল কদম্বের মূলে ॥

পূর্বরাগও যথার্থতঃ রূপানুরাগ পর্যায়ে পড়ে, অন্ততঃ গোবিন্দদাসের কাব্যে।
 বিজ্ঞাপতিরও। রূপ-দর্শন করিয়াই রাগ জন্মে। গোবিন্দদাস এই প্রাকৃত সত্যটিকে
 মাত্র করিয়া চলিয়াছিলেন। চণ্ডীদাস বা জ্ঞানদাস করেন নাই। চণ্ডীদাসে নাম
 শুনিয়াই রাগ—তিনি পূর্বজন্মের প্রীতিকে পরজন্মের সহিত যুক্ত করিয়া দিয়াছেন।
 ফলে রাধিকা জন্ম হইতে “মহাযোগিনীর পারা,” কিংবা “পরানে পরানে নেহার” বোদ্ধা।
 কাব্যোৎকর্ষের দিক দিয়া চণ্ডীদাস-জ্ঞানদাসের স্থান পূর্বরাগ-পর্যায়ে গোবিন্দদাস
 অপেক্ষা অনেক উর্দ্ধে। তাহা সত্য, কারণ গোবিন্দদাসের পূর্বরাগে দেহের ভাগ
 অধিক, মন অবর্তমান। বিজ্ঞাপতিরও একই অবস্থা। শ্রীরাধার পূর্বরাগে বিজ্ঞাপতি-
 গোবিন্দদাসের অবস্থা অতি শোচনীয়। নারীর পূর্বরাগে রূপলালসা অপেক্ষা মর্ম্মপীড়ন
 অধিক। চণ্ডীদাস-জ্ঞানদাসে ঐ মর্ম্মপীড়নের কাব্যরূপ অতুলন। অপরপক্ষে পুরুষের
 জ্ঞান নারীর রূপলালসা এবং তাহার চিত্রণ উৎকৃষ্ট কাব্যের আধার হইতে পারে না।
 পুরুষ-সৌন্দর্য্য—যতই হোক—নারী-সৌন্দর্য্যের অল্পরূপ বর্ণন-উৎকর্ষ লাভ করে না।
 অথচ বিজ্ঞাপতি বা গোবিন্দদাসের পক্ষে—তাহাদের প্রতিভাধর্ম্ম অল্পমাত্র—কৃষ্ণরূপের
 বর্ণনা ছাড়া গত্যন্তর নাই। সুতরাং তাহাদের এই বিষয়ের কাব্যও অসুন্দর।
 অত্ৰদিকে পুরুষের চোখ দিয়া নারীকে দর্শন এবং দর্শন-ফল উত্তম কাব্যরূপ ধারণ
 করিতে পারে। তাই কৃষ্ণের পূর্বরাগ, যাহার ভিতর কৃষ্ণের দৃষ্টির মাধ্যমে রাধারূপের
 উপভোগ আছে, সেখানে কাব্যসৌন্দর্য্য বঞ্চনা করে নাই। এই কারণে কৃষ্ণের পূর্বরাগে
 বিজ্ঞাপতির হাত হইতে “গেলি কামিনী গজ্জল গামিনী,” “যাঁহা যাঁহা পদযুগ ধরই”—
 ইত্যাদি কয়েকটি প্রথম শ্রেণীর পদ পাইয়াছি। এ ব্যাপারে গোবিন্দদাসও পিছাইয়া
 নাই। শ্রীকৃষ্ণের পূর্বরাগ-বিষয়ক কয়েকটি ভাল পদ তাহারও আছে। পদগুলির
 শ্রেষ্ঠত্বের কারণ সেই একই—কবির রূপের প্রতি অল্পরাগ; এগুলিকে পূর্বরাগের
 পদ না বলিয়া রূপানুরাগের পদও বলিতে পারি :

যাঁহা যাঁহা নিকসয়ে তহু তহু জ্যোতি ।

তাঁহা তাঁহা বিজুরী চমকময় হোথি ॥

যাঁহা যাঁহা অরুণ চরণে চলি যাত ।

তাঁহা তাঁহা ধরগী হইয়ে মঝু গাত ॥...

যাঁহা যাঁহা তরল বিলোকন পড়ই ।

তাঁহা তাঁহা নীল উতপল বন ভরই ॥

যাহা যাহা হেরিয়ে মধুরিম হাস।

• তাহা তাহা কুন্দ কুসুম পরকাশ ॥...

বা—

চম্পকদাম হেরি চিঁতি অতি কম্পিত

লোচনে বহে অহুরাগ।

তুয়া রূপ অন্তরে জাগয়ে দিরন্তর

ধনি ধনি তোহারি সোহাগ ॥...

গোবিন্দদাসের কয়েকটি রাসের পর আছে—ইহাদের জুড়ি বৈষ্ণব সাহিত্যে নাই।
আনন্দ নয়, স্থখ নয়, তৃপ্তি বা সন্তোষ নয়—একেবারে উদ্দাম উল্লাস,—পদগুলির মধ্য
দিয়া উল্লাস যেন ফাটিয়া পড়িতেছে। শরদ পূর্ণিমার রজনী, অপূর্ণ প্রাকৃতিক পরিবেশ,
বর্ষণ-ক্ষান্ত স্বচ্ছ সুনীল আকাশে মুক্তির অফুরন্ত অবসর, এমন সময়ে কৃষ্ণের বাঁশি
বাজিল—বাজিল, না, হৃদয়বস্ত্রটাকে বাজাইয়া দিল। নৃত্যচন্দ্রের প্রত্যেক পদপাতে
লাজলজ্জা, মানঅভিমান, কুলগোকুল—সব মাড়াইয়া গুঁড়াইয়া গোপীরা ছুটিয়া
আসিতেছে—আজ আকাশে উল্লাসে, বাতাসে উল্লাস, হাসিতে উল্লাস, বাঁশিতে উল্লাস,
দেহে উল্লাস, ‘নেহে’ উল্লাস—কবির স্বরে ছন্দে ভাবে ভাষায় উল্লাস—এ যেন উল্লাসের
মাথায় মাতনের ঘূর্ণী লাগাইয়া দেওয়া হইয়াছে—মহারাসের মহারাগ কবিকে একেবারে
উন্মত্ত করিয়া ফেলিয়াছে :

ওরে কবি আজ তোরে করেছে উত্তলা

বাকর-মুখরা এই ভুবন-মেখলা

অলক্ষিত চরণের অকারণ অবারণ চলা। (চঞ্চলা)—বলাকা

যে পদটি উদ্ধৃত করিতেছি, বোধকরি তাহার মত উল্লাস-রসের এমন ক্রটিশেষশূন্য
অনবদ্য কাব্যাংশ আর মিলিবে না। প্রথম প্রকৃতির পটভূমিকা :

শরদ-চন্দ্র পবন মন্দ

বিপিনে ভরল কুসুম-গন্ধ

ফুল মল্লী মালতী যুথী

মত্ত মধুপ ভোরণী।

এহেন সময়ে :

হেরত রাতি ঐছন ভাতি

শ্রাম মোহন মদনে মাতি

মুরলী-গান পঞ্চম তান

কুলবতী চিত চোরণী ॥

এ পর্যন্ত একটি সংবাদ পাইয়াছি, সময় বুঝিয়া পঞ্চমে কৃষ্ণের বাঁশি বাজিয়াছে—
যে বাঁশি কুলবতী-চিত-চোরণী, যে বাঁশি বাজিলে “কুলবতী-ধরম কাচ সমতুল”। পরের
শ্লোকে দেখিব, কৃষ্ণের সেই বাঁশি অপ্রবুদ্ধ মোহাচ্ছন্ন বৃন্দাবনের কানে কানে উঠিবার—
উঠিয়া ছুটিবার বার্তা কানাকানি করিয়া গেল। কৃষ্ণ-করুণায় আজি বৃন্দাবনের সহসা-
জাগরণ—তন্দ্রাজড়িমা এখনো কাটে নাই—স্বপ্ন ভাঙিয়া নিব্বার শৈলগাত্রে প্রথম
আঘাত করিয়াছে—শ্লোকটির মন্তব্য-ছন্দে, সংযত শব্দ-বিজ্ঞাসে ভাঙিয়া পড়িবার পূর্বের
ভাব-সুস্কতা ফুটিয়াছে :

শুনত গোপী প্রেম রোপি
মনহি মনহি আপনা মৌপি
তাহি চলত জাহি বোলত
মুরলীক কললোলনী ।

অতঃপর আর বাধা মানিল না—কি গোপীর প্রাণ-ভঙ্গি, কি কবির ছন্দোভঙ্গি,—
নিব্বারের কেবল স্বপ্ন ভাঙে নাই, বন্ধও টুটিয়াছে। সেই অভূতপূর্ব আনন্দোন্মাসের
চিত্র :

বিছুরি গেহ নিজহ দেহ
এক নয়নে কাজর রেহ
বাহে রঞ্জিত মঞ্জীর এক
এক কুণ্ডল দোলনী ।

শিখিল ছন্দ নীবিনিবন্ধ
বেগে ধাওত যুবতীবৃন্দ
খসত বসন রসন চোলি
গলিত বেণী লোলনী ॥

চিত্র-দৃশ্যতা, সেই চিত্রের মধ্যে চলিযুতা আনিয়া দিবার শক্তি, নাটকীয়তা এবং
ঋপমুগ্ধতা—গোবিন্দদাসের নিজস্ব কয়েকটি শক্তির সম্মিলন, পূর্বোক্ত পদ্যটিতে
পাইয়াছি—তরুণির উহার উল্লাসোচ্ছ্বাস। নিম্নের পদ্যাংশগুলিতে অল্পরূপ উৎকর্ষের
সন্ধান না মিলিলেও এগুলি প্রশংসারযোগ্য :

ধনি ধনি অপরূপ রাস-বিহার ।

খির বিজুরী সঞ্চে

চঞ্চল জলধর

রস বরিথয়ে অনিবার ॥

কত কত চান্দ

তিমিরপর বিলসই

তিমিরহু কত কত চান্দে ।

কনক লতায়

তমালহু কত কত

দুহুঁ দুহুঁ তহু তহু বান্ধে ॥

কিংবা :

শ্রামক অঙ্গ

অনঙ্গ তরঙ্গিম

ললিত ত্রিভঙ্গমধারী ।

ভাঙ বিভঙ্গিম

রঙ্গিম চাহনি

রঙ্গিনী বয়ান নেহারি ॥

“শরদ চন্দ” পদটি একেবারে অনলঙ্কৃত, উপরিউক্ত অংশগুলিতে অলঙ্কারের আপেক্ষিক আধিক্য।

মহারাসের পদগুলি আশ্রয় করিবার সময় মনে হয়, এই পদগুলি এতদূর উৎকর্ষ পাইল কিরূপে? এগুলির মূল ভাব মিলনের, কিন্তু গোবিন্দদাসের মিলন-মূলক পদ এমন চমৎকার নয়। সেখানে আলঙ্কারিক কৃতিত্ব এবং সূক্ষ্ম রীতিনৈপুণ্য আছে বটে, তথাপি এমন প্রাণশক্তি নাই। তাহার কারণ মনে হয়, মিলনে একটা বদ্ধতা আছে। সীমাবদ্ধ ভোগের চিত্র কাব্যহিসাবে সার্থকতা লাভ করিতে পারে না, যদি তাহার মধ্যে আত্মবিস্তৃতির বিপুল অবকাশ না থাকে। বিরহ সেই মুক্তির অবসর দেয়। ভোগের মধ্যেও বিচ্ছেদ, পাওয়ার মধ্যেও হারাই হারাই ভাব, আলিঙ্গনের মধ্যে আশঙ্কার শিহরণ (তু: “রম্যাগি বীক্ষ্য”—কালিদাস; “মেঘালোকে ভবতি”—কালিদাস; “দুহুঁ কোরে দুহুঁ কান্দে”—জ্ঞানদাস; “জনম অবধি হাম” বিজাপতি, ইত্যাদি) পগুচ্ছন্দকে কাব্যরূপ দান করে। গোবিন্দদাস কিন্তু সেই বেদনার কবি নহেন। সাধারণভাবে তাঁহার কাব্য-নাট্যিকা আশ্লেষ-মুহুর্তে অশ্রুবর্ষণ করে না। তাই মিলন-বর্ণনায় নয়—মিলনমূলক অগ্র পদে গোবিন্দদাস শ্রেষ্ঠ, যেমন রাস। রাসে বিরহবোধ নাই সত্য কিন্তু বিশ্বপ্রকৃতির উদার পটভূমিকা আছে। সেই প্রকৃতি কবিচিন্তকে আপন বিশাল বিস্তারের ভিতর ছুটাইয়া নাচাইয়া ফিরাইয়াছে। রবীন্দ্রনাথ মেঘদূতের সমালোচনা প্রসঙ্গে ঐ কথাই বলিয়াছেন। মিলনের দিনে বিশ্বপ্রকৃতির পটভূমিকা ছিল না বলিয়া তাহাতে আনন্দ

জাগে নাই; তাই কালিদাসকে রামগিরি হইতে অলকা পর্যন্ত বিরহস্থসিত পথটিকে স্বজন করিতে হইয়াছে। মহারাসে কেবল বিশ্বপ্রকৃতির পৃষ্ঠরক্ষা নয়, তদুপরি আছে চলিষ্ণুতা—গতিবেগ। গতি ও বেগের ক্ষেত্রে গোবিন্দদাসের কবি-প্রতিভা একটা স্বাভাবিক ক্ষুণ্ণি আবিষ্কার করে। অভিসারের পদে তাহার চূড়ান্ত দৃষ্টান্ত মিলিবে।

অভিসারের পদে গোবিন্দদাস রাজাধিরাজ। তাঁহার একাধিপত্যে সন্দেহ জাগাইবার মত দ্বিতীয় বৈষ্ণব কবি নাই। সমকক্ষতা তো দূরের কথা, কাছাকাছি আসিতে পারেন এমন কবিও দেখি না। বিজ্ঞাপতির কয়েকটি পদে [“বরিস পয়োধর ধরণী বারি-ভর রয়নি মহাভয়ভীমা”; “গুরুজন নয়ন অন্ধ করি আওল বাঁধব তিমির বিসেখ”; “চকিত চকিত কত বেরি বিলোকই” (?)] এবং রায়শেখর ও অনন্তদাসের দুইটি পদে (“গগনে অবঘন মেহ দাঁড়ণ সঘনে দামিনী ঝলকই”; “ধনি ধনি বনি অভিসারে”;) অভিসারের ভাব ভালই ফুটিয়াছে, তবে গোবিন্দদাসের সঙ্গে তুলনীয় হইবার যোগ্যতা অর্জন করে নাই।

অভিসারের পদে গোবিন্দদাসের অতুলনীয় চমৎকারিত্বের কারণ কি? সংক্ষেপে, তাহা কবির স্বকীয় প্রতিভাধর্ম—তাঁহার চলিষ্ণুতা ও চিত্র-রস-রসিকতা এবং পরোক্ষ অভিজ্ঞতা-রস। কবির নিজ কবি-মর্ম্ম কাব্যের রূপ-নির্মাণে শক্তি দিয়াছে এবং শ্রীচৈতন্য-জীবনের অপূর্ণ অভিজ্ঞতা সেই শক্তিকে সার্থকতার পথ প্রদর্শন করিয়াছে।

অভিসারের পরিকল্পনা কিছু মৌলিক নয়, মৌলিক হইতে পারে না। সৃষ্টির আদি মুহূর্ত্ত হইতে বিবর্তনের পথে মানবজীবনের অগ্রগতির সহিত অভিসারের পরিকল্পনার এতই ঘনিষ্ঠতা যে, যাহা কিছু দীর্ঘ কুচ্ছসাধনায় লভ্য, সংগ্রামে অকীকার্য্য, তাহাকেই অভিসার—জীবনাভিসার বলিয়া আসিয়াছি। পৃথিবীর যেমন দুই গতি, আফ্রিক ও বাহিক, একটি স্ব-বৃত্ত অত্রটি স্বর্ধ্য-বৃত্ত, তেমনি মানব-জীবনেরও দুই গতি; একটি হইল অসীম অতীত হইতে অনন্ত ভবিষ্যতের অভিমুখে পথ-পরিক্রমা, অত্রটি সেই পথে চলিতে চলিতেই আত্মপ্রেম—স্বীয় কামনাবাসনার চতুর্দিকে চক্রমণ। মানবীয় প্রেমের জন্ত তেমন স্ব-বৃত্ত-গতি বহুপূর্বকালেই অভিসার আখ্যা পাইয়াছে। সংস্কৃত কাব্যে—বিশেষতঃ কালিদাসের মধ্যে তাহার দৃষ্টান্ত আছে। যথা :

গচ্ছন্তীনাং রমণবসতিং যোষিতাং তত্র নন্তং

রুদ্ধালোকে নরপতিপথে সৃচিভেদৈন্তমোভিঃ।

সৌদামন্তা কনকনিকবস্মিঙ্কয়া দর্শয়ৌবাং

তোয়াংসর্গন্তনিতমুখরো মাশ্ব ভূবিক্রবাস্তাঃ ॥

গীতগোবিন্দের কবিও কোমল-করুণ হুরে অভিসারের কথা বলেন :

ধীর সমীরে ঘুম্নাতীরে বসতি ধনে বনমালী ।...

নাম্মামেতং কৃতসঙ্কেতং বাদয়তে মুহু বেণুং ॥...

পততি পতত্রে বিচলিত পত্রে শঙ্কিত ভবদুপখানম্ ।

রচয়তি শয়নং সচকিত নয়নং পশুতি তব পদ্বানম্ ॥

মুগ্ধমধীরং ত্যজ মঞ্জীরম্ রিপুমিব কেলিযু লোলম্ ।

চল সখি কুঞ্জং সতিমিবপুঞ্জং শীলয় নীলনিচোলম্ ॥

জয়দেবের ধীর-ললিত মুহুকম্পিত ছন্দহিলোলে অভিসারের প্রাণোত্তাপ ফুটে নাই। জয়দেবের গান এ ঘর হইতে ও ঘরে ঘাইবার গান, ঘর হইতে বাহিরে ঘাইবার নহে। অথচ অভিসারের মধ্যে আছে একটা অনিবার্য প্রাণাবেগ, সুদুর্জয় আত্মবিশ্বাস, অতন্ত্র সাধন-দীপ্তি, অপরিমীম উৎকর্ষার যন্ত্রণাময় আকৃতি। তাহা কেবল প্রেমের লীলা-বৈচিত্র্যের মধ্যে নীমাবদ্ধ নাই—তাহা কেবল আত্মিক-গতির, আত্মপরিক্রমা নহে—জগতের শ্রেষ্ঠ ধর্মকাব্যগুলিতে তাহা দৌরাবর্তনের গতিবেগ লইয়াছে। অনন্তের জন্ত অন্তহীন পদক্ষেপ অভিসারের রূপ ধরিয়াছে। কখনো পথের রূপ দেখিয়া যেন পথিক আর্তনাদ করিয়া ওঠে—সুরস্র ধারা নিশিতা হ্রতয়া দুর্গং পথস্তং কবয়ো বদন্তি ; সে আর্তকণ্ঠে পরক্ষণে আত্মহানের সিংহগর্জন বাজিয়া ওঠে—চরৈবেতি চরৈবেতি—উত্তীর্ণত জাগ্রত প্রাপ্য বরান্ নিবোধত। চলিতে চলিতে চলৎ-শক্তির গোপন রহস্তটুকু প্রকাশ করিয়া দেয়—গীতার অভ্যাসযোগের কথা আসে ;—সমস্ত মিলিয়া মানবপ্রাণের নিত্যযাত্রার একটা রূপ ধরা পড়ে। যোগী বলে, সমস্ত বিশ্বপ্রকৃতি যোগমগ্ন, পরমপুরুষের আবির্ভাবকে সে সমাসন্ন করিবে। বৈষ্ণবের নিকট পরমের অবতরণ-সাধনা অপর একটি রূপ গ্রহণ করে। বৈষ্ণব লীলাবাদী, সে কোথাও থামিয়া নাই, চলিতে চলিতে সে তাহার কৃষ্ণ-সন্ধান করে। পথও তাহার, পরমও তাহার। তাহার ভগবান দাঁড়াইয়া নাই ; তিনি বাঁশি বাজাইয়া আগাইয়া আসিতেছেন। রবীন্দ্রনাথ অল্পম কাব্যশ্রীমণ্ডিত করিয়া তত্ত্বটি প্রকাশ করিয়াছেন :

“অপূর্ণ যখন চলেছে পূর্ণের দিকে

তার বিচ্ছেদের যাত্রাপথে

আনন্দের নব নব পর্য্যায় ।

পরিপূর্ণ অপেক্ষা করছে স্থির হয়ে ;...

যে অভিসারিকা তারই জয়,

আনন্দে সে চলেছে কাঁটা মাড়িয়ে ।

ভুল বলা হোল বুঝি ।

সেও তো নেই স্থির হয়ে যে পরিপূর্ণ,

সে যে বাজায় বাঁশি, প্রতীক্ষার বাঁশি,

স্বর তার এগিয়ে চলে অন্ধকার পথে ।

বাঙ্কিতের আহ্বান আর অভিসারিকার চলা

পদে পদে মিলেছে একই তালে ।

তাই নদী চলেছে যাত্রার ছন্দে

সমুদ্র ছলেছে আহ্বানের স্বরে ।

শ্রীরামকৃষ্ণ বলিতেন, কখনো ভগবান্ চুষক, ভক্ত ছুঁচ—ভগবান্ আকর্ষণ ক'রে ভক্তকে টেনে লন। আবার কখনো ভক্ত চুষক, পাথর হন, ভগবান্ ছুঁচ হন, ভক্তের এত আকর্ষণ যে, তার প্রেমে মুগ্ধ হয়ে ভগবান্ তার কাছে গিয়ে পড়েন। অলঙ্কিত কৃষ্ণের আকর্ষণে ধরা দিয়া পথ চলিবার ইতিহাসই অভিসার-পর্যায় ।

গোবিন্দদাসের অভিসার-পদে অলঙ্কারশাস্ত্রসম্মত নানা অভিসারিকা-ভেদের চিত্র আছে (যেমন—দিবাভিনয়িকা, তিমিরাভিনয়িকা, গ্রীষ্মাভিনয়িকা, জ্যেষ্ঠাভিনয়িকা ইত্যাদি), কিন্তু ঐ বৈচিত্র্য-সৃষ্টিই তাঁহার কবিত্বশক্তির নিরিখ নহে। কবি সেগুলিকে কাব্য করিয়া তুলিতে পারিয়াছেন। এই পদগুলিতে দুইটি বস্তু প্রবল : চিত্রধর্ম ও নাটকীয়তা। এক কথায় ইহাদের নাটকীয় চিত্র বলিতে পারি। তদুপরি গোবিন্দদাস-সিদ্ধ সঙ্গীত-হিলোল তো আছেই। অভিসারের পদে অধিক নাটকীয় অবসর স্বজনের মধ্যে কবির গভীর সঙ্গতিবোধের প্রমাণ আছে। অভিসারের সাধনা বাস্তবের সাধনা। তাহার যে কষ্ট তাহা মানস-স্বজিত নহে। তাহা অনেকাংশে লৌকিক কষ্ট। সুতরাং সেই কষ্টকে যখন কাব্যরূপ দান করিতে হইতেছে, তখন অধিক নাটকীয় না হইয়া উপায় নাই। এখন হ'একটি পদ গ্রহণ করা যাক। প্রথম কৃষ্ণ সাধনার চিত্র :

কণ্টকগাড়ি কমলসম পদতল

মঞ্জীর চীরহি বাঁপি

গাগরি-বারি চারি করি পিছল

চলতহি অঙ্গুলি চাপি ।

মাধব, তুমি অভিসারক লাগি

দূতর পন্থ- গমন ধনী সাধয়ে

মন্দিরে যামিনী জাগি ।

রাধিকা প্রস্তুত হইতেছেন, তাহারই একটি অতিশয় বাস্তব চিত্র। ইহা অধ্যায়ত্রী, আসন্ন সাধনায় সিদ্ধিলাভের উপযোগী হইবার অভ্যাসযোগ, দেহে মনে সামর্থ্য-সংগ্রহের প্রস্তুতি-অধ্যায়। কেবল জল ঢালিয়া, কাটা মাড়াইয়া সাধনা নয়, যেখানে সর্বাধিক ভীতি ও সর্বাধিক প্রীতি, সেই উভয়কে জয় করিতে হইবে। তবেই না চরম আলিঙ্গন। অলঙ্কারের প্রতি নারীর স্বাভাবিক প্রীতি এবং সর্পের প্রতি সাধারণ ভীতি। অলঙ্কারের মূল্যে আশঙ্কা-নিরাকরণের প্রচেষ্টা :

করকঙ্কণপণ ফণীমুখ-বন্ধন

শিখই ভুজগ-গুরু পাশে।

কিন্তু সর্প-সিদ্ধি কাজে আসে না; পথ চলিতে রাধা মস্ত্রে সরীসৃপকে বশীভূত করিবার কথা ভুলিয়া যান, তখন চক্র-দোলায়িত সর্পের সম্মুখে রাধিকার কিবা আচরণ? গোবিন্দদাসের মুখের কথা বহুপূর্বে অহুমান করিয়া তদীয় গুরু বিতাপতি লিখিয়া গিয়াছেন :

দেখি ভবনভিত্তি লিখল ভুজগপতি

জস্থ মনে পরম তরাসে।

সো হৃদদনী করে ঝাঁপইত ফনীমণি

বিহসি আইলি তুঅ পাশে ॥

রাধিকা তো প্রস্তুত--এই প্রস্তুতি কি যথেষ্ট? কত দূর-দূর্গম পথ, সিদ্ধি কত কঠিন, বিঘ্নবিপদ বাধাবন্ধ কত স্তূতস্তর, কবি তাহা স্মরণ না করাইয়া পারেন না। কেবল কি সমাজ বা সংস্কারের বাধা, বিশ্বপ্রকৃতি যে বিরূপ। গোবিন্দদাস অভিসারিকা রাধিকার সম্মুখে পরিব্যাপ্ত বিশ্বপ্রকৃতির চিত্র আঁকিতেছেন; শব্দমন্ত্র, ধ্বনিগুণ, ভাবগৌরব মিলিয়া মিশিয়া সে বর্ণনাকে অনির্বচনীয় স্তরে তুলিয়া দিয়াছে :

মন্দির বাহির কঠিন কপাট।

চলইতে শঙ্কিল পঙ্কিল বাট ॥

উহি অতি দূরতর বাদর দোল।

বারি কি বারই নীল নিচোল ॥

হৃন্দরী কৈছে করবি অভিসার।

হরি রহ মানস স্বরধুনী পার ॥

ঘন ঘন ঝন ঝন বজ্রর নিপাত।

শুনইতে শ্রবণে মরম জরি ষাত ॥

“ দশদিশ দামিনী দহন বিধার ।

হেরইতে উচকই লোচন তার ॥

যাহার কান আছে সে এই সঙ্গীত শুনিবে, যাহার গ্রাণ আছে সে সঙ্গীতাত্মিত ভাবহিল্লোলে আপ্ত হইবে। বৈষ্ণব কাব্য—ধ্বনিময় যেখানে সিদ্ধবস্ত—সেখানেও এমনটি স্থলভ নয়। শুধু—জ্ঞানদাসের পদের একটি অংশে—তাহাও বর্ষার বর্ণনা—এই ধ্বনি ফুটিয়াছে। সেখানের বর্ষা ঐ বর্ষা নয়; সেখানে ‘রিমিরিমি বরষা’—‘রিমিরিমি শব্দে বরিষে।’ ঐ রিমিরিমি পদটির মত শব্দচিত্র রবীন্দ্রযুগেও বোধ করি বিরল। বর্ষার অগ্র যে রূপ—আকুল উত্তাল স্বরূপ—তদুচিত শব্দ চয়নে ও বয়নে এখানে গোবিন্দদাস পাঠকের মর্মে একেবারে বিদ্ধ করিয়া দিতে পারিয়াছেন। আষাঢ়ের নববর্ষা নয়, শ্রাবণের যৌবনমত্ত দিনগুলি। চকিত আগমন নয়—ঝাঁপিয়া আসা। সমস্ত বিশ্বপ্রকৃতিকে বেড়িয়া, ঢাকিয়া, বর্ষার মস্তধ্বনি গুরু গুরু করিয়া উঠিতেছে। শুধু বারি নয়, বায়ুসনাথ আগমন। সমগ্র প্রকৃতি ছলিয়া ছলিয়া উঠিতেছে। ক্ষণেকের জন্ত হয়ত শ্রাবণের দীর্ঘধারা বাঙ্গার বাপটে উৎক্ষিপ্ত হইয়া পুনরায় প্রবল বেগে নামিয়া আসিল। আর অমনি মত্ত-মাগরের উত্তাল তরঙ্গের মত তরঙ্গায়িত আবেগে ঐ ধারাবর্ষণ ছলিতে লাগিল—তাহারই একটি আশ্চর্য্য শব্দ-চিত্র :

তহিঁ অতি দূরতর বাদর দোল ।

কেবল বাদর দোলে না, মনও দোলে—আশঙ্কায় দোলে আর আশায় ভোলে, আশ্বাসে কাঁপে আর নৈরাশ্রে ভাঙে :

স্বন্দরী কৈছে করবি অভিসার ।

হরি রহ মানস স্বয়ধুনী পার ॥

আবৃত্তির সময় ‘করবি অভিসারের’ ‘ক’-তে দীর্ঘ টান দিয়া ‘রবিঅভিসার’ একসঙ্গে পড়িয়া গেলে এই মানস দোলনটি শ্রুতিগোচর পর্য্যন্ত হয়। অতঃপর ঘনবর্ষণ বজ্রপাত—বিদ্যুৎচমক :

ঘনঘন বনবন বজ্র নিপাত ।

শুনইতে শ্রবণে মরম জরি যাত ॥

দশদিশ দামিনী দহন বিধার ।

হেরইতে উচকই লোচন তার ॥

ঘন ঘন বজ্রপাত হইতেছে, আকাশের একপ্রান্ত হইতে অগ্রপ্রান্ত পর্য্যন্ত বিদ্যুতের তরবারি ছুটীছুটি করিতেছে—পথে যে নামিয়াছে, হয়ত পথ হারাইয়া সর্বনাশা

আকাশের পানে ক্ষণে ক্ষণে সে ভয়চকিত দৃষ্টিক্ষেপ করিতেছে—এ সবই কয়েকটি মাত্র শব্দের মধ্যে এমনি অমোঘ উপায়ে কবি ধরিয়া দিয়াছেন যে, গোবিন্দদাসের পর কয়েকশত বৎসর কাটয়া গেল—বাংলা কাব্যসাহিত্যের অভাবনীয় উন্নতি হইল—তথাপি পদটি নিজক্ষেত্রে অনতিক্রান্ত রহিয়া গিয়াছে।

তাহা হইলে বিশ্বপ্রকৃতি কি শ্রীমতীর পথ-বন্ধক হইবে? যত দুর্ঘোষ হোক, প্রেম অল্প বেগময় নয়; আমরা স্মরণ করিতে পারি শ্রীরাধিকার স্মৃতি আত্মঘোষণা :

কুলবতী কঠিন কপাট উদঘাটলুঁ
তাহে কি কাঠক বাধা।
নিজ মরিয়া দু' সিন্ধু-সঞ্চে পড়ারলুঁ
তাহে কি তটিনী অগাধা।

আজি আষাঢ় শু প্রথম দিবসে রাধিকার যে মনের অবস্থা, আমরা জানি আষাঢ় শু প্রথম দিবসেও তাহা পরিবর্তিত হইবে না :

অম্বরে ভয়র ভরু নব মেহ।
বাহিরে তিমির ন হেরি নিজ দেহ।
অস্তরে উয়ল শ্রামর ইন্দু।
উছলল মনহি মনোভব সিন্ধু।

কেবল বর্ষা, কেবল রাত্রি? অভিসারের জগু গ্রীষ্ম নয় কেন,—কেন দিবস বাদ থাকে? রাধিকার সাধনা কি দিনক্ষণ দেখিয়া ঘটবে, স্বেযোগ বুঝিয়া শুরু হইবে, সম্ভাবনা বিচার করিয়া যাত্রা করিবে, না, আশানের মধ্যেও সে বাসর জাগে, বিরূপের রূপ দেখিয়া আত্মহার। হয়, ভয়ঙ্কর কৃষ্ণকে অভয়ঙ্কর শ্রামরূপে বরণ করে। সে যে কি করে আমরা জানি না, বোধহয় সে লীলার অতন্দ্র দ্রষ্টা আমাদের কবি জানিলেও জানিতে পারেন :

মাংখহি তপন- তপত পথ-বালুক
আতপ দহন বিথার।
ননীক পুতলি তহু চরণকমল জহু
দিনহি কয়ল অভিসার।
হরি হরি প্রেমক গতি অনিবার।
কাহু-পরশ-রসে অবশ রসবতী
বিছুরল সবহু বিচার।

ভীতক চিত ভুজগ হেরি যো ধনী
 চমকি চমকি ঘন কাঁপ ।
 অব আধিয়ারে আপন তহু ঝাঁপুই
 কর দেই ফণীধ্বনি কাঁপ ॥

হুন্দরী হরি অভিসারক লাগি ।
 নব অহুবাগে গোরী ভেল শ্রামরী
 কুহু যামিনী ভয় ভাগি ॥
 নীল অলকাবুল অলিক হিলোলিত
 নীল তিমিরে চলু গোই ।
 নীল নলিনী জহু শ্রামরস-মাযরে
 লখই ন পারই কোই ॥

অতএব দেখিতেছি রাধিকা পথে বাহির হইয়াছিলেন এবং বিলজয়ী তাঁহার তপস্যা পথান্তে যে শ্রামমোহন হাসিতেছেন, তাঁহার চরণতলে সমাপ্ত হইয়াছিলও । উপনীত-সিদ্ধি রাধিকা নিজ পথাতিক্রমণ বর্ণনা করিতেছেন—রসোদগারের মত ইহাকে অভিসারোদগার বলিতে পারি । ভাবগৌরব, শব্দচিত্র, নাটকীয় গতিবেগ এবং উজ্জ্বল অহুভূতির আলোকে মেশামেশি হইয়া পদটি “আপন স্বরূপে আপনি ধজা” :

মাধব কি কহব দৈব-বাপাক ।
 পথ-আগমন কথা কত না কহিব হে
 যদি হয় মুখ লাথে লাথ ॥
 মন্দির তেজি যব চারি পদ আয়লু
 নিশি হেরি কম্পিত অঙ্গ ।
 তিমির-দুরন্ত পথ হেরই না পারিয়ে
 পদযুগে বেড়ল ভুজঙ্গ ॥

লক্ষ মুখেও যে পথাতিহাস বিবৃত করা সম্ভব নয়, একমুখে শ্রীরাধিকা তাহার ষতটুকু পারেন করিতেছেন ; মন্দির হইতে বাহির হওয়া প্রথমত কত কঠিন—মন্দির কঠিন কঠিন কপাট ; মন্দিরের কপাট শুধু নয়, কুলমরিষাদ এবং নিজ মরিষাদের কপাট ; যদি ঘর খুলিয়া পথে নামিলেন, বাহিরে নিশ্চিহ্ন অন্ধকার, পথ দেখাইবার কেহ নাই, কাহাকে ডাকিতেও পারেন না—সব ভাসাইয়া যে রাধারাগী

চলিতেছেন। পথ কেবল তিমির-গহন নয়, তাহা বিবাক্ত অর্পাকুল—‘পদযুগে বেড়ল
তুঙ্গ’; অন্তঃপরঃ

এক কুল-কামিনী তাহে কহ যামিনী
ঘোর গহন-অতি দূর।
আর তাহে জলধর বরিথয়ে বরবর
হাম যাওব কোন পূব ॥

অন্ধকার নিশির বিপদও যথেষ্ট হইল না, প্রবল বর্ষা নামিল। রাধার ধৈর্য্যবোধ
টুটিয়া যায়, কোথায় তাঁহার দয়িত? না, তিনি রাধিকা—চির আরাধিকা; কৃষ্ণকে
তিনি পান না, অর্জন করেন :

একে পদপঙ্কজ পক্ষে বিভূষিত
কণ্টকে জরজর ভেল।
তুয়া দরশন-আশে কছু নাহি জানলুঁ
চিরদুখ অব দূরে গেল।
তোহারি মুরলী যব শ্রবণে প্রবেশল
ছোড়লুঁ গৃহস্থ আশ।
পস্থক-দুখ তৃণহঁ করি না গণলুঁ
কহতহি গোবিন্দদাস ॥

গোবিন্দদাস ‘কহিয়াছেন’ বটে; এমন করিয়া অভিসারিকার পথ চলা—এত
অল্পে, এমন অব্যর্থভাবে—আর কেহ ফুটাইতে পারেন নাই। পথ চলাটুকু যেন
স্বচক্ষে চাহিয়া দেখিলাম। “একে পদপঙ্কজ...”—কী বেদনা—অপরিসীম যন্ত্রণা,
অথচ কিবা আনন্দ! “তোহারি মুরলী যব শ্রবণে প্রবেশল...”—কত যুগের কত
অবারণ পথগতির স্মৃতিতে মন পর্য্যাকুল হইয়া ওঠে; প্রেমের জন্ত,—সে প্রেমের
অশেষ বৈচিত্র্য,—কত-মাতৃষ ঘর ছাড়িয়াছে, ঘরকে বাহির আর বাহিরকে
ঘর করিয়া তুলিয়াছে; দয়িতের জন্ত প্রেম, দেশের জন্ত প্রেম, আদর্শের জন্ত প্রেম,
ধর্মের জন্ত প্রেম—যখনই মুরলীধ্বনি বাজিয়া ওঠে, ক্ষুধারের ত্রায় নিশিত ও দুর্গম
পথে লোকাভাব হয় না :

“তারি লাগি রাজি-অন্ধকারে

চলেছে মানবযাত্রী যুগ হতে যুগান্তর পানে
ঝড় ঝঞ্ঝা বজ্রপাতে,...

তারি লাগি

রাজপুত্র পরিয়ছে ছিন্ন কহা, বিষয়ে বিরাগী'
পথের ভিক্ষুক। মহাপ্রাণ সহিয়াছে পলেপলে
সংসারের ক্ষুদ্র উৎপীড়ন,...

তারি পদে মানী সঁপিয়াছে মান,
ধনী সঁপিয়াছে ধন, বীর সঁপিয়াছে আত্মপ্রাণ,
তাহারি উদ্দেশে কবি বিরচিয়া লক্ষ লক্ষ গান
ছড়াইছে দেশে দেশে।”

লক্ষ লক্ষ গানের একটি গান গোবিন্দদাসের ৯ একটি শ্রেষ্ঠ গান।

গোবিন্দদাসের শ্রেষ্ঠ রসপর্যায়গুলি সম্পর্কে আমাদের বক্তব্য বলিয়াছি। গোবিন্দদাসের প্রতিভার দুইটি দিক আছে—একটি তাহার চলতা; দুই, তাহার আকার-সৌষ্ঠব ও ক্লাসিক্যাল গাভীর্ষ। রাস অভিনায় প্রভৃতি পর্যায়ের মধ্যে গোবিন্দদাসের প্রতিভার চলিত্যুতা কাব্যরূপ ধারণ করিয়াছে। ঐ সকল অংশ অবশ্য দেহসৌষ্ঠবের দিক হইতে ন্যূন নহে, বাঙালিগণের ক্রটি আবিষ্কার করা দুষ্কর। তথাপি সমগ্র মিলিয়া একটা গতিবেগ অহুভব করা যায়। আর রূপাহর্য্য প্রভৃতি স্থানে গোবিন্দদাসের স্থির-গভীর রূপনির্মাণ দক্ষতা প্রাধান্য লাভ করিয়াছে। সেখানে কবি একের পর এক শব্দ গাঁথিয়া তাহার কাব্য-মন্দির গড়িয়া তুলিয়াছেন। গোবিন্দদাসের অলঙ্কার-প্রাণতা এই কবি-স্থাপত্যের পক্ষে বড়ই উপযোগী হইয়াছে। অলঙ্কারের ঠাসবুনানিতে বহু পদে শিথিলতার অবসরমাত্র নাই। তথাপি একথা স্বীকার্য্য, নিছক অলঙ্কার-কৌশলের উপরে গোবিন্দদাসের প্রতিভার ঐকান্তিক নির্ভরতা নাই। ইতিপূর্বে যে সকল পদ বা পদাংশ উদ্ধৃত করিয়াছি, সেগুলির মধ্যে অলঙ্কার-চাতুর্য্য খুব বড় আসন গ্রহণ করে নাই; অলঙ্কার যদি থাকেই, তবে তাহারা অনিবার্য্য যোগ্যতায় স্থান লইয়াছে। কতকগুলি তো প্রায় অনলঙ্কৃত (“রূপে ভরল দিঠি”; “মাধব কি কহব দৈব বিপাক”; “শরদ-চন্দ পবন মন্দ”; “মন্দির-বাহির কঠিন কপাট”)। ঐ সকল পদে “পদপঙ্ক্তের” মত সামান্ত অর্থালঙ্কার, কি অত্র্য শব্দালঙ্কার যাহা কিছু আছে, সেগুলিকে অলঙ্কার বলিয়া বোধ হয় না, রূপিতার সাধারণ ভাষাই তো ঐ। বিজ্ঞাপতির “সরসিজ বিহু সর সর বিহু সরসিজ” কিংবা “অঙ্কুর তপন-তাপে যদি জারব” ইত্যাদির মত গোবিন্দদাসের ঐ সব পদ নিছক অলঙ্কার-নির্ভর বা অলঙ্কার-প্রাণ নয়। সাধারণভাবে অলঙ্কৃত বাক্যখণ্ডের

পাঁখক আধ আধ দিটি অঞ্চলে
যব হরি পেখনু কান ।
কত শত কোটি কুহুম-শরে জরজর
রহত কি যাওঁ পরাণ ॥
সজনি জানলু বিহি মোহে বাম ।
দুহু লোচন ভরি যো হরি হেরই
তছু পায়ু মঝু পরণাম ॥
হনয়নী कहत • । কাহু ঘनशामर
मोहे बिजुरी सम लागि । .
रसवती तাক परश-रसे भासत
हामारी हृदये जल आगि ॥

অলঙ্কার অনেক ক্ষেত্রে কাব্যের সম্পদ ; বিপদও ঘটায় না তাহা নয়। বিরহ পর্যায়ে অতিরিক্ত অলঙ্কৃতি গোবিন্দদাসের কাব্যকে নষ্ট করিয়াছে। গভীরতম বেদনার বাণী সহজ সরল, তাহা প্রায়ই অর্দ্ধমুচ্ছিত গদগদভাষ। কিন্তু গোবিন্দদাস বিরহবেদনা প্রকাশ করিতে রাধিকার মুখে যখন চরম অলঙ্কৃত বাণী স্থাপন করেন, তখন তাহাতে হয়ত কবি-চাতুর্য্য প্রকাশ পায় কিন্তু তাহা কাব্য হয় না। আসলে গোবিন্দদাস বেদনার কবি নহেন, আরাধনার কবি। যেখানে আরাধনা মুখ্য, সেখানে গোবিন্দদাস অনতিক্রম্য। গোবিন্দদাস ভক্ত বৈষ্ণব কবি। রাধাভাব তাঁহার সাধনা নহে ; স্বতরাং রাধার বেদনাদর্শনও তাঁহার পক্ষে শক্ত হইয়াছে। তিনি রাধার বেদনা দর্শন করিতে পারেন নাই, কিন্তু বৃন্দাবনের বেদনা অন্তর দিয়া অনুভব করিয়াছেন - ঐ বৃন্দাবনের পথে একজনা লীলামুগ্ধ পথিক তিনি। কৃষ্ণ-বিরহিত বৃন্দাবনের চিত্র তাঁহার কাব্যে তাই অপরূপ রসরূপ ধারণ করিয়াছে। এখানে গোবিন্দদাসের কবি-স্বভাবের বিশেষ স্বযোগ—ছবির মারফৎ পটভূমিকা রচনার অবসর :

মাধব তୁহଁ সে রহলি ব্রজপুর ।

ବ୍ରହ୍ମକୁଳ ଆକୁଳ ଝୁକୁଳ କଳରବ
 କାନ୍ଥୁ କାନ୍ଥୁ କନ୍ଧି ଧାନ୍ଥୁ ॥

ষষ্ঠোমতী নন্দ অক্ষয় বৈঠত
 সাহসে ঊঠই ন পার ।
 সখাগণে দেখু বেণু সব বিছুরল
 বিছুরল যমুনা-কিনার ॥
 সারি শুক মুক কপোত না ফুকরত
 কোকিল না গঙ্গম গান ।
 কুসুম তেজি অলি ভূমিতলে লুঠই
 তরুগণ মলিন সমান ॥

নাথ-হারা বৃন্দাবনের মলিন বিপর্যস্ত মূর্তির অক্ষয়রূপ হইয়া ত্রীরাধিকা বিরাজ করিতেছেন—তাঁহার সম্বন্ধে একটি পঙক্তিই যথেষ্ট :

বিরহিনীরাই বিরহ জরে জারল ।

উপরোক্ত কৃষ্ণ-হারা বৃন্দাবনের চিত্রাঙ্কনে কবির কৃতিত্ব আছে। কিন্তু যেখানে রাধার বেদনার কথা আসে, সেখানে কবি অসমর্থ। সে বিষয়ে চণ্ডীদাস ও জ্ঞানদাস এবং ক্ষেত্রবিশেষে বিভাপতির শ্রেষ্ঠত্ব। চণ্ডীদাস ও জ্ঞানদাস রাধার বেদনাকে আত্মস্থ করিয়া আপনার ব্যথিত স্পন্দিত হৃৎপিণ্ডকে খুলিয়া ধরিয়াছেন—রাধার বেদনা কবির বেদনা হইয়া কাব্যরূপ ধারণ করিয়াছে :

বহুদিন পরে বঁধুয়া এলে ।
 দেখা না হইত পরাণ গেলে ॥
 দুখিনীর দিন দুখেতে গেল ।
 মথুরা নগরে ছিলেতো ভাল ॥ (চণ্ডীদাস)

বিভাপতিও রাধার বেদনাকে প্রকাশ করিয়াছেন, তবে রাধার বেদনা তাঁহার আত্মবেদনা হইয়া ওঠে নাই, সৃষ্টির সহিত ব্যক্তিগত হৃদয়াত্মভূতির একটা পার্থক্য রক্ষিত ছিলই। তথাপি দৃষ্টির গভীরতা, অসামান্য অশ্রুভবশালিতা, সর্বোপরি বিরল কবি-প্রতিভার সাক্ষ্য বহন করিয়া বিভাপতির কয়েকটি বিরহ পদ (“সজনি কো কহ আওব মধাঈ” ; “এ সখি হামারি দুখের নাহি ওর” ; ইত্যাদি) উৎকর্ষের সীমা নির্দেশ করিয়া দিতেছে।

গোবিন্দদাসের কবিপ্রতিভার মূল স্বরকে নানাভাবে নানাদিক হইতে ছুঁইতে চেষ্টা করিয়াছি! তাহাতে গোবিন্দদাসের প্রতিভার প্রতিষ্ঠা নূতন করিয়া সম্ভব

হোক বা কলহোক, গোবিন্দদাস-সম্পর্কে আমার মনোভাব অন্ততঃ অগোচর নাই। গোবিন্দদাস যে একজন সর্বশ্রেষ্ঠ বাঙালী কবি, তাহাও প্রমাণের প্রয়াস পাইয়াছি। সেই সঙ্গে স্বরণ করি গোবিন্দদাসকে একজন খাঁটি বাঙালী কবি হিসাবে। কাব্যে বাঙালীত্বের দ্বিবিধ প্রকাশ—এক, ঘরোয়া যুদ্ধরূপ আবেষ্টনী-স্বজনে, দুই, সঙ্গীত-সৌন্দর্য্যে। প্রথমক্ষেত্রে চণ্ডীদাস ও জ্ঞানদাস শ্রেষ্ঠ; দ্বিতীয় ক্ষেত্রে গোবিন্দদাস। প্রথমটি বেদনার ক্ষেত্রে, দ্বিতীয়টি আরাধনার। বলিয়াছি তো, গোবিন্দদাস আরাধনার কবি। দেবতার মন্দিরে বসিয়া তিনি গান গাহিতেছেন। সেখানে ঘরোয়া আবেষ্টনী স্বজনের অবকাশ নাই। সামনে শ্রীমহেশ্বর বঙ্কিম ভক্তিতে হাসিতেছেন; তাঁহার বামে আত্মসমর্পণের দেহছন্দে রাধারাণী হেলিয়া। রাধা ও কৃষ্ণ—শ্রীমতী ও শ্রীমতী—যুগ যুগ ধরিয়া কত অশ্রু আর হাসি, কত উল্লাস আর আনন্দ ঐ চারি রাঙাপায়ে আছড়াইয়া পড়িয়াছে। সেই হাসি আর অশ্রুর মিলিত ধারায় গোবিন্দদাসও আপন অনুরাগতপ্ত দেহমন মিশাইয়া দিলেন। মিশাইলেন বটে, তবু সবটুকু মিশিল না, দুইটি অতৃপ্ত নয়ন আয়ত হইয়া চিরদিনের মত ঐ মদনমোহন মুরতির পানে বিক্ষারিত হইয়া রহিল; আর কণ্ঠ জাগিয়া রহিল। রূপ আর স্বরের বণা নাচিয়া নাচিয়া উচ্ছ্বসিত হইতে লাগিল। গোবিন্দদাস জানিতেন—“আমার স্বরগুলি পায় চরণ তোমার আমি পাইনা তোমারে।” গোবিন্দদাস কবিরাজ ভক্ত কবি, বৈষ্ণব কবি।

বলরামদাস

৬

বলরামদাসের কবি-বৈশিষ্ট্য একটিমাত্র লক্ষণের মধ্যে প্রকাশ করা যায়—তিনি বাংসল্য রসের কবি। তার অর্থ নয় যে, তিনিই বাংসল্য রসের শ্রেষ্ঠ কবি। বৈষ্ণব বাংসল্য রসের পদে অবিসংবাদিত শ্রেষ্ঠত্ব কাহারো নাই। বাংসল্যের পদবিচারে বলরামদাসের ভূমিকা আমাদের মনোযোগ বিশেষভাবে আকর্ষণ করে, এই পর্য্যন্ত।

তবে কি বলরামদাস নিতান্ত মধ্যম শ্রেণীর কবি? সেরূপ হইলে তিনি আলোচনার অন্তর্ভুক্ত হইতেন না। বলরামদাসের জন্ম প্রথম শ্রেণীর দাবী যেমন বাড়াবাড়ি ঠেকিবে, তেমনি একেবারে মধ্যম শ্রেণীর বলিলে উন্নাসিকতার অপবাদ বর্ত্তিবে। উভয়ের মধ্যবর্ত্তী অংশে বলরামের স্থান। কাব্যের কি উচ্চ-মধ্যবিত্ত কোন শ্রেণী নাই?

বলরামের পদগুলি পর্যালোচনা করিলে দেখিব, পদপর্য্যায় সম্বন্ধে কবি প্রায় সমদৃষ্টি—সকল বিষয়েই কিছু না কিছু পদ লিখিয়াছেন এবং মধ্যে মধ্যে ঈষৎ ছন্দ সঙ্কেত (যাহা পদলুপ্তির জন্ম ঘটতে পারে) পদগুলির মধ্যে ঘটনাগত ধারাবাহিকতা আছে। আরো দেখি, সকল শ্রেণীর পদেই একটা মোটামুটি কবিত্ব বজায় আছে, অথচ কবি অধিকাংশ ক্ষেত্রে সমুচ্চ মার্গে উঠিতে পারেন নাই। মনে হয়, অতি উচ্চ-স্তরের কবি নন বলিয়া কাব্যসৃষ্টির জন্ম তাঁহাকে স্ফূর্ত্ত কবি-প্রেরণার মুহূর্ত্তের জন্ম অপেক্ষা করিতে হইত না। এবং কবি সম্ভবতঃ নিজের শক্তি সম্বন্ধে সচেতন হইয়া প্রধান প্রধান রসপর্য্যয়ে অধিক পদ লিখিবার বাসনা দমন করিয়াছেন। কবির আত্মসচেতনতা আমরা ক্রমে লক্ষ্য করিব।

এই সচেতনতার একটি প্রমাণ অন্ততঃ এখনি দেওয়া চলে। কবি হৃদয়াবেগের স্বর্ণমুহূর্ত্ত-সৃষ্টি অপেক্ষা বর্ণনার দিবালোককেই অধিক বিশ্বাস করিয়াছেন। এই বর্ণনারস বলরামের কাব্যে সর্বত্র বর্ত্তমান। সংযত গম্ভীর ও অহুচ্ছসিত ভঙ্গিতে তিনি বর্ণনা করিয়া যান, সর্বক্ষেত্রে সে বর্ণনা চিত্র অথবা ভাবরসে পৌছয় এমন নয়, তথাপি তাহা বহুক্ষেত্রে ব্যর্থ আলঙ্কারিক চতুরালি অপেক্ষা পাঠকচিত্তকে অধিক আকর্ষণ করে। বলরাম স্বীয় শক্তির সীমাবদ্ধতা জানিতেন ও মানিতেন।

যে লক্ষণগুলির কথা বলিলাম—কবির বাংসল্য-প্রীতি, আত্মসচেতনতা, বর্ণনা ক্ষমতা—এগুলির একটু বিস্তৃত আলোচনা করিলে বলরামের কাব্যের সকল প্রকার

বৈশিষ্ট্য উদ্ঘাটিত হইবে বলিয়া আমার বিশ্বাস। বলরাম অধিকন্তু রসোদগারের বিশিষ্ট কবি। কবির রসোদগার-ক্ষমতার কারণ উপরোক্ত লক্ষণগুলির মধ্যেই বলাইতে পারিব মনে করি।

বাংসল্যরস বৈষ্ণব পঞ্চ রসের অন্তর্গত অর্থাৎ সাধ্য বস্তু। সর্বোত্তম মধুর-রসের নিম্নেই বাংসল্যের স্থান। বৈষ্ণব কাব্য মুখ্যত মধুররসের কাব্য। সেই মধুররসের পরিমণ্ডল সৃষ্টি করিয়াছে বাংদল্য ও সখ্যরতি। শান্ত ও দান্তকে কাব্য হইতে বৈষ্ণব কবির। বাদ দিয়াছেন। এমনকি সখ্য বা বাংসল্যরসও বৈষ্ণব সাহিত্যে যথোপযুক্ত মর্যাদায় প্রতিষ্ঠিত নয়। বৃন্দাবনচন্দ্র শ্রীকৃষ্ণ সাধকের নিকট ননীচোরা বালগোপাল রূপে আবৃত্ত হইতে পারেন, কবিদের নিকট কিন্তু তাঁহার চিরকিশোর চিরযৌবন মূর্তি—রসিকশেখর রাধারমণ তিনি। বিষয়-বৈচিত্র্যের জগ্ৰহই যেন বাংসল্য বা সখ্যরসের (সখ্য আবার বাংসল্যের সহিত মিশিয়া আছে) অবলম্বন।

সাধনা-ব্যাপারে গোপালভাব যথেষ্ট আদৃত হইয়াও কাব্যের দিকে অবহেলিত হইল কেন, সে প্রশ্ন জাগিবে। অবশ্য মধুররসই চিরকাল সকল সাহিত্যের প্রাণরসস্বরূপ। কিন্তু আপেক্ষিক বিচারেও বৈষ্ণব বাংসল্যের পদ সেরূপ উৎকর্ষ লাভ করে নাই। তাহার একটি কারণ মনে হয়, বৈষ্ণব বাংসল্যরসে মাতৃহৃদয়ের সত্যকার বেদনাবোধের স্থান সঙ্কুচিত। “স্নেহ পাপ আশঙ্কা করে”, মাতা সকল সময় সন্তানের অন্তঃ-ভীতিতে অস্থির, অতএব কৃষ্ণের জগ্ৰ যশোদার যন্ত্রণা। পুত্রকে গোষ্ঠে ঘাইতে দিতে কিছুতে প্রাণ চায় না; কত কাতরতা, কত উদ্বেগ। পুত্র দোষ করিয়াছে, শাস্তি দিতে হয়, অথচ কাঁদে কে বেশী—পুত্র না মাতা, বলা শক্ত। মাঝে মাঝে মনে হয়, এ বেদনা অতিরঞ্জিত, গোষ্ঠ-গমনে এহেন আশঙ্কা গোপপরিবারে অস্বাভাবিক, কিন্তু অনতি-বিলম্বে পাঠকচিত্ত সজ্জিত খুঁজিয়া পায়—প্রতীক বাংসল্যে অতিরঞ্জন থাকিবেই; অথবা উহা অতিরঞ্জনও নয়, মানবী মাতার বুকেই যেখানে পুত্রের জগ্ৰ পৃথিবীর যত ভীতি জমাট বাঁধিয়া থাকে, সেখানে নিত্য বৃন্দাবনে নিত্য মাতার শিহরণ নিশ্চয় সীমা মানিবে না। তবু এই বেদনাবোধ মাতৃহৃদয়কে যে পরিমাণে চিনাইয়া দেয়, ঠিক সেই পরিমাণে কি পাঠককে বিচলিত করে? মাতার ক্ষেত্রে যে বেদনা সত্য, পাঠককে সেই বেদনার অংশ দিতে হইলে ঐ বেদনাবোধের কারণটিকে আরও বাস্তব করিয়া তুলিতে হইবে, পুত্রের যথার্থ বিপদের হেতু জানাইতে হইবে। সত্যকার বিপদ শিশু কৃষ্ণের জীবনে বহুবার ঘটয়াছিল এবং সেই বিপদের বর্ণনা যে-কাব্যে রহিয়াছে, সেখানে মাতার ব্যথিত শ্যাকুল মূর্তিটি আমাদের অন্তরে কাটিয়া বসে। আমি শ্রীমদ্ভাগবতের কথা বলিতেছি। বাংলার বৈষ্ণব কবিদের পক্ষে কিন্তু ঐ সকল ঘটনার

পূর্ণ স্বেযোগ গ্রহণ করা শর্ত। এখানে কেবল কৃষ্ণের বিপদ নয়, সম্পদও আছে—
অলৌকিক ঐশ্বরিক শক্তির ঐশ্বৰ্য্যে কৃষ্ণ বিপদ অতিক্রম করিয়াছেন। বারবার কৃষ্ণের
সত্য পরিচয় বুঝিয়াও যশোদাকে ভুলিতে হইয়াছে, মায়া তাকে ঢাকিয়া মর্ষ্য
দিয়াছে। নচেৎ কাব্য হয় না। কৃষ্ণের সেই ঐশ্বর্য-প্রকাশ বাংলার বৈষ্ণব কবির
নিকট গ্রাহ্য নয়। স্তব্ধাং বিপদ কাহিনীগুলিরও ব্যবহার চলে না। বৈষ্ণব কবির
একটি যন্ত্রণার কথাই কেবল ঘুরাইয়া ফিরাইয়া বলিতে হইয়াছে—কৃষ্ণ যে গোষ্ঠে যায়,
যশোদা যে কাঁদে।

এতৎসত্ত্বেও একটি ঘটনাকে ঐশ্বর্য্যবিমুখ বাঙালী বৈষ্ণব কবিগণ অস্বীকার করিতে
পারেন নাই—কালীয়দমনের ঘটনা। এ ক্ষেত্রে যশোদার নিষ্ঠুর মর্ষ্যপীড়ন, বাধভাড়া
ব্যাকুলতা চিত্রণের পূর্ণ স্বেযোগ। কৃষ্ণের অগ্নি-পিদগুলি অতিক্রান্তে আসিয়াছে এবং
বিপদ কাটিবার পরেই সব শুনিয়া স্নেহোচ্ছল জননী নিবিড় মমতায় পুত্রের মুখচূষন
করিয়াছেন। কালীয়দমনের ক্ষেত্রে সংবাদ পূর্বেই পাওয়া গেল, কৃষ্ণ বিষদহে
নিমজ্জিত, দর্শন মিলিতেছে না। তাই যশোদা বিশ্ব ভুলিয়া ছুটিয়া আসেন, কূলে
দাঁড়াইয়া বুক চাপড়াইয়া বারে বারে বাঁপ নিতে যান—পুত্রহারা জননীর হৃদয়চ্ছিন্ন
মৃতিটি আঁকিবার বড় স্বেযোগ। এই স্বেযোগ যে, পদকারগণ প্রাণভরিয়া গ্রহণ
করিয়াছেন, মনে হয় না। কেমন ঘেন দ্বিধাগ্রস্তভাব। বালালীলার ক্ষেত্রে ঐশ্বর্য্য-
ভাব সম্পূর্ণ বর্জন করিতে না পারিলেও লীলাবিষয়ের নির্বাচন-পদ্ধতিতে বর্জনের
একটা রীতিমত চেষ্টা দেখা যায়। শ্রীকৃষ্ণের নৃত্য, মুক্তিকাভক্ষণ, ননীচুরি, চাঁদধরা
এবং গোচারণ—এই সকল নিরীহ বিষয়েই অধিক মনোযোগ।—

নাচত মোহন নন্দভুলাল।

রঞ্জিম চরণে

মঞ্জীর ঘন বাজত

কিঙ্কিণী তাহি রসাল ॥

*

*

*

মায়ে দেখি মাটি ফেলে

না খাই না খাই বলে

আধ আধ বদন টুলায়।

*

*

*

চাঁদ মোর চাঁদের লাগিয়া কান্দে।

—ইহারই রসে বৈষ্ণব কবি বিভোর। পসারিণী ফল বিক্রয় করিতে আসিয়াছে;
পৌরাণিক কাহিনীতে পাই, শ্রীকৃষ্ণকে দেখিয়া মুগ্ধ হইয়া সে ফলগুলি তাহার হাতে

তুলিয়া দিল। আরো পাই, পরিবর্তে কাহ্ন মুষ্টিভরা তুলু আন্নিয়াছে ; বালহস্তের গলিত মুষ্টি হইতে ছিন্ন অঞ্চলে স্থলিত প্রত্যেকটি তুলুকণা স্বর্ণকণায় রূপান্তরিত। বৈষ্ণব কবি কাহিনীর ঐ শেষাংশ পর্য্যন্ত অগ্রসর হওয়ার প্রয়োজন মনে নাই—তাহার পূর্বেই পসারিণী শিশুমুখের জ্যোৎস্নায় আত্মহারা—উহাই যথেষ্ট। তবে মৃত্তিকাভক্ষণই হউক, আর ননীচুরিই হউক, কৃষ্ণের ঈশ্বরত্বের প্রতীতি মনে না থাকিলে যে, এই সকল লীলার পূর্ণরস আন্বাদন সম্ভব নয়—অন্ততঃ সাধারণ পাঠকের পক্ষে—তাহাও সত্য। বাংলার বৈষ্ণব কবিগণও এমনকি ঐ ঐশ্বর্যপ্রচ্ছায় পুরোপুরি এড়াইতে পারেন নাই।

তাই বৈষ্ণব বাৎসল্যরস নিছক লীলারস; পূর্ণ আনন্দের রসপান। ইহাতে বিচ্ছেদ নাই, যন্ত্রণা নাই। গোষ্ঠগমনাদিতে যেটুকু যাতনা, তাহা কেবল মাতৃহৃদয়ের এবং মায়ের প্রাণ ঐরূপ বোধ করিবেই। কাব্যের তরফে ইহাতে গভীরতার অভাব ঘটে। ষথার্থ মর্ম্মপীড়নের অবকাশ বাল্যলীলার মাত্র দুইক্ষেত্রে। একটির উল্লেখ করিয়াছি—কালীঘদমন। অত্রটি, যখন কৃষ্ণ বৃন্দাবনের স্বপ্ন ভাঙিয়া মথুরায় প্রস্থান করিলেন, সেই মাথুর। সেখানেও যশোদা অহুপস্থিত। বাৎসল্য তো বৈষ্ণব মতে চরম রস নয়, তাই তখন কৃষ্ণের রথচক্র ব্রজগোপীদের বুকের উপর দিয়া চলিয়া যায়, রাধিকার রক্তসিক্ত হৃদয় সেই পথে লুটাইয়া লুটাইয়া চলে। তখন মধুর মধুর প্রেমরস। রবীন্দ্রনাথ যেমন একস্থলে অন্ততঃ বলিয়াছেন—কম্পমান দীপশিখাটি কেমন :

“সেই আলোটি নিমেষহত
প্রিয়ার ব্যাকুল চাওয়ার মতো,
সেই আলোটি মায়ের প্রাণের
ভয়ের মতো দোলে।”

বৈষ্ণব কবির পক্ষে ঐ প্রকার প্রিয়ার ব্যাকুল চাওয়া ও মায়ের প্রাণের ভয়কে এক করিয়া দেখা কোন ক্ষেত্রেই সম্ভব হয় নাই।

(শাক্তগীতিকার সঙ্গে বৈষ্ণব বাৎসল্যপদের তুলনা করিতে ইচ্ছা হয়। সমগ্রতঃ শাক্তগীতিকা কাব্য্যাংশে বৈষ্ণবপদাবলীর সহিত কোনমতে তুলনীয় নয়। শাক্তগীতিকা স্বরূপতঃ সাধনসঙ্গীত। বৈষ্ণব পদাবলী সাধনসঙ্গীত হইয়াও মানবজীবনগীতি। কেবল এই একটি ক্ষেত্রে—এই বাৎসল্যরসের ব্যাপারে—শাক্তগীতিকাকে আমরা উচ্চ স্থাপন করিতে পারি। তাহার কারণ অবশ্য এই যে, মাতৃভাব এবং অঙ্গাদি বাৎসল্য-ভাব শাক্তপদের মুখ্য আশ্রয়, কিন্তু বৈষ্ণবপদের নয়। শাক্তগীতে কবি হয় পিতা, নয় পুত্র, গোঁরী হয় কন্যা, নয় মাতা। যখন আগমনী বিজয়ার গান হয়, তখন গিরিরাজ ও

মেনকার মধ্যে স্বয়ং কবি-বাসা বাঁধেন ; যখন তাহা মাতৃভক্তের সঙ্গীত হয়, তখন বিশ্বমাতাকে ঘরের মা করিয়া কবি-মান-অভিমান, আদর-আবদারে বসেন। এই অমৃতভূতির নিবিড়তা বৈষ্ণব পদে নাই। আবার বৈষ্ণব বাৎসল্যরস যেখানে ব্যক্তি-জীবনের সাধনার ধন, সেখানে সমগ্র জাতীয় জীবনের আশা-আকাঙ্ক্ষা শাক্তগীতিকায় প্রস্ফুটিত। শরতে মা যখন আসেন, তখন সব বাঙালীর ঘরে স্বর্ণদীপ জলে, যখন বিদায় নেন, সে দীপ নিভিয়া আঁধার নামে ঘরে ঘরে। তাই কবিরা যদি অশক্তও হন, আগমনী-বিজয়ার গানে বাঙালীর উদ্‌গ্রীব প্রাণ উচ্ছ্বাসের তরঙ্গ তুলিয়া কবির পাশে হাজির হয়। আরো আছে। শক্তি-সঙ্গীতের মর্মজালার বাস্তবতা। ঐ মেনকা আর কেউ নন, বাঙালী মাতা, ঐ গিরিরাজ, বাঙালী পিতা—বৃদ্ধ উদাসীন নেশাসক্ত আশান্ধারীর হস্তে মাতা নিজ অঙ্ক, পিতা নিজ বক্ষ হইতে ছিন্ন করিয়া অষ্টম বর্ষীয়া কন্যাটিকে গৌরীদান করিয়াছে, সে কন্যা-জামাতার উপর তবু চাপাইয়া কতখানি তুলিয়া থাকিতে পারি,—শরৎকাল হইতে না হইতে মাতৃহৃদয়ের আনন্দাশ্রু আগমনীর আলোয় টলটল করে, তিনদিন যাইতে না যাইতে বিজয়ার বৈতরণী কূলে ঝরিয়া পড়ে,—এ কি বিশ্বতত্ত্ব, না গৃহতত্ত্ব !

শক্তিসঙ্গীতের দুঃখবোধ তাই মাতৃপ্রাণের স্নেহস্রষ্ট আতুরতা মাত্র নহে। উহা নাড়ী-ছেঁড়া ধনের জন্ত নাড়ী-ছেঁড়া গান। বৈষ্ণব বাৎসল্য রসের পদে এই গভীরতার সন্ধান নাই। বাঙালী মেয়ে তো গোষ্ঠে যায় না, সে স্বামীর সঙ্গে আশানে যায়।

সীমাবদ্ধতা স্বীকার করিয়া আমরা যখন বৈষ্ণব বাৎসল্যপদের আলোচনায় নামিব, দেখিব, উহারই ভিতর কবিগণ ষথার্থ কাব্যসৌন্দর্য্য স্রষ্টি করিতে সমর্থ হইয়াছেন। আলোচনার প্রারম্ভে এই বাৎসল্য-ব্যাপারে আমরা বলরামদাসের জন্ত একটি বিশেষ স্থান দাবী করিয়াছি। রায়শেখর, বংশীবদনাদি কয়েকজন উত্তম পদ রচনা করিলেও বলরামকেই আমরা এই পর্যায়ে সর্বাধিক মানসিক-প্রস্তুতিযুক্ত কবি বিবেচনা করি। বলরামের কাব্যের মধ্যে সর্বত্র একটা বয়স্ক মন খুঁজিয়া পাওয়া যায়। প্রৌঢ় কবিমন বলিতে যে উচ্চশ্রেণীর মানসিকতা বোঝায়, তাহা নয়, বলরাম বয়োহ্রলভ প্রবীণতা অনেকাংশে কবিধর্মের উপর চাপাইয়াছেন। এই মানসিক প্রৌঢ়ত্ব বাৎসল্য-রসের পদস্রষ্টির পক্ষে বড়ই উপযোগী। শ্রীকৃষ্ণের বাল্যলীলাকে কেবল যশোদার স্নেহে দর্শন নয়,—ঐ স্নেহকে যথোপযুক্তভাবে দেখাইবার স্নেহদৃষ্টি কবিরও থাকা চাই। বলরামের তাহা আছে। এবং শুধু যশোদা বা কবি নন। বলরামের কাব্যে শ্রীদাম স্ত্রীদাম পর্য্যন্ত নিজ নিজ সখ্যতাব ঘুচাইয়া স্নেহ-বাৎসল্যের চক্ষে কৃষ্ণকে দেখিয়াছে। স্নেহের এই ত্রিবেণী-মধ্যে কৃষ্ণকে স্থাপন করিয়া তবে কবির শাস্তি।

বলরামের বাৎসল্যপদে কাহিনীর একটা ক্রমপরম্পরা খুঁজিয়া পাই, একথা পূর্বে বলিয়াছি। কৃষ্ণের গোষ্ঠগমনের উদ্যোগ, যাত্রার পূর্বে যশোদার বিবিধ সাবধানবাণী, শ্রীদামের সাস্থনা ও যশোদার সাস্থনাহীন আশঙ্কা, মানত, দেবতার নিকট ব্যাকুল প্রার্থনা, ও ভীতি-প্রাবল্যে মুচ্ছা, এবং মুচ্ছাভঙ্গে কৃষ্ণের শুভাশুভের ভারগ্রহণের জ্ঞাত বলরামের প্রতি অমুনয়,—এই সকল ক্রমিক চিত্র মিলিতেছে। এগুলি পূর্ব-গোষ্ঠভুক্ত। অতঃপর গোষ্ঠগত ক্রীড়াক্রান্ত রাখালদের প্রত্যাবর্তনের উদ্যোগ, মাতাকে স্মরণ ও তাঁহার উৎকর্ষার কথা ভাবিয়া উদ্বেগ, রাখাল-দলসহ প্রত্যাবর্তন, কৃষ্ণকে পাইয়া শঙ্কাপীড়িত যশোদার স্বস্তিলাভ, গোষ্ঠলীলা সম্বন্ধে বলরামের স্নেহস্বিকৃতি এবং সকলকে একত্র লইয়া যশোদার উল্লাস ও ভোজনের ব্যবস্থা—এই সবগুলি বলরামদাস-অঙ্কিত উত্তরগোষ্ঠের চিত্র। ইহা মধ্যে বাৎসল্যের দুইটি রূপ পাই—প্রত্যক্ষ ও পরোক্ষ। যশোদা যখন কৃষ্ণের জ্ঞাত উৎকর্ষিত, তখন প্রত্যক্ষ রূপ, আর যখন যশোদার উৎকর্ষা কৃষ্ণে সঞ্চারিত হইয়া গোষ্ঠের আনন্দকোলাহলের মধ্যে কৃষ্ণকে চঞ্চল ও উন্নয়ন করিয়া তোলে, তখন পরোক্ষ। পরোক্ষ হইলেও বাৎসল্যের এই রূপ যেন আরো মোহন,—সদা-উদাসীন ক্রীড়ামুগ্ধ গোপালকে যে প্রেম এমন করিয়া বাঁধে, না জানি সে কেমন। এইবার কিছু পদ বা পদাংশ উদ্ধৃত করিতে পারি।

বিপর্যাস্ত মাতাকে সাস্থনা দিতে স্নিগ্ধকণ্ঠে শ্রীদাম বলিতেছে :

নন্দরানী যাও গো ভবনে ।

তোমার গোপাল এনে দিব বেলি অবসানে ॥

লৈয়া যাইছি তোমার গোপাল রাখি বসাইয়া ।

আমরা ফিরাব দেখু চাঁদমুখ চাইয়া ॥

লৈয়া যাইতে তোমার গোপাল পাই বড় স্নেহ ।

বেগুতে ফিরাব দেখু এ বড় কৌতুক ॥

যশোদা তাঁহার প্রাণনিধি সঁপিয়া দিয়া বড় কাতর কণ্ঠে বলেন :

হের আয়রে বলরাম হাত দে মোর মাথে ।

ধড় রাখিয়া প্রাণ দিলাম তোমার হাতে ॥

রাখালদের প্রত্যাবর্তনের একটি বর্ণনা—চমৎকার চিত্র :

চান্দ মুখে বেণু দিয়া

সব দেখু নাম লৈয়া

ডাকিতে লাগিল উচ্চস্বরে ।

টানে নয়ানে নয়ানে গো'—পর্যন্ত নয়। পরিশেষে বাৎসল্যস্রসের আর একটি পদের উল্লেখ করিব, তৎপূর্বে অত্র কবির একটি পদ উদ্ধৃত করিতে চাই। বলরামের 'হুইই যাদবেস্ত্র মাতা' যশোদার আকৃতি স্পষ্টাক্ষরে প্রকাশ করিয়াছেন :

আমার শপতি লাগে না ধাইও দেখু আরে
পরানের পরাণ নীলমণি ।

নিকটে রাখিহ দেখু পুরিহ মোহন বেণু
ঘরে বসে আমি যেন শুনি ॥

বলাই ধাইবে আগে আর শিশু বামভাগে
ক্রীদাম সুদাম তার পাছে ।

তুমি তার মস্তক ধাইও সঙ্গছাড়া না হইও
মাঠে বড় রিপুভয় আছে ॥

ক্ষুধা পাইলে চেয়ে খাইও পথপানে চাইয়া যাইও
অতিশয় তৃণাকুর পথে ।

কারু বোলে বড় দেখু ফিরাইতে না যাইও কারু
হাত ভুলি দেহ মোর মাথে ॥ ইত্যাদি

এখানে যশোদার বড় আত্মবিস্মৃত অবস্থা; পুত্রের শুভাশুভের চিন্তায় যেন শালীনতা পর্য্যন্ত বিসর্জন দিয়াছেন—সকলের মাঝে ক্রোধের অবশ্যই থাকা চাই, অথচ সকলেই শিশু। পুত্রের জন্ত মাতার এই স্বার্থপরতা স্নেহপূর্ণিয়ার কলঙ্কের মত—বড় মনোহর, বড় মধুর। বলরামের একটি পদে যশোদার আত্মসচেতনতার পুনঃ-প্রত্যাবর্তন লক্ষ্য করি। রাণী দুইপুত্রকে আবার ফিরিয়া পাইয়াছেন :

রাণী ভালে আনন্দসায়রে ।

বামে বসাইয়া শ্রাম দক্ষিণে শ্রীবলরাম
চুষ দেই মুখ-সুধাকরে ॥

ক্ষীর ননী ছানা সরে আনিয়া সে থরে থরে
আগে দেই ব্লাইর বদনে ।

পাছে কাহানির মুখে দেয় রাণী মহাসুখে
নিরথয়ে চাঁদ-মুখপানে ॥

বলরামের মুখে অগ্রে অর্পণ কেন? ক্রোধের প্রতি স্নেহের অতিশয়া দৃষ্টিকটু বলিয়া অথবা ক্রোধের বদনে শেষে ভোজ্য দিয়া শেষের আনন্দটুকু নিবিড়ভাবে পাইতে? দুই-ই হয়।

বলরামকৃত বাৎসল্যের যে সকল পদের উল্লেখ ও উদ্ধার করিয়াছি, সেগুলির সাহায্যে তাঁহাকে উক্ত রসের শ্রেষ্ঠ কবি বলিলে অতিরঞ্জন নয়, বোধ বস্তিবে এবং আমার সেক্ষেপ কোন বাসনা নাই। বাৎসল্য বলরামের কাব্যের অঙ্গী রস, ইহা আমার বক্তব্য। সে কারণে প্রথমেই তাঁহার বাৎসল্যরসের আলোচনা করিলাম। এইবার দেখিব এই রসটি অল্প সকল পর্ধ্যায়ে কিরূপ অল্পসূত। কথাটি বিচিত্র ঠেকিবে। অল্প পর্ধ্যায় অর্থে মধুররসের নানা পর্ধ্যায়। মধুররসে আবার বাৎসল্যের মিশাল কি? কিন্তু ঠিক তাই। বলরামের প্রেমকাব্যও অনেকাংশে বাৎসল্যরসের কাব্য। বিষয়টি তলাইয়া দেখা যাক।

বলরাম রসোদগারের কবি বলিয়া খ্যাত। রসোদগার প্রিয়-গৌরবিনী নারীর গর্ব-গৌরবোক্তি। নায়িকা এখানে আর সরলা মুখা নন, জীবনপাত্র হইতে অন্যতরস মিলিয়াছে,—পূর্ণসৌভাগ্যের নিশান্তে ‘এমনটি কাহারো হয় নাই’ শ্রেণীর গূঢ় অভিমান জাগিয়াছে। মিলনে বলরাম শ্রেষ্ঠ লাভ করিতে পারেন নাই, কারণ মিলন-বর্ণনার কলাকৌশল অথবা মনোবৃত্তি তাঁহার ছিল না। ইন্দ্রিয়ের উত্তেজনাকে আলাঙ্কারিক বাণীবয়নে চারুত্ব দান করা তাঁহার পক্ষে সম্ভবপর নহে। আবার ভাব-সম্মিলনের প্রাণোন্মাদে পৌছানও তাঁহার সাধ্যাতীত। উভয়ের মাঝখানে রসোদগার। ইহা মিলনের মদনমথিত গ্রহর নহে, কিংবা ভাবসম্মিলনের কল্পনার দিব্য আবেশও নয়—রসোদগারে মিলনের পরবর্তী চিত্র; নিবিড় স্বথভোগের অল্পসারী আলমুখমধুর স্বথস্বতির বর্ণনা। বর্ণনাভঙ্গিতেও দ্রুতি নাই, স্বথস্বত্ব সুর। প্রৌঢ় রসিকমন ভিন্ন এই অবস্থাকে চিত্রিত করা সম্ভব নয়। প্রৌঢ়ত্বের স্নেহের প্রাণে তৃপ্তি-অলস মূর্ত্তিকে দর্শন করিবার রসিকতা এ ক্ষেত্রে প্রয়োজন। সে রসিকতা এবং স্নিগ্ধচক্ষে নরনারীর প্রণয়লীলা দেখিবার মানসিক ঔদার্য বলরামের ছিল। তাঁহার বাৎসল্যের স্নেহদৃষ্টিই রসোদগারে প্রসূত। এক কোটিতে বাৎসল্য, অল্প কোটিতে রসোদগার। বাৎসল্য মধুরের পূর্বরস, রসোদগার প্রণয়ের প্রৌঢ়তম অবস্থা—শ্রেষ্ঠতম অবস্থা নয়। দুই প্রোক্তের লীলারস উপভোগ করিয়াছেন প্রবীণ রসিক বলরামদাস।

তথাপি রসোদগারে সন্নিবেশিত পদগুলি বিচার করিলে এ ক্ষেত্রে বলরামদাসকেই একমাত্র শ্রেষ্ঠ কবি বলিতে পারিব মনে হয় না। জ্ঞানদাসের কতক উৎকৃষ্ট পদ এ পর্ধ্যায়ে আছে। রসোদগারের কবিরূপে বলরামদাস ও জ্ঞানদাসের (কিয়দংশে চণ্ডীদাসেরও) তুলনার কথা মনে আসে। জ্ঞানদাস মিলনস্বথের কথা বলিতে গিয়া বিশুদ্ধ ভাবলোকে প্রস্থান করিয়াছেন, সেখানে ‘অনাদিকালের হৃদয়-উৎসের’ রাগিণী ধ্বনিত, স্নান অতীন্দ্রিয় অহভূতির নিবিড়তায় সেখানে দেহদুর্গ ভাঙিয়া চিরন্তন

একলোকের কূলে একবার উপস্থিত হই, আবার তথা হইতে বিচ্যুত হইয়া হৃদয়ভেদের
হৃদয়ভেদী হাহাকারতুলি। সেখানের যে প্রেম, সে কি শুধুই যৌবনস্বপ্ন?—

শিশুকাল হৈতে বন্ধুর সহিতে

পরানে পরানে নেহা।

শিশুকাল হইতে সচেতন প্রেম তো জাগে না—তবে কি শিশু গতজীবনের—
বহু গতজীবনের স্মৃতি ও সংস্কার বহন করিয়া আনিয়াছে! নহিলে বিধাতার বিরুদ্ধে
অভিমান কেন?—

না জানি কি লাগি কো বিহি গড়ল

ভিন্ ভিন্ করি দেহা ॥

তাই জ্ঞানদাসের রাধা বলে যে, কৃষ্ণ দেহে দেহে নয়, “নয়ানে নয়ানে মোরে
পিয়ে”; বলে সে :

হিয়ার উপর হৈতে শেজে না ছোঁয়ায়।

বুকে বুকে মুখে মুখে রজনী গোঁড়ায় ॥

নিদের আলসে যদি পাশ মোড়া দিয়ে।

কি ভেল কি ভেল বলি চমকি উঠিয়ে ॥

প্রেমের এই ‘লোকলোকান্তরব্যাপ্ত’ পটভূমিকা জানিলে একথা অত্যাশ্চর্য মনে
হয় না :

হিয়ায় হিয়ায় লাগিবে লাগিয়া

চন্দন না মাখে অঙ্গে।

নিজ প্রাণের অর্দ্ধাংশটুকু হারাওয়া উন্নত অন্ধের মত সে কোন্ অপরিজ্ঞাত
অতীতে ছুটিয়া বাহির হইয়াছি—দিন যায়, মাস যায়, বর্ষ যায়, যায় যুগ, যায় কল্প,
তবু পাই না—আজ যদি সত্যি পাইলাম, তবে চন্দন মাখিব, বসন রাখিব! প্রাণের
কি সজ্জা আছে, আত্মার কি বসন থাকে? বিরহাস্তে মিলনের একাকার মোহানায়
ব্যথিত আশঙ্কা শুধু বিচ্ছেদের তরঙ্গ তোলে, শুধু করুণ উৎকণ্ঠা ছলিয়া ছলিয়া
ওঠে, ঐ—

কি ভেল কি ভেল বলি চমকি উঠিয়ে।

জ্ঞানদাসের রসগুরু চণ্ডীদাসেরও এক কথা :

এমন পিরীতি কভু দেখি নাই শুনি।

নিমিখে মানয়ে যুগ কোরে দূর মানি ॥

হার নহৌ পিয়া গলায় পরয়ে
 * চন্দন নহৌ মাথে গায় ।
 অনেক যতনে রতন পাইয়া
 থুইতে সোয়াস্ত না পায় ॥
 কর্পূর তাম্বল আপনি সাজিয়া
 মোর মুখ ভরি দেখে ।
 হাসিয়া হাসিয়া চিবুক ধরিয়া
 মুখে মুখ দেই লেয়ে ॥
 সাজাঞা কাচাঞা বসন পরাঞা
 আবেষ্টে লইতে কোরে ।
 দীপ লৈয়া হাতে মুখ নিরখিতে
 তিতিল নয়ান লোরে ॥
 চরণে ধরিয়া যাবক রচই
 আউল্যায়া বান্ধয়ে কেশ ।
 বলরাম চিতে ভাবিতে ভাবিতে
 পীজর হৈল শেষ ॥

*

*

*

কত নানা বেশ করি পরায় পাটের সাড়ী
 সাথে সাথে সমুখে হাটায় ।
 দেখিয়া হাটন মোর হইয়া আনন্দে ভোর
 দুই বাহু পসারিয়া ধায় ॥
 সহি তেঞি সে হিয়ার মাঝে জাগে ।
 কত কুলবতী যারে হেরিয়া ঝুরিয়া মরে
 সেই ষোড় হাথে মোর আগে ॥
 অতি রসে গরগরি কাঁপে পছ ধরধরি
 আরতি করিয়া কোলে করে ।
 ঘন ঘন চুষনে নিবিড় আলিঙ্গনে
 ডুবাইল রসের সাগরে ॥
 চন্দন মাখায় গায় দেয় বসনের বায়
 নিজ করে তাম্বল খাওয়ায় ।

বিনি ঝাজে কত পুছে কতনা মুখানি মোছে
 হেন বাসেদেখিতে হারায় ॥
 তুমি মোর ধনপ্রাণ তোমা বিনে নাহি আন
 "কহে পিয়া গদগদ" ভাষে ।
 যতেক পিরীতি তার জগতে কি আছে আর
 কি বলিবে বলরামদাসে ॥

*

*

*

রাতি দিনে চোখে চোখে বসিয়া সদাই দেখে
 ঘন ঘন মুখানি ঝাজে ।
 উলটি পালটি চায় সোয়াস্ত নাহিক পায়
 কত বা আরতি হিয়ার মাঝে ॥...
 আলিয়া উজ্জল বাতি জাগিয়া পোহায় রাতি
 নির্দ নাহি যায় পিয়া ঘুমে ।
 ঘন ঘন করে কোলে খেনে করে উত্তরোলে
 তিলে শতবার মুখ চুমে ॥
 খেনে বুকে খেনে পিঠে খেনে রাখে দিঠে দিঠে
 হিয়া হুইতে শেজে না ছোয়ায় ।
 দরিত্রের ধন হেন রাখিতে না পারে স্থান
 অঙ্গে অঙ্গে সদাই ফিরায় ॥

*

*

*

*

নয়ানে নয়ানে থাকে রাতিদিনে
 দেখিতে দেখিতে ধান্দে ।
 চিবুক ধরিয়া মুখানি তুলিয়া
 দেখিয়া দেখিয়া কান্দে ॥
 নিখাস ছাড়িতে গুণে পরমাদে
 কাতর হৈয়া পুছে ।
 বালাই লইয়া মো মরোঁ বলিয়া
 আপনা দিয়া কত নিছে ॥
 না জানি কি স্থখে দাঁড়াঞা সমুখে
 ঘোড় হাথে কিবা মাগে ।

যে করয়ে চিতে কে যাবে প্রতীতে

• **বলরাম চিতে জাগে ॥**

* * *

କିବା ସେ କହିବ • ବନ୍ଧୁର ପିରୀତି

তুলনা দিব যে কিসে।

সমুখে রাখিয়া মুখ নিরখয়ে

পর্যাণ অধিক বাসে ॥

আপনার হাতে পান মাজাইয়া

মোর মুখ ভরি দেয় ।

মোর মুখে দিয়া আদর করিয়া

মুখে মুখ দিয়া নেয় ॥

মরোঁ মরোঁ সই বঁধুর বাঁজাই লৈয়া ।

না জানি কেমনে আছয়ে এখনে

যোরে কাছে না দেখিয়া ॥

করতলে ঘন বদন মাজই

বসন করয়ে দূর ।

পরশিতে অঙ্ক

ধৈর্য্য পাওল চর ॥

ममय वाक्कन नाना सुथ दिया

বচন ঠেলিতে নাহি ।

যখন যেমতি করে অনুমতি

তখন তেমনতি করি ॥

উদ্ধৃত পদ বা পদাংশগুলি সর্বাঙ্গীণভাবে প্রথম শ্রেণীর এমন দাবী করি না। তবে একটা কবিত্বের মান বজায় আছে। এই পদগুলির মধ্যে, লক্ষ্য করিলে দেখিব, প্রণয়ের মাদকতা কোথাও নাই। সুখস্বপ্নতির বর্ণনায় উত্তাল হৃদয়াবেগ আশাও করা যায় না, তবু শিহরণটুকু মধ্যে মধ্যে না থাকিবে কেন? বলরাম তাহাও বর্জন করিয়াছেন। বলরাম বা রাধিকা এ কোন্ কৃষ্ণের কথা বলিতেছেন? রসোদগারের প্রেম—গাঢ়স্বভাবিত হারাই হারাই ভাবটুকুর কথা বাদ দিলে—বিরহহীন পূর্ণ মিলনাত্মক। প্রণয়ের এই খণ্ডকালে বিচ্ছেদ বা প্রতারণার ছায়াপাত নাই। নায়কের প্রেমে নায়িকার পূর্ণ আস্থা। সেই পরিপূর্ণ আস্থা কি প্রণয়মত্ত প্রেমিকের নিকট

কোনকালেই আশা কল্পা যায় না? তাহার মধ্যে কি পিতৃষের মনোভাব সঞ্চারিত করিয়া দেওয়া এত প্রয়োজন? অন্ততঃ বলরাম তাহাই মনে করিয়াছেন। রবীন্দ্রনাথ ‘দুই বোনের’ ভিতর প্রেমিকা নারীর দুইরূপ আবিষ্কার করিয়াছেন, একজন মাঠা, অল্পজন শ্রিয়া। বলরামদাস প্রেমিক পুরুষের মধ্যেও সম্ভবতঃ দুই রূপ আবিষ্কার করিয়াছেন, পতি ও পিতা। রসোদগারের কৃষ্ণ দ্বিতীয় শ্রেণীর প্রণয়ী। বলরামের সর্বব্যাপক বাৎসল্য এখানেও উপস্থিত। প্রমাণের প্রয়োজন আছে? প্রেমের রসকলার নিদর্শন কোথা—সর্বত্র সেবা-শুশ্রূষা পরিচর্যা—‘সোয়াস্ত’ না পাওয়ার কথা। এই অস্থিরতাটুকু প্রেমের গাঢ়ত্ব হইতে উৎপন্ন হয়, কিন্তু ইন্দ্রিয়ের প্ররোচনাকে ছাড়াইয়া স্নিগ্ধ স্নেহের সৃষ্টি করে। দুঃস্থ পুরুষের জন্ত নারীর এই প্রকার অমুভূতির কথা শুনিয়াছি বটে, কিন্তু বিপরীত পক্ষও যে আছে, তাহা রসোদগারের কাব্যপাঠে জানিলাম। নারী রাধিকা তাঁহার হৃদয়ভাব পুরুষ কৃষ্ণের উপর চাপান নাই তো?

ঐ স্নেহপূর্ণ প্রণয়—ঐ সেবা-শুশ্রূষা—ঐ পান খাওয়ান—রাতদিন চোখে চোখে রাখা—ঐ আশঙ্কা—ইহা প্রণয়ের আকৃতি নয়, বাৎসল্যের প্রকৃতি। ইহা ছোটর জন্ত বড়র আশঙ্কা—ঐ ‘মায়ের প্রাণের ভয়ের মত দোলে,’ নচেৎ—

আউলাঞ কবরীভার

বেশ করে বারবার

বসন পরায় কুতূহলে।

বসঞা আপন উরে

নুপুর পরায় মোরে

চরণ পরশে করতলে ॥

—গোবিন্দদাসের রসোদগার-পদের এই অংশের সঙ্গে বলরামদাসের পূর্বোক্ত অংশগুলির ভাবঘটিত পার্থক্য কিরূপ স্পষ্ট। গোবিন্দদাসের কৃষ্ণ ‘বসন পরায় কুতূহলে’, আর বলরামের কৃষ্ণ বসন পরাইয়া ‘সাধে সাধে সমুখে হাঁটায়’; কেবল তাহাতেই শেষ নয়, স্নেহবাক্যুল চিন্তে ‘দেখিয়া হাঁটন মোর, হইয়া আনন্দে ভোর, দুই বাহু পশারিয়া ধায়।’ অথবা যেখানে ‘চন্দন মাখায় গায়, দেয় বসনের বায়, নিজ করে তাম্বুল খাওয়ায়’, যেখানে ‘কতনা মুখানি মোছে’, যেখানে ‘নিশ্বাস ছাড়িতে শুণে পরমাদে কাতর হৈয়া পুছে, বালাই লইয়া, মো মরে’। বলিয়া আপনা দিয়া কত নিছে’—সে সকল স্থান রাধাকৃষ্ণের প্রণয়-পর্যায় বলিয়া না দিলে, দিব্য বাৎসল্য রসের অন্তর্গত বলিয়া চালাইয়া দেওয়া যায়। একটি চরম দৃষ্টান্ত লওয়া যাক, ঐ—‘করতলে ঘন বদন মাজই’ অংশটুকু,—এখানে ‘বসন করয়ে দূর’-এর মত ব্যাপারেও কবি কোনপ্রকার উত্তাপ সৃষ্টি করিতে পারেন নাই, বলিতে হয় বলিয়া কোনক্রমে কথাটা বলিয়া ফেলিয়াছেন; নচেৎ অব্যবহিত পরেই রাধিকার যে স্বীকৃতি—‘যখন যেমতি

করে অল্পমতি তখন তেমতি করি'—এই বাধ্যতা অপস্মিগতবয়স্ক একটি স্ত্রীলা বালিকার তাহা বুকিতে বিলম্ব হয় না। ঐ একই ব্যাপার যখন গোবিন্দদাস লেখেন, তাঁহার রূপ হয় এইঃ

যব হরি পাণি-

পরশে ঘনকাঁপসি

কাঁপসি কাঁপলি অঙ্গ।

বলরামদাস-সম্বন্ধে অবশিষ্ট বক্তব্য কয়েকটি অংশে গ্রহণ করা যায়,—বলরামের বর্ণনারস, কবিভাষা ও রাধিকা-সর্বস্বতা। বর্ণনারসের প্রাধাত্যের বিষয় পূর্বে উল্লেখ করিয়াছি, কারণও বলিয়াছি—হৃদয়াবেগের তরঙ্গভঙ্গ সৃষ্টিতে অক্ষম যে প্রৌঢ় মানসিকতা, তাহাই সংযত বর্ণনাভঙ্গির মধ্যে আত্মপ্রকাশ চাহিয়াছে। এই একই কারণে কবিভাষার আলোচনা বলরামের কাব্যপ্রসঙ্গে মূল্যহীন। ভাষা-বিভ্রাটে অনেক বৈষ্ণব কাব্য নষ্ট হইয়াছে। বৈষ্ণব ভাব-আন্দোলনের রসপ্রকাশ ব্রজবুলি ভাষায়। এই ভাষার সম্পদ প্রচুর, সমর্থ হস্তে ব্রজবুলিতে সোনা ফলিয়াছে। কিন্তু বৈষ্ণব পদকারগণ অনেকসময় বিস্মৃত হইতেন যে, আত্মউদ্ঘাটনের রূপ-রীতিতে সর্বজনীনত্ব কখনই সম্ভব নয়। ব্রজবুলি বৈষ্ণব পদের উৎকৃষ্ট বাহন হইতে পারে, কিন্তু উহাকেই একমাত্র বাহন করিলে প্রমাদের শঙ্কা থাকে; বিশেষতঃ যখন দেশের কথা বুলি ব্রজবুলি নয়। ব্রজবুলি যতখানি ভাষা, ততোধিক রীতি। গোবিন্দদাস-জগদানন্দের প্রতিভাধার যথার্থতঃ ব্রজবুলি, তেমন চণ্ডীদাস-জ্ঞানদাসের অমিশ্র বাংলা। জ্ঞানদাস অনেকক্ষেত্রে এই সত্যটি বিস্মৃত হইয়া গোল বাধাইয়াছেন। বলরামদাসেরও বাহন নিঃসংশয়ে বাংলা অথচ তাঁহার ব্রজবুলিতে রচিত পদ আছে। লক্ষণীয় এই, সাধারণভাবে ব্রজবুলিতে রচিত পদগুলি অপকৃষ্ট। পূর্বে বলরামদাসকে প্রতিভা-সচেতন কবি বলিয়াছি, অথচ বাহন-নির্বাচনের ব্যাপারে এহেন বিভ্রাট কেন? আমাদের বিখ্যাস, এই বিভ্রাট-সৃষ্টি বলরামের ইচ্ছাকৃত এবং তাঁহার আত্মসজ্ঞানতাই উহার কারণ। আমাদের বক্তব্যে স্বতোবিরোধ আছে মনে হইতে পারে, কিন্তু তাহা নয়। প্রত্যেক রসপৰ্য্যায়ের প্রাণরস ভিন্নপ্রকার। তাহার রূপসৃষ্টিও ভিন্ন হইতে বাধ্য। কোনটিতে ভাবাকুল সরলতা, কোনটিতে আলঙ্কারিক চাতুর্য্য। অধিকাংশ পদকারের প্রতিভাপূর্ণ উহার একটির অঙ্গুত হয়, স্তম্ভং প্রতিভা ছাড়া উভয়ের সমব্যবহার থাকে না। বলরামের কবিশক্তি বর্ণনাপূর্ণ অঙ্গুতরূপে অত্যন্ত—সমুচ্চ ভাবেল্লাসে বা রসকুটিল প্রণয়কলার পথে চলিতে অপারগ। তাই বাংসল্য রসোদ্গার ইত্যাদি পৰ্য্যায় বলরামের প্রতিভা যে আচ্ছন্ন্য অঙ্গুতব করে, বিরহ, ভাব-সম্মিলন কিংবা খণ্ডিতা কুণ্ডলভে তাহা পায় না। অথচ সর্ববিধয়ে পদরচনা করিবার একটা আকাঙ্ক্ষা

বলরামদাসের মধ্যে লক্ষ্য করি। সুতরাং বহুক্ষেত্রে তিনি ভাষার আবরণে নিজ অক্ষমতা ঢাকিতে চেষ্টা করিবেন স্তাহাতে সন্দেহ কি? দৃষ্টান্ত নইলেই বিষয়টি পরিষ্কার হইবে।

নৌকাবিলাসের একটি পদ আরম্ভ হইতেছে এইভাবে :

কিবা যায়রে শ্রাম-সোহাগিনী।

ধনী ঠমকি ঠমকি চলনি চরণে মণি-মঞ্জীর বোলনি

পিঠপর বেণী দোলনী ॥

—এই সুরে মন সায় দেয়। এখানে রাধিকার যাত্রা অনেকটা আনন্দাভিগারের মত; সখীদের সঙ্গে পথে বাহির হইয়া স্বভাবতঃ যৌবন-গরবিনী রাধিকা উল্লাসবোধ করিবেন। কবিরও ইচ্ছা, সেই উল্লাস ভাবে-ভঙ্গিতে ফুটাইবেন কিন্তু হয়, সাধ থাকিলেই সাধ্য থাকে না, অতএব ঠিক পরেই সাদামাটা বিবৃতি শুরু হয় :

সাজায়ে পসরা

যাইতে মথুরা

যতেক গোপের নারী ॥.....

কবি যেন কর্তব্যবোধে রাসের পদ লিখিয়াছেন। গোবিন্দদাসের ছন্দে পদ তো আরম্ভ করিয়া দিলেন :

একে সে মোহন যমুনার কূল

আরে সে কেলি কদম্বমূল

আরে সে বিবিধ ফুটল ফুল

আরে সে শারদ যামিনী।

অধিক অগ্রসর হইবার প্রয়োজন নাই, প্রথম স্তবকেই গোবিন্দদাসের ছায়াস্বরূপকে দেখি; ‘আরে সে, আরে সে’ করিয়া কবিকে উৎসাহ বজায় রাখিতে হইয়াছে, এবং ক্রমেই অবশিষ্ট উল্লাস ফিকা হইয়া একেবারে অদৃশ্য হইয়া গিয়াছে। উল্লাস বোধ করিবার ক্ষমতাই যে কবির নাই; তদুপরি সূক্ষ্ম ধ্বনিজ্ঞান, ছন্দবোধ, ব্রজবুলিতে পদ রচনা করিবার সামর্থ্যেরও অভাব।

কেবল উল্লাস নহে, গভীর ভাবাহুভূতিও কবির আসে না। সুতরাং আক্ষেপানুসারে তিনি সোজা সরল ছংখের বর্ণনা করিয়া গেলেন; তাহার অনেকখানি অংশ পাশ নন্দিনী ও দাক্ষণী শাশুড়ী ভরিয়া রছিল। সেই আটপোরে বর্ণনা তো বিরহে চলে না, অথচ বাংলা ভাষায় হাহাকার তুলিতে কবি অক্ষম, তাই ব্রজবুলিতে কিঞ্চিৎ বেদনার বার্তা নিবেদন করিলেন, তাহাতে না সৌন্দর্য, না আবেগ।

আবার মণ্ডনকলার অহুসৃতি যেখানে আবৃত্তিক, সেই সকল পর্যায়েও প্রায়

অমুরূপ অবস্থা। মান বলরামের নিজস্ব ক্ষেত্র নহে, পদও অমুরূপযোগ্য। মিলন সম্বন্ধে একই কথা। •খণ্ডিতা এবং কুঞ্জভঙ্গ—এ দুটি আনন্দারিক চাতুর্ধ্যামৃষ্টির উৎসব ক্ষেত্র। কবিও যেন তাঁহা মাত্র করিয়া ব্রজবলি অবলম্বন করিয়াছেন। অবশ্য কুঞ্জভঙ্গের শ্রেষ্ঠ বলিয়া গৃহীত বংশীবদনের—

রাই জাগো রাই জাগো শারীশুক বলে ।
কত নিদ্রা যাও কালো মানিকের কোলে ॥
উঠহে গোকুলের চাঁদ রাইকে জাগাও ।
অকলঙ্ক কূলে কেন কলঙ্ক লাগাও ॥
শারী বলে ওহে শুক, গগনে উড়ি ডাক ।
নব জলধরে আনি অরুণেরে ঢাক ॥—

পদটির বর্ণনাভঙ্গি সরল। একটি পদে বলরাম সম্ভবতঃ বিদ্যাপতির অমুরূপে রসামৃষ্টিতে সমর্থ হইয়াছেন :

সহচরীগণ দেখি লাজে কমলমুখী
রাঁপি রহল মুখ-আধ ।
অলম্বিতে আধ কমল দিটি অঞ্চলে
হেরই হরি-মুখ-চাঁদ ॥
হরি হরি মাধবী-লতাগৃহ মাঝ ।
কুহুমিত কেলি শয়নে দুহঁ বৈঠলি
চৌদিকে রমণীসমাজ ॥
গোরিক খোরি বদন বিধু হেরইতে
পহঁ ভেল আনন্দে ভোর ।
ঘন ঘন পীত বসন দেই মোছই
নিবরই নয়নক লোর ॥

কুঞ্জভঙ্গে তবু আন্তরিক বেদনার স্থান আছে, কেননা রাধাকৃষ্ণের প্রাভাতিক বিচ্ছেদে ঘর্নিচ ভোগ-বিরতিজনিত যন্ত্রণাই প্রধান, তবু বিচ্ছেদ তো ; কিন্তু খণ্ডিতায় একেবারে প্রবঞ্চিতার মর্ষজালা, ঈর্ষ্যার দাহন। সারারাত্রি বাসক সজ্জায় ব্যর্থ প্রহর গণিয়া কাটিয়াছে, প্রভাতে—দিবালোকে—নির্লজ্জ নায়ক গতরাত্রির ভোগস্মৃতি অঙ্গে বহিয়া উপস্থিত—এহন সময়ে নায়িকার মুখে যে ভাষা বাহির হইবে, তাহাতে বিষের জালা ও ক্ষুরের ধার, মধুকরনের আশা কেহ করে না। ব্যঙ্গে কণ্ঠ রি রি করিয়া ওঠে :

ভাস হৈল আরে বন্ধু আইলা সকালে ।
 প্রভাতে দেখিলাম মুখ দিন যাবে ভালে ॥
 বন্ধু তোমার বলিহারি যাই ।
 ফিরিয়া দাঁড়াও তোমা'র চাঁদমুখ চাই ॥ (চণ্ডীদাস)

বলরামদাস কি বলেন দেখা যাক । একটি পদ উদ্ধৃত করি, অবশ্য ইহা কিছু
 উৎকৃষ্ট পদ নহে :

দেখ সখি হোর কিয়ে নাগররাজ ।
 বিপরীত বেশ- বিভূষিত হেরিয়ে
 কোন কয়ল ইহ কাঙ্ক্ষ ॥
 ঢুলি ঢুলি চলত খলত পুন উঠত
 আওত ইহ মঝু কাস্ত ।
 স্থলপঙ্কজদল নয়নযুগল বর
 যামিনী জাগি নিতান্ত ॥
 মুখ বিধুরাজ মলিন অব হেরিয়ে
 অরুণ-কিরণ ভয় লাগি ।
 অলক-নিকর উড়ু ভাল-গগন পর
 নিশি অবসান ভয় ভাগি ॥
 বাকুলী অধরে হেরি জহু নিলীম
 কাস্তর করি অহুমান ।
 অপরূপ দশন- কাঁতি জহু দরপণ
 সে অব রঙ্গিম ভাণ ॥
 উরপর নখপদ তহু তহু নিরমদ
 অম্বুধন আলসে বিভোর ।
 যাবক-রাগ দাগ কিয়ে শোভন
 ঘন ঘন ভুজয়ুগ মোড় ॥
 শ্রামর অঙ্গে নীল অম্বর কিয়ে
 জগদে জগদ মিলি গেল ।
 দূরহি দীগ- বসন জহু হেরিয়ে
 ঐছন মরমহি ডেল ॥

টলমল চরণ-

যুগল মণিস্মঞ্জীর

ঝনর ঝনর ঘন বাজে ।

ক'হ বলরাম-

দাস ইহ বিপরীত

হেরত নাগধরাজে ॥

পদটিতে, পরম কোতূকের ব্যাপার, ইহার অন্তর্নিহিত ভাব-বিরোধ। পদটি খণ্ডিত। স্বতরাং রাধাকর্তৃক কৃষ্ণরূপের বর্ণনা সম্পূর্ণ ব্যঙ্গাত্মক হইবে। কৃষ্ণের রূপের প্রশংসা যদি রাধা করেন, সে শ্লেষভিত্তিক কণ্ঠে। প্রথম দিকে তেমন করিবার একটা চেষ্টা আছে বটে। কিন্তু শ্লেষ বা ব্যঙ্গ যে কবির আসে না। তাই ব্যঙ্গের ধার মরিয়া গিয়া পদটি প্রায় রূপাহরণের হইয়া দাঁড়াইয়াছে। কবি ও রাধিকার মধ্যে মনোভাবের সূক্ষ্ম সংঘাতে রসদানা বাঁধে নাই। বক্তব্যে শ্লেষ ও সুরে স্তম্ভি। যাহা অভিপ্রেত তাহা অসিদ্ধ রহিয়া গেল।

বলরামের কাব্যপ্রসঙ্গ শেষ করিবার পূর্বে তাঁহার কবিবৈশিষ্ট্যরূপে উল্লিখিত অবশিষ্ট লক্ষণটির আলোচনা এখন করিতে পারি। বলিয়াছি, বলরামের কাব্য রাধিকা-সর্কষ। ইহা কি বলরামের কোন স্বতন্ত্র ধর্ম? রাই বই গীত নাই—সমগ্র বৈষ্ণব পদাবলী সম্পর্কে কি একথা নিঃসংশয়ে বলা যায় না? সমগ্রের অঙ্গরূপেই তো বলরামের ঐ রাধিকাপ্রীতি। তাহা সত্য। কিন্তু বলরাম ঐ স্বরূপধর্মকে যেমন অনগ্রহণ্য হইয়া অগ্রসরণ করিয়াছেন, অগ্র কবি সেরূপ নন। একজন পদকার আশ্চর্য্য ভাষায় যুগলরূপের বর্ণনা করিতেছেন—“আধারে জ্বলে কিবা রসের দীপিকা।” পদে পদে বৈষ্ণব কবি রসের দীপিকা জালিয়াছেন। কিন্তু সে দীপ জলে কৃষ্ণ-নিশীথের বৃকে। বলরামের কাব্যে ঐ কৃষ্ণ নাই তাহা নয়, তবে তাহার অস্তিত্ব তিনি যেন যথাসম্ভব বিস্মৃত হইতে চাহিয়াছেন। দীপ জলে তাহাই যথেষ্ট, কোথায় জলে বলরামের তাহাতে প্রয়োজন নাই। দৃষ্টান্তে আসা যাক।

বলরামের কিছু রূপাহরণের পদ আছে। রূপ কাহার? রাধিকা এবং কৃষ্ণ উভয়ের। রূপ কাহার বেশী? কৃষ্ণ বলে রাধার, রাধা বলে কৃষ্ণের; কবি কিছুই বলেন না, তাঁহার বলিবার অবস্থা নয়। অতএব বৈষ্ণব কাব্যে রাধা ও কৃষ্ণ উভয়ের রূপবর্ণনা ও রূপপিপাসার কাহিনী নাই। আবার রূপাহরণের দুটি অংশ : রূপ ও অহরণ। যখন শুধু রূপ তখন, কবি পুরুষজাতীয় বলিয়া, রাধারূপ প্রাধান্য পাইবে। রাধা যে নারী; পুরুষ কবির উল্লাস নারীরূপের অঙ্কনে একটু বেশী পরিমাণেই হয়। আশা করি ইহাতে কেহ আপত্তির কিছু দেখেন না। আর যখন অহরণ, তখন কবি পুরুষত্বের আকুলতা অপেক্ষা নারীপ্রাণের ব্যাকুলতায় ঈষৎ অধিক আস্থা

রাখিবেন। অতএব মূল্যতঃ রূপের দৃষ্টি কৃষ্ণের এবং অমুরাগের দৃষ্টি রাধার—সমগ্র বৈষ্ণব কাব্য ইহার সাক্ষ্য। বলরাম কৃষ্ণ-চোখে রাধার রূপদর্শন-ব্যাপারটুকু প্রায় বাদ দিয়াছেন। “অপরূপ পেখল রামা”—এই ‘পেখল’-কর্মটুকু ছাড়া বৈষ্ণব কাব্যে কৃষ্ণের বিশেষ ভূমিকা নাই। সেই রাধারূপকে যদি বর্জন করা যায়, তবে কৃষ্ণ ঐ রাধিকাকে দেখিবার গৌরব হারাইয়া কাব্য হইতে স্থলিত হইয়া পড়েন। বলরামের কাব্য সেইরূপে কৃষ্ণ-হার।

তবে কি বলরামের কাব্যে রাধা-রূপের বর্ণনা একেবারে নাই? কবি কি প্রথার আহুগত্য সম্পূর্ণ পরিহার করিলেন? না, তিনি বিপ্লবী নন। কিছু রাধারূপের বর্ণনা অবশ্যই আছে—অতি সাধারণ স্তরের—এবং ব্রজবুলি ভাষায়। কবি কি ভাষার আবরণে নিজ অক্ষমতা ঢাকিতে সচেষ্ট নন?

রাধারূপ বর্ণনার ক্ষমতা কবির ছিল না। রূপকে কাব্যরূপ দিতে হইলে যে সতেজ সরস প্রগাঢ় রসদৃষ্টির আবশ্যক, বলরামের মানসিকতা সম্বন্ধে পূর্বে যাহা বলিয়াছি, তদনুযায়ী উহা বলরামের থাকে না। তাই তিনি কৃষ্ণ-দর্শনে রাধার অবিরত হৃদয়-মর্ধনের কাহিনী বলিয়া যান। স্তর কোথাও খুব তীব্র নয়। কাব্যের স্তরে ভাব-ফোটান বলরামের পক্ষে কঠিন। তিনি নিরাপদ বর্ণনার আশ্রয়প্রার্থী। আকুলতার কথা বারবার বলিতে বলিতে এক সময় আকুলতা আসিয়া যায় ও অল্প ক্ষেত্রে স্ফূর্ত্য হইয়া ওঠে; যথা :

কিবা রাতি কিবা দিন কিছুই না জানি ।

জাগিতে ঘুমাতে দেখি শ্রামরূপখানি ॥

আপনার নাম মোর নাহি পড়ে মনে ।

পর্যণ হরিল রাঙা নয়ান নাচনে ॥

কিবা রূপ দেখিছ সেই নাগর শেখর ।

আঁখি ঝরে মন কাঁদে পর্যণ কাতর ॥

ইহার পরের দুই পঙ্ক্তিতে কেবল রাধিকার মনের কথা নয়, নিজ কবি-মন সম্পর্কে একটা বড় সত্য কথা কবি বলিয়াছেন :

সহজে মুরতিখানি বড়ই মধুর ।

মরমে পশিয়া সে ধরম কৈল চুর ॥

‘সহজে মুরতিখানি’ রাধিকার ধর্ম চুরি করিয়াছে ও বলরামদাসের কবিধর্ম দান করিয়াছে ।

পূর্বরাগের বিচারে আসিয়া আমরা একটু অস্থবিধায় পড়িতেছি। পূর্বরাগে কতক সত্যাকার উৎকৃষ্ট পদ আছে। নিন্দার স্বযোগ হারাইয়া সমালোচকের যে অস্থবিধা, এক্ষেত্রে আমাদের অবশ্য ঠিক সে অস্থবিধা নয়। পদগুলি হৃন্দর ও বলরামের প্রচলিত রীতিতে রচিত নয়। আমরা সাধারণতঃ কবির সংখ্যাতত্ত্বকে মর্যাদা দিই না—এক্ষেত্রে কি দিতে হইবে? বলরাম কয়েকজনই ছিলেন বলিয়া শোনা যায়। আমরা কাব্যের আভ্যন্তর সাক্ষ্যের সাহায্যে বলরামের যে কবিচরিত্র উদ্ঘাটিত করিতে চেষ্টা করিয়াছি, এক্ষেত্রে তাহার সামান্য ব্যতিক্রম ঘটতেছে। যথা ব্রহ্মবলিতে রচিত বিদ্যাপতি-গোবিন্দদাসের স্বরে রাধিকার আত্মবিশ্বৃত ভাববিস্মল মূর্তির উত্তম রূপায়ণ :

বাবু বাবু এ দুই নয়ানি ॥

ঘন ঘন নয়নে নীর ভরি আঁওত
 ঘন ঘন অধরহি কাঁপ ।
 বলরামদাস কহ জানলু জগমাহ'
 " প্রেমক বিবম গস্তাপ ॥

অথবা চপল ঢঙে গভীরের ইসারা, চণ্ডীদাস বা লোচনদাসের অঙ্করূপ :

চুলু চুলু ছুটি নয়ান নাচনি
 চাহনি মদনবাণে ।
 তেরছ বন্ধানে বিবম সঙ্কানে
 মরমে মরমে হানে ॥
 চন্দন-তিলক 'আধ কাঁপিয়া
 বিনোদ চুড়াটি বাঞ্চে ।
 হিয়ার ভিতর লোটায়া লোটায়া
 কাতরে পরাণ কান্দে ॥

একই প্রকার হালকা শব্দ ও অনাড়ম্বর ভঙ্গিতে ভাবসৃষ্টির চমৎকারিত্ব :

রসের ভরে অঙ্গ না ধরে
 হেলিয়া পড়িছে বায় ।
 অঙ্গ মোড়া দিয়া ত্রিভঙ্গ হইয়া
 ফিরিয়া ফিরিয়া চায় ॥
 * * *
 হিয়া অরঙ্গর পরাণ ফাঁপর
 দারুণ মুরলী শরে ।
 ফুটিল হরিণী লোটায়ে ধরণী
 কান্দিয়া মরমে ঘরে ॥

অবশ্য বলরামের সংযত মধুর বর্ণনারসে প্রত্যাভর্তনে বিলম্ব হয় নাই :

কিরূপ দেখিছু সই নাগর শেখর ।
 আঁখি রায়ে মন কাঁদে পরাণ ফাঁপর ॥
 কিবা রাতি কিবা দিন কিছুই না জানি
 আগিতে স্বপনে দেখি স্তামরূপখানি ॥

এমন কি পুরাতন 'সহজ মুরতি'-দ্বারা ধর্মচুরি পর্য্যন্ত :

সহজে মুরতিখানি বড়ই মাধুরী ।

মরমে পশিয়া সে ধরম কৈল চুরি ॥

বলরামের পদের ভক্তি-বৈপরীত্যকে ভক্তিবৈচিত্র্য বিবেচনা করিয়া সম্ভবতঃ পাঠকগণ সমালোচকের অস্ববিধাকে তুচ্ছজ্ঞান করিবেন। বিশেষতঃ একটি-দুটি পদে সাধারণ নিয়মের ব্যতিক্রম নতুন কবির সৃষ্টি করে না। আর বলরাম ব্রজবুলিতে যখন পদ লিখিয়াছেন, তখন সর্বত্রই তাঁহাকে ব্যর্থ হইতে হইবে, অথবা মন্থর স্বরে বর্ণনা করেন বলিয়া “চপলতা যদি ঘটে করিও ক্ষমা” বলিবার সুযোগ অন্ততঃ কখনও গ্রহণ করিবেন না, এমন কথা হালফ করিয়া বলা চলে না। পাঠকগণ একরূপ বলিলে খণ্ডন করিতে পারিব মনে হয় না।

সর্বশেষে যে পদটির উল্লেখ করিতেছি, তাহা সমগ্র বৈষ্ণব সাহিত্যের একটি শ্রেষ্ঠ পদ - বলরামের সর্বোত্তম তো নিশ্চয়ই। সমালোচকের থিয়োরীর উপর চূড়ান্ত আঘাত এখানে অপেক্ষা করিতেছে। ব্যতিক্রম নিয়মের প্রমাণ করে—এই জীর্ণ বচনটুকু আত্মপক্ষ সমর্থনের একমাত্র উপায়। রাধিকা সম্পর্কে কৃষ্ণের উক্তি পদটিতে। বলরাম যে রাধিকা-সর্বস্ব প্রমাণসহ জানাইয়াছি; এমনই পরিহাস, বলরামের শ্রেষ্ঠ পদ কৃষ্ণাশ্রয়ী। পদটি এই :

তুমি মোর নিধি রাই তুমি মোর নিধি ।

না জানি কি দিয়া তোমা সিরঞ্জিল বিধি ॥

বসিয়া দিবসরাতি অনিমিত্ত আঁখি ।

কোটা কলপ যদি নিরবধি দেখি ॥

তবু তিরপিত নহে এ দুই নয়ান ।

জাগিতে তোমারে দেখি স্বপন-সমান ॥

*

*

*

যতনে আনিয়া যদি ছানিয়ে বিজুরী ।

অমিয়ার ছাঁচে যদি গড়য়ে পুতলি ॥

রসের সায়েরে যদি করায় সিনান ।

তবু তো না হয় তোমার নিছিনসমান ॥

হিয়ার ভিতরে থুইতে নহে পরতীত ।

হারাই হারাই হেন সদা করে চিত ॥

হিম্মার ভিতর হৈতে কে কৈলে বাহির ।

তেঞি বলরামের পছ'র চিত নহে স্থির ॥

কৃষ্ণের মানস-রহস্য যিনি বর্ণনা করিতে পারেন না, তাঁহার হাত দিয়া এ কবি বাহির হইল। অথবা কৃষ্ণ-সম্বন্ধে কবিচিন্তার যতকিছু প্রেরণা বেদনা সকলি একটি পদে নিঃশেষ করিবেন বলিয়া অপেক্ষা করিয়া ছিলেন। অথচ কাব্য কি নিঃশেষ হয়—স্বরতরঙ্গিণীর শেষে রসসাগরোর্মি। নচেৎ আষাঢ়-সন্ধ্যায় যুগযুগ-জাগ্রত ব্যাকুল অন্তবেদনার রসরহস্যের মধ্যে ডুব দিয়া কেবল কালিদাসের মেঘদূত নয়, বলরামদাসের এই কাব্যটিকে রবীন্দ্রনাথ এমন করিয়া স্মরণ করিতে পারিতেন।—

“কিন্তু একথা মনে হয়, আমরা যেন কোনো এক কালে একত্র মানসলোকে ছিলাম, সেখান হইতে নির্বাসিত হইয়াছি। তাই বৈষ্ণব কবি বলেন, তোমার ‘হিম্মার ভিতর হৈতে কে কৈল বাহির’। এ কী হইল। যে আমার মনোরাজ্যের লোক, সে আজ বাহিরে আসিল কেন। ওখানে তো তোমার স্থান নয়। বলরামদাস বলিতেছেন, ‘তেঁই বলরামের, পছ, চিত নহে স্থির।’ যাহারা একটি সর্বব্যাপী মনের মধ্যে এক হইয়াছিল, তাহারা আজ সব বাহির হইয়া পড়িয়াছে। তাই পরস্পরকে দেখিয়া চিন্তা স্থির হইতে পারিতেছে না—বিরহে বিধুর বাগনায় ব্যাকুল হইয়া পড়িতেছে। আবার জগতের মধ্যে এক হইবার চেষ্টা করিতেছি, কিন্তু মাঝখানে বৃহৎ পৃথিবী।”

রবীন্দ্রনাথ কেবল একটু প্রভেদ করিয়াছেন; বলরাম বলেন, হিম্মার ভিতর হৈতে বাহির করায় তাঁহার প্রভুর চিত স্থির নহে। রবীন্দ্রনাথ ঐ অস্থিরতা স্বয়ং বলরামের উপর চাপাইয়াছেন—‘তেঁই বলরামের, পছ, চিত নহে স্থির।’ এই সর্বব্যাপী ব্যাকুলতার দিনে তুমি দূরে থাকিবে কেন, হে কবি, সরিয়া এস, মিশিয়া যাও, তোমার ও তোমার পছর প্রাণ একস্থরে কথা কউক—সব একাকার।

পদটিকে কোন্ রসের বলিবে। এমন কিছু বৈষ্ণব পদ আছে যাহা কেবল রসের নয়, রসপর্ধ্যায়ের সর্বজনীনত্ব লাভ করিয়াছে। অনেকগুলি রসপর্ধ্যায়ে তাহাদের স্থাপন করা যায়। এটি তেমন। তবে যদি এটিকে রসোদগারের পদ বলি—বলরাম যে রসোদগারের কবি। কিন্তু কৃষ্ণের রসোদগার হয় কি? সন্দেহ জাগিতে পারে, ইহা বাধারই উক্তি, বাধিকার প্রতি পক্ষপাতের স্ফালন করিতে কবি কৃষ্ণের বেনামীতে চালাইয়াছেন, কেননা বাধিকার রসোদগারের সাহিত বক্তব্যে ইহার সমুচ্চ ঐক্য। না, একটু গভীর দৃষ্টিতে দেখিলে, ইহা কৃষ্ণেরই। আমরা বোধহয় বলরামের কৃষ্ণ-সম্পর্কে কিছু অবিচার করিয়াছি; মনে করিয়াছিলাম, রসোদগারের বাধিকা

তাহার প্রতি কৃষ্ণের প্রেমের গাঢ়ত্ব সম্বন্ধে যে সকল উচ্ছ্বাস প্রকাশ করিয়াছেন, তাহা তাহারই প্রাণের অঙ্গীভাগপথে নিঃসৃত হইয়াছে। বলরামের কৃষ্ণ ঐ প্রকার গভীর নহে। বলরামের কৃষ্ণের পক্ষে এই পদটি তদুত্তর। রসোদগারে রাধিকার উক্তি পুনরায় স্মরণ করিতে বলি : একই কথার ক্লাস্তিহীন পুনরাবৃত্তি : “দীপ লৈয়া হাতে, মুখ নিরখিতে, তিতিল নয়ান লোরে”; “রাতদিন চোখে চোখে, বসিয়া সদাই দেখে, ঘন ঘন মুখখানি মাজে”; “উলটি পালটি চায়, সোয়াস্ত নাহিক পায়”; “জালিয়া উজ্জল বাতি, জাগিয়া পোহায় রাত, নিদ নাহি যায় পিয়া ঘুমে”; “নয়ানে নয়ানে থাকে রাত দিনে, দেখিতে দেখিতে ধান্দে, চিবুক ধরিয়া মুখানি তুলিয়া, দেখিয়া দেখিয়া কান্দে”; “সমুখে রাখিয়া মুখ নিরখয়ে, পরাণ অধিক বাসে”; ইত্যাদি।—এই যে বারে বারে দর্শন, এমন করিয়া রাধিকা কি দেখিতে পারে; তাহার স্তোত্র রূপ নয়, রাগ। নাম শুনিয়াই পূর্বরাগের দীক্ষা চণ্ডীদাসের নিকট পাইয়াছে। যে কথা কৃষ্ণের, তাহা একবার মাত্র রাধিকা বলিয়াছেন বিদ্যাপতির কাব্যে—“জনম অবধি হাম রূপ নেহারল, নয়ন না তিরপিত ভেল”; এখানে সুরের উদ্দীপ্তিতে নারীকণ্ঠ ধরা পড়ে। পুরুষ প্রেমের কথা সচরাচর এমন উদ্দীপ্ত হইয়া বলে না। সাধারণতঃ তাহার স্বর আরো প্রোঢ় এবং গম্ভীর। বিদ্যাপতির পদের আবেগোত্তেজনা বর্তমান পদে নাই। ইহার প্রথম ও শেষ পঙ্ক্তিতে উত্তেজনার কথা মাত্র আছে। শেষ পঙ্ক্তির অস্থিরতা শুধু বিবৃতিতে—“চিত নহে স্থির”। প্রথম পঙ্ক্তিতে রাধার কথা বলিতে গিয়া একই কথা কৃষ্ণকে দুইবার বলিতে হইয়াছে,—“তুমি মোর নিধি রাই, তুমি মোর নিধি”—যেন একবার কাঁপিয়া উঠিল, তারপর স্থির শিথল গভীর করণ কণ্ঠ—প্রত্যেকটি শব্দ ধীরে উচ্চারণ করিয়া, তাহার দ্বারা আপন অস্থিরতার চারিপাশে নিটোল রেখা টানিয়া, প্রেমের অপার সিকুর মধ্যে সেই ভাবধণ্ডুকু ছাড়িয়া দেন। পদটির বক্তব্যে সীমাহীন আকুলতা, ভাব ও সুরে নিবিড় প্রশান্তি। এ তো সমুদ্র-পৃথিবীর মিলন নয় যে, তটের মাথাতে চাঞ্চল্য, এ আকাশ-সাগরের মালাবদল; অথবা তাহাও নয়, আকাশ নিভৃতি চাহিয়া, ঐ সাগরকে আকর্ষণ করিয়া উর্দ্ধে মৌন গিরিশিখরের স্তব্ধ প্রহরায় মানসসরোবরে মিলিতে চায়; যেন রাধিকার উৎসুক উন্নত মুখের উপর কৃষ্ণের নত নেত্র নাথিতে নাথিতে এক সময় স্থির হইয়া যায়, পরস্পরের দিকে চাহিয়া কৃষ্ণও তন্নয়, রাধাও তন্নয়—মুখে ভাষা নাই, প্রাণে কেবল তরঙ্গ—সেই অন্তরঙ্গ তরঙ্গধ্বনিকেই কবি যথাসম্ভব ভাষা দিয়াছেন। হেমসেতার রাত্রে শিশির ঝরার মত শব্দহীন শব্দ একটির পর একটি আসিয়াছে; ‘জাগিতে তোমাতে দেখি স্বপন সমান’—অনির্বচনীয় স্বপ্নলোকের দ্বার খুলিয়া বলরাম প্রস্থান করিলেন। ইহাই তাহার চরম কাব্যসিদ্ধি।

শেখর

বসশেখরের লীলাবৈচিত্র্যের রূপরেখা আঁকিতে গিয়া বৈষ্ণব কবি ভণিতায় নাম-বৈচিত্র্য সৃষ্টির প্রলোভন দমন করিতে পারেন নাই,—কখনো শুধুই শেখর, অধিকাংশ ক্ষেত্রে কবিশেখর, নব কবিশেখর, নূপ কবিশেখর, রায়শেখর. শেখর রায়। এত নাম অথচ ব্যক্তি এক। শুনিতেছি, আসল নাম দৈবকীনন্দন সিংহ। দৈবকীনন্দন ভাগ্যবান ব্যক্তি, যেখানে ভণিতায় নাম এক থাকিতেও কবিব্যক্তিত্বে দ্বিত্ব ত্রিত্ব, চতুস্ত্ব দেখিতে পাই, সেখানে ভণিতায় পার্থক্য, ভাষায় ভাসে ও ভঙ্গিতে পার্থক্য সত্ত্বেও কবি-অধৈতের প্রতিষ্ঠা ঘটয়াছে। এবং দৈবকীনন্দন কেবল নিজ প্রতিষ্ঠাভূমি অর্জন করেন নাই, সেই ভূমিতে দাঁড়াইয়া সাম্রাজ্যবিস্তারের বাসনাও রাখেন। এই ‘ছোট বিজ্ঞাপতি’ ‘বড় বিজ্ঞাপতি’র প্রতি ‘রাজ্যের হস্ত করে সমস্ত কাঙালের ধন চুরি’ জাতীয় ধিকারের সহিত দু’একটি হৃতপদ পুনরুদ্ধারের চেষ্টাও করিয়াছেন। ‘এ সখি, হামারি ছুখের নাহি ওর’ পদটি বড়র নয়, ছোটর রচনা। শেখর অথবা রায়শেখর নামে সাধারণ্যে পরিচিত এই কবির সম্বন্ধে সাহিত্যের ঐতিহাসিকের মতামত সঙ্কলন করিতে পারি। ডঃ হুসুমার সেন বলিতেছেন: “ষোড়শ শতাব্দীর শ্রেষ্ঠ কবিদের একজন ছিলেন কবিশেখর রায়। ইহার অনেকগুলি পদ এখন বিজ্ঞাপতির বলিয়া চলিতেছে। বাংলা ব্রজবুলি উভয়বিধ পদ রচনায় কবিশেখর প্রাবীণ্য দেখাইয়াছেন। ‘কবিশেখর রায়’ ইহার ছদ্মনাম। আসল নাম দৈবকীনন্দন সিংহ। গোপাল বিজয় কাব্যে কবি এই আত্মপরিচয় দিয়াছেন।

“কবিশেখর সুশিক্ষিত কবি। ইনি সংস্কৃতে ও বাংলায় কাব্য নাটক পাঁচালী ও পদাবলী রচনা করিয়াছিলেন। সংস্কৃতে লেখেন ‘গোপাল চরিত’ মহাকাব্য এবং ‘গোপীনাথ বিজয়’ নাটক আর বাংলায় লেখেন ‘গোপালের কীর্তন-অমৃত’ অর্থাৎ রাধাকৃষ্ণ পদাবলী এবং ‘গোপাল বিজয়’ পাঁচালী।

“কবিশেখরের গাঢ়বন্ধ ব্রজবুলি পদগুলি বিজ্ঞাপতির পদের সমকক্ষ। সেইজন্য ইহার অনেকগুলি ব্রজবুলি পদ এখন বিজ্ঞাপতির নামে চলিতেছে। বিজ্ঞাপতির নামে অধুনা বিখ্যাত ‘এ সখি হামারি ছুখের নাহি ওর’—এই উৎকৃষ্ট কবিতাটি কবিশেখরেরই রচনা। প্রচলিত পাঠের ভণিতা হইতেছে, ‘বিজ্ঞাপতি কহ কৈছে গোড়ায়বি হরি বিনে দিন রাত্তিয়া’। কিন্তু এখানে ভরা বাদল-নিশীথের কথা হইতেছে, ‘দিন

রাতিয়া' আসে কোথা হইতে ? আসল শুদ্ধ পাঠ হইতেছে 'ভণয়ে শেখর কৈছে বঞ্চব সে হরি বিম্ব ইহ রাতিয়া'। পীতাম্বরদাসের অষ্টমসর্বাধ্যায় (সপ্তদশ শতকের শেষ ভাগ) এই পাঠই পাই। ইহার অপেক্ষা পুরাণো পাঠ পাওয়া যায় নাই।

“কবির বিজ্ঞাপতি-খ্যাতি আজিকার নয়। ইহার সংস্কৃত কাব্য নাটক এবং বাংলা-ব্রজবুলি পদ ইহাকে জীবৎকালেই যশস্বী করিয়াছিল। কবিশেখর নাম ইনি বোধ করি অল্প বয়সেই পাইয়াছিলেন।.....”

“কবিশেখর ও কবিরঞ্জন দুইজন স্বতন্ত্র ব্যক্তি ধরিতে আমাদের আপত্তি আছে। দুই জনেই বৈষ্ণব, ক্রীষ্ণগুণাসী, রঘুনন্দনের শিষ্য। দুইজনেই ব্রজবুলি পদ লিখিয়াছেন একই রীতিতে। এতগুলি কাকতালীয়, যোগাযোগ বিশ্বাসযোগ্য হইতে পারে প্রামাণ্যস্তর থাকিলে। কিন্তু সে প্রমাণই বা কই।”

শেখর-কবির বিষয়ে অনেকগুলি তথ্য পাইলাম। মোটামুটি সেগুলি মানিতে আপত্তি নাই। কেবল বিজ্ঞাপতি-সংক্রান্ত মতামত আলোচনার অপেক্ষা রাখে। শেখর যদি ‘ছোট বিজ্ঞাপতি’ নামে নিজকালে খ্যাত হন, তবে ঐ খ্যাতি মূল বিজ্ঞাপতির সহিত কবিস্বভাবের ঐক্য সম্বন্ধে তাঁহার সময়ুগের স্বীকৃতি দেখাইয়া দেয়। কিন্তু যেহেতু বিজ্ঞাপতির ছোট বড় ভেদ করা হইয়াছে, সে কারণে ঐকালে নিশ্চয় উভয়ের প্রতিভার সামর্থ্যগত ভেদ মানিয়া লওয়া হইত। একজন প্রাচীন, অগ্রজজন অর্ধাচীন, —শুধু এই জন্মই একজন ‘বড়’, অগ্রজজন ‘ছোট’, এইরূপ হয় না। প্রতিভায় বড়—সমকক্ষ পর্য্যন্ত হইলে—অত্যাধিককালে শেখর যে উপাধি পাইয়াছিলেন, তাহা পরিণত বয়সে খসিয়া পড়িত। অগ্র বহু কবির ক্ষেত্রে তাহাই ঘটিয়াছে। তাই সেযুগের রসবুদ্ধি অন্ততঃ “কবিশেখরের গাঢ়বন্ধ ব্রজবুলি পদগুলি বিজ্ঞাপতির পদের সমকক্ষ”—এই মত সর্ব্বাংশে গ্রহণ করে নাই।

অবশ্য কেবল সে যুগের বিচার ধরিব কেন, উভয় কবিকে তুলানো চড়াইবার অধিকার এ যুগের সমালোচকের নিশ্চয় আছে। এ যুগেও কি আমরা কবিশেখরকে বিজ্ঞাপতির সমকক্ষ বলিতে পারি ? মানিতে হইবে, কবিশেখরের কতক পদ বিজ্ঞাপতির কতক সাধারণ পদের তুল্য, এমন কি চৈতন্যোত্তর যুগের পরিচর্য্যায় স্থান-বিশেষে অধিক মার্জিত মন্থণ। তথাপি প্রতিভার সমুন্নতির ক্ষেত্রে যখন আসি, দেখি, বিজ্ঞাপতির বহুসংখ্যক উৎকৃষ্ট পদের সহিত কবিশেখরের শ্রেষ্ঠ পদের কোনরূপ তুলনাই চলিতে পারে না। প্রশ্ন উঠিয়াছে বিজ্ঞাপতির একটি সর্ব্বোচ্চ শ্রেণীর পদ লইয়া। ঐ পদটি শেখরের প্রমাণিত হইলে বিজ্ঞাপতির মর্য্যাদাহানি অপেক্ষা শেখরের মর্য্যাদা-ক্ষীণিতি বিপুল রকমের ঘটয়া যায়। পদটিকে শেখরের বলিয়া প্রমাণ করা গিয়াছে কি ?

কবিধর্মের পক্ষে ইহার অবিমিশ্র বিজ্ঞাপতিত্ব ইতিপূর্বে বিজ্ঞাপতি-প্রসঙ্গে প্রদর্শন করিয়াছি। ডঃ সেনের মতামত এ ক্ষেত্রে অগ্রভাবে যাচাই করা যাক। তিনি বলিয়াছেন, ইহার সর্বপুরাতন পাঠে শেখরের ভণিতা আছে। যদি উহা সর্বপুরাতন পাঠও হয়, তথাপি উহাই কি সর্বপুরাতন উল্লেখ? পুঁথি অপেক্ষাকৃত অর্কাচীন হইলে কি কাব্যেরও অর্কাচীনত্ব স্বীকার করিতে হইবে? বাংলা সাহিত্যের সর্বাপেক্ষা প্রাচীন পুঁথি কি বাংলার প্রাচীনতম কাব্য? “প্রচলিত পাঠকে” ডঃ সেন বাতিল করিয়াছেন আর একটি কারণে—কবিতার আভ্যন্তর প্রমাণে; ডরা বাদল নিম্নীতের কথায় “রাতিয়া গোড়ায়বি” চলিতে পারে, “দিন রাতিয়া” নহে। সত্য নাকি? যেহেতু রাত্রির কথা হইতেছে, অতএব অসহ দিনযামিনীর কথা বলা চলিবে না, দিনটিকে সম্বন্ধে বাদ দিয়া বিস্তৃত রাত্রির কথাই বলিতে হইবে? রাধিকার বিরহের যন্ত্রণা কি শুধু ঐ রাত্রির জন্ত? এত খণ্ডিত, অব্যাপ্ত? দিনের কথা বলিলেই যদি অনৌচিত্য, তবে, অগ্র কাব্যের কথা তুলিব না, এই কাব্যেই “ভুবনভরি বরিধস্তিয়া” একবারে অচল; কারণ রাধিকার কি এইটুকু বোধবৃত্তি নাই যে তাঁহার ঘরের বর্ষাকে সমস্ত পৃথিবীর উপর অবলীলাক্রমে চাপাইলেন! আর যদি বলা যায়, প্রেমের আবেগে স্থান-কালে গোলমাল হইয়া গিয়াছে, তবে সেই গোলমালের মধ্যে “দিনরাতিয়া” এক স্বরে বলিলেই যত দোষ! বিপরীত পক্ষে, কাব্যের দ্বিতীয় পঙ্ক্তিতে দেখিতেছি, প্রিয়-শূন্য মন্দিরের জন্ত রাধিকার দুঃখ সমস্ত ‘ভাদরের’,—আর ‘মাহ ভাদর’ নিশ্চয় শুধু ভাদ্র রাতগুলি লইয়া নয়।

এই সকল কারণে বাঙালী কবির প্রতি আমাদের পক্ষপাত সত্ত্বেও মৈথিল কবির পদ হস্তান্তর সম্ভব বোধ করি না। শেখরকে প্রথম শ্রেণীর কবি বলিতেও বাধা আছে। তিনি বলরামদাসের সগোত্র না হইলেও স্বপঙ্ক্তির কবি, অর্থাৎ কাব্যের উচ্চ মধ্যবিত্ত।

বলরামের পদে আন্তরিক সরলতার যে পরিচয় পাওয়া যায়, তাহার নানা প্রতিবেশ-রূপ পূর্ব প্রবন্ধে লক্ষ্য করিয়াছি। শেখরকে আমরা চাতুর্যের কবি বলিতে পারি। অতি সরলার্থ বাক্যাংশও শেখরের কাব্যে সরল-ভাবার্থ নয়। সেই কারণে বৈষ্ণব কাব্যের কলাকুতূহল যে নবস্তম্ভ ভাষার মধ্যে আত্মপ্রকাশ করিয়াছিল, শেখরের আত্ম-প্রকাশের ভাষাও সেই ব্রজবুলি। তবে শেখর বলরামের অনন্যরূপ রূপ-সাধনা করিয়াছেন বলিয়া বলরাম ব্রজবুলি পদে যে রূপ সাধারণভাবে ব্যর্থ, শেখর বাংলা পদে সেরূপ নন।

শেখরের ব্যক্তি-পরিচয়ে তাঁহার বৈদগ্ধ্য সম্বন্ধে সন্দেহ থাকে না। সে মানস-

প্রকর্ষকে তিনি সর্ববিধ পদপর্ধ্যায়ে নিয়োজিত করিয়াছেন। আবার প্রধান রসপর্ধ্যায়-গুলি তাঁহার কাব্যপ্লেরণা নিঃশেষ করিয়া লইতে পারে নাই। কবি অপ্রধান রসপর্ধ্যায়ে প্রায়শঃ মনোযোগ দিয়াছেন। আমরা শেখরকে অপ্রধান রসপর্ধ্যায়ের শ্রেষ্ঠ কবি বলিতে পারি।

অপ্রধান রসপর্ধ্যায়গুলি কাব্যগ্রাহ্য হইবার কিছু কারণ আছে। প্রথমতঃ ইহাতে বৈচিত্র্যের সৃষ্টি। পূর্বরাগ, মিলন, মান, বিরহ, ভাবোন্মাদার রসসৌন্দর্য্য বিজ্ঞাপিত-চণ্ডীদাসের পর নিষ্কাশন করিতে একটি অধিক সাহসের প্রয়োজন। ঐ পথে স্বাচ্ছন্দ্য সহকারে অগ্রসর হইবার শক্তি কেবল বৃহৎ প্রতিভা ও অল্পবুদ্ধি সাধুলোকের। শেখর কোনদলেই পড়েন না। তাই রাধাকৃষ্ণ প্রেমলীলায় বৈচিত্র্য এবং ব্যাপকতা সৃষ্টি করাই তিনি নিরাপদ ভাবিয়াছেন। গভীরে যেখানে প্রাণ-হরণ নয়, বিচিত্রে সেখানে মনোহরণ তো হয়। দ্বিতীয়তঃ এই সকল অনভিজাত রসপর্ধ্যায় সৃষ্টির দ্বারা রাধাকৃষ্ণের প্রেমে অধিক মানবিকতার সঞ্চার করা যায়। এবং বাস্তবিক এই সকল ক্ষেত্রে প্রাকৃত আলোবাতাস অপ্রাকৃত সৌন্দর্য্যালোকের বেষ্টনী ভেদ করিয়া রাধাকৃষ্ণের অন্তঃস্পর্শ বেশী পরিমাণে করিয়াছে। সব বৈষ্ণব কবিই মর্ত্যজীবনের জবানীতে দিব্য জীবনবার্তা নিবেদন করিয়াছেন। কিন্তু মানবরস গোপনের একটা চেষ্টাও দৃষ্টিগোচর হয় : কোথাও ভাববিহ্বলতার আতিশয্য, কোথাও অলঙ্করণের মগিদীপ্তি, কোথাও কলারসের অতি-সূক্ষ্মতা। অপ্রধান রসপর্ধ্যায়ের রাধাকৃষ্ণ সেরূপ নহেন। ইহারা মর্ত্যালোকের এবং সেই মর্ত্যের নানা পরিবেশে নিজেদের স্থাপন করিয়া জীবনরস উপভোগ করিতে চান। রাধিকা বা কৃষ্ণ গোবিন্দদাসের কাব্যেও গুরুজনদের ফাঁকি দিয়া পরস্পর মিলিত হইয়াছেন ; কিন্তু সে যেন অলৌকিক সৌন্দর্য্যনিকেতনে। শেখরের কাব্যের ছলনা নিতান্ত লৌকিক।

প্রমাণ সন্ধানের চেষ্টা করা যাক। শেখর দেয়াসিনী মিলন, রাধাকৃষ্ণ মিলন, সূর্য্যপূজার ছলে মিলন, স্বয়ং দৌত্য, জলক্রীড়া প্রভৃতি বিষয়ে অনেক পদ লিখিয়াছেন। বৈষ্ণবপদস্থলভ গাঢ়বন্ধ লিরিক সৌন্দর্য্য ইহাদের মধ্যে সর্বত্র মিলে না। খুঁটিনাটি বর্ণনা এবং কাহিনীসৃষ্টির দিকে কবির সমধিক আগ্রহ। খুঁটিনাটির প্রতি মনোযোগ অনেকাংশে মঙ্গলকাব্যজাতীয়। কাহিনীর ধারাবাহিকতাও পর্ধ্যায়গুলিতে রীতিমত রহিয়াছে। শেখরের রাধাকৃষ্ণলীলায় কবি কাব্য ইহাতে এই পদগুলি সংগৃহীত কি না বলিতে পারি না। যাহা হউক এক্ষেত্রে গুরুজনদের প্রবঞ্চনা করিয়া রাধাকৃষ্ণের মিলিত হইবার পদ্ধতি একেবারে পার্থিব। কবির মিলনোৎসুক রাধাকৃষ্ণের প্রতি অল্পরাগ ও প্রতিবন্ধক গুরুজনদের প্রতি বিরাগ ছিল। অতএব নানা পদ্ধতিতে তাঁহাদের

বিভ্রান্ত করাইয়া অঐবধ মিলন ঘটাইয়া কবি যে কেবল কৃষ্ণরাধার স্তবসাধন করিয়াছেন তাহা নয়, এক প্রকার কোতুক স্বয়ং উপভোগ করিয়াছেন। বিজ্ঞানসন্দের হৃদয়পথে গোপন মিলন এখানে শাস্ত্রী-ননদিনীর নির্বোধ সংশয়ের ভিতর হৃদয় কাটিয়া ঘটিয়াছে।

শেখরের এই মানবজীবনপ্ৰীতি সৰ্ববস্থায় সৌন্দর্য্যসৃষ্টি করিতে পারে নাই। ইহার অসৌন্দর্য্যের ইতিহাস আমরা পরে, বাল্যলীলা-অধ্যায়ে পর্য্যবেক্ষণ করিব। কিন্তু কবির সকৌতুক স্ববসিক ও বিদগ্ধ মনের পরিচয় সম্পূর্ণ লওয়া হয় নাই। শেখরকে চাতুর্য্যের কবি বলিয়াছি। এই চাতুর্য্য অলঙ্কারের—ততোধিক ভাবভঙ্গির। কবি গভীর ভাবাবেগের উপর চপলতার পর্দাটুকু দোলাইয়া দেন। বাহিরের হাসির ছটায় ভিতরের অশ্রুজল শেখরের কাব্যে প্রায়শঃ চাপা থাকে।

শেখর বিজ্ঞাপতিপন্থী বলিয়া তাঁহাতে আলঙ্কারিক চাতুর্য্যের সবিশেষ প্রাচুর্য্য। রসসৌন্দর্য্যে সচকিত দু' একটি অংশ :

হেমজ্যোতি বরততী তমালের গায়।

তাহা দেখি তরল আঁখি বক্র করি চায় ॥

চন্দ্রমুখী ডাকি সখী বলে, দেখ কি।

কান্ন কোলে করি খেলে কোন্ রাজার ঝি ॥

প্রথম পঙ্ক্তি পাঠ করিয়া পাঠকচিত্ত উল্লসিত হয়,—রাধাকৃষ্ণের মিলিত মূর্তির এহেন “অম্লপাম” উপমা—পল্লবিনী লতা আর সঞ্চারিণী নয়, হেমজ্যোতি বরততী বেটনের তমাল খুঁজিয়া পাইয়াছে। হায়, তাহা নয়। আমরা ভাবিয়াছিলাম কৃষ্ণ-রাধা, শ্রীরাধা ভাবিয়াছেন কৃষ্ণ ও অন্ন নায়িকা,—শেখর এই বিশ্রমে হাসিয়া অস্থির :

শেখর কৃষি কহে হাসি ধনী অগেয়ান।

তমাল কোলে লতা দোলে আনে কহে আন ॥

বিপরীতের চমক নহিলে স্বাভাবিকের রস পাইনা, তাই রাধা বা কৃষ্ণের মাঝে মাঝে ঐরূপ ভুল হয়; প্রকৃতির মধ্যে প্রিয়-সৌন্দর্য্যের নিত্য উপমান খুঁজিবার এই একটু বিপদ :

দুহঁ মুখ হেরইতে দুহঁ ভেল ধন্দ।

রাই কহে তমাল মাধব কহে চন্দ ॥ (অজ্ঞাত)

আবার অন্ন বিপদও আছে। স্কন্দর-স্কন্দরী দেখিয়া মুগ্ধ চিত্তে উপমা সন্ধানের একটা অভ্যাস আমাদের আছে এবং সেই মুগ্ধতা বাড়িতে বাড়িতে যখন চিত্তের বড় বিগলিত অবস্থা, তখন রূপ রূপক হইয়া পড়ে, তখন আদ্য উপমেয় উপমানে ভেদজ্ঞান থাকে না।

কিন্তু সে তো আমাদের নিকট, উপমেরও কি ঐ অবস্থা হয় না কি ? কেবল হয় না ।
হওয়ার সমূহ বিপদও ভোগ করে :

নিজ করপল্লবে

অঙ্গ না পরাই

শঙ্কই পঙ্কজ ভাণে ।

মুকুরতলে নিজ

মুখ হেরি হৃদরী

শশী বলি হরইংগেয়ানে ॥

চন্দ্র-দর্শনে বিরহের বুদ্ধি, তাই বলিয়া রাধিকা যদি দর্পণে নিজ মুখদর্শন পর্য্যন্ত না করিতে পারেন তো কবির বিরুদ্ধে রাধিকাকে চন্দ্রমুখী বানাইয়া যন্ত্রণা দিবার অভিযোগ আসিবে ।

বাঁশী বাজে । কে বাজায় কুবি যেন সে প্রশ্নের উত্তর দিতে উৎসুক নন ।
ঐ “বাঁশী বাজে” কথাটিকে তিনি আক্ষরিক ভাবে লইয়াছেন—কিরূপে বাজে, অনবজ ধ্বনিগুণের সহিত তাহার ছন্দটুকু তুলিয়া ধরিতে তাঁহার যত চেষ্টা : বড় সফল চেষ্টা :

পরম মধুর মুখ

মুরলী বোলায়ত

অধর স্খাধরে ধরিয়া ।

গুরুত্বপূর্ণ রসপর্য্যায়গুলি যদি গ্রহণ করি, সেখানেও শেখর অশ্রু-হাসিতে মাথা, লাবণ্যে টলটল, কোঁতুকে উজ্জল—কিন্তু বেদনায় মগ্ন বা গভীরতায় স্থির কদাচিৎ ।
যেমন পূর্ব্বরাগে - ভাষার কি রঙ্গলীলা :

রহ রহ সখি

ভাল করে দেখি

আঁখি না পিছলে মোর ।

কৃষ্ণের চিত্রপট দেখিয়া রাধিকার বড় অহরাগ । রাধিকা বলিতেছেন,—‘আঁখি না পিছলে মোর’— কেন ? সখী একবার দেখাইয়াই চিত্র সকৌতুকে গোপন করিতেছে, এই কারণে, না কৃষ্ণের কৈশোর তহুঁ এমন তরল-মৃদু যে আঁখি বসে না । কৃষ্ণ-কান্তি রাধিকার ঐ লীলায়িত নিষেধটুকু ছাড়া আর কিসে এভাবে ফুটিত ? পদটির সমাপ্তি অবশ্য অশ্রুপূর্ণ তনয়তায়—লাবণ্যতরঙ্গিনী হইতে অশ্রুসমুদ্রে পড়িয়া ভাসিতে ভাসিতে নয়নতারা নয়নতরী—একসময় স্থির হইয়াছে ।

আক্ষেপাহ্নরাগের একটি পদে পরম দুঃখার্ভ চিত্তে রাধা আক্ষেপ প্রকাশ করিলেন, জানিনা ‘কি গুণে বাড়াইলা, কি দোষে ছাড়াইলা নবীন শিরীতি খানি’,—যখন হৃদন ছিল ভালবাসিতে, আজ সে ভালবাসা নাই অথচ ভালবাসার স্মৃতি আছে,—‘শব্দ-বণিকের করাত ঘেমন আসিতে যাইতে কাটে’ । এরূপ দুঃখ রাধিকা কোন একটি পদে

খানিক করেন বটে, কিন্তু পরেই ঐ অক্ষেপ অগ্র একটি পদে ব্যঙ্গের জ্বালা লইয়া ফুটিয়া ওঠে :

সেকাল গেল বৈয়া বন্ধু সেকাল গেল বৈয়া ।

আখি ঠারাঠারি মুচকি হাসি

কত না করিতে রৈয়া ॥

বেশের লাগিয়া দেশের ফুল

না রহিত কিছু বনে ।

নাগরীর সনে নাগর হৈলা

আর বা চিনিবা কেনে ॥

অনুভূতি যখন অতিগভীর নয়, আর বিচ্ছেদকে নাযকের ইচ্ছাকৃত অবহেলা ও প্রবঞ্চনা মনে হয়, তখন মনোভাবের অব্যর্থ প্রকাশ প্লেয়ে। অথচ ভাষায় যে আলোড়ন দেবিতেনি, তাহা দুঃখের টলটল অশ্রুর উপর ফুটিয়া আছে।

মিলন-রজনীর পরবর্তী প্রভাতচিত্র কবি আঁকিতেছেন ; গত রজনীর পানপাত্রের অবশেষ পুনরায় ঢালিয়া দিবার ইচ্ছা তাঁহার নাই। অতিশয়হীন বর্ণনায় এমন একটা স্নিগ্ধতা আছে যা প্রভাতের অনুরূপ :

দশরিশ নিরমল ভেল পরকাশ ।

সখিগণ মনে ঘন উঠয়ে তরাস ॥

আত্রে কোকিল ডাকে কদম্বে মধুর ।

দাড়িষে বসিয়া কীর বোলেয়ে মধুর ॥

দ্রাক্ষাডালে বসি ডাকে কপোত কপোতী ।

তারাগণ সহিতে লুকাই তারাপতি ॥

স্বামরা বৃন্দাবনে কিরূপ দ্রাক্ষা ফলে সে কুট প্রসন্ন করিব না, রাই-এর প্রতি শারীর প্রীতি সত্য বলিয়াই মানিব, কিন্তু সবচেয়ে উপভোগ করিব কৃষ্ণের প্রতি কবির পরিহাসটুকু, বড় স্নিগ্ধ, বড় মনোরম ; নাম-এক্যের স্বযোগ লইয়া কবি কৃষ্ণের মিতা হইয়া দাঁড়াইয়াছেন :

শেখর শেখরে কহে হাসিয়া হাসিয়া ;

চোর হয়ে সখ্যপারা রহিলে শুভিয়া ॥

ইহারও উপরে আছে। রাধিকার সরম ও স্নেহ, কোপ ও ক্রোধটুকু কবি একবার যে ভাবে ও ভাষায় প্রকাশ করিয়াছেন—সে রসিকতার তুলনা হয় না ; এ রসিকতা বাক্যগত নয়, ভাবগত—চারি পঙ্ক্তিতে একটি নিটোল রসচিত্র :

আর একদিন

সিনানে ঘাইতে

আঁচল ধরিল মোর।

* তথা দুই চারি

নাগরী আছিল

হাসিয়া হইল ভোর ॥

শেখরের প্রতিভাস্ফুর্তির যোগ্যভূমি সম্বন্ধে মনে প্রশ্ন জাগিবে। কোনো বিশেষ পদপর্যায়ের নম, —সকল পর্যায়েরই শেখরের রসপূর পদ রহিয়াছে—সাধারণভাবে চিত্ররস সৃষ্টির ব্যাপারে কবি সার্থকতা লাভ করিয়াছেন। এই চিত্রাঙ্কনদক্ষতা কোথাও বিরলবর্ণে উদ্ভিষ্ট বস্তুটিকে ফটোগ্রাফিক স্পষ্টতা দিয়াছে, কোথাও ধ্বনি ও ভাবরস যুক্ত হইয়া কল্পনাভরে কাঁপিয়াছে। বাস্তব অথবা অবাস্তব—শেখরের চিত্রে ইন্দ্রিয়ের উপভোগ কোথাও উপেক্ষিত হয় না। এইরূপ চিত্র শেখরের কাব্যের সর্বত্র। পূর্বে তাঁহার যে মানবিকতার কথা বলিয়াছি, তাহাই অবাস্তব রমণীয়লোকে “অসম্ভবচিত্রিত লতার উপরে অসম্ভবচিত্রিত পক্ষিপচিত্রিত শ্বেতপ্রস্তররচিত কক্ষপ্রাচীর মধ্যে” আত্মনির্কাসন বরণ করিতে বাধা দিয়াছে। আমরা সেই নানারূপী চিত্র-পরিচয় অল্পশব্দ গ্রহণ করিব।

বাস্তব হইতে তুলিয়া আনিয়া কাব্যে নিবেশিত করিলে যাহা হয় :

দণ্ডবৎ করি মায়

চলিলা যাদব রায়

আগে পাছে ধায় শিশুগণ।

ঘন বাজে শিঙ্গা বেণু

গগনে গোখর-রেণু

স্বর নর হ্রষিত মন ॥

আগে আগে বৎসপাল

পাছে ধায় ব্রজবাল

হৈ হৈ শব্দ ঘন রোল।

মধ্যে নাচি যায় শ্রাম

দক্ষিণে শ্রীবলরাম

ব্রজবাসী হেরিয়া বিভোর ॥

আর একটি পদ, সম্ভবতঃ শেখরের, চিত্ররূপে অধিকতর সার্থক :

বরজে পড়িল ধ্বনি

শিঙ্গা বেণু রব শুনি

আগে ধায় গোপনের পাল।

গোঠেরে সাজিল ভাইয়া

যে শুনে সে যায় খাইয়া

এহিতে না পারে কেহ ঘরে ॥

শুনিয়া মুখের বেণু

মন্দ মন্দ চলে দেখে

পুচ্ছ ফেলি পিঠের উপরে।

নাচিতে নাচিতে যায়

নৃপূর পঞ্চম গায়

পাচনি ফিরায় শিশুগণে ॥

শেখর একশ্রেণীর চিত্ররসাত্মক পদে সত্যকার শক্তির পরিচয় দিয়াছেন। তিনি অত্যন্ত direct উপায়ে ইন্দ্রিয়মুখী সৌন্দর্য ও পরিবেশ বর্ণনা করিতে পারেন। ভাষা সরল ও স্বচ্ছ, পঙ্ক্তি স্বাক্ষর, অলঙ্কারাদি প্রায়শঃ বর্জিত। কোথাও এই সকল চিত্র সনেটের সংক্ষিপ্ত ও গাঢ়বদ্ধতা পাইয়াছে, কোথাও তাহা বর্ণনা-বিষয় অল্পাধিক্য পদকাব্যের পক্ষে ঈষৎ দীর্ঘ। জলক্রীড়া বা নৌকালীলার কিছু পদ এই দিক দিয়া অনবত্ত। আধুনিক প্রেমকাব্যে প্রত্যক্ষ বর্ণনায় স্পন্দন-সৃষ্টিকারী কবিত্বের পূর্বসূচি :

জলকেলি সাধে ।

চলু ধনী রাধে ॥

উত্তরল তীরে ।

পহিরল চীরে ॥

যুবতী সমাজে ।

শোভে যুবরাজে ॥

সরসি সলিলে ।

পৈঠলি শিলে ॥

করিণীর সঙ্গে

করিবর রঙ্গে ॥

ছুঁ ছুঁ মেলি ।

করু জল কেলি ॥

সখিগণ নিপুণা ।

বেঢ়ল হঠিনা ॥

কেহ দেই নীরে ।

কেহ লেই চীরে ॥

কেহ দেই ভালি ।

কেহ বলে ভালি ॥

কাহ্ন মুখ মোড়ি ।

জল দেই জোরি ॥

কেহ কেহ হারি ।

কেহ দেই গারি ॥

ভাগি ভাগি দূরে

চমকি নেহারে ॥

কাহ্ন করে বেড়ি ।

ধরল কিশোরী ॥

সলিল অগাধা ।

লেই চলু রাধা ॥

কাহ্নক অঙ্গে ।

ভাসত সঙ্গে ॥

পাতল চীরে ।

বেকত শরীরে ॥

নিরখিতে কান ।

হানে পাঁচবান ॥

ধনী করি বৃকে ।

চুষ দেই মুখে ॥

ধনী কুচ জোড়া ।

হাস দেই মোড়া ॥

হরি পুরি সাধা ।

আনলি রাধা ॥

রাখলি তীরে ।

অলপহি নীরে ॥

এবং আর একটি, উৎকর্ষে কিঞ্চিৎ ন্যূন :

চললি নিতম্বিনী ধুম্না শিনানে ।
 সঙ্গিনী রঙ্গিনী গজগতি ভানে ॥
 তৈল হলদি কোই আমলকি নেল ।
 সুবরণ ঘট লেই কোই চলি গেল ॥
 জানি নাগরবর চলু ধীরে ধীরে ।
 আগুসরি আওল কালিনীতীরে ॥
 একলি কাহু খেলই জলমাছি ।
 সহচরী সনে ধনী, মিললি তাহি ॥
 আন জন কোই নাহি তব সাথ ।
 নাগর হেরি ধূনায়ত মাথ ॥
 কাহুক জল দেই কাহুক পঙ্ক ।
 কাহুক চুষই ধাই নিঃশঙ্ক ॥
 হেরি সব সহচরী চমকিত ভেল ।
 ঝটিতহিঁ ধাই রাই লেই গেল ॥
 কণ্ঠমগন জলে দুহুঁ একঠাম ।
 পুরল দুহুঁক মনোরথ কাম ॥

নৌকালীলায় বড়ই কবিত্বের অবকাশ। সুন্দরী রমণীরা একতালে নৌকা বাহিতেছে—সেই তাল পড়ে আর কবির হৃদয় তোলাপাড় করে ; সব কবির এক দশা। তাহার মধ্যে শেখরের এই অংশ :

নবীন গোপিনী সারি হাতে কেরোয়াল করি
 তরঙ্গী বাওই অবিরাম ॥
 ঝমকি ঝমকি পড়িছে কেরোয়াল
 রঙ্গিনীগণ চারু কঙ্কণ বাজে ।

শ্রীকৃষ্ণ একদা নারীর জটিল মনস্তত্ত্ব লইয়া বড় বিব্রত বোধ করিয়াছেন,—রাধার ঔষ্ক্যের সীমা নাই অথচ সরমের বাধা টুটে না ; কৃষ্ণ আগ্রহ দেখিয়া অগ্রসর হন, আবার প্রতিক্রিয়ায় প্রতিহত হইয়া ফিরিয়া আসেন—‘প্রাণ চায় চক্ষু না চায়, একি তোর দুস্তর লজ্জা’ :—

হামে দরশাইতে কতহুঁ বেশ কর
 হামে হেরইতে তহুঁ বাঁপ ।

স্বরত শিখারে

আজু ধনী আওলি

পরশিতে ধরহরি কাঁপ ॥

আকর্ষণ-বিকর্ষণের আবর্তে পড়িয়া কাহ্ন অস্থির, নারীর অর্ধেকটুকু কল্পনা, কিন্তু সে যে এত বড় দুঃস্থ কল্পনা, কে জানিত :

সকল কাজ হাম

বুঝলু বুঝায়লু

না বুঝলু 'অন্তর নারী'।

ছোট বিদ্যাপতি বড় বিদ্যাপতিস্থলভ এই ভঙ্গি ও ভাষায় তাঁহার বিশ্বয়টুকু প্রকাশ করিয়া যদি ক্ষান্ত হইতে পারিতেন। শেখরের মধ্যে একজন কবিচাতুরীর রসিক, আভাসে-ইঙ্গিতে ঠারে-ঠোরে কথা বলিতে ভালবাসেন, অগ্রজন কিন্তু বেশীক্ষণ অপেক্ষা করা পছন্দ করেন না, তাঁহার আহ্বান প্রত্যক্ষ, ভাষায় ছলাকলা নাই, উদ্দেশ্য অতি স্পষ্ট। রাধিকার মান হইয়াছে, কৃষ্ণ সম্ভবতঃ কিছুক্ষণ মানভঙ্গের চেষ্টায় ছিলেন, তারপর বার্থ হইয়া প্রেমের সোজা কথাটা সোজা ভাষায় খুলিয়া ধরিলেন :

তুহঁ না পরশ যদি মোয়।

পিরীতি কৈছে তব হোয় ॥

ইথে লাগি শরণ তোহোবি।

মানহ পরশ হামারি ॥

আধুনিক কাব্যরসিকেরা প্রেমকাব্যে আর মগুন-বিলাস পছন্দ করিতেছেন না। 'জগন্ময় নন্দবানি' তাঁহারা বড়ই আকাজ্জ্ব করেন। শেখরের পূর্বোক্ত পদগুলি তাঁহাদের তৃপ্তি দিবে; নিম্নোক্ত অংশটুকুও :

কুহ্মিত কুঞ্জে।

অলিকুল গুঞ্জে ॥

মলয় সমীরে।

বহে ধীরে ধীরে ॥

রসবতী সঙ্গে।

রসময় সঙ্গে ॥

ধনী করি বৃকে।

শুভলি স্থখে ॥

ধনী কুচ কলসে।

ঘুমল আলসে ॥

শেখরের চিত্ররস-প্রীতির সর্বোৎকৃষ্ট দৃষ্টান্ত হিসাবে রূপাহরাগ ও অভিসার গ্রহণ করা যায়। চিত্ররসিক যিনি, তিনি স্বভাবতঃ রূপরসিক। সে কারণে রূপাহরাগের অন্তর্ভুক্তি বুঝি, কিন্তু অভিসার? অভিসারে যে চিত্রবল, চলৎশক্তি প্রাণ। আবার শেখর অভিসারের অগ্রতম শ্রেষ্ঠ কবি। এই স্থানে আমাদের মনে রাখিতে হইবে, শেখরের অভিসার গোবিন্দদাস-গোত্রীয় নয়। গোবিন্দদাসের অভিসারেও রূপ আছে। কিন্তু সে চলকু রূপ। শেখর অভিসার বাদ দিয়া অভিসারিণী নারীটিকে

দেখিয়া এবং, আকিয়া বিভোর। ত্রিচৈতন্যের দুঃখ-দুর্গম ক্লেশ-লক্ষ্য পথাতিক্রমের পটভূমিকায় বৈষ্ণব যুগে যথার্থ অভিসার বলিতে বাহা বুঝি, শেখরের সেরূপ পদ আছে কিনা সন্দেহ। অভিসারের ভূমিকায় স্থাপন করিয়া রাধার বিমোহন রূপ-রসাস্বাদই কি কবির অভিপ্রের্ত নয়? অভিসারের পদ উদ্ধৃত করিলে ইহা প্রমাণিত হইবে। তৎপূর্বে রূপানুসারের পদগুলি লক্ষ্য করিব। কবির রূপানুসার খোলে কোথায়?—যদি রাধার রূপ হয় কৃষ্ণদেবে, যদি কৃষ্ণের রূপ হয় রাধা দেবে; যদি মিলিত রূপ হয়, তবেই কবির দেখা,—রাধার চোখে কৃষ্ণকে বা কৃষ্ণের চোখে রাধাকে নয়,—স্বচক্ষে রাধাকৃষ্ণের যুগলমুর্তি। কবি বারবার যুগলমুর্তি নিরীক্ষণের প্রলোভন সংবরণ করিতে পারেন নাই। তার মধ্যে একটি শ্রেষ্ঠ দর্শন এইরূপ :

হিরণ্যকিরণ • , আধ বরণ

আধ নীলমণি জ্যোতি।

আধ গলে বন- মালা বিরাজিত

আধ গলে গজমোতি ॥

আধ শ্রবণে মকর কুণ্ডল

আধ রতন ছবি।

আধ শিরে শোভে ময়ূর শিখণ্ড

আধ শিরে দোলে বেণী ॥

কনক কমল করে ঝলমল

ফণী উগারয়ে মণি।

বিশ্বনাগরিক ত্রিগৌরাক্ষ নদীয়া-নাগররূপে শেখরের রূপ-শিলাসিঁদুর মিটাইয়াছেন :

উরসি পর নানা মণিহার

মকর কুণ্ডল কানে।

মধুর হাসনি তেরছ চাহনি

হানয়ে মরম বাণে ॥

বিনোদ বসন ছলিছে লোটন

মল্লিকা ঝালতী বেড়া।

নদীয়া নগরে নাগরীগণের

ধৈর্য ধরম ছাড়া ॥

শেখরের রূপানুসারের শ্রেষ্ঠ অংশ বোধ হয় অভিসার। পূর্বে বলিয়াছি, শেখরের অভিসারে গতি নাই, তাহা পরিবেশ পরিবর্তনে রূপ-সন্ভোগের স্বাদস্বাদ। কথাটি একটু

সংশোধন করিব; অভিসারে যদি গতির বাস্তব বিরূতি না থাকে, তথাপি একটা মানসিক গতি আছে। সেই মানস বেগই এই চিত্রগুলিতে অতিরিক্ত প্রাণ-সংযোগ করিয়াছে।

গতির যে বাস্তব বিরূতি নাই, তাহা শেখরের অভিসার-পদ পরীক্ষা করিলে বোঝা যায়। অভিসারের ভাব আছে অর্থচ যথার্থতঃ রূপাহুরাগের পর্যায়ে পড়ে এরূপ একটি পদে রাধিকার বর্ণনা :

চলিতে না পারে যৌবন ভরে ।

ধাধসে ধরিল সখীর করে ॥

নবীন কামিনী কনকলতা ।

এ তিন ভুবনে তুলনা কোথা ॥

যৌবনভারনত রাধিকার ছবি। ‘পর্যাপ্ত পুষ্পস্তবকাবনম্রা’র পাশে এ চিত্র তরল। আমাদের প্রয়োজন কেবল ঐ কথাটিতে - ‘চলিতে না পারে যৌবন ভরে’। শেখরের অভিসারের রাধিকা কোনমতে চলিতে পারে নাই, যাত্রার প্রস্তুতি মাত্র করিয়াছে, আর শেখর সেই আকর্ষিত চাকুলোর রূপটি প্রাণভরে দেখিয়াছেন। যেমন বৈষ্ণব কাব্যে বিরল কৃষ্ণের অভিসারের একটি চিত্র :

জানল ঘর পর নিদে ভেল ভোর ।

শেজ তেজি উঠি নন্দকিশোর ॥

সঘন গগনে নখতর পঁতাতি ।

অবধি না পাওত ছুটত রাতি ॥

জলধর রুচিহর শ্রামর কাঁতি ।

যুবতীমোহন বেশ ধরু কত ভাতি ॥

ধনী অহুরাগিণী জানি সজ্জান ।

ঘোর আক্টিয়ারে তব করল পয়ান ॥

পরনারী পিরীতিক ঐছন রীত ।

চলিল নিভৃত পথে না মানয়ে ভীত ॥

রাত্রির স্তরগভীর মূর্তি সংক্ষেপে অতি চমৎকার। তত্পরি আর একটি প্রায় অপরিচিত বার্তা—প্রেমাবেগে কৃষ্ণের নিশীথ শয়নেও টান পড়ে, তাঁহাকে রাধিকারই মত ছুটিয়া বাহির হইতে হয়। জামরা জানি, রাধিকাই কেবল “ঘর কৈলু বাহির” কিন্তু বাহার আকর্ষণে ঐ কুলনাশী ব্যাপারটুকু ঘটে তিনিও যে “বাহির কৈলু ঘর”—সেই বিপরীত পক্ষটি আমাদের দৃষ্টি যেন এড়াইয়া যায়। কবি দৃষ্টির পক্ষপাত দূর করাইবার প্রচেষ্টার ধস্তবাদের পাত্র।

কিন্তু আমাদের আলোচ্য যে বিষয়—সংবাদ অনিলাম, ত্রীকৃষ্ণ নির্ভয় হৃদয়ে অভিসার করিয়াছেন;—কিরূপে ? জানি না। কবি সেকথা জানান নাই। আর একটি উৎকৃষ্ট অভিসারের পদ—সিন্ধু ধ্বনিমস্ত্রে যাহার সূচনা—

কাজর রুচিহর রজনী বিশালা ।
 তছুপর অভিসার করু ব্রজবালা ॥...
 উনমতি চিত অতি আশ্রতি বিথার ।
 গুরুয়া নিতম্ব নব যৌবনভার ॥
 কমলিনী মাঝে খিনি উচ কুচজোর ।
 ধাধসে চলু কত ভাবে বিভোর ॥...
 অঙ্গক আভরণ বাসয়ে ভার ।
 নৃপুং কিকিণী তেজল হার ॥
 লীলাকমল উপেখলি রামা ।
 মম্বরগতি চলু ধরি সখী শ্রামা ॥

কয়েকবার চলার কথা বলা হইয়াছে বটে কিন্তু সে শুধু বক্তব্যে, রাধিকার পক্ষে চলা যে অসম্ভব কবি তাহাই ভাবে প্রমাণ করিতে চাহিয়াছেন। পথের নানা বিঘ্নের জন্ত রাধিকার গতি-নিবারণ নয়,—গোবিন্দদাসের রাধিকা তো বাঁধনকে সাধন করিয়াছে—কণ্টক নয়, কৰ্দম নয়, বিষধর অথবা বিষদৃষ্টি গুরুজন কিছুই নয়—রাধিকার যৌবন-পুঞ্জিত লাবণ্যমণ্ডিত দেহই চলিবার পক্ষে পরম প্রতিবন্ধক। কবি যৌবনভারাত্মক রাধিকাকে পথে নামাইয়া যেন কোতুকভরে—ততোধিক সতৃষ্ণ নয়নে—চাহিয়া আছেন; এ দেহ স্থির থাকিয়া কবিকে রূপতৃষ্ণি দিয়াছে, যদি অস্থির রূপে তাঁহার সৌন্দর্য্যপিপাসা অধিকতর চরিতার্থ করে। নচেৎ এক পঙ্ক্তিতে বলিতেছেন,—‘উনমতি চিত অতি আশ্রতি বিথার’—পরের পঙ্ক্তিতে এই বলিয়া প্রমাণ করেন যে, তৎসঙ্গেও চলা কঠিন—‘গুরুয়া নিতম্ব নব যৌবনভার’? বলিলেন বটে—‘ধাধসে চলু কত ভাবে বিভোর’ কিন্তু পূর্ব পঙ্ক্তি পাঠ করিলে তাহা যে বিশ্বাসযোগ্য নয় বুঝিতে পারি—‘কমলিনী মাঝে খিনি উচ কুচজোর।’ যৌবনভারের সঙ্গে ছিল অলঙ্কারভার—নৃপুং কিকিণী হার লীলাকমল সব ত্যাগ করিয়াও হায়, পদের শেষে দেখি ‘মম্বর গতি চলু ধরি সখী শ্রামা।’ ইহা কিরূপ অভিসারের পদ?

এইবার শেখরের ও তৎসহ সমগ্র বৈষ্ণব কাব্যের একটি শ্রেষ্ঠ অভিসারের পদ উদ্ধৃত করি :

গুণনে অব ঘন মেহ দারুণ
 সঘনে দামিনী বলকই ।
 কুলিশ পতন শবদ বনবন
 পবন খরতর বলগই ॥
 সজনি আজু দুয়দিন ভেল ।
 হামারি কাস্ত নিতাস্ত আগুসরি
 সকেত কুঞ্জহি গেল ॥
 তরল জলধর বরিখে ঝরঝর
 গরজে ঘন ঘন ঘোর ।
 শ্যাম নাগর একলি কৈছনে
 পহু হেরই মোর ॥
 সোড়রি মঝু তহু অবশ ভেল জহু
 অখির থর থর কাঁপ ।
 মঝু গুরুজন নয়ন দারুণ
 ঘোর তিমিরহি কাঁপ ॥
 তুরিতে চল অব কিয়ৈ বিচারহ
 জীবন মঝু আগুসার ।
 রায় শেখর বচনে অভিসর
 কিয়ৈ সে বিধিনি বিথার ॥

পদটির কাব্যসৌন্দর্য্য অধিক ব্যাখ্যার প্রয়োজন নাই। ইহা সত্যসত্যই অভিসারের পদ। অভিসারের ছন্দবেশে রূপাহুরাগের নয়। এখানে আমরা রাধিকা বা কৃষ্ণের রূপের কোন বর্ণনা পাই না। পদটি সমগ্রতঃ রাধিকার মানস-অবস্থার প্রকাশ। এবং সেই মন যাহা প্রিয়জনকে ঝঙ্কারিবে অগ্রসর দেখিয়া অস্থির হইয়া উঠিয়াছে। অভিসারের প্রাণাবেগ ইহাতে যথেষ্ট পরিমাণে অহুভূত এবং সেই আবেগ একটি পঙ্ক্তিতে সংহত হইয়া বিরল কবিবচনের রূপ ধরিয়াছে—“তুরিতে চল অব কিয়ৈ বিচারহ জীবন মঝু আগুসার।” ইহাতে ধ্বনিগুণ প্রভূত ও বর্ধার পটভূমিকায় রচিত অন্ত্যান্ত উত্তম বৈষ্ণব পদের সহিত সমকক্ষতা দাবী করিতে পারে।

এই সকল কথা সত্য এবং যেখানে জীবন আগুসার সেখানে দেহ চলিল কি না তাহা বিচার্য্য নয়, কারণ যথার্থতঃ মনই চলে। তথাপি বৈষ্ণব অভিসারের পদে একটা দাহ পথচলার ইতিহাস আছে। সেটুকু বিস্তৃত হওয়া যায় না। তীব্র মানস-

গতি যদি তীব্র দেহগতির মধ্যে ঢালিয়া দেওয়া না যায়, তবে উহা অল্প পদপর্যায়কে অলঙ্কৃত করিলেও যথাযথ অভিসারের পদ হয় না। এ ক্ষেত্রে কি “তুরিতে চল অব” — শুধু এইটুকুই পাই না? মন চলিলেও শেখরের কাব্যে দেহ চলিতে চায় না, অর্থাৎ শেখর পূর্ণাঙ্গ অভিসারের কবি নহেন। বর্তমান পদটিতে চিত্ররসে একটু অধিক পরিমাণে ভাবরসের মিশাল ঘটিয়াছে এই পর্যন্ত।

সর্বশেষ প্রসঙ্গরূপে শেখরের বাল্যলীলা ও বাৎসল্যরসের আলোচনায় আসিতে পারি। এই ক্ষেত্রে তিনি অত্যন্ত বিশিষ্ট কবি বলিয়া খ্যাত। কিছু কিছু উল্লেখযোগ্য পদ সে খ্যাতি সমর্থন করিবে। চিত্ররসের দৃষ্টান্ত হিসাবে পূর্বোক্ত কৃষ্ণাদির গোষ্ঠ-গমনের চিত্রটি স্মরণ করিতে বলি। “জিহ্বিত কুঞ্জর গতি মন্থর” কৃষ্ণকে “ভায়া ভায়া” বলিয়া ডাকিতে শুনিয়া বৈষ্ণবের ক্রী স্মৃৎ। অল্প একটি পদে প্রভাত চিত্র—চন্দ্রাস্ত এবং সূর্যোদয়—সখারা গৃহদ্বারে অথচ কৃষ্ণ নিদ্রাচ্ছন্ন—যশোদার কৃষ্ণকে ডাকিবার ভঙ্গিটুকু অবিকল বাঙালী গৃহজীবন হইতে উদ্ধার করিয়া কবি পরিশ্রম বাঁচাইলেন :

কাহে নাহি ভাঙত নয়ানক ঘুম।

আওত ব্রজশিশু করতহি ধুম ॥

একটি পদে শয্যা ছাড়িয়াই গত রাত্রির শেষ স্মৃতি চন্দ্রের জন্ত কৃষ্ণের কান্না। ইহাতে মাধুর্য্য সৃষ্টির চেষ্টা আছে। অবশ্য এ বিষয়ে তুলনীয় একটি শান্ত পদ কাব্য্যাংশে উৎকৃষ্ট।—

অতি অবশেষ নিশি

গগনে উদিত শশী—

বলে উমা ধরে দে উহারে।.....

আমি কহিলাম তায়

চাঁদ কিরে ধরা যায়।

ভূষণ ফেলিয়া মোরে মারে ॥

প্রভাতে উঠিয়া চাঁদের জন্ত কৃষ্ণের কান্নায় কবিচাতুরীই অধিক। ইহাতে বাস্তবরস নাই। কিন্তু উমা গগনাঙ্কনে সত্ত চন্দ্রোদয় দেখিয়া তবে চাঁদ ধরিতে চাহিয়াছে। তমিস্রালুপ আকাশপ্রান্ত উদ্ভাসিত করিয়া সহসা চন্দ্রোদয় এবং তাহা দেখিয়া—ঐ দুর্লভ বস্তুটির জন্ত—বিনিদ্র দ্রুত কণ্ঠটির অস্থির আকাজক্ষা—ইহাতে পরমাস্বাদ্য রসসৃষ্টি। যদুনাথদাসের যশোদা যখন বলেন, “চাঁদ মোর চাঁদের লাগিয়া কান্দে”—তখন সেখানেও কোন অস্বাভাবিকত্ব নাই, কারণ আকাশের চাঁদ ও কোলের চাঁদকে এক করিয়া যাঁহা দেখিয়াছে, তাহার নাম মাতৃহৃদয়—তাহা ঐরূপই

দেখে। বলরামদাসের ‘অম্লরূপ’ একটি পদে শেখর মাতৃচিন্তের আর্থিকে সয়ল ও মর্যম্পর্শীরূপে প্রকাশ করিতে পারিয়াছেন :

রাম পানে চায় রাণী গোপাল পানে চায় ।

কি বলে বিদায় দেব মুখে না বাহিরায় ॥

সকালে আসিহ গোপাল দেখুগণ লইয়া ।

অভাগিনী লইল তোর চাঁদমুখ চাহিয়া ॥

“রাণীর চরণধূলি সন্ডে লইয়া শিরে” যখন বাহির হইয়া পড়িল তখন শেষ পণ্ডিত্তিতে শেখর তাঁহার মানবরস এবং বস্ত্তপ্রীতির পরিচয়টি শেষ বারের মত জানাইয়া দিলেন :

শেখর কহয়ে হিয়া সম্বরিতে নারে ।

(রাণী) পাছু পাছু গমন করিল কুতূবুরে ॥

এতৎসঙ্গেও শেখরের বাল্যলীলা ও বাৎসল্যের পদ সম্বন্ধে একটু গুরুতর আপত্তি উত্থাপন করিব। শেখর তাঁহার বাল্যলীলার পদগুলিতে একটু অধিক পরিমাণে আদিরস ঢালিয়াছেন। বাল্যলীলা বলিতে আমি গোষ্ঠলীলা পর্য্যন্ত ধরিয়াছি। রাধাকৃষ্ণের প্রেম স্বরূপতঃ না হইলেও নামতঃ কিশোর-কিশোরীর প্রেম। অতএব গোষ্ঠগত কৃষ্ণ-রাধার প্রণয়লীলা প্রদর্শন অমূল্য নয়। আমরা তাহা মানি। যখন বৃন্দাবনের কিশোর রাখাল ও কিশোরী রাজকুমারীর মধ্যে আকর্ষণ-বিকর্ষণের পালা চলে,—তাহা যদি নিভুতে ঘটে-তবে আপত্তি করি না,—কিন্তু ঐ প্রণয়লীলায় কৃষ্ণ-সখাদের অংশগ্রহণ কি প্রেয়ঃ? অন্ততপক্ষে তত্ত্বতঃ নয়। কারণ সখ্যরস মধুররসের অনেক পূর্ববর্তী। সখ্যের পর বাৎসল্য, বাৎসল্যের পর মধুর। সখ্যে সম্ভ্রমশূন্যতা থাকিলেও মধুররসের পোষক হইবার পক্ষে একটি মানসিক বাধা আছে। বৃন্দাবনের একমাত্র পুরুষ কৃষ্ণের এই একান্তলীলায় আমরা অগ্র পুরুষের সাহচর্য্য চাই না। রাধা-সখাদের কথা স্বতন্ত্র, কারণ তাঁহারা মধুররসের সহচরী।

অবশ্য যেহেতু গোচারণকালে রাধাকৃষ্ণের রসলীলার একটা অংশ সম্পন্ন করাইতে হয়, সে কারণে কেবল শেখর নন, অগ্র কয়েকজন বৈষ্ণব কবিও অন্তরঙ্গ সখাদের এই লীলাপর্য্যায় হইতে সম্পূর্ণ দূরে রাখিতে পারেন নাই। স্ববল বড় অন্তরঙ্গ। স্ববলকে লইয়া কৃষ্ণ অগ্র সকলের নিকট হইতে প্রায়ই নিভুতে গমন করেন। “শিশু পশু নিয়োজিয়া স্ববল মঞ্চলৈ লৈয়া বাহির হইল নটরায়”—একথা কেবল শেখর বলেন না, গোবিন্দদাসেরও অম্লরূপ কথা—“আনহি চল করি, স্ববল করে ধরি, গমন করল বনমাহি।” স্ববলকে লইয়া কেবল সরিয়া যাওয়া নয়, ভাব-আন্বাদনও আছে। শেখরের স্ববল দুঃস্বাদনরত কাছকে ঘিরিলে পাইয়া প্রসন্ন করেন :

পুছত স্ববল হেরিয়া মুখ ।

কি ভেল আছুক রজনী স্মৃথ ॥

‘এবং জনৈক অজ্ঞাতনামা কবির স্ববলকে কৃষ্ণ “স্ববল মিতা হে, কি কব সে সব রঙ্গ” বলিয়া গত রজনীর মিলনের বিস্তৃত বিবরণ পর্য্যন্ত দিয়াছেন । গোষ্ঠপর্য্যয়ে কৃষ্ণের চিত্তচাক্ষুর্যের আরো দু’ একটি উল্লেখ—কৃষ্ণ দুগ্ধ-দোহন করিতেছেন, এমন সময় :

রাইরূপ দেখি বিভোর হইয়া ।

দোহনের ছাঁদ পড়ে আউলাঞা ॥

আর একবার :

খেলা রসে ছিল কানাই, শ্রীদামের সনে ।

হেনকালে রাধাক্তে পড়িয়া গেল মনে ॥

আপনার দেখুগণ সঙ্গিগণে দিয়া ।

রাধা বলি বাজায় বাঁশি ত্রিভঙ্গ হৈয়া ॥

উপরের দৃষ্টান্তগুলিতে দেখা যায়, সখ্য রসের সহিত কোন কোন স্থলে মধুর রসের মিশ্রণ ঘটয়াছে । এই মিশ্রণ সর্ব্বাংশে অভিপ্রেত নয় । গোষ্ঠ-পর্য্যয়ে রাধাকৃষ্ণের পূর্ব্বরাগ ও মিলন সংক্রান্ত ব্যাপারের একটা অবকাশ আছে বটে, কিন্তু বৈষ্ণব কবিরা এই দুইটি রসকে পৃথক রাখিতে চেষ্টাও করিয়াছেন । কারণ সমকালে ঘটিলেও সখ্য ও মধুর—এই দুই লীলালোক সম্পূর্ণ ভিন্ন । একটি একেবারে অন্তরঙ্গ, অপরটি বহুলাংশে বহিরঙ্গ । সখ্যের কৃষ্ণ ও মধুরের কৃষ্ণে দুস্তর ব্যবধান । বয়সে কিশোর হইয়াও সখ্যে কৃষ্ণ বালকাদিক এবং মধুরে পূর্ণ নায়ক ।

বৈষ্ণব পদ-সাহিত্যে তাই সাধারণতঃ এই দুই রসের সংমিশ্রণ দেখা যায় না । শেখরই উল্লেখযোগ্য ব্যতিক্রম । শেখরের যে বাস্তবতা ও মানবিকতার প্রশংসা করিয়াছি, তাহাই এই ভাব-বিপর্য্যয়ের জন্ত দায়ী মনে হয় । গোষ্ঠে যদি রাধাকৃষ্ণ পরস্পর-দর্শনে আকুল হন, তবে উপস্থিত সকলকে, অন্ততঃ ঘনিষ্ঠদের, সে চাক্ষুর্য্যে অনবহিত রাখা যায় না । শেখর তথ্যের বাস্তবতা ও সত্যের বাস্তবতায় গোল বাধাইয়াছেন ।

গোলযোগ সর্বাধিক বাৎসল্যে । ‘সেখানে বাস্তবিক রসভাস । বাৎসল্যে মধুর রসের মিশ্রণ একেবারেই চলে না । সেরূপ করিলে বাৎসল্যের স্নিগ্ধতা নিরতিশয় কটু হইয়া পড়ে । সেই তিক্ততা শেখরের বাৎসল্যের পদে আছে ।

শেখর-রচিত বাৎসল্যের পালাজাতীয় ধারাবাহিক কয়েকটি পদে যশোদা কর্তৃক কৃষ্ণসহ রাখাল বালকদের ভোজন করাইবার একটি বিবরণ পাই । যশোদা রাধিকাকে

পতিগৃহ হইতে আমন্ত্রণ ধরিয়া আনিয়াছেন বন্ধনে সহায়তার জন্ত, কিন্তু শুধুই বন্ধনে সহায়তা? কাব্যরূপে উৎকৃষ্ট না হইসেও আমরা কিছু কিছু উদ্ধৃত করিব। সখাসঙ্গে ভোজনে বসিয়া কৃষ্ণ রাধাকে দেখামাত্র অচেতন; তখন :

অরুচি দেখিয়া আকুল হইয়া

কহয়ে নন্দের রাণী ।

রাধা রসবতী কপূর মালতী

তোমারি লাগিয়া আনি ॥

তুমি না খাইবে রাই না আসিবে

স্বরূপ কহিছ তুতারে ।

এবং :

তোমার কারণ এসব পকান

পাঠায় রাজার ঝি ।.....

তোমার ভোজন শুনিয়া তখন

রাধিকা পাওব স্থখ ॥

কৃষ্ণের উপর রাধিকার প্রভাবের কথা যশোদা বেশ জানেন দেখিতেছি, অথচ উভয়ের এই আকর্ষণ অবৈধ, ইহা লইয়া পাড়া-প্রতিবেশী কানাকানি করে, সে বিষয়েও তিনি সচেতন। যথা : রাধিকাকে সাজাইবার পর যশোদার উক্তি :

আমার জীবন তোমরা দুজন

দুখানি আখির তারা ।

ব্রজরাজ মন জানিবা এমন

সে জন আমারি পারা ॥

এ ঘর করণ তোদের কারণ

শুনহ রাজার ঝি ।

ধাতার মাথায় পড়ুক বজ্র

আর না বলিব কি ॥

আর কিবা কহ তোমা হেন বহু

নাহিক আমার ঘরে ।.....

গদ গদ স্বরে রাণী কহয়ে বিষাদ বাণী

ধরিয়া রাধার ছুটি করে ।

কৃত্তিকাসমান হেন আমারে জানিবাঁ তেন
 সে ঘর এ ঘর সব তৌরে ।
 কি আর করিব সাধ সকলে পড়িবে বাদ
 দিনেক রাখিতে নারি তোমা ।
 এমনি বিষম লোক জীয়ন্তে পাড়য়ে পোক
 তিলেক নাহিক কই ক্ষমা ॥

রাধাকে পুত্রবধূরূপে না পাইয়া তাঁহার প্রচণ্ড দুঃখ, ততোধিক দুঃখ বোধহয় পুত্রের যন্ত্রণায়। পুত্রের সেই বঞ্চিত জীবনের দীর্ঘশ্বাস থামাইতে কি তিনি মাঝে মাঝে রাধিকাকে ডাকিয়া আনেন? মাতাকে প্রেমের দূতী বলা অতি কদর্য, কিন্তু সূক্ষ্মভাবে কি সেই দূতীর মানসিকতা যশোদারূপে সক্রিয় নাই—বিশেষতঃ উদ্ধৃত পদগুলিতে? ইহা চরমে উঠিয়াছে, যখন দেখি যশোদা কৃষ্ণের সম্ভোগ চিহ্নগুলিকে ভুল অর্থে ব্যাখ্যা করিতেছেন। যশোদা কি এতই মুগ্ধা—অন্ততঃ পূর্বে তাঁহার যে মনোভাবের পরিচয় পাইয়াছি, সেই পটভূমিকায়? এত অল্প বয়সে সম্ভবতঃ কৃষ্ণের পরিপক্বতা বুঝিতে যশোদা অক্ষম—কবি এইরূপ মনোভাব জাগাইতে সচেষ্ট হইয়াছেন; কিন্তু সেই সরলা বিভোরা মাতাকে যশোদার মধ্যে শেখর ফুটাইতে পারেন নাই বলিয়া, তাঁহার ঐ ব্যাখ্যা কপটতা মনে হয়।

শেখরের কাব্য সম্বন্ধে যে আলোচনা হইল তাহাই যথেষ্ট মনে হয়। অপেক্ষাকৃত অপরিচিত কবি বলিয়া তাঁহার কাব্যের বিস্তৃত উদ্ধৃতি দিতে হইয়াছে। তাঁহার সামর্থ্যের অবকাশ এবং অভাব উভয়ই দেখিয়াছি। এই পরিচয় হইতে প্রতীয়মান হয়, বৈষ্ণব পদঙ্গতে তিনি সাহসিক কবি। তাঁহার বিগ্ধা এবং বৈদগ্ধ্য যেমন প্রচলিত কাব্যরীতির রসসৌন্দর্য যথাসম্ভব নিকাশন করিতে উৎসাহিত করিয়াছে, তেমনি এমন একটি স্বাধীন চিন্ততা দিয়াছে, বাহা প্রথালুগত্যের মত প্রথাপরিহারেও বিশ্বাস করে। প্রথা পরিহার করিলে কাব্য উৎকর্ষ লাভ করে আবার করেও না। শেখরে উভয় অবস্থাই দৃষ্টিগোচর হয়। আরো একটি পরিচয় লাভ করি,—শেখর বৈষ্ণব কবি হইলেও ভক্ত কবি নহেন। ভক্তির ব্যাকুল দৃষ্টিক্ষেপ না করিয়া জীবনরসিকের রস-পিপাসা ও কোতূহল লইয়া রাধাকৃষ্ণলীলাকে তিনি নিরীক্ষণ করিয়াছিলেন। শেখরের রাধাকৃষ্ণ মুখ্যতঃ মানবমানবী। সংশয় না রাখিয়াই বলা চলে “শুধু বৈকুণ্ঠের তরে” শেখরের সঙ্গীত নহে, তাহাতে মানব-সংসারের রীতিমত অংশভাগ আছে।

কৃষ্ণদাস কবিরাজ

বৃন্দাবনদাস ও কৃষ্ণদাস

শ্রীচৈতন্যের আবির্ভাবের অব্যবহিত পরে এক অভূতপূর্ব চিন্তাজাগরণের স্রোত বাংলা দেশকে প্রাবিত করিয়াছিল। কাব্যে সঙ্গীতে সাধনে জীবনে সেই প্রাণোন্মাদনা যে রূপ এবং স্বরূপে আত্মপ্রকাশ করিয়াছিল, তাহাকে আমরা এক যুগের সম্পদ-শ্রেষ্ঠ বলিতে পারি।

ভারতীয় ভাষা-সাহিত্যে অ-পূর্ব জীবনী, সাহিত্য ও শ্রীচৈতন্যের জীবনালোকে আত্মলাভ করে। তাঁহার জীবন ও বাণী উপস্থাপিত করিতে বাংলাভাষায় যে দুটি গ্রন্থ সর্বাধিক খ্যাতিলাভ করিয়াছে—চৈতন্য ভাগবত এবং চৈতন্য চরিতামৃত নামীয় সেই মহাগ্রন্থদুটিকে আজিও আমরা শ্রদ্ধা নিবেদন করিয়া থাকি। ‘এক বৃন্তে দুটি ফুলের’ মত ঐ চৈতন্য-দাস কাব্য দুটিকে একত্র চিন্তা করিতে অভ্যস্ত ছিলাম। দুইটি গ্রন্থই পরম ভক্ত, পরম প্রেমিক দুই কবি-সাধকের রচিত; দুইটি গ্রন্থেই উপজীব্য পুরুষোত্তম শ্রীচৈতন্য। এবং এই গ্রন্থদ্বয় সমগ্র গোড়ীয় বৈষ্ণব সমাজে—কি নবদ্বীপে, কি বৃন্দাবনে—যুগপৎ আত্মাদিত ও অর্চিত হইয়া থাকে; স্তবরাং ইহারা যে একই ভাবাবেগ—প্রাণ-প্রবর্তনার সৃষ্টি তাহাতে সন্দেহ ছিল না।

ছিল না কিন্তু বর্তমানে থাকিতেছে। আধুনিক পণ্ডিতগণের কেহ কেহ বলিতেছেন, ঐ দুই গ্রন্থে নবদ্বীপ ও বৃন্দাবনের ঐতিহ্য অসুসঙ্গ করিবার জন্ত পরস্পর বিরোধ আসিয়াছে এবং চৈতন্য চরিতামৃতে অঙ্কিত শ্রীচৈতন্য মোটেই সত্যচরিত্র নন, তিনি বৃন্দাবনের গোস্বামী ও কবিরাজ গোস্বামীর কারসাজির সৃষ্টি। মতামত হিসাবে এগুলি রীতিমত চমকপ্রদ। আমাদের জ্ঞানবুদ্ধি মত বিষয়টির পর্যালোচনা করিব।

দ্বিতীয় মতটি অর্থাৎ চৈতন্য-চরিতামৃতে অঙ্কিত চৈতন্য সত্যচরিত্র নহেন, এতই অ-যুক্তিসহ যে, এ বিষয়ে বিশেষ প্রমাণপ্রয়োগের প্রয়োজন আছে মনে করি না। বৃন্দাবনদাসের কাব্যে চৈতন্যের একটা স্থানিক রূপ, চৈতন্য-জীবনের একাংশকে উপস্থাপিত করিবার প্রয়াস। বৃন্দাবনদাস দেশকালের দ্বারা শ্রীচৈতন্যের যে মূর্তি দর্শন করিয়াছিলেন—তাহাকেই তাঁহার কাব্যে রূপদান করিয়াছেন। কিন্তু কৃষ্ণদাস চৈতন্যকে বৃহত্তর—উদারতর দৃষ্টিতে অবলোকন করিয়াছেন। বৃন্দাবনদাস শ্রীচৈতন্যের

প্রায় সমদাময়িক। সুতরাং দৃষ্টিভঙ্গীর সীমাবদ্ধতা তাঁহার পক্ষে প্রায় অপরিহার্য। পক্ষান্তরে কৃষ্ণদাস অপেক্ষাকৃত পরবর্তীকালের। এবং তিনি খ্রীষ্টচৈতন্যের সমগ্র জীবন-বাণী ও জীবন-রূপ উপস্থাপিত করিতেছেন। তাই খণ্ড দৃষ্টিতে যে রূপ ধরা পড়ে সমগ্রের আলোকে তাহাকে স্থাপন করিলে নূতনতর তাৎপর্য আবিষ্কৃত হইয়া স্বতন্ত্র কিছু ভাবোপলব্ধি অসম্ভব হয় না। এখন প্রশ্ন, চরিতামূর্তিতে অঙ্কিত এই চৈতন্য-মূর্তি বাস্তব মূর্তি কিনা? উত্তরে বিকল্প প্রশ্ন উঠান যায়, অবাস্তব কিনা? অবাস্তব বলিবার পক্ষে যথেষ্ট প্রমাণ দেওয়া হইয়াছে কি? আমাদের যতদূর মনে হয়, অবাস্তবতার একটি প্রমাণ দেওয়া হয়, অলৌকিকতা। আধুনিক যুক্তিবাদী মন এতই লোক-রসিক যে তাহার বিন্দুমাত্র ব্যত্যয় সহ করিতে প্রস্তুত নয়। তাহা না হয় মানিলাম, কিন্তু ইহারাই কি করিয়া অলৌকিকতা বর্জন করিয়া চৈতন্য-ভাগবত হইতে অকৃত্রিম চৈতন্যোদ্ভাবের চেষ্টা করেন? বস্তুটা দাঁড়াইতেছে, যাহা আমার সিদ্ধান্তের অন্তর্কূল, তাহাকে বাছিয়া খুঁজিয়া বাহির করিতে আপত্তি নাই,—সেখানে চৈতন্য ভাগবতের অলৌকিকতা সত্ত্বেও ঐ স্থান হইতে খ্রীষ্টচৈতন্যের জীবন-সম্পর্কে ধারণা সংগঠনে বাধা জন্মায় না, অথচ চৈতন্য-চরিতামূর্তিতে ঐ অলৌকিকতাই যত ভয়াবহ। অবশ্য এই অলৌকিকতার সত্যাসত্য বিষয়ে তর্ক উঠান চলিত, এবং যে-দেশে নিতান্ত সাধারণ হঠযোগী ও নানা প্রক্রিয়ায় বিজ্ঞানবুদ্ধিকে শুভিত করিয়া দেয়, সে দেশে কোন ঈশ্বরকল্প মহাপুরুষের পক্ষে আপাত প্রতীয়মান নিয়মশৃঙ্খলার ব্যতিক্রম করা অসম্ভব কিছু নয়, ইহা বলা যায় না তাহা নয়। তথাপি বর্তমান ক্ষেত্রে আমরা সীমাবদ্ধ যুক্তি-বিজ্ঞান এবং ভূত-বিজ্ঞানের সম্মান করিয়া অলৌকিকতাকে অস্বীকার করিলাম। তাহাতেও চৈতন্যচরিতামূর্তি হইতে চৈতন্যবিকাশে বাধা জন্মায় কেন বুঝি না।

সুতরাং আমরা স্বীকার করিতে বাধ্য, চরিতামূর্তির মহাপ্রভু ক্রীষ্ণচৈতন্য কোন ব্যক্তি বা সম্বল-মনের সৃষ্টি নহেন। তিনি স্বয়ং-সৃষ্ট। যে বিশাল বিচিত্র জীবন তিনি মর্ত্যবাসীর সম্মুখে রাখিয়া গিয়াছেন, চরিতামূর্তিকার অথবা বন্দাবনের গোস্বামি-গণ তাহাকেই—অথবা তাহার অংশকে প্রত্যক্ষ করিয়া—যথাসাধ্য রূপদান করিতে চেষ্টা করিয়াছেন। তাঁহারা খ্রীষ্টচৈতন্যের চরিত্রে এমন নূতন কিছু আরোপ করেন নাই, যাহা তাঁহাতে বিদ্যমান ছিল না। এ কোন ভক্তের স্তুতিবাদ নহে, ইহা যুক্তিসিদ্ধ উক্তি। বন্দাবনদাস চৈতন্যকে যে ভাবে ও রূপে দেখিয়াছেন তাহা মিথ্যা নয়—কিন্তু সম্পূর্ণ সত্যও নয়। তাঁহার দৃষ্টি সীমাবদ্ধ এবং চিত্র খণ্ডিত। তিনি খ্রীষ্টচৈতন্যের জীবনের প্রথম অংশকে অর্থাৎ সন্ন্যাসপূর্ব জীবনকেই মুখ্যত উপলব্ধি

করিয়াছেন। সম্রাস-গ্রহণের পরও তাঁহার কাব্যে চৈতন্য-চিত্র সামান্য কিছু আছে কিন্তু মহাপ্রভুর শেষজীবনের কৃষ্ণবিধিহিত সেই অপূর্ণ ভাবোন্মত্ত অবস্থা—তাহার উল্লেখ বা বিবৃতি তাঁহার কাব্যে নাই। অথচ মহাপ্রভুর জীবনের ঐ অবস্থাকে উড়াইয়া দেওয়া চলে না। উহা কোন বিচ্ছিন্ন মুহূর্তের সহস্রাগত অল্পভূতি বালক-মাত্র নহে, মহাপ্রভু বৎসরের পর বৎসর দিব্যোন্মাদ অবস্থায় নীলাচলে কাটাঁইয়াছেন। ইহা পূর্ণতঃ ঐতিহাসিক সত্য। তবে পণ্ডিতগণ, কৃষ্ণদাস কবিরাজ যে দৃষ্টিতে ঐ অবস্থা বিশেষকে গ্রহণ করিয়াছেন, তাহার যথার্থ্যে আপত্তি তুলিতে পারেন। সে সম্পর্কে আমাদের বক্তব্য, আধ্যাত্মিক ভাবপর্ধ্যায় সম্পর্কে অন্ত্যর্থক বা নাস্ত্যর্থক কোন উক্তি সম্পূর্ণ সঙ্গত হইবে না। আমাদের দেশে আধ্যাত্মিক অল্পভূতি-সম্পন্ন মহাপুরুষের অসম্ভাব নাই; তাঁহার ধর্মকে ‘রিলিজিয়ন’ হইতে উদ্ধার করিয়া বাস্তব ব্যবহার-শাস্ত্রের প্রত্যক্ষতা দান করিয়াছেন। আমাদের ধর্মশাস্ত্র অনেকাংশে অহুষ্ঠান-শাস্ত্র। কোন্ কোন্ সাধনপর্ধ্যায়ের মধ্য দিয়া অগ্রসর হইলে কোন্ কোন্ উপলব্ধির আবির্ভাব জীবনে সমাসন্ন হইবে তাহা স্পষ্ট নির্দেশিত আছে। এবং সেই ক্ষুরধার পথে ধাবমান বহুতর অধ্যাত্ম পুরুষের সাক্ষ্য ঐ ‘নির্দেশে’র আধ্যাত্মিক বাস্তবতা প্রমাণ করিয়া গিয়াছে। অধ্যাত্ম সাধনার পথে অগ্রসর না হইয়া সে বিষয়ে অভিজ্ঞতার অভিমান থাকা বাঞ্ছনীয় নয়। ‘প্রত্যেক বস্তুর অধিকারী অনধিকারী ভেদ আছে। যাহা বুঝি না, উপলব্ধি করি না, অথচ অগ্রে উপলব্ধি করিয়া যে বিষয়ে স্পষ্ট সিদ্ধান্ত ঘোষণা করিয়া গিয়াছেন, সে সম্পর্কে স্থলৎ-বাক্ হওয়া নিরতিশয় অসুচিত। বিজ্ঞানের দুর্ভ্রম তথ্য বা তত্ত্ব সম্বন্ধে বিশেষজ্ঞ হইয়া কেহ দস্তম্ভুট করিতে সাহস করে না, অথচ অধ্যাত্ম-বিজ্ঞান বিষয়ে পরম গান্ধীর্ধ্যসহ লঘু উক্তি করিতে বাধে না। সর্ববিদ্যা পারদ্রুম্য না হইয়া আমরা নিবৃত্ত হই না; ঐ বিদ্যার ক্ষেত্রে অধ্যাত্মতত্ত্বকেও আমরা একটা ‘সাবজেক্ট’ করিয়া লইয়াছি।

সর্বশেষে এতৎ সম্পর্কে আমাদের বক্তব্য এই যে, যে চৈতন্যকে বাঙালী এবং ভারতবাসী এই দীর্ঘ কয়েকশত বৎসর ধরিয়া জানিয়া আসিতেছে, যিনি ভক্তের হৃদয়ে, অহুভবশালীর প্রাণস্পন্দনে, বিশ্বাসীর বিশ্বাসে এবং অগণিত প্রাকৃত মাহুকের আন্তরিক ভক্তি ও প্রীতির সিংহাসনে প্রতিষ্ঠিত হইয়া আছেন, তিনি কিছু বৃন্দাবনের গোস্বামী ও কবিরাজ গোস্বামীর সৃষ্টি নন। অতবড় গৌরব—গোস্বামিগণের প্রতি সর্ববিধ শ্রদ্ধা সম্বন্ধে—তাঁহাদের দান করিতে প্রস্তুত নই। সেই চৈতন্য-বহুস্তর সামান্য মাত্র উপলব্ধি করিয়া তাঁহারা চৈতন্য-চিত্রণে মনপ্রাণ সমর্পণ করিয়া ছিলেন। প্রীতি ও ভক্তি তাঁহাদের অন্তর্দৃষ্টি দিয়াছিল। আমরা বলিব, যে চৈতন্যকে

তাহারা আকিয়াছেন, তাহার মধ্যে সীমাবদ্ধতা হয়ত আছে কিন্তু অতিরঞ্জন নাই। আর একটি কথা মনে জাগে, এই দীর্ঘ দিন ধরিয়া শ্রীচৈতন্যকে যে ভাব ও রূপে সাধারণ মানুষ এবং বিদ্বজ্জন গ্রহণ করিয়া আসিতেছে, তিনি হইলেন মিথ্যা? তাহার মিথ্যাস্ব এতদিন কাহারও চোখে পড়িল না? মিথ্যার কি এত শক্তি হয়?

এইবার আমরা দ্বিতীয় প্রশ্নের আলোচনায় আসিয়া পড়িতেছি; নবদ্বীপের বৈষ্ণবধর্মের ঐতিহ্য, ভজনাদর্শ, শ্রীচৈতন্য-নিষয়ক প্রতীতি নাকি বৃন্দাবনের ঐতিহ্য ভজনাদর্শ ও চৈতন্যবোধ হইতে পৃথক। নবদ্বীপের বৈষ্ণবগণের নিকট শ্রীচৈতন্য আরাধ্য, উপেয়। আর বৃন্দাবনের আদর্শে তিনি উপায়। অবশ্য বৃন্দাবন ও নবদ্বীপ উভয়ত্র তাহার ঈশ্বরত্ব স্বীকৃত। তথাপি নবদ্বীপে তিনি মূলতঃ কৃষ্ণভাবে পূজিত হইতেন আর “বৃন্দাবনের ভক্তেরা তাঁহাকে শ্রীরাধার ভাব আশ্বাদনের জন্ত অবতীর্ণ কৃষ্ণরূপে মানিতেন”; এবং “নরহরি শিবানন্দ বাসুদেব প্রভৃতি ভক্তেরা তাঁহার কৃষ্ণ-ভাবে অবলম্বন করিয়া ও নিজেরা গৌরনাগরীভাবে আবিষ্ট হইয়া তাঁহার মাধুর্য আশ্বাদন করিতেন। আর বৃন্দাবনবাসী ভক্তগণ তাঁহার রাধাভাবে অবলম্বন করিয়া ও আপনাদিগকে মঞ্জরিভাবে ভাবিত করিয়া শ্রীকৃষ্ণের উপাসনা করিতেন।”

এই প্রকার বিপ্লবী সিদ্ধান্তকে রক্ষণশীল মন লইয়া সত্বর স্বীকার করিতে বাধিবে। আমরা চৈতন্য-ভাগবতকে নবদ্বীপের আদর্শ ও চরিতামৃতকে বৃন্দাবনী আদর্শের প্রতিভূ ধরিয়া এ বিষয়ে সামান্য বক্তব্য উপস্থিত করিব। মনোমত হইলে নিজের পক্ষে অন্য চিন্তাশীল ব্যক্তির যুক্তিও গ্রহণ করিব।

অপর কোন প্রশ্ন না দিয়াও বলা যায়, যাহারা নবদ্বীপ ও বৃন্দাবনের আদর্শের মধ্যে ভেদ কল্পনা করিতেছেন, তাহাদের যুক্তি তাহারা নিজেরাই খণ্ডন করিয়াছেন। প্রতি মন্তব্যের পর ঢোক গিলিয়া তাহারা যে পরিমাণে ‘যে’ ও ‘যদি’ বলিয়াছেন (গোড়ভক্তেরা যে শ্রীচৈতন্যের রাধাভাবের বিরহ স্বীকার করিতেন না, তাহা নয়…… নীলাচলে শ্রীচৈতন্য কখনো কৃষ্ণভাবে কখনো রাধাভাবে পূজিত হইতেন ইত্যাদি ইত্যাদি), তাহাতে শেষ পর্যন্ত স্বকীয় সিদ্ধান্ত প্রতিষ্ঠিত করিতে পারিয়াছেন কিনা সন্দেহ। এখন ইহার উপর আমরা যদি দেখিতে পাই, নবদ্বীপেও শ্রীচৈতন্যের সহিত শ্রীকৃষ্ণ যুগপৎ পূজিত হইতেছেন এবং বৃন্দাবনে শ্রীচৈতন্য উপায়মাত্র নহেন, উপেয়ও, তাহা হইলে তাহাদের সিদ্ধান্ত সম্পূর্ণরূপে বিপর্যস্ত হয়।

প্রথম, নবদ্বীপে চৈতন্য ও চৈতন্যোত্তর যুগে কৃষ্ণারাদনা বৈষ্ণবদের মধ্যে চলিত ছিল কিনা? চৈতন্য-ভাগবতে আছে, গয়া হইতে ফিরিবার পর শ্রীচৈতন্য কৃষ্ণকথা, কৃষ্ণকীর্তন ও কৃষ্ণ-লীলার আবেশে দিন কাটাইতেন। গয়াতীর্থে ঈশ্বরপুরীর

সহিত সাক্ষাৎ ও বার্তালাপের পর শ্রীগৌরান্দের এক অপূর্ব ভাবান্তর উপস্থিত হয়। ঈশ্বরপুরী চলিয়া গেলে তিনি অকস্মাৎ কাঁদিয়া ফেলিয়া উঠেনঃ

“কোথা মোর বাপ কৃষ্ণ ছাড়িয়া আমারে।”

(চৈ. ভা. আদি)

অতঃপর নবদ্বীপে ফিরিয়া তাঁহার মুখে কৃষ্ণ ছাড়া অস্ত্র বাণী ছিল না। ‘বহির্গৌর’ হইলে কি হয়, মাহুষটি তখন ‘অন্তঃকৃষ্ণ’ :

কৃষ্ণের ভঞ্জন ছাড়ি যে শাস্ত্র বাথানে ।

সে অধম কতু শাস্ত্র-মৰ্ম্ম নাহি জানে ॥.....

চণ্ডাল চণ্ডাল নয় যদি কৃষ্ণ বোলে ।.....

দরিদ্র অধম যদি লয় কৃষ্ণ নাম ।

সর্বদোষ থাকিলেও যায় কৃষ্ণ-ধাম ॥

(চৈ. ভা. মধ্য)

অগ্রত্ব : যত ধ্বনি শ্রবণে সকল কৃষ্ণ নাম ।

সকল ভুবন দেখে গোবিন্দের ধাম ॥

(ঐ—মধ্য)

নিত্যানন্দ ও হরিদাসকে মহাপ্রভু আদেশ দিলেন :

সর্বত্র আমার আজ্ঞা করহ প্রকাশ ॥

প্রতি ঘরে গিয়া কর এই ভিক্ষা ।

বল কৃষ্ণ, ভজ কৃষ্ণ, কর কৃষ্ণ শিক্ষা ॥

ইহা বহি আর না বলাবে না বলিবা ।

দিন অবসানে আসি আমারে বলিবা ॥

(ঐ - মধ্য)

শ্রীচৈতন্য মুখনিঃসৃত এই সুস্পষ্ট অনুজ্ঞার পরেও যদি একথা বিশ্বাস করিতে বলা হয়, নবদ্বীপে কেবল শ্রীচৈতন্যই উপেয়, তাহা হইলে আমরা নাচার। যে কৃষ্ণার্তি চৈতন্য-জীবনের সর্বশ্রেষ্ঠ সম্পদ, তাহাকে বর্জন করিলে কৃষ্ণকে তো নয়ই, চৈতন্যকেও পাওয়া সম্ভব নয়, এটুকু বোধবৃত্তি নবদ্বীপবাসী বৈষ্ণবগণের ছিল। ইহার প্রমাণ নবদ্বীপের ভক্তগণের এতৎবিষয়ক আচরণ। নিত্যানন্দপ্রভু গৌরান্দ-ভজনের উপদেশ দিয়াছেন, কিন্তু দম্ভ্য তত্ত্ববাদের কুপাবিতরণে উদ্ধার করিবার পর তিনি কৃষ্ণমন্ত্রই দিতেন :

জন্মে জন্মে কৃষ্ণের সেবক তুমি দঢ়।

ধর্মপথে গিয়া তুমি লও হরিনাম ॥

(চৈ. ভা.)

নিত্যানন্দ স্বয়ং কৃষ্ণ ও কৃষ্ণচৈতন্য উভয়ের পূজা করিতেন। অদ্বৈত মদনগোপালের সেবা করিতেন। গদাধর পুণ্ডরীক বিত্তানিধির নিকট কৃষ্ণমস্ত্রে দীক্ষা পাইয়াছিলেন এবং চৈতন্য ভাগবতে আছে মুকুন্দ শ্রীবাসাদি পূর্ব হইতে শ্রীকৃষ্ণার্চনা করিতেন, পরে কৃষ্ণ-অস্ত-প্রাণ মহাপ্রভুর সংস্পর্শে আসিয়া কৃষ্ণ-ত্যাগের কোন কারণ উপস্থিত হইয়াছিল বলিয়া আমাদের মনে হয় না।

নিত্যানন্দ, অদ্বৈত, গদাধর-সম্প্রদায়ভূক্ত বৈষ্ণবগণ এখন পর্য্যন্ত গুরু-পরম্পরায় প্রচলিত রীতি অনুসারে ব্রজলীলা ও গৌরলীলার আশ্বাদন করেন।

নবদ্বীপের পদকর্তারা—নরহরি, বংশীবদন, শিবানন্দ, পরমানন্দ প্রভৃতি মূলতঃ কৃষ্ণলীলায় পদই রচনা করিয়াছেন। কেবল প্রারম্ভে গৌরচন্দ্রিকা যুক্ত আছে।

চৈতন্য ভাগবতাদিতে চৈতন্যরাধনা একমাত্র উপজীব্য বলিয়া তাহাকে বৃন্দাবনের কৃষ্ণাধনা হইতে পৃথক করিবার যে প্রচেষ্টা, তাহার বিরুদ্ধে একদিকের প্রমাণ উপস্থিত করিলাম। ইহার বিপরীত প্রামাণ্য পরীক্ষা করা যাক। বৃন্দাবনের গোস্বামীদের আদর্শ—চৈতন্য চরিতামৃতকে যাহার প্রতিভূ-গ্রন্থ বলিতে পারি—শ্রীচৈতন্য উপায়মাত্র কিনা?

চৈতন্য চরিতামৃতের প্রারম্ভে দীর্ঘ স্থান ধরিয়া শ্রীচৈতন্যের অবতারত্ব প্রমাণিত করা হইয়াছে এবং তিনি যে নিছক অবতারমাত্র নন, স্বয়ং অবতারী শ্রীকৃষ্ণই, তাহাও নির্দেশিত হইয়াছে। চৈতন্য চরিতামৃতের বহু স্থানেই “ঈশ্বর তুমি পরম স্বতন্ত্র” বলিয়া শ্রীচৈতন্যের স্তুতিপাঠ আছে। স্বতরাং সহজ বুদ্ধিতে ইহাই স্বাভাবিক ঠেকে যে “পরম স্বতন্ত্র ঈশ্বর” ভজনীয় হইবেন। বাস্তবিকই চরিতামৃতে শ্রীকৃষ্ণের সহিত, শ্রীচৈতন্যও উপেষ্ট, উপায়মাত্র নহেন। কবিরাজ গোস্বামী বহুস্থানে গৌরান্দ-ভজনের কথা বলিয়াছেন এবং আদিলীলার অষ্টম পরিচ্ছেদে তিনি গৌরান্দের ভজনীয় বা মাধ্যম প্রমাণ করিয়াছেন। তিনি বলিতেছেন :

অতএব পুনঃ কহো উর্দ্ধবাহ হৈয়া।

চৈতন্য নিত্যানন্দ ভজ কুতর্ক ছাড়িয়া ॥

কিন্তু কুতর্কিক প্রাণী চিরকাল অবিরল। অতএব কবিরাজ গোস্বামীকে বলিতে হইতেছে :

যদি বা তार्কিক কহে তর্ক সে প্রমাণ ।

তর্ক শাস্ত্রে সিদ্ধ যেই সেই সেব্যমান ॥

এই কথাটি বৃন্দাবনীয় ভক্তনাদর্শের পৃষ্ঠপোষক বলিয়া খ্যাত শ্রীনরোত্তমের একটি উক্তিতে সমর্থিত :

“সাধনে ভাবিবে যাহা সিদ্ধ দেহে পাবে তাহা ।”

হুতরাং এখানে মহাপ্রভু কেবল উপায় থাকিতেছেন না, তিনি উপেয়ও । আর আসলে এই বিশেষ ক্ষেত্রে উপায় ও উপেয়ে যে কী পার্থক্য তাহা বোধগম্য হয় না । কারণ শ্রীচৈতন্যকে উপায় হিসাবে গ্রহণ করিলে—গৌড়ীয় বৈষ্ণব মতে—কৃষ্ণ-সাধনার একটমাত্র পথ থাকে—রাধাভাবে সাধনা । কিন্তু মহাপ্রভু ছাড়া অল্প কাহারও পক্ষে যে রাধাভাবে কৃষ্ণসাদনা সম্ভব, তাহা গোষ্ঠামিগণ বিশ্বাস করিতেন না । অতএব তাঁহাদের নিকট শ্রীচৈতন্য নিছক উপায় হন কিরূপে ? উপায় অর্থে যদি অল্পপ্রেরণা ধরা যায়, তাহা হইলে শ্রীচৈতন্য কৃষ্ণপূজায় প্রেরণা সঞ্চার করিয়াছিলেন মানিতে হইবে । কিন্তু বৃন্দাবনের গোষ্ঠামিবৃন্দ শ্রীচৈতন্যের ভগবত্ত্বের বিশ্বাস করিতেন । অতএব তাঁহাদের পক্ষে নিছক অল্পপ্রেরণাদাতা বলিয়া মহাপ্রভুকে গ্রহণ করা সম্ভব ছিল না । তাঁহারা যে তাহা করিতেনও না, চৈতন্যচরিতামৃত তাহার উল্লেখ আছে । চরিতামৃত হইতে জানা যায়, রঘুনাথদাস প্রত্যহ “প্রহরেক মহাপ্রভুর চরিত্র কথন” করিতেন ; এবং “রূপসনাতনাদির দৈনন্দিন কর্তব্যের অন্তর্গত ছিল চৈতন্যকথা শ্রবণ ও চৈতন্য-চিন্তন—প্রত্যহ “চৈতন্যকথা শুনে করে চৈতন্য-চিন্তন ।” ভক্তিরসাকরে আছে, বৃন্দাবনের গোষ্ঠামিগণ শ্রীচৈতন্যের অষ্টকালীন নিত্যলীলার চিন্তাও করিতেন :

চৈতন্যচন্দ্রের নিত্যলীলা রসায়ন ।

নিশাস্ত নিশা পর্য্যন্ত চিন্তে বিজ্ঞজন ॥

নরোত্তমের প্রার্থনা পড়ে আছে—“গোরা পছঁ না ভজিয়া মৈতু” ; “গৌরাক্ষের দুটি পদ যার ধনসম্পদ, সেই জানে ভকতির সার ।”

গৌড়ীয় বৈষ্ণব দর্শনের আদি দ্রষ্টা এবং স্রষ্টা রূপ ও সনাতনের এবং রঘুনাথের “কলৌ ষং বিদ্বাংসঃ স্ফুটমভিষজন্তে” ; “গতিং দ্রষ্টা যন্ত প্রমদ গজবর্ষোহখিলজন্য” প্রভৃতি বহু স্থলে স্তোত্রে মহাপ্রভুর উপাস্ত্র স্বীকার করা হইয়াছে ।

বস্তুতঃ অবতার বাল্য স্বীকার করিলে উপাস্ত্র প্রায় স্বতঃসিদ্ধ হইয়া পড়ে । বৃন্দাবনের গোষ্ঠামিগণ মনে করিতেন, ব্রজলীলা ও নবদ্বীপলীলা উভয়ের মিলিত আশ্বাদনজনিত মাধুর্যের তুলনা নাই । চৈতন্য চরিতামৃত আছে :

চৈতন্য লীলামৃতপুর

কৃষ্ণলীলা স্তব্ধপূর্ণ

দোহে মেলি হয় স্তম্ভধূম্য

সাধু গুরু প্রসাদে

তাহা যেই আশ্বাদে

সেই জানে মাধুর্য্য প্রাচুর্য্য ॥

নবদ্বীপ ও বৃন্দাবনের ভজনাদর্শে ভেদ-কল্পনার মূলে যে যথেষ্ট পরিমাণ সত্য নাই, তাহা চৈতন্য ভাগবত ও চৈতন্য চরিতামৃত অবলম্বনে দেখাইতে যথাসাধ্য চেষ্টা করিয়াছি। এখন, এই দুইটি জীবনী-কাব্যে কি ভাবগত পার্থক্য কিছুই নাই? আমাদের বিশ্বাস তাহাও সত্য নয়। পার্থক্য আছে, কিন্তু সেই পার্থক্য গ্রন্থদুটিকে পরস্পর-বিরোধী করিয়া তোলে নাই। তাহা অসম্পূর্ণ ও সম্পূর্ণের পার্থক্য, অপরিণতি ও পরিণতির প্রভেদ। অর্থাৎ একটি পূর্ণপরিচয়ের পরিপূরক। এই মন্তব্যটি কয়েকদিক হইতে নাড়িয়া চাড়িয়া দেখিব। প্রথমতঃ তথ্যের কথা ধরা যাক।

বৃন্দাবনদাসের চৈতন্য ভাগবত একটি অসম্পূর্ণ গ্রন্থ। ইহাতে চৈতন্য-জীবনীর প্রথমাংশের সুবিস্তৃত, মধ্যাংশের নানি-বিস্তারিত এবং শেষাংশের উল্লেখমাত্র রহিয়াছে। বৃন্দাবনের গোস্বামিগণ এই গ্রন্থ প্রত্যাহ আশ্বাদন করিতেন। আশ্বাদন করিতেন অথচ অসম্পূর্ণতার একটা অতৃপ্তিও ছিল। চৈতন্য-জীবনের শ্রেষ্ঠ অংশ, সেই দিব্যোন্মাদের কোন বর্ণনা ইহাতে নাই; তদুপরি চৈতন্য-জীবনকে দার্শনিক দৃষ্টিতে অপরোক্ষ করিবার প্রযত্নও বর্জমান নাই। তাঁহারা চৈতন্য ভাগবতের তথ্যগত ত্রুটি-বিচ্যুতি সন্ধানও সচেতন ছিলেন। সুতরাং কৃষ্ণদাস কবিরাজের উপর পূর্ণায়ত জীবনী রচনার ভার হস্ত হইল। ঐ উদ্দিষ্ট গ্রন্থে কেবল যে ত্রুটি-বিচ্যুতি গুলি সংশোধিত হইবে তাহা নয়, শ্রীচৈতন্যের লোকান্তর জীবনের দার্শনিক ব্যাখ্যা এবং বিরহোন্মাদ দিব্যাবস্থার পূর্ণ বিবরণও থাকিবে। এই মহতী ব্রতে নিযুক্ত হইয়া কৃষ্ণদাস কবিরাজ কিন্তু পূর্বস্বরীর কৃত কৰ্মকে অবজ্ঞা করিলেন না। সবিনয়ে বৃন্দাবনদাসের ঋণ স্বীকার করিয়া, প্রকৃত বৈষ্ণবের মত, “নিজের মানভ্যাগ করিয়া অপরের মান বাড়াইয়া” নিজ গ্রন্থ রচনা করিয়াছেন। তিনি আপন কাব্যকে বৃন্দাবনদাসের কাব্যের পরিপূরক জ্ঞান করিতেন; ইহার সকলের বড় প্রমাণ, বৃন্দাবনদাসের বিস্তৃতি ও শ্রেষ্ঠত্ব যেখানে, সেখানে তিনি সেই দিকেই অঙ্গুলী নির্দেশ করিয়া প্রসঙ্গান্তরে অগ্রসর হইয়া গিয়াছেন। বৃন্দাবনদাসের অকৃত কার্য্যই তাঁহার আরম্ভ। তাই আদিলীলা অতিসংক্ষেপে সূত্রাকারে রচিত। ফলতঃ শ্রীচৈতন্যের জীবন সমগ্রভাবে জানিতে হইলে কেবল চরিতামৃতে চলিবে না, অংশবিশেষের জন্য চৈতন্যভাগবতকেও আমন্ত্রণ করিতে হইবে, এবং কাব্যে আদিলীলাকে সূত্রমাত্র

রাখিয়া কৃষ্ণদাস কবিরাজ উহা আবশ্যিক করিয়া গিয়াছেন। তবে বৃন্দাবনের গ্রন্থের পরিপূরক যখন, তখন অসমাপ্তি বা অসম্পূর্ণতার ক্ষেত্রে কৃষ্ণদাসের লেখনী ধরিতে হয়। আদিলীলার কাজী দলন ও দিগ্বিজয়ীর পরাভবের বিস্তৃত বর্ণনা এবং সম্রাটের পর মহাপ্রভুর রাঢ়দেশ ভ্রমণ ও শান্তিপুর আগমন বিষয়ে বৃন্দাবনদাসের বিবরণের সহিত ইচ্ছাকৃত অনৈক্য বজায় রাখার মধ্যে ইহার প্রমাণ পাওয়া যায়। মধ্যলীলার ও বহুস্থলে কবিরাজ গোস্বামী বৃন্দাবনদাসের বর্ণনার উপর বরাত দিয়া পাশ কাটাইয়া অপর গুরুতর বিষয়ে মনোযোগ নিবিষ্ট করিয়াছেন। শান্তিপুর হইতে মহাপ্রভুর নীলাচল গমনের বিবরণ বৃন্দাবন বিস্তৃতভাবে দিয়াছেন বলিয়া কৃষ্ণদাস তাহা বর্ণনা করেন নাই।

তত্পরি ছিল বৃন্দাবনদাসের উপর কৃষ্ণদাসের অপরিণীম শ্রদ্ধা ও ভক্তি। “বাস বৃন্দাবন” সম্বন্ধে কিছু বলিতে গিয়া প্রত্যেক ক্ষেত্রে কবিরাজ গোস্বামী ভক্তিভাবে অবনত হইয়া পড়িয়াছেন। চরিতামৃতের আশুস্ত-বিস্তৃত সম্বন্ধোক্তির দুই একটি অংশ :

মহুয়া রচিতে নারে এঁছে গ্রন্থ ধন্য।

বৃন্দাবনদাস মুখে বক্তা শ্রীচৈতন্য।

বৃন্দাবনদাস পদে কোটি নমস্কার।

এঁছে গ্রন্থ করি যেহৌ তরিল সংসার ॥

অতঃ

বৃন্দাবনদাসের পাদপদ্ম করি ধ্যান।

তঁার আজ্ঞা লঞা লিখি যাহাতে কল্যাণ ॥

চৈতন্য লীলাতে ব্যাস বৃন্দাবনদাস।

তঁার কৃপা বিনা অণ্ঠে না হয় প্রকাশ ॥

এমন শ্রদ্ধা ঐহ্যার, তিনি কখনই সম্পূর্ণ বিপরীত কোনো ভঙ্গনাদর্শ বা ঐতিহ্য তাঁহার কাব্যে উপস্থিত করিতে পারেন না। তিনি করুন বা না করুন আমাদের কল্পনা করিতে বাধেন। তবে কল্পনা ও সত্যে প্রভেদ আছে, ইহাই আশার কথা।

এ পর্যন্ত তথ্যবিচার চলিতেছিল। তথ্য ব্যতীত ভাবের দিক ধরিলেও আত্যন্তিক ভেদের কল্পনা ভ্রমাত্মক। শ্রীচৈতন্যের অনির্দ্বন্দ্বীয় অনিরূপণীয় ব্যক্তিত্ব। ইহার একান্ত ঘরোয়া রূপ ফুটিয়াছে বৃন্দাবনদাসের কাব্যে। আর ঘরে-বাহিরে একজ কবিতা দেখিতে চেষ্টা করিয়াছেন কবিরাজ গোস্বামী। ফলতঃ তাঁহার কাব্যে শ্রীচৈতন্যের সর্বভারতীয় রূপের আভাস আছে। শ্রীচৈতন্যকে ঐ দুইরূপ—গৃহগত এবং বিশ্বগত—ইহার কোনটি হইতে বিচ্ছিন্ন করিয়া দেখা যায় না। চৈতন্য-বনম্পতি বাংলাদেশের সরস স্বতন্ত্র যুক্তিকা হইতে প্রাণরস সংগ্রহ করিয়াছিল কিন্তু

ঐ “বৃন্দারণ্য বনস্পতির” পত্র-প্রচ্ছায় বহু-বিস্তৃত, শাখাশ্রেণী• দূর-প্রসারী। নদীয়া-
 হুলাল গোরামণিকে বৃহত্তর ভারতের বক্ষে স্থাপন করিয়া দর্শন করিতে হইলে তাঁহার
 •স্থানিক রূপের—তৎসম্পর্কে মীমাবন্ধ সংস্কার-দৃষ্টির—আবরণ অনেকখানি ছিন্ন করার
 প্রয়োজন হয়। কিন্তু তাই বলিয়া স্বরূপ-স্তুভ্য ঐ দুই চৈতন্তে কোন প্রভেদ থাকে
 না। বৃন্দাবনদাসের গৌরান্দ্র পরিণত হইয়া কৃষ্ণদাস কবিরাজের শ্রীকৃষ্ণচৈতন্তে রূপ
 ধারণ করিয়াছিল। একই দেহরূপের বাল্য-কৈশোর এবং যৌবন-প্রৌঢ়ত্বে যে প্রভেদ
 বৃন্দাবন ও কৃষ্ণদাসের কাব্যেও সেই ভেদ।

ইহা ছাড়া আর একটি বিষয় বিচার্য। বৃন্দাবনদাসের কাব্যে চৈতন্ত সম্পর্কিত
 মনোভাব একটা ভাবাবেগ-নির্ভর। সেখানে ভক্তপ্রাণের আকৃতি প্রবল। তাহার
 মধ্যে কোন সচেতন দর্শন বা তত্ত্ব প্রতিষ্ঠার প্রয়াস নাই। বৃন্দাবনদাস সহজ
 ভক্তির আলোকে দেখিয়াছেন বলিয়া স্বভাবতঃই তাঁহার কাব্যে অলৌকিকতার
 অবসর আসিয়াছে। ঐ অলৌকিকতা নির্বিচার—অনেকাংশে ভক্ত-হৃদয়ের কল্পনা-
 সৃষ্ট। কিন্তু কৃষ্ণদাসের কাব্যে চৈতন্ত-জীবন ও বাণীর একটা দার্শনিক রূপ
 আবিষ্কারের চেষ্টা আছে। যে মহাজীবন লক্ষ জীবনের দীপাবলীতে আলোকোৎসব
 করিয়া গেল, তাহাকে কেবল উৎসবরাত্রির উত্তেজনার মধ্যে গ্রহণ না করিয়া যুক্তির
 আলোকে, বিচারের মাপকাঠিতে যাচাই করিবার একটা চেষ্টা কবিরাজ গোস্বামীর
 মধ্যে প্রত্যক্ষ। ইহা না করিলে রস তারল্য আর ভাবগদগদ অশ্রুধারার মধ্যে
 চৈতন্ত-ব্যক্তিকে কোনদিন খুঁজিয়া পাইতাম না। তিনি প্রাকৃতভাষায় চৈতন্ত-
 রস-সাগরের অংশবিশেষকে অন্ততঃ বলয়িত করিতে পারিয়াছেন, তাহা স্বীকার করিতে
 হইবে। তবে তাঁহার বিচার কোনমতে আবেগের পরিপন্থী নয়। কবিরাজ গোস্বামীও
 আবেগমুখী, তবে সেই আবেগকে কুলহার না করিয়া তটের কঠিন বাঁধনের মধ্য দিয়া
 একটা নিদ্রিষ্ট মোহানার দিকে আগাইয়া দিতে চাহিয়াছেন। বৃন্দাবনদাসের কাব্য
 ব্যক্তিগত অমুভূতিকে (তাহা অন্তের অমুভূতিও হইতে পারে) রূপদান করিয়াছে
 বলিয়া উহার মধ্যে তত্ত্ব-চিন্তার অবসর নাই। কিন্তু কৃষ্ণদাসের কাব্য মহাকাব্যের
 মত। তাহাতে কত চিন্তা, কত ধারণা, কত বোধ, কত বেদ আসিয়া পড়িয়াছে।
 কবিরাজ গোস্বামী সেগুলিকে সম্মিলিত করিতে চেষ্টা করিয়াছেন। সেই মিলন-
 সাধনায় তত্ত্ব-দৃষ্টি অপরিহার্য। কৃষ্ণদাস কবিরাজের কাব্যে সেই তত্ত্বের যথাযোগ্য
 স্বীকৃতি আছে। বৃন্দাবনদাসের কাব্যে তত্ত্ব নাই, স্তবরাং কৃষ্ণদাস কবিরাজের
 তত্ত্বের সহিত তাহার বিরোধও অবাস্তব।

কৃষ্ণদাসের কাব্যে ত্রিচৈতন্য

প্রাণ জাগিলেই গান জাগে। মধ্যযুগে সমগ্র বাংলাদেশ ব্যাপ্ত করিয়া যেন একটা সঙ্গীতের আসর বসিয়াছিল। ঘরকে বাহির এবং বাহিরকে ঘর করিয়া বাংলাদেশের স্বরোত্তম মানুষগুলি বিশ্বজীবনের মহাপ্রাঙ্গণতলে সেই স্বর-সভায় আসিয়া মিলিত হইল। উপরে অনন্ত নীলাকাশ-নীলকৃষ্ণ; তাহার উপর রাধাচন্দ্রাবলী—ভুল হইল, চৈতন্যচন্দ্রোদয় হইয়াছে। বাঙালীর ভাবের উচ্ছ্বাস, রসের উল্লাস, আনন্দের উৎসার বাধা মানে নাই। প্রাণ যে জাগিয়াছে - মহাপ্রাণ, মহাগান তো জাগিবেই।

ত্রিচৈতন্যই সেই প্রাণ-বৈষ্ণব সাহিত্যই সেই গান। মহাজীবনের মহাসঙ্গীতে বাংলার একযুগের সাহিত্য মঙ্গ-মুখর।

যে জীবনের আত্মান বাহিয়া অসংখ্য মানুষের প্রাণাবেগ পরম প্রাপ্তির দিকে ছুটিয়াছিল, সেই মানুষটিকে সেদিন চিনিয়াছিলাম, আজিকে চিনি, অথবা ভবিষ্যতে চিনিব—ইহা অল্পবুদ্ধির অহংকার। রায় রামানন্দ—মহারহস্তে রসিয়া যিনি চৈতন্যের সহিত অন্তরঙ্গ ভাব আস্থাদান করিতেন, তিনিও মেঘমাত্র—ঐ অন্তঃকৃষ্ণ গৌরসাগর হইতে স্রাব্যারি অঙ্গীকার করিয়া সেই স্রাব্যকে পুনরায় চৈতন্যের আলিঙ্গনে ছাড়িয়া দেন। সে গহন-গম্ভীর বহুস্তর সন্ধান অণ্ণে কেমনে পাইবে? তথাপি এই পার্থিব দেহপ্রাণের একটা আকৃতি ও উৎকর্ষ—একটা নীমাবদ্ধ বোধবুদ্ধি রহিয়াছে। তাহারই মাপকাঠিতে—অথবা যতটুকু দূর। দেয়—তাহাই মাপিয়া চলিব। “কে তোমারে জানতে পারে তুমি না জানালে পরে” সত্য,—তথাপি “শিশিরটুকুরে দূর। দিতে পারি বাসিতে পারি যে ভাল।” সাধারণ মানুষ দীঘির সব সংবাদ রাখে কি করিয়া; ঘটটুকু ঘটটুকু জলের দরকার, তাহা জুটিলেই যথেষ্ট।

ঠাকুর শ্রীরামকৃষ্ণ বলিতেন, ভক্ত হৃদয় ভগবানের বৈঠকখানা, আর সেখানে ভক্তাধীশও মাঝে মাঝে আসর জাঁকাইয়া বসেন। মানুষেই তাঁর শ্রেষ্ঠ প্রকাশ। তাই জগতের আদিকাব্য নরকুলচন্দ্রমার কাহিনীতে শুরু;—তাহা মানুষের জীবনায়নের ইতিবৃত্ত—তাহা রামায়ণ। পরশয্যাশায়ী ভীষ্মও মহাযুদ্ধকে প্রজ্ঞার অঙ্গিম আলোকে অপরোক্ষ করিয়া ঘোষণা করিয়া গেলেন—ন মানুষ্যং শ্রেষ্ঠতরং হি কিঞ্চিৎ। মানুষের প্রাণ-মুকুরে অনন্তের জ্যোতিঃপাত হয়, তাই মুকুরটিকে স্বচ্ছ রাখিতে প্রচেষ্টার অন্ত নাই। অধ্যাত্মসাধনা সেই স্বচ্ছতার সাধনা—তিমির-বিদারণের সাধনা। সাধারণ মানুষের ক্ষেত্রে, এই ব্যক্তিমুকুর উজ্জল রাখিতে উদ্দীপনা জাগে স্বতঃস্বচ্ছ

প্রাণমূকুর দর্শনে। সেই অনন্ত-বিশ্ব-গ্রাহী প্রাণমূকুর স্তুতিগানই মহামানবতার কাব্যরচনা। দেবক্কা এবং উপদেবতার গাথা-বাহী মধ্যযুগের বাংলাসাহিত্যে মহুগ্গ্বেষের অন্ততম অর্হণাকাব্য কৃষ্ণদাস কবিরাজের চৈতন্য চরিতামৃত—তাহা শ্রেষ্ঠকাব্যও বটে।

কৃষ্ণদাস কবিরাজ মহুগ্গ্বেষের কোন্ রূপ দেখিয়াছেন, তাঁহার চৈতন্য-চরিতে পরম মানবের মূর্তি-মনোহর কোন্ প্রতিচ্ছায়া পড়িয়াছে—এক কথায় বলিতে গেলে তাহা লৌকিক এবং অলৌকিক। মহাজীবনই তাই। তাহা যুগপৎ মূক্ত এবং আবিষ্ট। চৈতন্য-চরিত্র সম্পর্কে স্বরূপ দামোদরের একটি অতি গভীর উক্তি চরিতামৃতে গ্রথিত আছে :

যতপি ঈশ্বর তুমি পরম স্বতন্ত্র।

তথাপি স্বভাবে হও প্রেম-পরতন্ত্র ॥

—ঐ পরমে মূক্ত, প্রেমে বদ্ধ। শ্রীচৈতন্যের প্রেমটুকুতে বর্তমানে আমাদের প্রয়োজন—অতিপ্রাকৃতকে আনিব না। আচার্য্য দীনেশচন্দ্র বলিতেন—“তাঁহার নয়নাশ্রয় জায় কিছুই অলৌকিক নয়।”

চৈতন্য চরিতামৃতকে কখনো কখনো আমার মহাকাব্য মনে হয়। এক হিসাবে ইহা সত্যই মহাকাব্য—মহাজীবন-কাব্য অথবা জীবন-মহাকাব্য। অগ্রদিক ধরিলেও মহাকাব্য যেমন করিয়া সমস্ত যুগচিন্তা ও যুগ-ভাবনাকে আব্রুসাৎ করিয়া বাণীদেহ ধারণ করে,—চরিতামৃতে মধ্য শ্রীচৈতন্য এবং তৎসঙ্গে গোড়ীয় ধর্ম ও দর্শনবিষয়ক যুগচিন্তার সকল ভক্তি ও অল্লাগ—সকল স্মরণ ও মনন, সর্ববিধ প্রজ্ঞা ও মনোযা যেন গুঞ্জীভূত হইয়া আছে। কত বিভিন্ন গ্রন্থের বিপুল বিস্তৃত অংশ ইহার অবয়ব গঠন ও বলাধান করিয়াছে। বৃন্দাবনদাসের কাব্যও স্বন্দর। তথাপি তিনি—তাঁহার কাব্যে অশেষবিধ অলৌকিকতার অবসর সত্ত্বেও—চৈতন্যের একটা স্থানিক রূপ অবলোকন করিয়াছেন। আর কৃষ্ণদাসের মহাকাব্যসদৃশ কাব্যে শ্রীচৈতন্য মহাভারতের মহাপ্রভু। তাই তত্ত্ব এবং তথ্য, জটিল দার্শনিকতা ও স্বতঃউজ্জ্বল জীবন ঐরূপ একসত্যায় সেখানে মিলিত হইতে পারিয়াছে।

কৃষ্ণদাস কবিরাজের মহাকাব্যের প্রাণপুরুষ যিনি, তাঁহার সাধনার মূলে আচ্ছ প্রেম, যে প্রেম পঞ্চম পুরুষার্থ। এই প্রেমের দ্বিধাগতি, কৃষ্ণমুখী ও মানবমুখী। রাধার প্রেম কেবল কৃষ্ণই পাইয়াছিলেন; রাধাভাবিত চৈতন্যের প্রেমে কেবল কৃষ্ণ নয়, কৃষ্ণময় এই বিশ্বসংসারের একটা অংশ ছিল। তাই শ্রীচৈতন্যের যে রূপ সাধারণ মানুষ প্রত্যক্ষ করে তাহার দুইটি দিক আছে; এক তাঁহার আধ্যাত্মিক আকুলতা, দুই, দুর্গত মানবের জন্ত স্নগভীর উৎকর্ষ। তিনি রাধাভাব আত্মদানের জন্ত দেহধারণ করিয়াছেন কিনা, অথবা তিনি রাধাকৃষ্ণের মিলিত বিগ্রহ কিনা,—এই সকল জটিল

দার্শনিক প্রশ্ন হইতে জনসাধারণ চিরদিন দূরে ছিল। তাহারা তত্ত্ব চায় না, শাস্তি চায়। বিত্তাগোরব অপেক্ষা প্রাণানন্দই তাহাদের কাম্য বস্তু। স্তবরাং অপূর্ব ছাতিমান সিংহগ্রীব দীর্ঘদেহা অথচ করুণায়তলোচন এক পুরুষ আসিয়া যখন তাহাদের ডাকিয়া কহিলেন, তৃষ্ণার শাস্তি আছে, জ্বালায় বিরতি মেলে, উৎকর্ষ বেদনা মিলাইয়া যায়, কিছু না, কৃষ্ণ নাম নাও, কৃষ্ণ নাম গাও, জাতি-ধর্ম-বর্ণ কোন ভেদ সত্য নয়—সত্য শুধু প্রেম, সত্য শুধু ঐ প্রেম-ব্যাকুলতা—সেদিন আর্ত অসহায় মানুষের দল মুগ্ধচিত্তে সেকথা শুনিয়াছিল, শুনিয়া আত্মহারা হইয়াছিল, আত্মহারা হইয়া আত্মদান করিতে বিলম্ব করে নাই। যে আশ্বাস মূর্তিমান হইয়া গৃহদ্বারে সমাগত, তাহাকে ফিরাইবে কে? সেই আশ্বাসমূর্তির বোধন মন্ত্রোচ্চারিত বাংলাদেশের পূজাঙ্গনে সেদিন বড় মহোৎসব পড়িয়া গিয়াছিল।

তিনি কাহারও লৌকিক অভাব পূরণ করেন নাই, মানুষের আধিভৌতিক প্রয়োজনের এক কণাও তাঁহার দ্বারা মিটে নাই। কিন্তু মানবজীবনের পরমা শাস্তি বাহা, তাহাই দান করিয়া গিয়াছেন। যে কথা বলিয়াছি—রাধার প্রেম কৃষ্ণই কেবল পাইয়াছিলেন, এই রাধাভাবিত মানুষটির প্রেম জগৎ লুটিয়া লইল।

শ্রীচৈতন্যের মধ্যে সেই যুগের এক বিপ্লবী মানবাত্মার দুর্জয় আত্মঘোষণার স্বর শুনিয়াছি। কৃষ্ণদাস কবিরাজ তাঁহার কাব্যে সেই স্বরটিকে যথোপযুক্ত বাজাইয়া তুলিতে পারিয়াছেন। বিচার ও বিতর্ক, অপ্রেম ও বঞ্চনা, লোভ ও নিষ্ঠুরতা, পাণ্ডিত্য ও প্রাণহীনতায় মলিন এক যুগে দাঁড়াইয়া যিনি মানুষকে অবিকৃত সত্যায় আবিস্কৃত করিয়া ঘন-গভীর কর্তে বলিতে পারেন—চণ্ডালোহপি, দ্বিজশ্রেষ্ঠঃ হরিভক্তি পরায়ণঃ, হরিভক্তি বিহীনশ্চ দ্বিজোহপি স্বপচাধমঃ—তিনি ব্যতিক্রম মানব। অবশ্য হিরণ্য পাত্রের আবরণ সরাইয়া সত্যকে যিনি দর্শন করিতে চান, তিনি যে মানব প্রাণস্বার্থের উপর হইতে আচার-সংস্কারের মেঘচ্ছায়া ছিন্নভিন্ন করিয়া দিবেন, তাহা বলাই বাহ্য। নিখিল প্রাণ-গন্ধকে তিনি অনন্ত কৃষ্ণ-সাগরের পানে কৌতর্ন-কর্তে আহ্বান করিয়া ছুটিয়াছিলেন—তাঁহার নিকট প্রাণবারির জাতিবিচার থাকে না। পথ চলিতে যাহার হৃদয়ে সমুদ্রের কলগান মঞ্জিত সেই ধর্মার্থ মানুষ—অব্রাহ্মণ হইলেও দ্বিজোত্তম -সত্যকুলজাত। সেই সেই যুগকে শ্রীচৈতন্য ‘সবচেয়ে’ দিয়াছেন, ‘সবার অধিক’ পাইয়াছেন।

শ্রীচৈতন্যের এই ‘ভেদভুলানো’, ‘প্রাণজাগানো’, এই ‘পতিতপাবন প্রেমলাবনি’ ব্যক্তিত্ব কবিরাজ গোস্বামী অতি অপূর্বভাবে প্রকাশ করিয়াছেন। তাঁহার স্বদীর্ঘ কাব্য হইতে—দার্শনিক আলোচনার বিস্তৃতি সত্ত্বেও—চৈতন্য-চরিত্রের একটা উজ্জল

পূর্ণায়ত রূপ আশ্রয়প্রকাশ করিয়াছে। শ্রীচৈতন্যের অলোকসামাগ্র দেহরূপই প্রাকৃত-
জনের প্রাণ প্রথম হরণ করিয়াছিল। নানাভাবে কবিরাজ গোস্বামী তাঁহার
কাব্যে সেই রূপসৌন্দর্য্য প্রতিবিম্বিত করিতে চেষ্টা করিয়াছেন। তেমন দুই
একটি প্রচেষ্টা :

শত সূর্য্য সম কান্তি অরুণ বসন ।
সুবলিত প্রকাণ্ড দেহ কমললোচন ॥

বা :

তপ্ত হেম কান্তিসম প্রকাণ্ড শরীর ।
নব মেঘ জিনি কণ্ঠধ্বনি যে গন্তীর ॥

বা :

সিংহগ্রীব সিংহবীৰ্য্য সিংহের লঙ্কার ।

এই সৌন্দর্য্যের মধ্যে মাধুর্য্য অপেক্ষা পৌরুষ-বীৰ্য্যই অধিক। দেহে কিংবা মনে
দুর্বলতার প্রশ্রয় নাই। এই রূপ হইতে অতঃপর জন্মে রাগ, তারপর রস :

বাহ তুলি হরি বলি প্রেমদৃষ্টে চায় ।
করিয়া কল্মষনাশ প্রেমোত্তে ভাসায় ॥

* * *

সেই দ্বারে আচণ্ডালে কীৰ্ত্তন সঞ্চারে ।
নাম-প্রেম-মালা গাঁথি পরাইল সংসারে ॥

* * *

উথলিল প্রেমবত্তা চৌদিকে বেড়ায় ।
স্ত্রী বৃদ্ধ যুবা আদি সবারে ডুবায় ॥
সুজন দুৰ্জন আদি জড় অন্ধগণ ।
প্রেমবত্তায় ডুবাইল জগতের মন ॥

* * *

পাকিল যে প্রেমফল অমৃত মধুর ।
বিলায় চৈতন্যমালী নাহি লয় মূল ॥
অঞ্জলি অঞ্জলি ভরি ফেলে চতুর্দিশে ।
দরিলে কুড়ায়ে থায় মালাকার হাসে ॥

শ্রীচৈতন্যের এই পাবনী ব্যক্তিত্ব ফুটাইতে কৃষ্ণদাসের চৈতন্যজীবনীর অংশ-নির্ধাচন
বড়ই উপযোগী হইয়াছে। তিনি—যে কারণেই হউক—মধ্য ও অন্ত্যলীলা বিস্তৃতভাবে

বর্ণনা করিয়াছেন। আর এই মধ্যলীলা এবং কিয়দংশে অন্ত্যলীলার মধ্যেই মহাপ্রভুর মানবপ্রেমী চরিত্র সর্বাধিক প্রকাশিত। এইখানেই কৃষ্ণনাম, কৃষ্ণপ্রেম এবং সেইসঙ্গে মানবসাধারণের প্রতি অখণ্ড করুণায় হৃদয় ভরিয়া শ্রীচৈতন্য ভারতের দিগ্বিদিকে ছুটিয়া ফিরিয়াছেন। কৃষ্ণদাস কবিরাজ সেই প্রেমমন্দির গতিপথটি তীর্থযাত্রীর সম্মুখ শ্রদ্ধা ভক্তি ও প্রীতি - তদুপরি নির্মল কবিত্ব সহায়ে আবিস্কার করিতে পারিয়াছেন। অস্বচিৎ ক্ষেত্রে শ্রীচৈতন্য কেমন করিয়া সামাজিক বাধাকে চূর্ণ-বিচূর্ণ করিয়া ফেলিতেন তাহার অল্পদৃষ্টান্ত তাঁহার কাব্যে মিলিবে। তিনি বলিতেছেন :

নাহং বিপ্রো ন চ নরপতির্নো বনশো ন শূদ্রো ।

নাহং বর্ণী ন চ গৃহপতির্নো বনশো যতির্বা ।

—আমি কেবল শ্রীকৃষ্ণের ‘পদকমলয়োদাসদাসামুদাসঃ’। বৃন্দাবনের পথে সমাজ-পরিত্যক্ত “সনোড়িয়া” ব্রাহ্মণের নিকট হইতে ভিক্ষা গ্রহণে তিনি দ্বিধা করেন নাই। এমনই ছিল তাঁহার অহেতুক প্রীতি, দক্ষিণপথে কুষ্ঠরোগীকে আলিঙ্গন করিতেছেন, নীলাচলে পুনঃপুনঃ নিষেধ সত্ত্বেও সনাতনের ক্ষত-রস-সিক্ত দেহ বৃকে চাপিয়া ধরিয়া উল্লসিত হইতেছেন।

কেবল দীনহুঃখী নয়, যাহারা সমাজের শীর্ষে, যাহারা জ্ঞানী গুণী ‘পণ্ডিত’, তাহাদের জ্ঞান ও পাণ্ডিত্যের রূপান্তর সাধনেও শ্রীচৈতন্য সহায়তা করিয়াছেন। কখনো তিনি পাণ্ডিত্যের দ্বারা পাণ্ডিত্যকে বিলুপ্ত করিয়া প্রাণের জয়ঘোষণা করিয়াছেন, কখনো বিষয়বস্তুর ভিতর হইতে মুমুক্ষু আত্মাকে সবলে ছিন্ন করিয়া উর্দ্ধে স্থাপন করিয়াছেন। সার্কর্ভৌম প্রকাশানন্দ তাঁহার মনীষানীপ্তিতে বিপর্যস্ত; রামানন্দ, রূপ, সনাতন, রঘুনাথ তাঁহার সর্বগ্রাসী আকর্ষণে বিষয়-বিরাগী। সেই যুগে এক মহানায়কের ভূমিকা ছিল তাঁহার। সনাতন রথচক্রে পড়িয়া আত্মহত্যা করিতে চাহিয়াছিলেন—রোগক্ষত দেহ আর সহিতেছিল না। তখন —

প্রভু কহে, “তোমার দেহ তোমার নিজ মন ।

তুমি মোরে করিয়াছ আত্মসমর্পণ ॥

পরের দ্রব্য তুমি কেন চাহ বিনাশিতে ।

ধর্মার্থ বিচার কিবা না পার করিতে ॥

তোমার শরীর মোর প্রধান সাধন ।

এ শরীরে সাধিব আমি বহু প্রয়োজন ॥

মহানায়কের কণ্ঠস্বর বটে। সমস্ত জীবের আত্মগত্য স্বীকার করিবার প্রাণময় শক্তি তাঁহার আছে।

এই প্রচণ্ডশক্তির আর একটি ফুলিঙ্গ কৃষ্ণদাসের কাব্যে আছে। দক্ষিণাপথে মহাপ্রভুর ভ্রমণ-সঙ্গীৎ বিপ্রটির নারীলোভ ঘটাইয়াছিল। তত্রত্য যৌবক্ষিপ্ত জনগণের প্রতিরোধের মধ্য হইতে মহাপ্রভু “কেশে ধরি বিপ্র লঞা করিল গমন”।

এই মাহুঘটি প্রেম দিয়াছে সত্য, কিন্তু ইহার চরিত্র কোনদিন তরল ছিল না। যে সূর্য্য আলো দেয় সে দহনও করে, যে মেঘ স্নিগ্ধ করে বজ্র নুমিয়া আসে তাহার ভিতর হইতে। দূরবগাহ চরিত্রের সম্মুখে বিস্ময়াহত প্রাচীন কবিকণ্ঠের উচ্ছ্বাস-ভাষ সত্যকে বিন্দুমাত্র অতিক্রম করে নাই। লোকোত্তর চরিত্র ‘বজ্রাদপি কঠোরাগি’ অথচ ‘মৃদুনি কুসুমাদপি’। কৃষ্ণদাস কবিরাজ মহাপ্রভুর প্রেম-বিগলিত লাবণ্য-কোমল চরিত্রের অন্তরালে সমুত্তম মহত্ত্বকে নিরীক্ষণ করিয়া ভাষা খুঁজিয়া পান নাই, অর্দ্ধচেতন ভাবে বহুশ্রুত ঐ পঙ্ক্তিস্তির, পুনরাবৃত্তি করিয়াছেন—“বজ্রাদপি কঠোরাগি মৃদুনি কুসুমাদপি।” সার্কর্ভোমের সহিত প্রেমোন্নত মহাপ্রভু দিব্যরাত্রি যাপন করিয়াছেন। বিচ্ছেদের সময় আসিল। শ্রীচৈতন্য স্বদূর দুর্গম দাক্ষিণাত্যে মাত্র একজন সঙ্গীতসহ যাত্রা করিবেন। অল্পনয়, আকুলতা, আর্তনাদ—অভিসারী আত্মার যাত্রাপথে পশ্চাতের কোন বন্ধনই সত্য নয় :

এত বলি মহাপ্রভু করিলা গমন ।

মুচ্ছিত হইয়া তাহা পড়িল সার্কর্ভোম ॥

তাঁরে উপেক্ষিয়া কৈল শীঘ্র গমন ।

কে বুঝিতে পারে মহাপ্রভুর চিত্ত মন ॥

মাহুভবের স্বভাব এই মত হয় ।

পুষ্পসম কোমল কঠিন বজ্রময় ॥

যেখানে তিনি গিয়াছেন, মাহুঘ উন্নত হইয়া উঠিয়াছে ; ছাড়িয়া যাইবেন—ঝগাছিয়া তরুর মত পথোপরি লুটাইয়া পথ আটকাইতে চাহিয়াছে ।

কাজীদলন শ্রীচৈতন্যের তেজস্বর্ষের অপূর্ব্ব এক দৃষ্টান্ত। সেদিন তিনি ভয় করেন নাই ; ভীতির সমারোহ সাজাইয়া বাহারা শ্মশান জাগিতেছিল, তাহার শ্মশানেশ্বরকে চিনিত না। ছোট হরিদাসের প্রতি চরম শাস্তি প্রদান তাঁহার চরিত্র-কাণ্ডিত্বের আর একটি প্রমাণ। “বৈরাগী করে প্রকৃতি সম্ভাষণ”—রক্ত চৈতন্য তাহাকে ক্ষমা করিবে না। সেদিন সমগ্র নীলাচল তাঁহার নিকট করুণ অহুরোধ জানাইয়াছিল, তাঁহারই ভাব-আত্মদানের সঙ্গী, তাঁহারই দ্বিতীয় স্বরূপ স্বরূপ দামোদর কান্তর অল্পনয়ে ভাঙিয়া পড়িয়াও ছোট হরিদাসের জন্ত বিন্দুমাত্র অহুকাঙ্গা সংগ্রহ করিতে পারেন নাই—সে জীবন দিয়া জ্ঞাপন দুষ্কৃতির প্রায়শ্চিত্ত করিয়া গেল। কৃষ্ণের প্রিয় বাহারা

—ভগবান্ স্বয়ং বলিতেছেন,—তঁাহারা “অঘোঁষা সর্বভূতানাং মৈত্রঃ করুণ এব চ,” তথাপি একই সঙ্গে “নির্মমো নিরহংকারঃ সমদুঃখসুখক্ষমী”। স্রী ভয়ঙ্কর তাঁহাদের আত্মার নির্জনতা—“শীতোষ্ণ সুখদুঃখেষু সমঃ সঙ্গ বিবর্জিতঃ।” “ছলচ্ছল টলটল কলকল তরঙ্গকে” শীর্ষে দেখিয়া নিবাত নির্ক্ষিপ দীপশিখার মত, অল্পভরঙ্গ সাগরের তুল্য, জলস্তম্ভিত মেঘের ত্রায় যোগীশ্বরের চরিত্রের ধারণা কে করিবে? মুদিত দুই নয়নোদ্ধে তৃতীয় নয়নের অগ্নিজালা ‘অসংযত চাপল্যকে ভস্মসাৎ করিয়া পুনরায় আনন্দিত করণায় স্নিগ্ধ হইয়া আসিলেই সাধারণ শ্রাণীর দল ভয়-চকিত বন্দনার উৎসার উপরের দিকে ঠেলিয়া দেয়।

এহেন মাহুঘের বৈরাগ্যের কঠিনোজ্জলরূপ আমরা কল্পনা করিতে পারি, অথবা তাহা পারি না। কবিরাজ গোস্বামী ঐ রূপ কাব্যে ফুটাইতে চাহিয়াছেন। সমগ্র নবদ্বীপের অশ্র-স্রসিত আর্দ্রধনীর মধ্যে যিনি নিজ চাঁচর কেশগুচ্ছ মুগুন করিয়া পথে বাহির হইয়াছিলেন, তিনি পরবর্ত্তীকালে সংযম ও নিষ্ঠার কঠিন তাহে বাঁধা বৈরাগ্যময় জীবনে বিন্দুমাত্র শিথিলতা আনেন নাই,—এমন কি অর্দ্ধবাহু দশাতেও, —তাহাতে আশ্চর্য্য কিছু নাই। প্রকৃতি বিষয়ে তাঁহার অতিশয় সাবধানতা ছিল। সনাতনকে রমণী-সঙ্গ ও রমণী-সঙ্গীর সঙ্গ ত্যাগে উপদেশ দিয়াছেন। আহাৰ্য্য বস্তুর সম্বন্ধে বিশেষ বাঁধাবাঁধি না রাখিলেও রঘুনাথদাসের পথকুড়ানো গলিত কদম্বই তাঁহার প্রিয়বোধ হইয়াছে। যে সনাতন ধনমান, এমনকি রাজসম্মান ত্যাগ করিয়া ভিখারী সাজিয়াছেন, তাঁহার শেষ বিলাসসম্বৃতি একটি ভোটকঞ্চল—অঙ্গ হইতে ঐটি না ছাড়াইলে ত্যাগ যে সম্পূর্ণ হয় না। জগদানন্দের সহিত গাঢ় প্রীতির সম্পর্ক। সে প্রভুর বিরহ-ক্লশ অঙ্গরক্ষার জন্ত তুলার বালিশ তৈয়ারী করিয়াছিল। তাহার জন্ত ধিকারের অবধি নাই—“জগদানন্দ চাহে মোরে বিষয় ভুঞ্জাইতে”। এই জগদানন্দকেই কোভে হুংখে মহাপ্রভুর জন্ত রক্ষিত সুগন্ধি তৈলের হাঁড়ি উঠানে আছড়াইয়া ফেলিতে হইয়াছে। প্রতাপরুদ্র রাজা হইলে কি হয়, পরম ধার্মিক, চৈতন্তের একান্ত ভক্ত। অথচ প্রথম দিকে তাহার সম্বন্ধে শ্রীচৈতন্ত বিশ্বয়কর কঠোরতা অবলম্বন করিয়াছিলেন। জগন্নাথের রথার্থে ভাবাবস্থায় পতনোন্মুখ দেহকে প্রতাপরুদ্র ধারণ করাতে ক্রোধ প্রকাশ করিয়া তিনি বলিয়াছিলেন :

রাজা দেখি মহাপ্রভু করেন ধিকার।

ছি ছি বিষয়িম্পর্শ হইল আমার ॥

এমন কঠোর সম্যাসী যিনি, যিনি জীদর্শনকে “বিষের ভক্ষণ” মনে করিতেন, তাঁহার কি বিপরীত মনোভাব রায় রামানন্দ সম্পর্কে। রামানন্দ রায় নির্জনে স্থান্য

কিশোরী দুই সেবাদাসীকে নৃত্যগীত শিক্ষা দেন, তাহাদের বেশবাসে সাজাইয়া দেন,—
তাহাতে মহাপ্রভুর অঙ্গপত্তি নাই বরং অদ্ভুত সম্বন্ধবোধ :

আমি ত সন্ন্যাসী আপনা বিরক্ত করি মানি ।

দর্শন দূরে প্রকৃতির নাম যদি শুনি ॥

তবহি বিকার পায় মোর তনু মন ।

প্রকৃতি দর্শনে স্থির হয় কোন জন ॥

অথচ রামানন্দের :

নির্কিঁকার দেহমন কাষ্ঠ পাষণ সম ।

আশ্চর্য্য তরুণীস্পর্শে নির্কিঁকার মন ॥

যিনি অন্তরতম তিনি অন্তরগত হইয়া বিচার করেন ; শক্তিমান শ্রদ্ধাস্পদ ও মহতের
প্রতি তাঁহার অটুট বিশ্বাস থাকে ।

এই শ্রদ্ধা এবং নম্রতা বিনয়ের রূপ ধরিয়া শ্রীচৈতন্যের মহামহিম ব্যক্তিত্বকে অধিকতর রমণীয় করিয়াছে । জীবনের প্রথম চব্বিশটি বৎসর যাহা কিছু ঔদ্ধত্য অবিনয়ের দিন গিয়াছে, মস্তকমুণ্ডনের সঙ্গে সঙ্গে সে সকলই ত্যাগ করিলেন । সার্কর্ভোমকে শিক্ষা দিবেন, অথচ তাঁহার সহিত কিরূপ নম্রমধুর কথাবার্তা ; কাশীর প্রকাশানন্দের সঙ্গেও তাই । রামানন্দের সহিত প্রথম মিলনের পূর্বে তাঁহার স্থবিনীত কৃতজ্ঞ মূর্তিটি তুলিবার নয় । তাঁহাকে ঈশ্বর বলিলে বিরক্ত হইতেন ; সার্কর্ভোমের স্তুতিবাদ গ্রহণ করিতে পারেন নাই ; তাঁহার পাদোদকের জন্ত জনৈক ব্রাহ্মণের অতিরিক্ত উৎসাহ বিরূপ সম্বন্ধনায় প্রশমিত হইয়াছিল ।

শ্রীচৈতন্যের নামে পরবর্তীকালে এক সাম্প্রদায়িক ধর্ম জাগিয়া ওঠে । ইহাদের সাম্প্রদায়িকতা অনেক পরিমাণে নিন্দিত হইয়াছে । পরিবেশ বিচারে ঐ সাম্প্রদায়িক আত্মরক্ষাবুদ্ধি অপরিহার্য্য কি না, সে প্রশ্ন বর্তমানে তুলিবার প্রয়োজন নাই । কিন্তু একথা সত্য যে, বৈষ্ণব সম্প্রদায়ের যিনি কেন্দ্র-পুরুষ, তাঁহার অলোক-আলোক চরিত্র সর্বপ্রকার ভেদবিভেদের উর্দ্ধে । তিনি নিজে কোনোদিন সাম্প্রদায়িকতার প্রশংসা দেন নাই । সনাতন গোস্বামীর প্রতি তাঁহার দৃঢ় নির্দেশ ছিল—“অন্ত দেব অন্ত শাস্ত্র নিন্দা না করিবে” । নিন্দা তো দূরের কথা শ্রীচৈতন্য দাক্ষিণাত্য-ভ্রমণে বাহির হইয়া সর্বশ্রেণীর দেবদেবীর প্রতি যে শ্রদ্ধা প্রকাশ করিয়াছেন তাহা বিশেষভাবে স্মরণীয় । বহুবার তিনি শিবদর্শন করিয়াছেন,—শ্রীরামচন্দ্র, লক্ষ্মীনারায়ণ, নৃসিংহ, শ্বেতবরাহ ইত্যাদি ভগবানের নানা অবতারের সম্মুখে প্রণতি জানাইয়াই তিনি ক্ষান্ত হন নাই, তাঁহার সম্প্রদায়-উর্দ্ধতার চরম প্রমাণ—

“শিয়ালী ভৈরবী দেবী করিল দর্শন”

এবং :

“সিংহারি মঠ আইলা শঙ্করাচার্য স্থানে” ।

এইজ্ঞাই শ্রীচৈতন্যকে মানুষ ভালবাসিয়াছে—তঁাহার ঐ সংযম ঐ বিনয় ঐ অসাম্প্রদায়িকতা—ইহার জগৎ তঁাহার বিরুদ্ধে বিধেব জাগে নাই, তঁাহার বিকচ-পবিত্র চরিত্রটি শ্রদ্ধা ও অমুরাগের আসনে অবিলম্বে ছিল। তিনি সমাজকে একস্থানে আঘাত করিয়াছেন বটে, সে কিন্তু বিকারের ক্ষেত্রে। মহাশয়ের প্রতিষ্ঠা-ব্রতে তঁাহার সেই আঘাত, —লোকরক্ষার দণ্ডাঘাত, সমাজের প্রাপ্য ছিল। তথাপি বিনাশ তঁাহার সাধন নয়। যিনি স্বয়ং-পূর্ণ তিনি পূর্ণ করিয়াই যান। পূর্ণতার যুগ্মি গড়িতে কিছুটা ভাঙচুর প্রয়োজন হয়। সেটুকু স্বাস্থ্যের প্রয়োজন। নচেৎ সমাজধর্মের কী গভীর সম্মান ও অপরিমীম মূল্য শ্রীচৈতন্য স্বীকার করিয়া গিয়াছেন। সাধারণ লোকমতের মধ্যেও সত্য থাকে, কারণ বিদ্যালয় না হোক পূর্বাগত গ্রাম-অগ্রায় ধারণা সংস্কারের মত মানবমনকে আশ্রয় করে এবং সেই বছর সম্মিলিত বুদ্ধি একটা সামাজিক প্রজ্ঞার রূপ ধারণ করে। ঐ সামাজিক প্রজ্ঞা এক যুগের দান নয়, অতএব যুগবিশেষের উচ্ছ্বলতায় তাঁহার মর্যাদানাশও অস্বাভাবিক। ইতিপূর্বে আমরা প্রতাপরুদ্রের ক্ষেত্রে শ্রীচৈতন্যের সমাজ-সম্মানের পরিচয় পাইয়াছি। সম্মান-জীবনের মর্যাদাকে তিনি সকল সময় রক্ষা করিয়া চলিতেন। এমনকি লোকনিন্দা সম্পর্কেও তঁাহার যথেষ্ট সাবধানতা ছিল। অনেক সময়েই বৈরাগ্য-পালনে তিনি যে অত্যধিক কঠোরতা অবলম্বন করিয়াছেন তাহা লোকমতের মুখ চাহিয়া। বৃন্দাবন-যাত্রায় শিষ্য-সঙ্কে পরিহার করিয়াছেন, তাহাও লোকমতের বিবেচনায়; কারণ “লোকে দেখি কহিবে মোরে এই এক ঢঙ”। ছিদ্ৰাঘেবী রামচন্দ্রপুরী মহাপ্রভুস্থানে সর্বত্রগামী পিপড়া দেখিয়াও নিন্দা রটাইল—“সন্ন্যাসী হইয়া করে মিষ্টান ভক্ষণ”। সঠিক মিত্যা—তথাপি মহাপ্রভু বেশ কিছুদিন অর্দ্ধাশনে কাটাইলেন। তিনি মিত্যার সম্মান করিলেন না, সত্যকে জ্যোতির্ময় করিয়া স্থাপন করিলেন। এমন করিয়া লোকমতের সম্মান করিয়াছেন বলিয়া ‘লোকও’ তঁাহার মান দিয়াছে।

শ্রীচৈতন্যের জীবনের এই লৌকিক দিকটি সাধারণ মানুষের মনকে টানেই টানে। মহিমার অত্যাশ্রিত ক্ষেত্রে প্রাকৃত জন বিস্মিত হয় কিন্তু এই দেহপ্রাণের সীমায় তাহাকে ধরিতে পারি না বলিয়া তাহার সহিত ব্যবধান থাকিয়া যায়। মানুষকে স্বাভাবিক আলোকলোকে উত্তীর্ণ করিয়া দিবে, তঁাহারা কেবল বিশ্ববিপুল নন, নীড়-শান্তও। মানুষের যেহরূপ বধন, তখন মানুষের ছোটখাট স্বত্বদুঃখ, বিচার-বিবেক,

রাগ-অহুরাগের প্রতি মমত্ব না থাকিলে চলে কেমন করিয়া? চৈতন্য-জীবনের এই মধুর লৌকিক দিকটিও কৃষ্ণদাস কবিরাজের কাব্যে রূপ ধরিয়াছে। চৈতন্যের মুখনিঃসৃত উপদেশগুলি কত সহজ সরল, ‘হৃদ্যন্ত পাণ্ডিত্য’ হইতে কতদূর! শিক্ষা শ্লোকাষ্টকে একেবারে প্রাণছোয়া সরলতা। সম্যাসী তিনি, তবু আজীবন জননীর প্রতি সন্তানের প্রণতি জানাইয়াছেন। বৈরাগ্যের অহঙ্কারে, পূর্ব-সম্পর্কচ্ছেদের অভিমানে মাতৃহৃদয়ে ব্যথা দেন নাই। ‘কর্তদিন হইল গৃহত্যাগ করিয়া গিয়াছেন—কিরিয়া মাতার সহিত সাক্ষাৎ হইল—“শচী আগে পড়িলা প্রভু দণ্ডবৎ হৈয়া”। বারবার বলিতেছেন, তুমি যাহা বলিবে তাহাই করিব, তুমি যদি যবে থাকিতে বল, তাহাও স্বীকার। চরিতামৃতের বহু স্থানে মাতার জ্ঞাত্য তাঁহার উৎকর্ষার পরিচয় আছে। বহুদূরে থাকিয়া শচীমায়ের শাল্য ব্যঞ্জন শাক মোচাঘট পটল নিষপাত—সর্বজড়িত ‘স্নেহ বিহ্বল’ ছলোছলো করুণাটুকু স্মরণ করিয়া দীর্ঘনিশ্বাস মোচন করিয়াছেন। এমনকি মায়ের বৃকে আঘাত করিয়া সম্যাসগ্রহণের জ্ঞাত্য একটা ঘেন আত্মমানির ভাব তাঁহার মধ্যে জাগরুক ছিল :

তাঁর সেবা ছাড়ি আমি করিয়াছি সম্যাস ।

ধর্ম নহে কৈল আমি নিজ ধর্মনাশ ॥

তাঁর প্রেম বশ আমি, তাঁর সেবা ধর্ম ।

তাঁহা ছাড়ি করিয়াছি বাতুলের কর্ম ॥ ইত্যাদি ।

মাতাকে সান্ত্বনা দিবার জ্ঞাত্য প্রতিবৎসর জগদানন্দকে নীলাচল হইতে নবদ্বীপ পাঠাইতেন ।

শ্রীচৈতন্যের একান্ত লৌকিক জীবনের যে অংশটি চিত্রিত করা কৃষ্ণদাসের কাব্যের উপজীব্য নয়, সেই সম্যাসপূর্ব জীবনেই বিজ্ঞা-উদ্ধত, চপল-চঞ্চল, প্রাণোত্তেজিত যুবকটির চরিত্রে ঘরোয়া রূপ সর্বাধিক পরিস্ফুট। কবিরাজ গোস্বামী ঐ রূপ আঁকিতে না চাহিলেও দু’একটি সংক্ষিপ্ত রেখায় জীবনপ্রান্তটুকু আলোকিত করিয়া তুলিয়াছেন। যেমন ধরা যাক লক্ষ্মীদেবীর সহিত শ্রীগোরাঙ্গের পরিচয় ও প্রণয়। দু’একটি মাত্র অর্থপূর্ণ উক্তি :

একদিন বলভাচার্য্যের কণ্ঠা লক্ষ্মী নাম ।

দেবতা পূজিতে আইলা করি গঙ্গাস্নান ॥

তারে দেখি প্রভুর সাভিলাষ মন ।……

দোহা দেখি দোহার চিত্তে হইল উল্লাস ॥ ইত্যাদি ।

সাধারণ মানুষের আন্তরিক তৃপ্তি আছে এই শ্রেণীর বর্ণনায় ।

কেবল আদিলীলা নয়, কবিরাজ গোস্বামী, তাঁহার নিজস্ব ক্ষেত্রে অর্থাৎ মধ্য ও

অন্ত্যলীলার অনেকাংশে এই সহৃদয় স্বচ্ছন্দ মানবতার স্বরূপ ফুটাইতে পারিয়াছেন। শিশুবর্গসহ মন্দির-মার্জনের এক অতি অপূর্ণ চিত্র আছে চৈতন্য চরিতামৃতে।

শ্রীচৈতন্য জীবনকে অহুভূতি ও উপলব্ধির পথে গ্রহণ করিয়াছিলেন। জীবন হইতে সহজের স্বরূপ মুছিয়া ফেলিবার প্রয়োজন হয় নাই। জগদানন্দের সহিত তাঁহার সম্পর্ক ছিল বিচিত্র। মহাপ্রভুর উপর জগদানন্দের অধিকারবোধ, অভিমান, বাম্যতা নানা ঘটনায় প্রকাশিত করিয়া চরিতামৃতকার উভয়ের সম্পর্কের সহিত কৃষ্ণ-সত্যভামার সম্পর্কের তুলনা দিয়াছেন। ভক্ত-সঙ্গে আহাৰ্য্য-গ্রহণেও শ্রীচৈতন্যের প্রচুর আনন্দ ছিল।

তাঁহাদের সহিত মহাপ্রভুর জলক্ৰীড়ার অনেকগুলি বর্ণনা চরিতামৃতে আছে। জলক্ৰীড়া নহে, জল-রণ সুর হইল। লড়ীইটা জমিল তাঁহাদের মধ্যে যাহাদের গাভীর্ষ আর গভীরতার বশ স্ববিদিত : যথা, ঐদেব-নিত্যানন্দ, বিদ্যানিধি-স্বরূপ, শ্রীবাস-গদাধর, সার্কর্ভোম-রামানন্দ; এবং সর্বোপরি সকৌতুকে বৃদ্ধদের এই বালকোচিত জলযুদ্ধ উপভোগ করিতেছেন নটশেখর রসিকোত্তম কৃষ্ণ-চৈতন্য।

মাহুষ চৈতন্যকে এমন করিয়া চরিতামৃতকার আমাদের সম্মুখে তুলিয়া ধরিয়াছেন। শ্রীচৈতন্যের ভাবদেহে এইগুলিই রক্তমাংস এবং সর্বজড়িত লাবণ্য। ইহা না থাকিলে দার্শনিক বা ভক্তের নিকট বাহাই হউক, সাধারণ জনগণের নিকট চৈতন্য-চরিত্রের কোন আবেদন থাকিত না। চরিতামৃতকারকে আন্তরিক প্রজ্ঞা জানাই, স্থানে স্থানে শ্রীচৈতন্যের অলৌকিক চরিত্রের উপর এমন লৌকিক মাধুর্য্যের ছায়া বিস্তার করিয়াছেন যে, মুহূর্ত্তে মন আনন্দরসে ভিজিয়া যায়। নদীয়া হইতে ভক্তগণ আসিয়াছে, তাঁহাদের অগাধ শ্রীতির পরিচয়ে শ্রীচৈতন্য বড় ব্যস্ত হইয়া পড়িয়াছেন, যে মধুর স্নিগ্ধ কৃতজ্ঞতাটুকু জানাইতেছেন তাহার তুলনা আছে না কি?—নিত্যানন্দকে আসিতে কতবার বারণ করিয়াছি, তবু ছুটিয়া আসে, কি বলিব। বৃদ্ধ, পরম শ্রদ্ধেয় আচার্য্য গৌসাই এই বয়সেও জীপুত্র ছাড়িয়া দুর্গম বিপদসঙ্কুল পথে বাহির হইয়াছেন আমার জন্তই, তাঁহার প্রেমকণ শুধি কেমন করিয়া? আমি সন্ন্যাসী, আমার ধন নাই, সম্পদ নাই, আমি কাহারো জন্ত কোথাও যাই না, তোমরাই ছুটিয়া আস—আমার অপরাধের কি শেষ আছে?

এমন মাহুষকে মাহুষ ভালবাসিবে না?

শ্রেয় এবং প্রেম লইয়া মাহুষের জীবন। বৈষ্ণব বলেন, মাহুষ হইতেছে তটস্থ—সমুদ্রেও নয়, ডাঙাতেও নয়, তটে। সমুদ্র এবং প্রান্তরের মাঝামাঝি তাহার জীবন। যদি সমুদ্র হয় শ্রেয়, প্রান্তর তবে 'প্রেম',—মাহুষের জীবনে উভয়ের অঙ্গীকার আছে। এক অর্থে সে বদ্ধ, অগ্র অর্থে সে মুক্ত। শুধু বৈষ্ণবদর্শনে কেন, সর্বশ্রেণীর মানবদর্শনে

এই বৈভব স্বীকৃত। সৃষ্টিকর্তা যখন মহুয়াসুজনে ব্যাপৃত ছিলেন তখন তিনি বাছিয়া বাছিয়া পাঁচটি ঝুঁত গ্রহণ করিলেন—সেই পঞ্চভূত-সমবায় মানবদেহ। ক্ষিতি তাহাকে পৃথিবীর সহিত যুক্ত করে, ব্যোম তাহার আকাশ-গোত্রতা আনিয়া দেয়। মাঝের ভূতগুলি করে শূন্য-পূরণ।

এই শ্রেয় এবং প্রেয়ের ‘আসমান জমিন ফারাকের’ মধ্যে এমন মাহুয আনিয়া দাঁড়ান যাঁহার পা মাটিতে ছুঁইয়া থাকে বটে, কিন্তু মাথা ঠেকে আকাশে। মানব-জীবনের দিগন্তে দাঁড়াইয়া আকাশপ্রাস্তরের মিলনে তিনি মধ্যস্থতা করিয়া যান।

শ্রীচৈতন্য তেমন একজন মাহুয; তাঁহার আকাশছোয়া ব্যক্তিত্ব ব্যক্তিগত আচার আচরণের ক্ষেত্রে ঐ শ্রেয় এবং প্রেয়—বাণী ও জীবনের চরম সামঞ্জস্য আনিয়া দিয়াছে।

তিনি বলিয়াছেন সর্বান্ন, তিনি করিয়াছেন সর্বাধিক। তিনি বাণীমূর্ত্তি অথবা মূর্ত্তিময় বাণী। তাঁহার জীবনটি যেন বিধাতা-রচিত একখানি কাব্য, অথবা এমন বলা যায়, বিধাতা-কাব্যের তিনি একটি ছন্দোময় ভাণ্ড।

চৈতন্য-জীবনকে যদি ভাণ্ড বলি, তবে বলিতে হয়, এটি অতি স্বল্পাক্ষর ভাণ্ড—অতি গূঢ়ার্থপূর্ণ। বিধাতার সৃষ্টির উপর মাহুযের অহংবুদ্ধি যে স্বকল্পিত বিস্তৃতির দায় চাপাইয়া দেয় এবং যে বাগ্‌বিস্তৃতি স্বতোবিরোধ অনিবার্য করিয়া তোলে, শ্রীচৈতন্য তাহা সযত্নে পরিহার করিয়াছিলেন। তিনি কোনদিন উপদেশের আড়ম্বর করেন নাই, ‘আমার জীবনই আমার বাণী’ বলিয়া আত্মঘোষণার প্রয়োজন অনুভব করেন নাই। বাণীতে আত্মঘোষণা আর আচারে জীবন-ঘোষণার মধ্যে পার্থক্য আছে। শ্রীচৈতন্য শেষ পথই বাছিয়া লইয়াছিলেন। প্রাকৃতজন বাণী হইতে জীবন, কথা হইতে কাজ, আফালন হইতে আচরণ, শাস্ত্র হইতে সাধনে বিশ্বাস করে বেশী। ‘আপনি আচরি ধর্ম’ চৈতন্য সেই বিশ্বাসের উদ্বোধন করিয়া গিয়াছেন।

শ্রীচৈতন্য বলিতেন, বেশী কিছু নয়, কলিতে হরিনাম নাও, তাহাতে মুক্তি—হরেনাম হরেনাম হরেনামেই কেবলম্। আর বলিতেন, গ্রাম্য বার্তা না শুনিবে, গ্রাম্যকথা না কহিবে; তৃণ হইতে স্নানীচ হইবে, তরু হইতে সহিষ্ণু হইবে, অপরকে মানদান করিয়া নিজে মানত্যাগ করিবে। তিনি কেবলই প্রার্থনা করিতেন :

ন ধনং ন জনং ন গুন্দরীং কবিতাং বা জগদীশ কাময়ে।

মম জন্মনি জন্মনীশ্বরে ভবতাদভক্তির্হৈতুকী স্মি ॥

এবং :

নয়নং গলদক্ষ ধারয়া বদনং গদগদ রুদ্ধয়া গিরা।

পুলকনিচিহ্নং বপুঃ কদা'তব নামগ্রহণে ভবিষ্যতি ॥

শ্রীচৈতন্যের জীবনের সহিত ঠাঁহার বিন্দুমাত্র পরিচয় আছে, তিনি বলিবেন, ঐ উপদেশ, ঐ অবস্থা কত সত্য ছিল ঠাঁহার জীবনে। হরিনাম নাট্য—একথা মহাপ্রভু বলিয়াছেন; কীর্ত্তনোন্নত মহাপ্রভুর পদভারে টলমল নবদ্বীপ নীলাচলের ‘টলমল’ মাহুগুলির সব কথা কি মিথ্যা? আশ্চর্য্য নয়, উৎকল কবি ঠাঁহাকে “হরিনামমুগ্ধি” আখ্যা দিবেন। গ্রাম্যকথা আর গ্রাম্যবার্ত্তা ঠাঁহার মুখে কেহ শুনিয়াছে এত বড় কলঙ্ক অতি বড় বিদ্রিষ্টও ছিটাইতে পারিবে না। বাঙালীর জীবন-সঙ্গীতকে গ্রাম্য গণ্ডী হইতে মুক্ত করিয়া কোন উচ্চগ্রামে তুলিয়া দিয়া গিয়াছিলেন, আজিকার দিনে তাহা কথঞ্চিৎ উপলব্ধি করিতে পারি।

তুণাদপি বিনয়—সাধন পথে এমন অত্যাধিক বস্তু আর নাই। আত্মবিচারণা না থাকিলে আত্মোপলব্ধি ঘটে না। ঐ আত্মাহুসন্ধান অনিবার্য্যভাবে নিজ ক্রটি বিচ্যুতি, স্থলন পতন উদ্ঘাটিত করিয়া দেয়। সাধন-পথিক মাহুগ—সহস্র অ্পূর্ণতার বোঝা বহন করিয়া আত্মগর্ভ করিতে পারে? বিনয়ী না হইয়া তাহার উপায় আছে? সন্ন্যাস-জীবনে শ্রীচৈতন্য বিনয়ের পরাকাষ্ঠা দেখাইয়াছেন। দৃঢ়কণ্ঠে অবতারত্ব অস্বীকৃতির কথা ছাড়িয়া দিই, পাণ্ডিত্যকেও তিনি বিসর্জন দিয়াছিলেন। তথাপি বিচারে যখন নামিতে হইয়াছে, তিনি আপন বিজয় সর্বদিক দিয়া সম্পূর্ণ করিতেন। জ্ঞানের অগ্নি হইয়া প্রতাপক্ষের উপরে নামিয়া মুহূর্ত্তে তিনি ভ্রমসাৎ করিয়া দিতেন কিন্তু তারপরেই করুণার মেঘবর্ষণ শুরু হইত।

আর ঠাঁহার প্রার্থনা—ধন নয়, জন নয়, হৃন্দরী নয়, সঙ্গীত নয়—জন্মে জন্মে যেন তোমার পায়ে অহৈতুকী ভক্তি থাকে; আবার—হে প্রভু, কবে তোমার নাম গ্রহণ করিলেই নয়ন গলদশ, বচন গদগদ, আর দেহ পুলককণ্টকিত হইবে সে কবে? ইহা কি প্রার্থনা, না প্রাপ্তির আনন্দ-স্বপ্ন। তিনিই সাধনা তিনিই সিদ্ধি। গভীরায় দীর্ঘ ষাদশবৎসর ব্যাপী চৈতন্যের বাধাভাবিত দিব্যোন্মাদ অবস্থা শেষবারের মত প্রমাণ করিয়া দেয় ঠাঁহার বাণী যাহা, ঠাঁহার জীবন তাহাই।

সৃষ্টির সাধারণ নিয়মে সৃচনা যেখানে সমাপ্তি সেখান হইতে অনেক দূরে। বিবর্ত্তনবাদ বা অভিব্যক্তি তত্ত্বের অর্থই এই। কিন্তু এমনও ঘটে, প্রথম যিনি, তিনিই পূর্ণ; সেই পূর্ণকে দর্শন করিয়া অপূর্ণ পূর্ণাভিসারী হয়। শ্রীচৈতন্যকে যদি প্রথম বৈষ্ণব বলি, পূর্ণ বৈষ্ণব তিনিই। নিত্যবৃন্দাবনের আলোকে ঠাঁহার জন্ম, ঠাঁহার বিকাশ। সেই বৃন্দাবন হইতে নির্বাসিত মানবাত্মা গিরি-নদী-অরণ্য-পর্বত অতিক্রম করিয়া ক্রমাগত অভিসার করিয়া ঐ বৃন্দাবনের দিকেই ছুটিয়া চলিয়াছে; সেখানে পূর্ণতম বৈষ্ণব শ্রীচৈতন্য অতঙ্গ করুণার আগিয়া আছেন।

নির্ঘণ্ট

অধৈত (আচার্য্য)

আচার্য্য গৌসাই—১৬৩, ১৭৮, ১৭৯

অনন্তদাস—১০০

অভিদার—২, ২২—২৪, ৩১, ৮৮, ১০০

—১০৮, ১৪৮—১৫৩

অর্জুন—৪৪, ৪৫

অলকা—১০০

‘অষ্টরসব্যাখ্যা’—১৩৯

অষ্টসাত্ত্বিকভাব—৮৯

আইহন—৪

আক্ষেপাহুবাগ—১, ৪, ২৯, ৬৫, ১২৮,
১৪৩

আগমনী—১১৫, ১১৬

আত্মনিবেদন—৬৫, ৭৪

ইন্দ্রাণী—৬৩

ঈশ্বরপুরী—১৬১, ১৬২

উজ্জয়িনী—৭০

উত্তরগোষ্ঠ—১১৭

উপনিষদ—৩৪

উমা—১৫৩

কথামৃত—৩১

কবিরাজ—৩২, ৩৮, ৩৯

কবিরঞ্জন—১৩৯

কবিরাজ—১৯

কবিশেখর—১৩৮, ১৩৯

কমলা—২১

কল্পতরু—৮১, ৯০

কল্পনা—৮৫

কাজীদলন—১৬৬, ১৭৩

কালিদহ—৫২

কালিদাস—১৩, ১৫, ৮৬, ৯৯, ১০০,
১৩৬

কালিনাগ—৫২

কালিয়দমন—১১৪, ১১৫

কালিয়দমন খণ্ড—৪৮, ৫২, ৫৪

কালিনী, কালিন্দী—৪৮, ৫৫, ৭৮, ৭৯,
৯৩, ১৪৭

কালী—২০

কৃষ্ণভঙ্গ—১২৭, ১২৯

কৃত্তিকা—১৫৭

কৃষ্ণদাস কবিরাজ—৮৮, ১৫৮

কৌতুক—৫

‘ক্ষণিকা’—৮৫

খণ্ডিতা—১২৭, ২৯, ১৩১

গদাধর—১৬৩, ১৭৮

গম্ভীরা—১৮১

গম্মা—১৬১

গিরিরাজ—১১৫, ১.৬

গীতগোবিন্দ—১১, ১০১

গীতা—১০১

গোকুল—৪৭, ৪৮, ১১৮, ১২৯

‘গোপালচরিত’—১৩৮

গোপালবিজয় কাব্য—১৩৮

গোপালভাব—১৩৩

গোপালের কীর্ত্তন অমৃত—১৩৮

গোপীনাথ বিজয়—১৩৮

গোপীনাথচার্য্য—১৭৮

গোবিন্দদাস—৫, ৮, ১৬, ১৭, ২৪, ৪২,

৪৩, ৬৩, ৬৪, ৬৮, ৭৪, ৭৭, ৭৮,

৮১—১১১, ১২৬—১২৮, ১৪১,

১৪৮, ১৫১, ১৫৪

গোরাঙ্গনি—১৬৭

গোষ্ঠ—১১৭, ১৫৪, ১৫৫

গোরচন্দ্রিকা—৮৮, ৮৯, ৯২, ১৬৩

গোরনাগরীভাব—১৬১

গ্রীষ্মাভিসারিকা—১০২

চণ্ডীদাস—৩, ১৪, ১৬, ২০, ২২, ২৯—

৩৩, ৩৮, ৬০, ৬১, ৬৩—৬৫, ৬৮,

৬৯, ৭১, ৭৩, ৭৪, ৭৭, ৭৮, ৮২—

৮৫, ৮৭, ৯৪, ৯৬, ১১০, ১১১,

১২১, ১২৭, ১২৮, ১৩৩, ১৪১

‘চঞ্চলা’—৯৭

চতুরানন—৩৮, ৩৯

‘চন্দ্রশেখর’—১০

চন্দ্রাবলী—৫৫

চন্দ্রাবলী রাহী—৪১

চর্য্যাপদ—৪১

চিত্রাঙ্গদা—৪৩—৪৫

চৈতন্যচরিতামৃত—৮৮, ১৫৮, ১৫৯,

১৬১, ১৬৩—১৬৬, ১৬৯, ১৭৭

চৈতন্যভাগবত—১৫৮, ১৫৯, ১৬১—

১৬৩, ১৬৫

চৈতন্যমঙ্গল—৮৮

‘ছোট বিজ্ঞাপতি’—১৩৮, ১৩৯, ১৪৮

ছোট হরিদাস—১৭৩

ছত্রখণ্ড—৪৮, ৫২

জগদানন্দ (পদকর্তা) ২৪, ১২৭

জগদানন্দ—১৭৪, ১৭৭, ১৭৮

জয়দেব—৮৬, ১০১

জলকীড়া—১৪১, ১৪৬

জানদাস—১৪, ১৬, ২২, ২৯, ৩৩, ৬১,

৬৩—৮০, ৮৭, ৯২, ৯৪, ৯৬, ৯৯,

১০৪, ১১০, ১১১, ১২০, ১২১,

১২৭

জ্যোৎস্নাভিসারিকা—১০২

তান্ত্রিক—৪৩

তাম্বুল খণ্ড—৪৮, ৫৯

তিমিরাভিসারিকা—১০২

দক্ষিণাপথ, দাক্ষিণাত্য—১৭২, ১৭৩,

১৭৫

দানখণ্ড—৪৮

দাস্ত—১১৩

দিগ্বিজয়ীর পরাভব—১৬৬

দিবাভিসারিকা—১০২

দীর্ঘশব্দ সেন (ডঃ)—১৬৯

‘দুইবোন’—১২৬

দুর্কাসা—৫৫

দুয়ন্ত—৫৫

দুতী—৫

দেয়াসিনৌ মিলন—১৪১

দৈবকীনন্দন সিংহ—১৩৮

নদীয়া—৯২, ১৪৯, ১৭৯

নদীয়াতুল্য—১৬৭

নব কবিশেখর—১৩৮

নবদীপ—৯০, ১৫৮, ১৬১—১৬৫, ১৭৪,

১৭৭, ১৮০

নবহরি—১৬১, ১৬৩

নরোত্তম—১৬৪

নিজ্যানন্দ—১৬২, ১৬৩, ১৭৮, ১৭৯

নীলগিরি—৭৮

নীলাচল—৯০, ১৬০, ১৬১, ১৬৬, ১৭২,

১৭৩, ১৭৭, ১৮০

নূপ কবিশেখর—১৩৮

নুসিংহ—১৭৫

নোকাখণ্ড—৪৮, ৫০

নোকালীলা, নোকাবিলাস—৭২, ১২৮,

১৪৬, ১৪৭

পঞ্চশর—১২

পত্নী—৪৬

পরমানন্দ—১৬৩

পার্কর্তী-পরমেশ্বর—৩৫

পীতাম্বরদাস—১৩৯

‘পুণ্ডরীক বিজ্ঞানিধি’—১৬৩, ১৭৮

পূর্বগোষ্ঠ—১১৭

পূর্বরাগ—৩, ৯, ১৩—১৬, ২৯, ৩১,

৯৬, ১৩৩, ১৩৭, ১৪১, ১৪৭, ১৫৫

প্রকাশানন্দ—১৭২, ১৭৫

প্রতাপরুদ্র—১৭৪, ১৭৬

শ্রমথ চৌধুরী—৪

প্রার্থনা—৩৫, ৩৭—৩৯

শ্রেমবৈচিত্র্য—৩

বড়ায়ি—৪৬—৪৮, ৫০—৫২, ৫৪—

৫৬, ৫৮

‘বড় বিজ্ঞাপতি’—১৩৮, ১৪৮

বড় চণ্ডীদাস—৪৬—৪৮, ৫৪, ৫৫, ৫৯

—৬২

বয়ঃসন্ধি—৩, ৯, ১০, ১৩, ১৫—১৭,

৩১, ৬১

বলরাম—১১৭—১১৯, ১৪৫

বলরামদাস—৬৩, ১১২—১৩৭, ১৪০,

১৫৪

‘বলাই’—১১৯

‘বলাকা’—৯৭

বল্লাভাচার্য—১৭৭

বহু রামানন্দ—৯৫

বাণখণ্ড—৪৮, ৫৪, ৫৫

বাণভট্ট—১৯

বাৎসল্য—১১২, ১১৩, ১১৫—১২০,

১২৬, ১২৭, ১৫৩—১৫৫

বারমাতা—২১

বাল্যলীলা—১৪২, ১৫৩, ১৫৪

বাঙালী—৩১

বাহুঘোষ—১৬১

বিজয়া—১:৫, ১১৬

বিজ্ঞাপতি—৩-৪০, ৪৬, ৬০, ৬১,
৬৪, ৬৮, ৬৯, ৭৩, ৭৪, ৭৭, ৮১,
৮৩, ৮৬, ৯২, ৯৪, ৯৬, ৯৯, ১০০,
১০৩, ১০৮, ১১০, ১২২, ১৩৩, ১৩৭,
১৩৮-১৪২

বিজ্ঞানন্দর—১৪২

বিরহ—৯, ২২, ২৪, ২৬—২৯, ৩১, ৬০,
৭৬, ১০৯, ১২৭, ১২৮, ১৪১

বিরহ খণ্ড—৫৪, ৫৬, ৫৯, ৬০

বিষ্ণুপুর—৪৭

বিহি—৯১

বৃন্দাবন—৮, ৪৬, ৫২, ৫৭, ৭৩, ৮৪,
৮৫, ৮৯, ৯০, ৯৮, ১০৯, ১১০,
১১৩, ১১৫, ১৪৪, ১৫৪, ১৫৮,
১৬১, ১৬৩—১৬৫, ১৭২, ১৭৬

বৃন্দাবন খণ্ড—৪৮, ৫২, ৫৪

বৃন্দাবনদাস—১৫৮, ১৫৯, ১৬৫—১৬৭,
১৬৯

বৃন্দাবনের গোস্বামী—১৫৮—১৬০,
১৬৩—১৬৫

বৈকুণ্ঠ—১৫৭

ব্যাস—১৬৬

ব্রজকুল—১০৯

ব্রজপুর—১০৯

ব্রজরাজ—১৫৬

ব্রজবলি—৭৬, ৭৭, ১২৭—১২৯, ১৩২,
১৩৩, ১৩৮—১৪০

ব্রজবৈবর্ত পুরাণ—১১

বংশীখণ্ড—৪৮, ৫৪—৫৬, ৬০

বংশীবাদন—১১৬, ১২৯, ১৬৩

বংশীমূলক পদ—৬৮

ভক্তিরত্নাকর—১৬৪

ভাবদাম্মিলন—৯, ২৯, ৩১, ৩৩—৩৫,
১২০, ১২৭

ভাবোন্মাদ—৩৩, ৩৪, ১৪১

ভারতখণ্ড—৪৮, ৫১

ভারতচন্দ্র—৫, ২০, ৮২

ভীষ্ম—১৬৮

মঙ্গলকাব্য—১৪১

মঙ্গলিভাব—১৬১

মথুরা—১১৪, ১১৫

মদন—১৪, ৫৫, ৫৮

মধুসূদন—১১৩, ১২০, ১৫৪, ১৫৫

মধুসূদন—৩৮, ৮২

মন্দাকিনী—৯১

মহাপ্রভু—৮৯, ৯০, ১৬০, ১৬৩, ১৬৪,
১৬৬, ১৬৯, ১৭৩—১৭৬, ১৭৮,
১৮০

মহামায়া—২১

মহারাস—৮৮, ৯৭, ৯৯, ১০০

মাধুসূদন—৬১

মান—৩, ৫, ৩১, ৪২, ১২৯, ১৪১

মানস গঙ্গা—৭২

মানস সরোবর—১৩৭

মিলন—৩, ৫, ৩১, ৩৩, ৩৪, ১২০, ১২৯,
১৪১, ১৫৫

মুকুন্দ—১৬৩

মেঘদূত—২৭, ৯৯, ১৩৬

মেনকা—১১৬

ষট্ঠনাথদাস—১১৮, ১৫৩

ষমুনা—৫, ৫৩, ১০১, ১১০, ১২৮

ষমুনাখণ্ড—৪৮, ৫৩, ৫৫

যশোদা—৫৪, ৭১, ১১৩, ১১৪, ১১৬,
১১৭, ১১৯, ১৫৩, ১৫৫—১৫৭

যশোমতী—১১০,

যাদবেন্দ্র—১১৯

রঘুনন্দন—১৩৯

রঘুনাথদাস—১৬৪, ১৭২, ১৭৪

রবীন্দ্রনাথ—১২, ১৬, ২৩, ২৭, ৩৪,
৪৩, ৫৫, ৬৩, ৬৬, ৬৭, ৭০, ৭১,
৮২, ৮৫—৮৭, ৯১, ৯৯, ১০১,
১১৫, ১২৬, ১৩৬

রদোদগার—১০৬, ১১৩, ১২০, ১২১,
১২৫—১২৭, ১৩৬

রাঢ়দেশ—১৬৬

রাধাকৃষ্ণ মিলন—১৪১

রাধাচন্দ্রাবলী—৪৫, ৫৫, ১৬৮

রাম, রামচন্দ্র—৩১, ৩৯, ৯১

রাম (বলরাম)—১৫৪

রামগিরি—১০০

রামচন্দ্রপুরী—১৭৬

রামায়ণ—১৬৮

রায় রামানন্দ—১৬৮, ১৭২, ১৭৪, ১৭৫,
১৭৮

রায়শেখর—২৪, ১০০, ১১৬, ১৩৮
১৫২

রাস—২৭, ৯৯, ১০৮, ১২৮

রূপ গোস্বামী—৩৯, ১৬৪, ১৭২

রূপাহুবাগ—১৬, ৫৬, ৭৭, ৭৮, ৮০,
৮৩, ৮৮, ৯২, ৯৪—৯৬, ১০৮,
১৩১, ১৪৮—১৫০

লক্ষ্মীদেবী—১৭৭

লক্ষ্মীনারায়ণ—১৭৫

লোচনদাস—৮৮, ১১৮, ১৩৪

শকুন্তলা—৫৫

শক্তি—২১, ৩৮

শঙ্করাচার্য—১৭৬

শচীনন্দন—৯২

শচীমাতা—১৭৭

শাক্তগীতিকা—৯০, ১১৫, ১১৬

শান্তিপুত্র—১৬৬

শিক্ষাপ্রদীপ—১৭৭

শিপ্রা—৭০

শিব—২১, ৩৮, ৯১, ১৭৫

শিবশক্তি—২১

শিবানন্দ—১৬১, ১৬৩

শিয়ালী ভৈরবী—১৭৬

শুকশারী—১২৯

শেখর—১৩৮—১৫৭

শেখর রায়—১৩৮

শেতবরাহ—১৭৫

শ্রীমা—১৫১

শ্রীঅরবিন্দ—৩৮

শ্রীকৃষ্ণকীর্তন—৪১—৬২

শ্রীকৃষ্ণচৈতন্য—১৬৩, ১৬৭, ১৭৮

শ্রীখণ্ড—১৩৯

শ্রীগোরাঙ্গ—১৪৯, ১৬২—১৬৪, ১৬৭

শ্রীচৈতন্য—৩১, ৮৮, ৮৯—৯২, ১০০,
১৪৯, ১৫৮—১৬০, ১৬১—১৮১

শ্রীদাম—১১৬—১১৯, ১৫৫

শ্রীবাস—১৬৩, ১৭৮

শ্রীমদ্ভাগবত—১১৩

শ্রীরামকৃষ্ণ—২২, ৩০, ৩৪, ৩৮, ৬৫,
১০২, ১৬৮

শ্রীরামচন্দ্র—১৭৫

সখ্য—১১৩, ১৫৪, ১৫৫

সত্যভামা—১৭৮

সনাতন—১৬৪, ১৭২, ১৭৪, ১৭৫

সার্কভৌম—১৭২, ১৭৩, ১৭৫, ১৭৮

সাহিত্যপরিষদ সং—৬, ১১, ৩৯

সিংহারি মঠ—১৭৬

সুকুমার সেন (ডঃ)—১৩৮, ১৪০

সুদাম—১১৬, ১১৮, ১১৯

সুবন্ধু—১৯

সুবল—১৫৪

স্বরধুনী—১৮, ৭৮, ৮১, ৯০, ১০৩

স্বর্ধ্যপূজার ছলে মিলন—১৪১

স্বয়ং দোহ্য—১৪১

স্বরূপ দামোদর—১৬৯, ১৭৩, ১৭৮

হরগৌরী—৭

হারথণ্ড—৪৮, ৫৪, ৫৫

হরিদাস—১৬২